





圖書在版編目(CIP)數據

儒藏. 精華編. 二一三/北京大學《儒藏》編纂中心編. 一北京:北京大學出版社, 2009.6

ISBN 978-7-301-11931-0

I. 儒… Ⅱ. 北… Ⅲ. 儒家 Ⅳ. B222

中國版本圖書館 CIP 數據核字(2009)第 081557 號

書 名:儒藏(精華編二一三)

著作責任者:北京大學《儒藏》編纂中心 編

責任編輯:王應

標 準 書 號: ISBN 978-7-301-11931-0/B • 0617

出版發行:北京大學出版社

地 址:北京市海淀區成府路 205 號 100871

組 址: http://www.pup.cn

電子郵箱: dianjiwenhua@163.com

電 話:郵購部 62752015 發行部 62750672 編輯部 62765691 出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 35.5 印張 348 千字 2009 年 6 月第 1 版 2009 年 6 月第 1 次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

教育部哲學社會科學研究重大課題攻關項目

北京 大學,「九八五工程」,重點項目國家、社會、科學、基金、重大、項目、「十一五」國家重點圖書出版規劃項目,重大工程出版規劃

《儒藏》精華編第二一三册

首席總編纂 季美林

項目首席專家 湯一介

湯一介 龐

總

編

本

册

主

編

孫欽善

樸

孫欽善

安平秋

(按年齡排序)

儒藏》精華編凡例

則的典籍的叢編。 爲儒家經典和反映儒家思想、體現儒家經世做人原 一、中國傳統文化以儒家思想爲中心。《儒藏 一、《儒藏》精華編爲《儒藏》的一部分,選收《儒 收書時限自先秦至清代結束。

藏 中的精要書籍

互見。 漢文寫作的儒學著作,編爲海外文獻部類。 寫者一律收其釋文文本。 已收入入選的個人叢書或全集者,僅存目録,並 分類法分類,大類、小類基本參照《中國叢書綜録》和 土文獻。傳世文獻按《四庫全書總目》經史子集四 (中國古籍善本書目》,於個別處略作調整。 三、《儒藏》精華編所收書籍,包括傳世文獻和 出土文獻單列爲一個部類,原件以古文字書 韓國、日本、越南儒學者用 凡單書 注明 部 出

> 編,不改編,保持原書的完整性和獨立性 四、所收書籍的篇目卷次,一 仍底本原 貌,不選

勘價值的版本爲校本。 確定内容完足、精確率高的版本爲底本,精選有校 五、對人選書籍進行簡要校勘。 出校堅持少而精,以校正誤 以對校爲主,

例,進行規範化標點。 爲主,酌校異同。校記力求規範、精煉。 六、根據現行標點符號用法,結合古籍標點通 專名號除書名號用角號(《》)

落。 外,其他一律省略 正文原已分段者,不作改動。千字以内的短文 七、對較長的篇章,根據文字内容,適當劃

分段

般不分段。

出現順序前詳後略 及其他有關情況。 及整理時所確定的底本、校本(舉全稱後括注簡稱) 介紹作者生平、該書成書背景、主要内容及影響,以 八、各書卷端由整理者撰寫《校點說明》,簡要 重複 出現的作者,其生平事蹟按

九、本書用繁體漢字豎排,小注一 律排爲單行。

凡 例 集

部

《儒藏》精華編第二一三册

顥 程

二程全書[北宋]程

頤

691

附 録 總 目

答晁

以道

書闕文。

謝

傅

耆伯壽手謁

與横

渠簡闕文。

第

先生遺文 酌貪泉詩闕文。 放蝎頌闕文。

書 縣 廳壁

易序見《易傳》。 易上下篇義見《易傳》。

禮序

春秋傳序見《春秋説

書銘 締説

謝 與方元案手帖 執政書

傳文續記

寄范淳夫書闕文。

答謝良佐書闕文。

凡十一條

右程子遺文遺事一卷,善心所

未盡善,而朱子改本惜不可見也。 蒐輯,可繕寫。始慮世傳胡氏本猶

貞白虞叔世聯葭莩,尺牘往還,商

終不可考,則固未敢自信,而 然如《定性書》、富、謝二書所删字, 略考訂,推本朱子之意,以復於舊。 亦未

能自慊也。 日, 以書來,蓋從今

内翰吴先生得家藏别本,乃與臆見 合,而凡删字皆在,且 又益以 數

脗

六六七

篇焉。遂與一二同志三復校正,用 歸焉。遂與一二同志三復校正,用 歸焉。遂與一二同志三復校正,用 以母之下,其餘脱誤錯簡,文字同 異不復具列,且爲竊考程氏世系, 其然之下,其餘脱誤錯簡,文字同 異不復具列,且爲竊考程氏世系, 有《經説》八卷,尚當嗣刻,以傳永 大云。至治三年秋九月丙午,臨川 後學譚善心謹書。

> 後 五 首

692

第二

朱子辨論胡本錯誤書南軒語附

與劉共父一首

與張欽父一首

又同上。

書明道先生遺文後

又别紙。

又並同上。

附 録

河南程氏遺文

易

序見《性理群書》,已載《易傳》。

易上下篇義已載《易傳》。

放 蝎 頌見游氏本《拾遺》。

殺之則傷仁,放之則害義。

酌 貪泉詩見劉立之《叙述》。

中心如自固,外物豈能遷?

縣 廳 壁見《龜山語録》。

右明道先生文

視民 如傷。

序見《性禮群書》。

禮

焉。彼非素有於教與邀譽於人而然也,蓋其 敢受",三尺童子拱而趨市,暴夫悍卒莫敢狎 飾情也。 經禮三百,威儀三千,皆出於性,非僞貌 鄙夫野人卒然加敬,逡巡遜却 而 不

禮固立矣,類聚群分,禮固行矣。

所有於性,物感而出者如此。故天尊地卑,

而彰。聖人循此,制爲冠、婚、喪、祭、朝、聘、 地與吾同體,萬物與吾同氣,尊卑分類,不設 人者,位乎天地之間,立乎萬物之上,天

六六九

六七〇

用, 朋 燕 勉之,賢 與其家與其國與其天下, 友之義。 饗 其形 之禮 人行之, 而 E 其形 0 者, 以 行 聖 丽 極 君 人 於 下者,具於飲食器 臣、 由 無 之。 聲無臭之微 父子、 故 兄 所 弟、 以 行 夫 服 其 衆 婦 身 X 之

亂,禮 放 周 吾從周。」 季 爲備。 ,質文不 有禮本 存則 ·之問 逮其 是 同 存 以 ,禮亡則 罔 弊也,忠義之薄,情文之繁, 夫子嘗曰:「郁 而孔子欲先進之從,蓋所 不由是。 Ļ 然而 上自古始 世 郁 有 乎 下 損 文哉 益 逮 以 林 惟 五 1

矯

IE

反

弊

也

然豈

禮之過哉?

爲禮

者之

過

也

得聖人之旨。 珠 文繁,其義博。 珍器帛隨其 禮記 秦氏 |焚滅 四十九篇,雜出諸家傳記 所取, 考其文義,時 典籍,三代禮文大壞。 學者 觀之,如 如 游 阿房之宫,千 有 適 牴 大通 牾。 , 之衢, 然 漢 門 而 能 興 萬 其 悉 購

> 際, 矣。 之要; 間 説 户 能 達於道者,然後能 得 也 隨 此 而《鄉黨》之記孔子,多在 於禮。 別粗在 昔者顏子之所從事,不出 其 學者所當致疑以 始於童幼之習,而終 所 人, 應對進 然則禮之所以 博 而 退之間 知 約 其言 之, 思,致思以 亦 於聖 而 爲禮 可 能 於 乎視 精 以 知 動 人之歸 在 弗 其 其 達 容周 聽 道 畔 (言,然 也。 則 言 德 旋 動 不 性 蓋 遠 後 命 其 惟

禮治則治

禮

亂

則

褅 説見《朱子

之, 文王配。 以始祖 萬物 締其 所出之祖無 祖之所自出,始受姓者也, 本 配 乎天,人本乎祖,故以 也。 文、武必以 廟 ,於太祖之廟 稷 配 後 所 其 出 禘 世 之祖 之而 祖 必

涂刻本作「肆」。 涂 小刻本 作「射」。

之父 子。 惡如 亦以厲 堂 后稷,配上帝則必以父。若宣王祭上帝,則 須配以武王。配天之祖則不易,雖百世惟 衰」,是周公之法壞也。若是成王祭上帝, 樂者言之。猶言「魯之郊禘非禮,周公其 者,以周之禮樂出於周公制作,故以 天,宗祀文王於明 帝,須以父也。曰「昔者周公郊祀后 以 則謂之上帝。此武王祀文王,推父以 配 有虞氏宗堯」,非 一,以配· 去也。 后稷。 天 苟非其子,雖授以 也。 幽、厲,不害其爲所生 也。 Ŧ 上帝,帝即天也。聚天之神而言之, 嚴父莫大於配天,宗祀文王於明 如 文、武之功起於后稷、故 周之后稷生於姜嫄,姜嫄 此 雖聖 則是堯養舜以爲養男也 如 也。如此則須舜是堯之 堂以配上帝」,不 堯、舜,不可以爲父, 天下之重,不可謂 也。 故《祭法》言 配 以 其 稷 日 天 H 个作禮 者 武 配上 一更推 以 雖 禪 舜 以 則 Ŧ. 須 配

讓之事蔑然矣。

物豈 可得而 以是言之,則英雄以得天下自己力爲之,並 桃可也。 嘗以僖祧之矣,介甫議以爲不當祧,順以 以禰配之。太祖 帝,并配者六位。自介甫議,惟祭昊天上帝 介甫此議 本朝以太祖祀於圓丘,●以禰配於明堂,自 帝者生物之祖,故推以爲配,而祭於明堂也。 之始,祭用圓丘,器用陶匏藁秸,服 而祭宗祀九月,萬物之成,父者我之所 ·得與 有 以 無 祖 推 始祖配天,須在冬至,一陽始 也。或難以僖 德。 本而生者? 何者? 方正。先此祭五 或謂: 而上,有僖、順、翼、宣。先 本朝 靈芝無 推僖祖爲始,已上不 今日天下基本,蓋出 祖無 帝,又帝昊天上 、根,醴 功業,亦當祧。 泉 用 生,萬物 大裘。 無 自

涂刻本作「配」。

不

僖祖 於此 廟 後 爲 得禮。 0 安 得 介甫所見,終是高 爲 無 功業? 故 朝 於世俗 廷 復 文

書 銘見《微言》。

含其英,茹其實,精於思,貫於一。

與方元菜手帖見《近思録》。

卓爾 耳。 加 言辭,解其訓詁,而不及道,乃無用之糟粕 還珠之弊,人人皆是。 由於經乎? 今之治經者亦衆矣,然而買櫝 耳,得其門,無遠之不可到也。 而 有立於前,然後不知手之舞,足之蹈,不 覬足下由經以求道,勉之又勉,異日見 聖人之道,坦如大路,學者病不得其門 不能自止矣。按"朱子跋此帖有二,其一有 經所 以載道也,誦 求入其門,不 其

不可見,姑記朱説云。❸「應舉耕田」之語,又賞得先生年二十五時與方氏帖,借3

謝執政書見張繹《師説》。

之以彀率之法。 慮其害公之多中也。 舍羿不恤也。 不若處羿於無事之地,則羿得盡其言,而用 之,則戾其故習而失多中之功。一作「巧」。 人皆以爲善射矣。 公知射乎? 頣 才非 不從,羿且怒而去矣, 有人執弓於此,發 一日,使羿立於其傍,道 羿也,然聞羿之道矣, 而 多 故

謝傅耆伯壽手謁見《朱子文集》。

頤謹詣行館拜謝長官秘書。十月日,河

) 「說」,涂刻本作「語」。) 「後」,涂刻本無此字。

六七二

答晁 以道書見《吕氏雜志》。

所不論,惟未嘗一字及數耳。 頤 與堯夫同里巷居三十年餘,世間事無

與 横 渠 簡見《朱子語録》。

作「説《先天之圖》甚有理,可試往之聽他説看」。● 堯夫説《易》好,今夜試來聽他説 看。

答謝良佐書見《微言》。 ○又楊遵道録但是問答,曾不

之廬。

云有書。

孟子既知天,安用尤臧氏? 族子至愚,無足責,故人素厚,不敢疑。

寄范淳夫書同上。

丞相久留,左右所助。 意正道者,實

在原明耳。

右伊川先生文

傳 辨惑》所載,以補《遺書》、《外書》之未備。 聞 記此記係取朱子《名臣言行録》 》及邵氏《易學 若夫他書,豈

無附見,然未敢必信,故不復取云。

日,二程先生侍太中公,訪康節 康節攜酒,飲月陂上,歡甚,語 於天津 平生

其

學術出處之大致。 明日,明道悵然謂門生周

純明一作「甫」。 曰:「昨從堯夫先生游,聽其

0 「之」,涂刻本無此字。

問」,原作「簡」,據涂刻本改。

附

録

六七三

六七四

道 明 論 也。」是日 議 《聞見録》。 振 所言何如?」明 古之豪 ,康節有 傑 也 詩 惜 明道和之,今各見集 道 其 曰:「内 無 所 用 聖外 於 世 王之 純

右二先生語

中

令門 所 日 成 命 及文定 同 君之文,須沐 卷爲贄,與謁 賦 長 賦。 ,仲塗自出題,令文定與其諸子及門下客 擬 將 賦 子東之娶其女,不忘仲塗之言也。 下 李文定公爲 識 爲 試 題 客 賦成,驚曰:「君必魁天下,爲宰 宰 與 京 者知其决爲宰相。 不 傳。 諸 相 師 俱 浴 子拜 ,仲塗門下客有柳某者,文定 ,攜明逸書見柳開 人。 乃敢 學子 如 王 之, 久之,仲塗出,曰:「 見。」因 沂公曾,初作《有 時,從 日 ... 「異 蓋所 种 留 放 之 日 仲 養所學, 門下 明 無 塗,以 逸 忘 文定 相。 物 也。 先 混 讀 文 生

> 爲言 云。 《聞 詞 見録 者 可 以 觀 矣。 程 明 道 先 生 爲 伯 温

言,光必來,不能 미 日 馬光,卿度光來 方下詔, : 無過。」公果辭召 「未論用其言, 神宗欲用 謂監 察 温 否? 御 公, 史 命。 用 如光者常 召 裹 其 顥對 知許州 同上。 行 言 程 日 在 光 顥 : 陛 令過闕 左右 必不來。」 日 下 能 朕 上 (主自 用 召 殿 帝 其 司

院,康節 解之。」云云。 賈公昌衡 君實與 熙寧十年春,吕申公起知河陽, 晦 以 率温 叔 疾 席 上同。 不 公、程伯 赴。 上各辨 0 明 論 日 淳 ,伯淳語 出 餞 處 於 不已,顥 福 先 康 寺 河 節 上 以 南 曰 詩 東 尹

怒不貳過,惟伯淳能之。」予問公曰:「伯 陳左 司瓘 日 范公淳夫 嘗 論 顔 子 淳 不 遷 誰

0 上 同」,涂刻本互乙。

事。

諸

所

愈。

和易之 或 問 伊 氣,望之可知也。」《聞見録》。 ĬIJ, 量可學否? 日。一可。 學進 醇

> 否 則 ?」曰:「魏公是間 識 進, 識 進 則 量 進。」 氣。」胡氏《傳家録 日 . 如 魏 公 可

明

哂

及 伊 君爲之極 卓安在地上,不知天 飲 ĬΙ 酒,因以論道。 先生之有條理也。」《易學辨惑》。 | 歎曰:「平生唯見周茂叔論至此,然不 異時,伊川同朱公掞訪先君,先君留之 論天地萬物之理,以及六合之外。 伊川 地 指 是安 面 在甚 前 食 卓曰:「此 處?」●先

伊 吾儕 花。」先君 遊 天門街]11 曰:「如是則願從先生遊。」同上。 看 伊川又同 花,異於常人,自可以觀造化之妙。」 曰:「庸 看 花。 張子堅來,方春時,先君率 何傷 伊川 乎? 辭 曰:「平生未嘗 物物皆有至理。 看 同

曹

無 以 致 先 君 力, 病且 願先生自主張。」 先君曰:「平生 革,伊 川 曰:「先 生至此 ,他人

0 是」,涂刻本無此字。

録

附

學道 聲氣已微,舉張 問難不已。先君戲之曰:「正叔可謂 徑窄,則自無著身處,况能使人行也?」同上。 謂也?」先君曰:「面前路徑,須常令寬。路 與先生永訣矣,更有 頭生,必是生薑樹頭死也。」伊川曰:「從此 ,固知此矣,然亦 右伊川先生語 兩手以示之。 可以見告者乎?」先 無 可主張。」 伊川曰:「 伊 生薑 111 猶 何 君 樹 相

伊川遺文續記終

間

心

辨論胡本錯誤書❷南軒 語附

明 此 間 怪 則 耳。 博識 愚 承 寄 意 近 不 略 ,欽夫之造詣精深, 不 聲 敢 到 能 存 議。 城中,歸方數 無 問 疑。 所 感 感。 不 伯逢 可 解 但 主 日。 者 所 圃 張 以以 論二先生 不曉此,此 家 見平父,示近 學 老兄 固 之聰 應 如 可

定,蓋 間 家。 亦 正。 本,復加補 所 無 **、嫌間** 若此 用 文定當時 今此乃是二先生集,但彼 不能 二本 書是文定所著,即 綴,乃是文定所欲聞。 保其 ·, 固 不 知 亦只是據所傳録 不 無 二兄何苦尚 能 一字之訛 盡善,亦 須 爾 有 也。 中 依 依文定 灼 之本。 本偶 違 文定復 今 然却是 也 别 出 ? 得 文定 本 雖 生, 此 此 善 文 爲

> 《辭 矣。 序》改一 謂 也。 删 性書》及《明道叙述》、《上富公與謝 横 數處,有 之類,皆非本文,必是文定删 文自不害義 却 横渠實父表弟, 却數十字,及《辭官表》 本 表》是也。 看 誤 惟《定性書》首尾 有曲 得 「沿」爲「泝」,《祭文》改 箇 者 無甚害者,但 義 胡文定,後不復信道 當當 爲 理 口 理 時 通 欲 互 故也、《叙述》及《富謝 處, 更 爲 聞道 不 而 回 便 曾 雖 反 亦可惜改却 互. 當從之。 寫 雖有先後,然不應以 非 失 9. 便 去, 倒却 切要之辭,然 事 實, 是 改。 但 「姪」爲 理 次 私 贵 只 邪 害 本文、蓋 熹 序 意 帥 ? 是 可 義 《易傳 害 看 平. 猶 書》中, 肚 書》是 如《定 理 得 明 義 裹 氣 子 道 此 先 理 本 虚

書序」,陳刻本、涂刻本無此二字。 朱子」,陳 刻 本、 涂 刻 本作「晦菴」。

0

附

録

六七七

一涂刻 本作 曲

七八

向上 象。 者書,雖 删 伊 聞 蓄,况明道乎? 今如此删去,不過是減 與學者語 全本,亦不可知。 · 箇 閑 ĬII 之 道 書,氣 事,更不暇照管此等處。 則直云「不是」。 恐文定亦是偶然一時意思,欲直截 之 字, 故 有不 有不合處, 象 傲 而 领類乎? 其 合,亦甚宛轉,不 壞 父兄 却 今豈 明 如 明道 箇 不 可曲 此 道 從 類 則 氣象 乎 容 意苟從邪 \wedge 日 ? 語 和 或是當 如 樂 至如 録 更有 且文定 》説 此,與今所 底 時未見 大 此 ? 商 答學 體 得 無 發 量 先 數 明 氣 含 牛

及 此 先 從善,公平正大之心。 院之文。比訪 人先著 誤,况其他 生歎息曰 向見李先生本,出 一箇私 又「猶子」二字,前論未 此 又可 意横 得游集,乃知其誤,以白先生。 書所 盡信邪?」只 在肚 本亦不是難 自來,可謂 龜 裹,便見此等事 Щ 家,猶雜 盡 此 端端 便是 事 的 以 禮 但 猶 虚 游 爲 記 有 察

> 者。 古人固不謂兄弟之子爲姪,然亦無云猶 字本亦不是稱呼,只是記禮者之辭。 改正文定所改之未安處 見,改易二程本文,今人乃不 害於義理 子 遂謂嫂爲「無 二先生非 K 嫂叔之無 喪 : 但云兄之子,弟之子,孫 服猶己之子,非 喪 服 不知此,然猶從俗稱姪 也。 兄 服,姑姊妹之薄也」,今豈 弟之子 服」,而名姑姊妹以 此等處,文定 猶 所 子 施 一,此何 於平 也 一言 得據 既 理 時 亦 得以 邪 也 人 者,蓋 日 相 「薄」乎 爲 兄 傳 一時 叮 如 况 兄 孫 别 亦 沿 下 耳 己 子 無 此 文

伊 無。 夫元寄胡家本校,亦脱 川《上仁 乃此間 又明道《論王 廟 録去, 書 ¥, 此 霸 有 間 所 箚 兩 本 脱 子》等數 句 無 誤, **後** 此 非文定之失 來 非 (篇, 胡 乃 以 是 他 人本 用 本 欽

⁰ 荷」,涂刻本作「徇」。

細 此 殊 將有望於兩兄,不意只此一小事,便只如此, 外 幾 家 似 改 失所 乎 私 何 刻 此 文定本 ,亦不專爲二先生之文也 之類 意 ? 得文字多錯,校得不精,便一切逆拒之, 而 根株, 望。 不爲訑訑之聲音顏色,拒人於千里之 夫樂聞過,勇遷善,有大於此者,猶 ,恐是全不曾參照,只見人來說自 乃 然則區區 是 消磨不去,隨事滋長,爲 印 本 自 所以 不 ·曾依 劇 論不置者,正恐 得文定本 害不 耳

居者 之上 以 其爲邢恕之子,遂削此 以 云:「子居,和叔之子。」胡氏編《語錄》時 誤 書問欽夫。答云:「嘗問之邢氏、果無 。 以 ,加一「邢」字。 事明之。 如必以胡氏之書一字不可改易 乃欲 此例之,則胡 不 集中《與呂與叔論中 問是非,一 頃疑吕氏亦 注 氏 之書,亦豈能 ,直於正文「子 切從之乎? 有 和 則 書》 叔 况 又請 **对** 居 。, 意 無 注 此 子

> 之,魏元履至爲扼 謂大者,終不見知於當世也。此等處,非 又守其尤小節處,以爲不可改,是文定有 祠於鄉郡説,應求、邦彦二公皆指其小節 何 乃 先生之文之不幸,亦文定之不幸耳。 必 文字間 一一遵之而不敢改乎? . 舛誤,與 其本原節 腕。今二兄欲尊師之,而 目 近以文定當立 處 初 無 所 妨, 特 所 疑

過。 説 成議 波 後學,不當守己殘而 微 下後世必當依此,即與王介甫主張三經、《字 是之陋也。 守却胡家錯本文字,以爲至當,可謂直截 蕩 似有此,亦是克未盡底己私 》何異? 於末 横渠所謂「其不善者共改之」,正所望於 論 今既用官錢刊一部書,却全不睹是,只 ,恐文定之心却須該 流也。 若説文定决然主張此書,以 作是説者,却是謗文定矣。 程子嘗言:「人之爲學,其 妬道真,使其 遍 所 流 通,决 遺 謂賢者之 風 設使 爲天 餘 不 苯 如

偏 説 異 陋 不 無 無 失 外,蓋不趐飢渴之於飲食,乃不知主意 昌熾 _ 枯。 ? ,●此尤是不情悠悠之説,與月 然 近 復 在 此? 此 也。 以 於 非 若得 舉 來 自 得 小 主 天下之善。 無 胡子《知言》亦云: 世 聖賢稽衆舍己,兼聽並 生 張 從容賓客之後,終日正言,又不 近 無 所 太 於陋邪? 可 敢 過 告語者。 聞 0 也。 今觀 横 渠 每恨 如 猶 二兄主 望二兄於千里之 云當 戒 學欲 此 以 道衰 觀之意 張 自 攘一 於 約約 此 處 他 微 不 事 太 雞 如 處 似 得 重 此 邪 何 别 欲 攘 曉

千 IE 却 此,幸爲呈似。 極費心力,又且 一,故 萬盡 不敢憚改也。 欽夫尊兄,不及别狀,所欲言者,不過 此 爲 間 收拾 更 無 便 所言或不中理,却望指教,熹 别 勞煩,衆人意 向所! 中 本,今既 寄來,當十襲藏之,❷以 録去數紙,合改處當 不 以 用 切 爲必依此改 勿毁棄 如 時

> 也。 加察而 俟 不 須寄 後 天寒手凍,作字不成,不能 世 來, 恕其狂妄可也。 耳。 熹不敢 向 求 數 以 + 此 本 朱子與劉共夫。 等錯 欲 遍 本文字 傾竭 遺 朋 懷抱 友, 誤 朋 今 亦 友

六八〇

所傳 復出,不能改也。若文字之訛,安知 生舊文之善。 至 老兄以爲嘗經文定之手,更不可 昔所未遑,今不得復作 所 所 夷狄、討亂 特改數處,竊以 謂。 亦有 昨見共父家問,以爲二先生集 未 夫文定固 盡善者,而未得善本以 臣,誅賊子之大倫大法,雖聖賢 若如老兄所 有不可改 義 理 ,前所未安,後 求之,恐 論 者, 則 是伊 改,愚 如 亦 正 中誤 尊君父, 非 \prod 不 之 不得 當 意未 若 歟 所 字, 謂 先 時 ?

知

所以

不合者復幾何耳。

「十」,涂刻本作「什」。

所處矣。嫌,而專以義理求之,則於取舍從違之間,知嫌,而專以義理求之,則於取舍從違之間,知言之,復此具禀,更望虚心平氣,去彼我之復正」者,又將起於今日矣。 已作共父書詳

諸 若 運 將來任事,必有不滿人意處,而其 平日深於吾兄望之。 以 公吾心以玩其氣象,自見有當矯革處,不可 又將傳於後學,非適一時之害也。 火濟火,以水濟水,而 用 先達,聞道固 每事自主張 固 道術衰微,俗學淺陋極矣。 有廣狭,然亦不能不各有偏倚處, 如此,則必無 有淺深,涵養固有 忽聞此論,大以爲憂。 益 其 好間 疾 也 流風 察言之理, 振起之任, 厚薄,擴充 只如近世 餘弊, 但

何? 哲 窺 1,故敢 彷彿。 熹聞道雖晚,賴老兄提掖之賜,今幸 其 詳 控 然於此不能無疑,不敢自鄙 則 瀝 盡盡 又具於共父書中,幸取 所言。 不審尊意 外於明 而 以 并 爲 略 觀 如

之,無怪其詞之太直也。與張欽夫

類耳。 天時未至,而妄以私意先之,若耕獲菑畬之 髮,所謂啐啄同時也。 先後之意,思却 天後天,乃是左右參贊之意,如《左傳》云實 先天,與《文言》之先天不同。《文言》之云先 於文爲協耳。 初不異,但上言天,下言人,上言時,下言政, 「天」作「時」。欽夫云:「作「天」字大害事。」 愚謂 不先天 兩先天,文同而意不同。 而開 在 人,各因 中間,正合天運,不 此序所云先天,却是 時 丽 先天先時却 立 政。 差毫 此 胡 本

亦無害於理否? 並同上。舜之治天下,豈無所用其心哉?」言用心,莫舜之治天下,豈無所用其心哉?」言用心,莫。」之言,请深思之。」愚謂孟子云:「堯、「窺聖人之用心。」胡本無「心」字。欽夫云:

著。 吉凶 此 \pm 義 以 敗,《詩》之《雅》、《頌》,極陳福禄壽考之盛 祖 貪欲之心,賢者則有嫌避之意,所趣雖殊,然 人自以私心計之,便以 理之效,感應之常。 全篇反復,無非義理,卒章之言,止是直 敢復議改先生之文也。 爲 而 從父之名 孟子最不言利,然對梁王亦曰: ,出大公至正之言,原始要終,莫非 動 稱 遺後其君親者。」答宋牼 禍 心之私 ,未之有也。」此 稱 福 其君而告戒之者,尤不 ,似稍穩當。 姪固未安,稱猶子亦不典。 《書》四十八篇, 則 ,則亦當 也。 有 慮 豈 如易六十四卦,無 若夫聖賢以大公至 爲利。 偶及此 從子從孫之目矣。 《與富公及謝帥書》, 以 利 害動 無 亦曰:「然而 爲少。 故不肖者則 ,因以求教, 非言災祥 之哉? 按禮有 「未有 《卷阿》尤 非 言義 至 非 Œ 但 成 言 以 從 起 不

知即 用 言聖人之用心者多矣。 謂 序 説,於此亦可見矣。 意 可謂聖人全不用心,又不可謂 有精粗邪正之不同,故有聖賢下愚之别。 心,自聖人至於下愚一 用豈易言哉? 協,何爲而 之已詳,莫無害於理否? 理 謂「得其意」者是也。 「心」字語 然也。 専用 用心,非所以言聖人,則《孟子》、《易傳》 又 似熹所據之本 心 其 何 此 即 嫌 用 其 説,則 意方足,尤見親 用, 也 疑 不可從也? 精微曲折 妙,異 之 非 故得其意,然後能法其用 《春秋序》 誠 可 有 -爲是。 害理矣。 避 是 乎常 哉 ,蓋有不苟然者矣。 心 不能窺其用 也。 蓋人之用處,無不是 ? 而 人之用 切主宰處,下 先 兩 「聖人之用」下 理既無害,文意 若 又 向 但 天二字, 處 所見教同 使 有 所 聖人 觀 先 耳 用 以用之者, 心, 其 生全 之者 無 然 卷 語 行異情之 則 一篇 心 又須 文 中 脉 也。 所 著 미 不 其 又 文

妄發之過 此 復求之,又似未能 辭 喻 見高明擇善 官表》兩 伏 蒙 也。 垂 處 諭 ,已蒙收 然所謂不必改,不當改者,反 而從,初 向 不惑於心,輒復條陳,以丐 論 程 録,其他 無 集 適莫,而 之誤,《定 亦多見納用。 小人向者 性 書》、

集諸 烹所 敢 先 外 語 不 同 脉 能 忽易之心,則當 生當日本文無疑。 ,未嘗敢妄以意更定一點 無 所 本 論 夫所謂不必改者,豈以爲文句之間 趨之便。 而 出於己意,則用此説可也。 所繫於義理之得失, 盡 證之,按其舊文,然後刊 同, 亦 除 是 所謂 循其舊,不 類 今若有尊 會數説 一疑 畫也。此其合於 當作某」一 而 容復 敬 面 不 重 求 Œ 今此 必 有 IE 其 改 例之 雖 文 小 毫 而 乃 邪 髪 勢 或 是 小 不 ?

> 備邪? 邪 ? 此 他 舍所宜 害,反求諸 者,須以 字 苟 嫌 卷 改之,不過印本字數稀密不匀,不爲觀美,而 通 尊」,今便疆説 邪? 「皆」字則不成文之類是也。 義 且 者 避之私,故不能 處,已悉 無所害。 迁 遷 似 且如吾輩秉筆書 用之字,而 晦 就 人情不大相 其肯故 亦 意 者 於 屬 心,則隱微之間,得無未 不 用 然則胡爲而不改也? ,必承 爲 其 無可 讀 朱 「尊其 間 爲 然 卷 取 刓 誤 更用他字,使 盡 後 乃 其 所聞」之類 此心。 ,方執筆時,不能 遠,有以知其 闕之句,使人 疆 備。 爲 上,復以上呈。 事,唯 説 盡 此等,不惟 如 善。 而 「嘗食絮羹、叱 是 後 今人又來 務 也。 通 惟 明白,其 人 其 心不然矣。 屬 疆 免於 語 卷子内 於文字有 如 不 然所 句 讀 説 不小有 遵」誤 不督書 爾 止之」, 背 自 刓 而 而 後 後 故 欺 闕 故 如

指

所 謂 不當改者, 豈 謂 ^ 富 謝 《春 秋 不

容再閲矣,更乞詳之可也

跗

録

其 有 亦不 生手筆之本文,雖欲思之以達於先生之意 也。 楊迪、及門二書,見集。 所改盡 耳。 欲專輒 先生之意,尚有不可不思者,而改者未之思 言有所不 盡善乎? 乃 改之尤者邪? 序》之屬 未 輕肆妄作之弊; 所以 筆 盡者,而絶人之思。 可得,此其爲害,豈不甚哉? 蓋非 ,恣行塗改,恐此 若聖賢成書,稍有不愜己意處,便率情 失其恭敬退 一善,猶啓 改 爲 特己不之思,又使後人不復得見先 合,則置不復思,所以終不能 尤當 而 易 伊 書 前賢文字,稍 ĴΠ 改也。 中 以熹觀之,所謂尤不當改者 、先生嘗語學者,病其於己之 [末流輕肆自大之弊,况 所喻 今熹觀: 讓之心,以言乎人,則啓 以言乎先生之意 氣象,亦自不佳 大抵熹之愚意,止是 沿 泝 姑無問其所改之得 此等改字處,竊恐 存謙 猶 子二説,又不 退 敬 夫以言乎 ,則恐 讓 蓋雖 同 之心 未 也。 猶 必 當 不

> 此宜 得 失, 再三冒瀆,貢其所不樂聞者,豈好己之説勝 日 面 羊,謹闕文,述而不作,信 已 紛 作,教人多聞闕疑之心,爲如何 丽 亦無 而不已者哉? 更專轍之意象,又爲如何? 老兄試思: 前聖入太 以 是三 待乎熹之言而决。 者論之,其不 而好古,深戒 廟,每 可 已 且知熹之所以 曉 事問,存 ? 審此,則 然矣 侕 視 不 於 今 知 餼

不用此 却 必欲改爲泝字,雖 之屬訓之,於文 不爲 改沿 害其指意,則只 垂世已久,此字又無大害義理,若不 殊迫急,似有 無 爲 熹請復論沿泝猶子之説,以 字之意,或出 力。 泝之説,熹亦竊聞之矣。 然所以不可改者: 蓋先 八爲 疆 似 探 沿字, 不 無 於此。 力取之弊。 無 所 一至之得,然其 害,而 而以因字尋字 不然,夫豈 意 疑 實前 亦頗寬舒 如 先 此曉 以 生之言 生 議。 不 循字 所 氣 文 象 知 以 辭 夫

皆爲 安知其果無未盡之意邪? 語,塗改舊文,自爲失耳 孟子之於《武成》,但後人崇信太過,便憑 當時之意,亦但欲使人知有此意,未 文,以從己意之便也。 流漂杵」之文,因 改乎? 改易處,但云某當作某,後世猶或非之,況遽 著,使人知之可矣,若遽改之以 亦莫之思也。 以祛後人之惑,後之疑者,又不能闕 云:「鉛與沿同,循也。」情乎當時莫或疑而扣之, 「吾於《武成》,取二三策而已。」終不刊去此 泝 是以先生之意,終已不明, 之别 順 流 且非 ጢ 而 下之字也。《荀子》云:「反鉛察之。」注 有 :特漢儒 大抵古書有未安處,隨事 此 謬哉? 而不改,孟子繼之,亦曰: 而 然熹又竊料改 己。 蓋 孔子删《書》,「血 漢儒釋經,有 古書沿字,亦 而舉世之人 没其 必不 此 圃 實, 字 遽 此 岩 欲 則 論 改 不 者

愚竊以爲此字决當從舊,尤所當改。若

可也。 默 無 「诉」。」不則云胡本「沿」作「诉」,不則但云「或 文只作「沿」字,而 老兄必欲存之,以見「泝」字之有力 專轍之咎,而先生之微音餘 而識之者,豈不兩全其道而 如此兩存,使讀者知用力之方,改者 注其下云某人云:「品」當作 無所傷乎? 韻,後世尚 則 請 有 正

之,則亦有所自 庶幾之説,是以愚瞢未能卒曉。 稱之意,云稱猶子尚庶幾焉,亦未見其 傳以父子稱之,則是古人直謂之子,雖漢人 以《漢書》考之,二疏 反復考尋,終不言男子謂兄弟之子爲何也 弟之子爲姪,注引左氏姪其從姑以釋之,而 教但云姪止是相沿稱之,而未見其害義 猶子之稱,謂不當改, 來。 蓋《爾雅》云: 13 今世 亦 所 所未 謂 然以書 叔 喻 女子謂 侄 , 0 而 蓋 [傳 所 不 兄 考 以 來 口

❶ 「侄」,陳刻本、涂刻本作「姪」。

猶

父與 遺 當 所 姪 義 害於親 而 1稱之。 謂 文出於其家,而 云 理處,則須改之」。 己。 、夫所謂姑者,又皆吾父之同氣 猶 者,是必以 若且 親之義哉? 子云者,而 伊川嘗言「禮從宜,使從俗 從 俗,則 爲 無大害於義理故也。 胡本 其子序之以行於世,舉 伊 今若欲從古,則直 夫以其言如此,而 特然稱之,是必]1] 横渠二 先 也,亦 有 牛 大害 一稱子 故其 者 出 猶 於 無 皆 何 稱

之? 豈以爲親屬之定名哉? 則自我作古,别爲一家之俗,夫 俗歇後之語無異。 於上文,不可殊絕,明矣。 與己子同,故 作姪,注 其舊者。 之惑也。 也,豈可指爲親屬之定名乎? 嫂叔之無 似 不必强挽前達,使之同 云胡本作「猶子」則 若必欲改之,則請 故愚於此,亦 服 也,姑姊妹之薄也」之文同耳, 日 兄 若平居假借稱之,猶之可 弟之子 以 亦 猶 若單 爲尤所當改,以 可 猶 即 矣。 亦用 子 若必以爲是, 如 己 稱 也 之,即 也,其義 以以 前 亦 二,與 例,正 孰 起 能 與世 下文 後 從 世 止 文

屢 不 來 知是否。 督書,不暇及矣。 春秋 序》、《富 更欲 細 論 謝 以 書》,其 若猶 求可否,此人行速, 以 説 爲 略 疑,則 具卷中, 亦且

出

於《檀弓》之文,而彼文止爲喪服兄弟之子

意

本

無

害

理

而

미

遽

改之乎?

今

所

改

者

非

'', 面

改之爲是,亦當從其舊文,

而

附

以

新

家

庭

之所筆

削

無

疑

也。

若曰何故

他處不改?

蓋有

不可改者,如祭文則有對偶之類

是

也。

若

以

稱

姪

爲

⁰ 具」,原 作「其」,今據《四 一部載 刊》影明嘉靖本 《晦

勝

幸甚。

同上。

於一 類此。 未能 言意之實,又不揜 做 文意瑣細之間,不無濶略之處,用心太剛,故 老兄之意,豈異於此? 之私,但欲此集早成完書,不誤後學耳。 注其下云元本有某某若干字,庶幾讀者既 知 智專,所以於此等處不敢便承誨諭, 其僣易也。 窠 卒定。 窟,苟所見未明,實不敢妄爲主宰,農馬 时意見所安,必欲主張到底,所以紛 幸賜詳觀, 如熹則淺暗遲鈍, 即見區區。 後賢 删削 但恐見理太明,故於 之功 非有偏主 一生在文義 (,其 他 見當 而不自 必 亦 F 紛 計 勝 名 時

《書明道先生遺文後》。

所得也。❶ 求 本,便中幸白共父寄兩本來,容更參定箋注 教。所以欲兩本者,蓋 伏惟少賜寬假,使得盡愚。 儻蒙矜恕,不 欲留得 録其 本 過 作 而 將來改定新 底 留 以 聽焉,不 備後復有

> 之。 得之玉 先 生文集,後三年,新安朱 乾道 右明道先生遺文九篇,長沙學官 Ш 己 汪 \pm 應 辰,敬以 四 月 朔 授教 廣 漢張 「熹復以 授 何 杜 謹 藴 此 俾 寄栻 書。 既刻 嗣 南軒 云 刻

序

後

易以大字,與《文集》爲一體,刻之後 復,是書胡可 乙未之火,與他 三山學官。《遺書》、《外書》則 河南二程先生《文集》,憲使楊公已鋟板 緩? 書 俱 師 耕承乏此 燬 不 存。 來,亟 庾司舊有之, 諸 書 雖 圃 將 未 故 明 教 本 能

- 「得」,涂刻本作「稽考」。
- 目》稱後序有五首,實際祇有四首。此標題原無。爲避免混亂,據《附録總目》補。《附録總

之書 麻沙本後序。 於是乎 賴 吾 同 全。 志 相 **旹淳祐丙午古汴趙** 與 校 訂 視 舊 加 密 師 二先 耕書 生

秋 書》附刻焉。 歲之久,板已 襲之乃模鋟於春陵郡庫,又取長沙所刊《外 本,參校既精,大字亦便觀覽,然無《外 日 程 東川李襲之謹題。 氏遺書》,長沙本最善,而字頗 願]漫漶。 與同 志者共學。 教授王君 春陵本後序。 湜 淳祐 出 六年立 示 小,閱 書 五 羊

字 第 子手記,考亭朱夫子家藏,類訪旁搜,先後 集》出胡文定公家,頗 明道行述》、《上富 、《辭官表》之顛倒次第、《易傳序》之改沿 爲此,世 右 河 |所刊本,無不同者。獨二先生《文 南 程 氏 遺書》、《外書》俱出 公與 有 謝 改 帥 削,如《定性書》及 書》中删却 程 門弟 數 + 次

> 論矣。 習訛 是本刻之長沙,考亭定其 爲泝,《祭文》之改姪爲 《書解》止「舜 集所 舊,且註劉、張本異同於其下,其餘遺文,凡 郡虞槃叔常往復 共父劉帥 敢 傳》止《繫辭》上篇,《春秋傳》止 説》,其目見《近思録》,其書見時氏本,特《易 寖少,悉爲刻棗,而於《文集》復加 今所傳《文集》,大率渾本,●是固 無拂」,《 心臆决。 末 未 臨川譚善心元之蚤讀二書,慮其 録 (論語 流 書,及 惟《易 者,各 波蕩 解》止「吾從下」,恨多誤字,不 格于文祖」、《詩解》 與南 之爲 • 繋》取吕氏《精義》所 以 討 類 論,以復乎考亭所改之 軒 懼 附 張 猶 焉 子。 而 所當 子 卒亦莫之從 屢 至若 改 劉、 書 一魯桓 者數紙, ,凛然承 止 詳 不能 張二公以 伊 審 四四 九年, 川《 傳 無 方以 與 也。 經 與 本 餘 姓

❶ 「渾」,陳刻本,涂刻本作「渾」。

之也。 裝褫 之正 至治 觀此書者,如挹座春而立門雪,俱非苟然爲 春秋 刊 二年壬戌之秋七月既望,臨川後學鄒次 成 ,稽之往 ,固將以集程氏書文之全,明程、朱授受 傳》取 而 嗚呼! 帙,家學人誦,謹緝大意,書于左方。 他 書則俟求善本,讎校 尹氏《纂集》所 哲 元之之用心,亦可謂勤也已。 而 不悖,傳之來裔 補,以 續刻 舊 板 而 本 亡窮。 此其 審 校

子解》十四卷、《易説》十卷、《春秋説》一卷,一卷、《淮問對》一卷、《信聞紀》一卷、《詩説》兩卷、《論語説》十卷、《孟子解》十四卷、《伊川卷、《論語説》十卷、《孟子解》十四卷、《诗説》兩一卷、《漁樵問對》一卷、《書説》一卷、《詩説》兩一卷、《漁樵問對》一卷、《信聞紀》一卷、《诗説》兩一卷、《漁樵問對》一卷、《信聞紀》一卷、《詩説》兩一卷、《漁樵問對》一卷、《春秋説》一卷,

《横渠崇文集》十卷、《邵 然也。 之 者,疑即朱子所謂諸公各自爲 部,壹伯五十四卷。● 或消 卷,又爲《外書》十二卷,益多《雜説》數倍,而 聲,人争愛之,則此日 棄不少矣。清廟雅樂,姑以備數,而鄭、衛之 數十年前所刻,就令刻板具在 續,●蓋可考矣。 因其先人舊藏,益以類訪,爲《遺書》二十 卷、觀物篇》六卷、擊壤集》二十卷,凡 一者也。 説》固不傳。 爲迂濶,且笑之。 近年始有 而《遺 然今所傳本,皆家藏故 新 書》所録,不見 合晁氏 刊 少而彼日多者,亦其勢 所謂《程氏雜説》十 邵子書,聞 宜黄譚善心,同邑傅 子 所 皇 記, 極 書 ,意且漫漶廢 其目 一、散出 經 風 與 世》十 今所 加 朱 起者, 十九 並 書 傳 Ŧ 子 卷

謹

識

[「]伯」,涂刻本作「百」。

^{) 「}續」,涂刻本作「讀」。

問志之士云。蜀郡後學虞槃。 倦,其卓然之見,良有可取,故題其後,以勉之有成,而學者得以傳讀先儒之遺文而不之有成,而學者得以傳讀先儒之遺文而不太。槃托中表之好,乃得預聞其説,喜其事然文集》刻之,且將考訂《程氏經説》,以次鋟君友諒之門人也,奮然不顧,取《二程遺書》、

吉凶。 先天 儀 陽 萬 之生,負陰 極 性命之理、盡變化之道也。 極 萬物之情見。聖人之憂天下來世,其至矣 也。 ,是生兩儀」。 殊 其 發其智,情僞出 數 下 絪縕交感,變化不窮。 《易》之爲書,卦爻彖象之義備,而天地 陰陽,一道也。太極,無 統之在道 以 六十四卦,三百八十四爻,皆所 而 定天下之象,著其象以定天 開 而 其物,後天下而 抱陽,莫不有太 則 太極者,道也; 焉,萬緒起焉 無 二致。 形一 散之在理, 成 極 所以「易有 其務。 極也。 真不 受其生,神 兩儀者,陰 萬 · 有 下之 是故 以 則 物 太 有 順 兩

德,與 則室而 之動 始有 時固 其道 合其吉凶,然後可 得之於精神之運,心術之動, 卦 在 百八十四爻互爲其用。 陽之道 義,而不知有卦爻彖象之用,亦非易 卦之象焉,莫不有爻之義焉。 同,所同者九六。 一,則 一身之中,暫於瞬息,微於 也 窮,而爻亦未始有定 未始有一,而 至大而无不包,其用至神 拘 日月合其明 也; 不通,非易也。 於无變,非易 卦 桂 雖 者,陰陽之物也; 不 同,所 是以六十四 以謂 與與 掛 未 也。 兀 之知易也 知 同 始有定象,事固 遠在 時 所謂 位。 者 合其序 以 奇偶;爻 動 六合之外,近 卦爲其體,三 與 以一 至哉易乎 卦爻彖象之 而无不存。 事 爻者, 静,莫不 天 而 時 地合 也。 與 明 雖 陰 鬼 而 交, 未 其 故 有 神 索 不 陽

雖然,易之有卦,易之已形者也,卦之

易,所以定吉凶而生大業。

故易者,陰

易

序

六

果何如哉? 此學者所當知也。知,未形未見者不可以名求。則所謂易者,有爻,卦之已見者也。已形已見者可以言

周易程子傳序

源,此《傳》所以作也。 之後,悼 經尚存。 聖人之憂患後世,可謂 之故,盡事物之情,而示開物 而忘味。 也),廣 易,變易也, 大悉 斯文之湮晦,將俾後人 自秦而 然而 備 前 將 下,蓋无傳矣。 隨 儒失意以傳言,後學誦 時 以 變易以從道 至矣。 順 性 命之理,通 成務之道也 去古雖遠,遺 沿 予生千 也。 流 而 幽 其 載 言 明 求 爲

頣

Ē

叔

冷序。

於辭。 變而 尚 以 其占。」吉凶消長之理,進退存亡之道,備 動者尚其變,以制器者尚 君 玩 易有聖人之道四焉:「以言者尚其辭 其 子 推 占。 居 辭考卦,可 則 得 觀 於辭不達其意者 其 象 以知 而 玩 變,象與占在其 其 其象,以卜筮 辭 動 有矣,未 則 觀 其 中 者

> 焉。 予所傳者辭 有 者,求言必自近。 會通以行其典禮 也,至著者象 不 得於 有宋元符二年己 辭 也,由 也。 而 能 一則解 體 通 易於近者,非 辭 用 其 以 卯 意者 无所 得 Ē 源,顯 山月 庚· 其 不備。 也。 意 微无 心,則在 申,河南 知言者也。 至 故 微 間 乎人 善 者 學 觀 理

周易傳序

六九二

上下篇義

卦》是也。 乾、坤、天地之道,陰陽之本,故爲上篇之終。 一篇之卦既分,而後推其義以爲之次,《序 一篇之卦既分,而後推其義以爲之次,《序

言, 也。 取義 居 也 下。 則陰盛於上,用各於其所,不相害也。 以爻言,則 如 有不同。 卦之分則以陰陽。 所謂 大壯"以 盛 如《剥》: 者,或以 陽 桂 極 言, 於 上,又一陽 卦,或以爻。 以卦言,則陰 則 陽盛者居上,陰盛者 陽 長 而 爲 壯 卦 衆 長 以 與爻 陰 陽 爻 剥 主

> 壯 陽 坤者居下篇。 爲 陰盛,夬陰極,則雖 極,則雖有坤而居上, 姤陰生, 遯陰長,大 一無「爲」字。 乾 父也, 敵 而 莫亢 也。 復陽生,臨陽長,觀 焉; 故卦 有 乾 坤, 有 而居下。 乾 母 者居 也 非 陽 F 乾 一篇,有 盛 無 剥 與

也。 衆陰主也。 也, 陰之卦皆在上篇,小 雖衆陽説於一陰,説之而已,非 卦一陰五陽者,皆有乾也,又陽衆 卦二陽者,有坤則居下篇,小過雖無坤, 其餘有坤者皆在下篇,晉、明 王弼云「一陰爲之主」,非 畜、履、同 人、大有也。 夷、萃、升 如一陽 也。 而 故 爲 盛

也。 正位 也。 陰 而 艮,以卦言則陽也,以爻言則皆始變,微也。 陽 中 下,謂震、坎在 也 寡,復失正位 也。 震之上、艮之下無陽,坎 過之卦也,亦在下篇。其餘二陽之卦 而 也。 惟習坎則陽上達矣,故爲盛卦 生於下而達於上,又二體皆陽 下無陽、無本也、艮也、蹇也。震、坎、 陽生於下而不達於上,又陰衆 在上篇,屯、蒙、頤、習坎也。 達於上,謂 生於下而上一作「陽」。達,陽暢之盛 一,陽之 下。震,生於下也。 一陽至一作「在」。 弱 也,震也,解 則 陽 陷,皆非盛 也。 上,或 坎,始於 陽之 陽 上有 生於 而 陽 得 皆

能 過 无 居上下,則綱紀於陰,頤是也。 陽 妄 主 制 也; 一有「過」字。 二陰者,有乾則陽盛可知,需、訟、大畜 於陽 無乾 而 反弱 而 盛於中,上下之陰弱矣。 爲盛者,大過 也。 必上下各二陰,中惟 也,離 陰居上下,不 也。 大

皆在下篇,家人、睽、革、鼎、巽、兑、中孚也。之盛也。其餘二陰之卦,二體俱陰,陰盛也,可見也。離則二體上下皆陽,陰實麗焉,陽兩陽,然後爲勝,小過是也。大過、小過之名

也。 上 盛 皆坎,陽生於下而達於上,又二體皆陽,可謂 卦, 爲陽陷,二體皆坎,反爲陽盛,何 陽少於陰而居上,則爲勝。蠱,少陽居 陽尊卑之義,男女長少之序,天地之大經也。 涣、節、 矣。 體有坎,陽 故陰陽敵 而陽爲陰所 賁,少男在 卦三陰三陽者,敵也,則 既濟、未 爲陰所陷,又重 而 中 陷溺 濟 有坎者,皆在 女上,皆陽 也。 也,又與陰 或曰:一體有坎,尚 盛 以義 一於陰也;二 下篇 也。 桂 也 爲勝。 ? 困、井、 重,陰盛 坎 雖 長 日 陰 體 陽 陰

「暢之」,涂刻本此二字互乙。

是也。 皆在 侔,則陰在上爲陵,陽在下爲弱,咸、益之類 者、皆在下篇、咸、益、漸、旅、困、涣、未濟也。 正 故有利貞之戒。 二少相感一作「感説」。 長男下中少女,故爲下之。若長少敵,勢力 日 唯隨與噬 隨》之《彖》曰: 位 「柔得中而 下篇。 而陰反居尊,則弱也,故恒、損、歸妹、豐 男 在 咸亦有下女之象,非以長下少也,乃 女上,乃 嗑,則男下女,非女勝男也。 女在男上,陰之勝也。 上行。」長陽非 困雖, 剛來而下柔。」《噬嗑 理之常,未爲 以相與,所以致陵 女少於男,乃陽陷 少陰 盛 凡女居上 也。 可 `敵,以 · 彖》 若失 而 也, 故 爲

爲

虚

乎?

日

頤二體皆陽卦,而本末皆陽

陰揜

,無相下之義也。

小過,二陽居四陰之中,

,則爲

陰盛;

孚,二陰居

四陽之中,

丽

不爲

陽

盛

何

也

? 中

陽體

實,

中孚中虚

也。

然則

頤

中

四

陰不

不成本末之象,以其中虚,故爲中孚,陰盛可 之至也。 中 孚二體皆陰卦,上下各二 陽,

盛

上下篇義

知

矣。

歸妹

巽

兑

小過

既濟

未濟

周易程氏傳目録

震

渙 艮

節 漸

坎 賁

剥

復

无妄

大畜

頤

大過

上經下

豫

隨

臨

觀

噬嗑

比 乾

小畜 坤 履

屯

上經上

否 需

同人 訟

大有 師

下經上

咸

恒

遯

蹇

損

大壯 晉 益

明 夬 夷 姤

家人

六九七

伊川易傳卷之一

周易上經

乾,元,亨,利,貞。

謂之乾。乾者萬物之始,故爲天,爲陽,爲 乾爲乾。乾,天也。天者天之形體,乾者 乾爲乾。乾,天也。天者天之形體,乾者 大之性情。乾,健也,健而无息之謂乾。 夫天,專言之則道也,天且弗違是也,分 大之性情。乾,健也,健而无息之謂乾。 主之,則以形體謂之天,以主宰謂之帝, 以功用謂之鬼神,以妙用謂之神,以性情 以功用謂之鬼神,以妙用謂之神,以性情 以功用謂之鬼神,以妙用謂之神,以性情 以功用謂之鬼神,以妙用謂之神,以性情 以功用謂之鬼神,以妙用謂之神,以性情 以功用謂之鬼神,以妙用謂之神,以性情 以功用謂之鬼神,以妙用謂之神,以性情

初九,潛龍勿用

潛隱,未可自用,當晦養以俟時。理无形也,故假象以顯義。乾以龍爲象。如为之端,屬氣方萌。聖人側微,若龍之氣消息,聖人進退。初九在一卦之下,爲氣消息,聖人進退。初九在一卦之下,爲氣消息,聖人進退。初九在一卦之下,爲

九二,見龍在田,利見大人。

聖人言之,舜之田漁時也,利見大德之君,田,地上也。出見於地上,其德已著。以

功。 之君,九五也。 以行 其道。 天下利見大德之人,以被其澤。 君亦利見大德之臣,以共 乾坤純體,不分剛柔,而以 大德 成其

九三,君子終日乾乾,夕惕若,厲,无咎。

百

·德相應。

聖人事,苟不設戒,則何以爲教? 德已著,天下將歸之,其危懼可 兢惕,則 顯者也,舜之玄德升聞時也。 三雖人位,已在下體之上,未離於下而尊 雖處危地而无咎。 在下之人 日夕不 知。 作易之 雖言 而 懈 君 而

九四,或躍在淵,无咎。

義

也。

淵 不躍,惟及時 ,龍之所安也。 以就安耳。 或,疑辭,謂非必也。 聖人之動,無 不 躍

時 也,舜之歷試 時也。

九五 一,飛龍 在天,利見大人。

進位乎天位也。 聖人既得天位 一則利見在

> 下大德之人,與共成天下之事。 見夫大德之君也。 天下

·固利

上九,亢龍有悔。

九五者,位之極 則有悔。 上九至於亢極,故有悔也。 唯聖人知進退存亡而无過,則不 中正者。 得時 之極 過此 有

過

至於悔 也。

用 九,見群龍,无首,吉。

者也。 用九者,處乾剛之道,以陽居乾體,純 剛柔相濟爲中,而 乃 以 純 剛 是 乎剛 過

首則吉也。 以剛爲天下先,凶之道也。 乎剛也。

「見群龍」,謂觀諸陽之義,无爲

彖》曰:大哉乾元 萬物資始乃統天。

雲行雨 施 ,品物流形。

乾道變化 大明終始,六位時成,時 各 Œ 性命,保合太和,乃利貞。 乘六龍以御天。

首出庶物 萬國 同咸 寧。

六九九

品物 彖。 受爲性。 運。「乾道變化」,生育萬物,洪纖高下,各 也。 天道始萬物,物資始於天也。 偏言則一事,專言則包四者。 辭,則思過半矣。「大哉乾元」,贊乾元始 桂 天爲萬物之祖,王爲萬邦之宗。 合謂常和,「保合大和」,是以 爻之時,乃天運也。 「以御天」,謂以當天 乃統天」,言元也。乾元統言天之道也。 萬物之道大也。 時 地之道 其類,各正 下 成。 流形」,言亨也。天道運行,生育萬物 彖者,言一卦之義。 大明天道之終始,則見卦之六位,各 之 辭 常久 「保合大 卦之初終,乃天道終始。乘此 爲 彖。 性 丽 命也 四德之元,猶五常之仁, 夫子 八和乃 不已者,「保合大和」 從 利 天所 而 貞」,保謂 故知者 釋 賦 「雲行雨 利且 之, 「萬物資始 爲 乾道「首 命 觀 通 常存, ",物所 貞 其 謂 也。 施 也。 六 彖 之

> 從。 出 庶 物 王者體天之道,則「萬國 而 萬 彙 亨, 君 道 尊 臨 咸 天 寧 位 也。 丽 四 海

象曰: 天行健,君子以自彊不息。

以自彊不息」,法天行之健也。「君子行健而已,至健固足以見天道也。「君子非聖人莫能體,欲人皆可取法也,故取其非型人莫能體,欲人皆可取法也,故取其計一象解一卦之象,爻下象解一爻之象。

「潛龍勿用」,陽在下也。

陽氣在下,君子處微,未可用

也

見龍在田」,德施普也。

見於地上,德化及物,其施已普也

終日乾乾」,反復道也

「或躍在淵」,進无咎也。進退動息,必以道也。

「飛龍在天」,大人造也。 量可而進,適其時則无咎也。

大人之爲,聖人之事也。

「亢龍有悔」,盈不可久也。

盈則變,有悔也。

「用九」,天德不可爲首也。

用九,天德也。天德陽剛,復用剛而好先,

則過矣。

利者,義之和也。貞者,事之幹也。文言曰:元者,善之長也。亨者,嘉之會也。

者、嘉美之會也;利者、和合於義也;貞乾之四德、在人則元者、衆善之首也;亨明其義、推乾之道、施於人事。元亨利貞、他卦、彖、象而已、獨乾、坤更設文言以發

君子體仁足以長人,

者,幹事之用也。

也。「體仁」,體元也。比而效之謂之體。體法於乾之仁,乃爲君長之道,足以長人

嘉會足以合禮,

理,豈得爲嘉? 非理安有亨乎?得會通之嘉,乃合於禮也。不合禮則非

利物足以和義,

和於義乃能利物。豈有不得其宜而能利

物者乎?

貞固足以幹事。

貞固所以能幹事也。

君子行此四德者,故曰乾,元、亨、利、貞。

行此四德,乃合於乾也。

不見是而无悶,樂則行之,憂則違之,確乎其而隱者也。不易乎世,不成乎名,遯世无悶,初九曰「潛龍勿用」,何謂也? 子曰:「龍德

不可拔,潛龍也。」

時。自信自樂,見可而動,知難而避,其守守其道,不隨世而變,晦其行,不求知於陽之微,龍德之潛隱,乃聖賢之在側陋也。自此以下,言乾之用,用九之道也。初九

堅不可奪,潛龍之德也。

謹,閑邪存其 九二日「見龍 曰:「龍 易》曰『見龍 德 而 在田 Œ 在 誠,善世而 中 田 者也。 ,利見大人」,君德 ,利見大人」,何 庸言之信,庸行之 不伐,德博而 謂 也 也? 化。

存矣。 非 以 博而化」,正己而物正 正中之義。 龍 无過之地 君位,君之德也 德而處正中者也。 「善世 庸信 而 則 唯 不伐」,不有其善 庸謹,造次必於是也。 在閑 也。皆大人之事,雖 邪。 在卦之正 邪既 中,爲 也。 閑 則 德 既 得 誠

至之, 因其時而惕,雖危无咎矣。」 以 何謂 九三曰「君子終日乾乾,夕惕若,厲,无咎」, 是故居上位 進 也? 德 可與 也 子曰:「君子進德修業。 幾 脩辭立 圃 也 不騙,在 其誠 知 終終之,可 下位 ,所以居業 而 不 與 憂,故乾乾 也。 存 忠信,所 義 知 也 至

> 也。 也。 憂,不懈而知懼,雖在 君子之學如是,故知處上下之道 謂 力進而終之,守之在後,故「可與存義」,所 先,故「可 之」,致知也。 三居下之上,而 進德脩業」 「終條理者聖之事也」。 「知終終之」,力行 擇 言 與幾」,所謂 篤 志, 而 求知所至而後至之,知之在 르 君德已著,將何 所 以 内 危 「始條 居 積 也。 地 業 忠信 此學之始終也 而 也。 既 理者知之事」 无咎也 知 爲 所 所 哉? 而 知 以 終, 无 至 進 驕 則 至 德 唯

宜。 或躍 及時」耳。 非 或 深淵者,龍之所安也。 爲 處,上下无常, 邪枉 時 行時 非 離 止,不可 群 或進 類 「進德脩 或退,去就 在淵 恒 也, 謂 業、欲 故 躍 就 云 從

也。君子進德脩業,欲及時也,故无

九四日「或躍

在淵

,无咎」,何謂

也?

子

İ

「上下无常,非爲

邪

也。

進

退

無

恒,

非

離

群

義。 所安。 或,疑辭,隨 淵 在 深 ൬ 時 言 而 躍 未 但 可 取 必 進就 也 君子之 所 安之

順時,猶影之隨形,可離非道也。

雲從龍,風從虎,聖人作而萬物覩。本乎天 者親上,本乎地者親下,則各從其類 九 曰:「同 Ŧī. 日「飛龍在 .聲相應,同氣相求,水流濕,火就燥, ·天,利見大人」,何謂 也。」 也? 子

物皆覩。 就燥,從龍從虎,皆以氣類,故聖人作而萬 從於上,「同聲相應,同氣相求」也。 之類莫不歸仰,况同德乎? 上應於下,下 人之與聖人,類也。 上既見下,下亦見上。物,人也, 五以龍德升尊位,人 流濕

見,共成其事,所利者見大人也,言在 在見前。乾之二五,則聖人既 大人,謂宜見大德中正之人,則其辯明,言 大人」,其言則同,義則有異。 古語云人物、物論,謂人也。《易》中「利見 如訟之利見 出,上下相

> 者」,如蟲獸草木。陰陽「各從其類」,人物 「本乎天者」,如日月星 辰。 「本乎地

莫不然也。

无位,高 上九日「亢龍 而无民,賢人在下位而无輔 有悔」,何謂也? 子曰:「貴 是 而

而 有悔也。」

九居上而不當尊位,是以无民無輔

動 則

有悔 也。

「潛龍勿用」,下也。

此以下言乾之時。 勿用」,以 在下 未可

用也。

「見龍在田」,時舍也。

隨時而 止也。

終日乾乾」,行 進德脩業也。 事

或躍在淵」,自試 也。

隨時自用也。

見

七〇三

飛龍 在天」,上治也

亢龍有悔」,窮之災也。 得位而行,上之治也。

窮極而災至也。

乾元「用九」,天下治也。

用九之道,天與聖人同,得其用則「天下治

潛龍勿用」,陽氣潛藏。

也」。

亦當晦隱,未可用也。 此以下言乾之義。 方陽微潛藏之時,君子

見龍在田」,天下文明。

龍德見於地上,則天下見其文明之化也。

終日乾乾」,與時偕行。

隨時而進也。

或躍在淵」,乾道乃革。

離下位而升上位,上下革矣。

飛龍在天」,乃位乎天德。

元龍有悔」,與時偕極。 正位乎上,位當天德。

時既極,則處時者亦極矣。

乾元「用九」,乃見天則。

曰:「盡其道者聖人也,得失則吉凶存焉。 也。或問"「乾之六爻皆聖人之事乎?」 用九之道,天之則也。天之法則謂 天道

乾元者,始而亨者也;

豈特乾哉?

諸卦皆然也。」

又反覆詳説以盡其義。 既始則必亨,不亨

則息矣。

利貞者,性情也。

乾之性情也。 既始 而 亨,非利貞其能

息乎?

乾始能以美利利天下,不言所利,大矣哉!

乾始之道、能使庶類生成、天下蒙其美利、 而「不言所利」者,蓋无所不利,非可指名

聖人在下,雖已顯

而

未得位,則進德脩業

也 故贊其利之大曰「大矣哉」。

六爻發揮旁通,情也。

大哉乾乎

剛、健、中、正、純、粹,精也。

時 乘六龍 ,以御天也。雲行雨施,天下平也。

大哉」,贊乾道之大也。 以剛、健、中、正、

以六爻發揮旁通、盡其情義。 純、粹六者,形容乾道。精謂六者之精極。 乘六爻之時

雨 以當天運,則天之功用著矣。故見「雲行 施」,陰陽溥暢,天下和平之道也。

君子以成德爲行,日可見之行也。潛之爲言

也,隱而未見,行而未成,是以君子弗用 於用。 德之成,其事可見者行也。 德成而 初方潛隱未見,其行未 成。 後可施 未成, 也。

未著也。 「是以君子弗用也」。

之。《易》曰:「見龍 君子學以聚之,問以辨之,寬以居之,仁以行 在田 ,利見大人。」君德也。

> 而已。 行,脩業也。 行之耳。進居其位者,舜、禹也。進行其 學、聚、問、辨,進 君德已著,利見大人,而進 德 也。 寬居、仁 以

道者,伊、傅 也

乾因其時而惕,雖危无咎矣。

九三重剛而不中,上不在天,下不在田,故乾

三重剛,剛之盛 也。 過中而居下之上,上

因時順處,乾乾兢惕以防危,故雖危而不 未至於天,而下已離於田,危懼之地

九四重剛而不中,上不在天,下不在田,中不 至於咎。 君子順時兢惕,所以能泰也

在人,故或之。或之者,疑之也,故无咎。 或退,唯所安耳,所以无咎也 也。疑者,未决之辭。 四不在天,不在 田,而出人之上矣,危 處非可必也,或 進 地

四 夫大人者,與天地合其德,與日月合其明,與 時合其序,與鬼神合其吉凶,先天而天弗

七〇六

違,後天而奉天時。天且弗違,而况於人

乎? 况於鬼神乎?

豈能違也? 艺能違也。 大人與天地、日月、四時、鬼神者,造化之迹 道也。 天地者,道也,鬼神者,造化之迹 道也。 天地者,道也,鬼神者,造化之迹 大人與天地、日月、四時、鬼神合者,合乎

知得而不知喪。 亢之爲言也,知進而不知退,知存而不知亡,

其唯聖人乎! 知進退存亡而不失其正者,

喪之理也。聖人則知而處之,皆不失其極之甚爲亢。至於亢者,不知進退存亡得

正

,故不至於亢

也。

坤,元,亨,利,牝馬之貞。

健行,故取其象曰「牝馬之貞」。 以 坤 剛固爲貞,坤 ,乾之對 也。 則 四 柔順 德 同 而 貞。 ൬ 貞 牝 體 馬 則 柔 異 順 乾 而

君子有攸往,

君子所行柔順而利且貞,合坤德也。

先迷,後得,主利。

君令臣行,勞於事者,臣之職也。則主於坤,生成皆地之功也。臣道亦然,迷錯,居後乃得其常也。「主利」,利萬物陰,從陽者也,待唱而和。陰而先陽,則爲

西南得朋,東北喪朋,安貞,吉。

其常則安,安於常則貞,是以吉也。類,乃能成化育之功,而有安貞之吉。得西南陰方,東北陽方,陰必從陽,離喪其朋

彖曰:至哉坤元! 萬物資生,乃順承天。

坤厚載物,德合无疆。

資生之道,可謂大矣。乾既稱大,故坤稱

之道合坤

·德也

其功,坤之厚德,持載萬物,合於乾之无資坤以生,父母之道也。順承天施,以成於尊卑之辨,謹嚴如此。萬物資乾以始,至。「至」義差緩,不若「大」之盛也。聖人

牝馬地類,行地无疆,柔順利貞,君子始含弘光大,品物咸亨。 疆也。

牝馬地類,行地无疆,柔順利貞,君子攸行。 乎? 坤止 而 牝馬爲象者,以其柔順 者,故能成承天之功,品物咸 裕也。光,昭明也。大,博厚也。 健、中、正、純、粹也。含,包容也。弘,寬 以含、弘、光、大四者形容坤道,猶乾之剛、 行地无疆」,謂健 利貞, 也。 日 乃坤德也,君子之所行也。 其動也剛,不害其爲柔 非 健 何 以 也。 配 乾? 乾健 而健行,地之類也。 坤順,坤亦 未 得亨遂。 有 也。 有此 乾 君子 行 柔 四 取 順 而 健

> 行,東北喪朋,乃終有慶。 先迷失道,後順得常。西南得朋,乃與類

安貞之吉,應地无疆。

无疆 豈能 健行 陽者用也。 之功,終有吉慶也。 類,喪朋也。 方,從其 失陰道,後和則順 形而上曰天地之道,形而 乾之用,陽之爲也。 也。「德合无疆」,天之不已 貞而吉,應地道之无疆也。 ·先迷後得」以下,言陰道也。 也 」,地之无窮也。 應地之道? 彖有三无疆,蓋不 類, 。陰體柔躁,故從於陽則 得 離其類而 朋 也。 而得 坤之用,陰之爲 與類行者本也,從於 「行地无疆」,馬之 從陽,則能成 其 東 下曰 常理。 北 陰而不安貞, 陽 也。 先唱 陰陽之功。 方 「應 西南 離 生 則 也 同 物 地 安 其 陰 迷

象曰:地勢坤,君子以厚德載物。

七〇八

勢坤」也。君子觀坤厚之象,以深厚之德厚而其勢順傾,故取其順厚之象,而云「地坤道之大猶乾也,非聖人孰能體之? 地

初六,履霜,堅冰至。

容

載庶物

象曰:履霜、堅冰,陰始凝也;馴致其道,至 盛也。 小人始雖甚微,不可使長,長則至於盛 爲霜,履霜則當知陰漸盛 始生,以其將長,則爲之戒。 陰爻稱六,陰之盛也。 也 陰始生於下,至微也。 入則 而至堅冰矣。 陽生矣, 陰之始凝 聖人於陰之 非 也。 猶 純 而

而至於盛。習,因循也。微,長則漸至於盛,故戒於初。馴謂習,習陰始凝而爲霜,漸盛則至於堅冰。小人雖

六二,直、方、大,不習无不利。

二,陰位在下,故爲坤之主,統言坤道中正

則二五相應。 之主,故不取五應,不以君道處 人識之耳。 由直方而大也。直、方、大足以盡地道,在 則先大。大,氣之體也。 坤體,故以方易剛,猶貞加牝馬 直、方、大,孟子所謂至大至剛以直也。 莫之爲而爲也,在聖人則從容中 而无所不利。「不習」謂其自然,在坤道 德用,盡地之道矣。 在 下,地之道也。以直、方、大三者形容其 乾坤 純 體,以 由直、方、大,故不習 於坤,則先直 位 相 應。 也。 Ŧī. 也。 二,坤 · 道 言氣, 方, 也。 在 乾 則

利」,地道光也。 象曰: 六二之動,直以方也。「不習无不

之義,其大无窮,地道光顯,其功順成。豈承天而動,直以方耳,直方則大矣。直方

六三,含章可貞,或從王事,无成有終。習而後利哉?

道也。 Ę 奉事以守其終耳。守職以終其事,臣之 悔咎也。或從上之事,不敢當其成功,惟 「可貞」,謂可貞固守之,又可以常久而无 晦其章美,有善則歸之於君,乃可常 三居下之上,得位者 上无忌惡之心,下得柔順之道也。 也。 爲臣之道,當 而 得 含

象曰:「含章可貞」,以時發也。

以 之。言爲臣處下之道,不當有 則以時 含晦其美,乃正 夫子懼人之守文而不達義也,又從而 時 也,非含藏終不爲也。 而發,不有其功耳。 而可常。 然義 不失其宜,乃 含而不爲,不 所當爲者 其功善,必

或從王事」,知光大也。

忠者也。

象只舉上句,解義則并及下文,他卦皆然。 或從王事」,而 能 无 成有終者,是其知之

> 光大也。 之人有善,唯恐人之不知,豈能含章也? 唯其知之光大,故能含晦。 淺暗

六四,括囊,无咎,无譽。

隔之時。其自處以正,危疑之地也。 不然則有害也。 藏其知,如括結囊口而不露,則可得无咎, 四居近五之位,而无相得之義,乃上下閉 既晦藏,則无譽矣。 若晦

象曰:「括囊,无咎」,慎不害也 能慎如此,則无害也。

六五,黄裳,元吉。

明

知。 裳,元吉。」黄,中色。裳,下服。守中而居 坤雖臣道,五實君位,故爲之戒云:「黄 也。黄裳既元吉,則居尊爲天下大凶 下,則元吉,謂守其分也。元,大而 爻象唯言守中居下則元吉,不盡發其義 後之人未達,則此義 五,尊位也。 在他卦,六居五,或爲柔 晦矣,不得不 辨 可

位。 羿、莽是也,猶可言也。 順 變 廢 之事猶盡言之,獨於此不言,何也? 黄裳之戒而不盡言也。 氏、武氏是也,非常之變,不可言也。 興, 也 或爲文 陰者,臣道也,婦 理之常也; 明 或 爲 以 暗弱 陰 道 3 居 或疑在革,湯、武 婦居尊位 也。 在 尊位,非 坤 臣 則 居 爲 一女媧 尊位 常之 故有 曰: 居 尊

象曰:「黄裳,元吉」,文在中 下,故爲元吉。 黄中之文,在中不過 也。 也。 内 積 至 美 而 居

上六,龍戰于野,其血 謂進至於外也。 玄黄」。 矣,復進不已,則必戰 陰從陽者也,然 盛 既敵矣,必皆傷,故「其 玄黄 極 ,故云「戰于 則 抗 而 争。 野 六 既 血 野 極

曰:「龍戰于野」,其道窮也。

乎,承天而時行」,承天之施,行不違時,

陰 盛 至 一於窮 極 則 必 争 而 傷 也

用 六,利永貞 道柔而 坤之用六,猶乾之用九, 難常,故用六之道 用陰之道 ,利在常永貞固 也。

陰

象 文言曰: 曰:用六永貞,以大終也 道,利在盛大於終。 陰既貞固不足,則不能永終。 坤至柔 而 動 也 能大於終,乃永貞也。 剛 7,至静 而德方。 故用六之

含萬 後得主而 物 而 有常, 化 光。

坤 利成 常。 德則 坤道 道 光大也。 其 萬物,坤之常也。 至柔, 方 陰之道不唱 順乎,承天而時行。 「主」字下脱 動 而 剛 其 故 動 應乾不 而 則剛 和 ,故居後 「利」字。 含容萬 違 3 坤 徳方故 體 類,其 爲得 至 坤道 一静 牛 功 其 而 物 而 化 順 主 其 有

坤道之順也。

曰:「履霜,堅冰至。」蓋言順也。 其所由來者漸矣,由辯之不早辯也。《易》殃。臣弑其君,子弑其父,非一朝一夕之故,殃。臣弑其君,子弑其父,非一朝一夕之故,

疑乎?

直其正也,方其義 利」,●則不疑其所行也 方外,敬義立而德不孤。「直方大,不習无不 下之惡无由而成,乃知霜冰之戒也。 長,小積成大,辯之於早,不使順長,故天 流於後世。其大至於弑逆之禍,皆因 善,則福慶及於子孫,所積不善,則災 天下之事,未有不由積而成。家之所積者 至於冰,小惡而至於大,皆事勢之順長也。 而至,非朝夕所能成也。明者則知漸 也。 君子敬以直内,義以 霜 1積累 不 殃 丽 可

其内,守義以方其外。敬立而内直,義形直言其正也,方言其義也。君子主敬以直

无所用 立,其德盛矣,不期大而 而 外方。 丽 義形 不周, 无所 於外, 非 施 在 大 外 IIII 矣 德 也。 不利,孰爲 不 敬 孤 義 也。 既

象。天地交感,則變化萬物,草木蕃盛。四居上,近君而无相得之義,故爲隔絶之曰:「括囊,无咎,无譽。」蓋言謹也。

■「習」,原誤作「直」,據《古逸叢書》覆刻元至正本《易

當 時,括 遂。 君 謹自守也。 臣 君 相 囊 臣 際 晦 道 而 藏 絶,賢者隱 道 則 亨。 雖无令譽,可得无咎,言 天 地 遯。 閉 隔 四 於 則 閉 萬 隔之 物 不

君子黄中通理,

正位

居體

美在其中,而暢於四支,發於事業,美之

體,發見於事業,德美之至盛也。惟取中正之義。美積於中,而通暢於四居正位而不失爲下之體。五尊位,在坤則居正位而不失爲下之體。五尊位,在坤則

者,天地之雜也,天玄而地黄。焉,猶未離其類也,故稱「血」焉。夫玄黄陰疑於陽必戰,爲其嫌於无陽也,故稱「龍」

矣,是「疑於陽」也。不相從則必戰。卦雖陽大陰小,陰必從陽。陰既盛極,與陽偕

至與 也。 玄黄,天地之色,謂皆傷也 與陽争,其 進不已,則戰矣。雖盛極,不離陰類也 純 陽争,雖陽 「于野」,進不已而 恐 疑 傷 无 可知 陽 不能无傷,故「其 故 ,故稱「血」。 稱 至於外也。 龍 見 陰既 其 血玄黄」。 與 盛 陽 極 一,而 戰 而

上下

盛,則 陽始交,雲雷相應而 下,坎始交於中,陰陽 興,陰陽始交也。以二體言之,震始交於 盈也, 屯者物之始生也。] 萬物始生, 鬱結 生,故繼乾、坤之後。以二象言之,雲雷之 未通,故爲盈 盈天地之間者惟萬物,故受之以屯。 屯、《序卦》曰:「有天地、然後萬物生焉。 塞意亡矣。天地生萬物,屯,物之始 塞於天地之間。 未成澤,故爲屯,若 相交,乃成雲 至通 屯者 暢茂 陰

屯。在時,則天下屯難,未亨泰之時也。義。陰陽不交則爲否,始交而未暢則爲已成澤,則爲解也。又動於險中,亦屯之

屯,元,亨,利,貞。 勿用有攸往,利建侯。

故「利建侯」也。 天下之屯,豈獨力所能濟? 必廣資輔助,何以濟屯? 方屯之時,未可有所往也。屯有大亨之道,而處之利在貞固。非貞固

彖曰: 屯,剛柔始交而難生,

動乎險中。

以雲雷二象言之,則「剛柔始交」也。以坎

未能通暢,則艱屯,故云「難生」。又「動於震二體言之,「動乎險中」也。剛柔始交,

大亨貞,

險中」,爲艱屯之義

雷雨之動滿盈。

所謂大亨而貞者,「雷雨之動滿盈」也。陰

道,亦在夫貞固也。 貞固安能出屯? 人之處屯,有致大亨之貞固安能出屯? 人之處屯,有致大亨之成雷雨,滿盈於天地之間,生物乃遂,屯有成雷雨,滿盈於天地之間,生物乃遂,屯有陽始交,則艱屯未能通暢,及其和洽,則

天造草昧,宜建侯而不寧。

雖建侯自輔,又當憂勤兢畏,不遑寧處,聖當此時運,所宜建立輔助,則可以濟屯。時運也。草,草亂无倫序。昧,冥昧不明。上文言天地生物之義,此言時事。天造謂

人之深戒也。

象曰:雲雷屯,君子以經綸。

營爲也。 為天下之事,以濟於屯難。經緯,綸緝,謂未能成雨,所以爲屯。君子觀屯之象,經坎不云雨而云雲者,雲爲雨而未成者也。

初九,磐桓,利居貞,利建侯。

七一三

謂 助,乃居屯濟屯之道也。 之屯乎? 居屯之世,方屯於下,所宜 正。 居 初 方屯之初,不磐桓而 居下位者也。 求輔助 正 以 苟无貞固之守,則將 而 陽爻在 固 也 其 下 志。 乃 未 能 凡 剛 便往 人處 遽進 明 之才 濟屯,故磐桓 一,則犯 故取 失義 屯 難 當 安能 則 建侯之義 難矣,故宜 屯 難 鮮 之 濟 能 也。 世 有 時 守

象日 時之屯,然有濟屯之志與濟 賢人在 其正也 雖「磐桓」,志行正也 下,時 荷未利 , 雖盤 桓 屯之用,志 未 能 遂 往 在 濟

以貴下賤,大得民 也

下,所以「大得民也」。 下賤」之象。方屯之時,陰柔不能自存,有 九當屯難之時,以陽而來居陰下,爲「以 剛陽之才,衆所歸 從 或疑 也。 方屯於下,何 更能 白處 貴 卑

六二,屯如邅如,乘馬班如,匪寇婚媾。 貞不字,十年乃字。 也。 二以陰柔居屯之世,雖 能 有 濟 貴 乎? 况陽之於陰,自爲貴乎? 屯之才而下 夫以 剛 於不能,乃「以貴 明之才 正應在上,而逼於 而 下 於 陰 下 柔 賤 以以

通 以 又爲 非理而至者。二守中正,不苟合於初,所 難,則往求於婚媾矣。 初剛 所求,柔者剛所陵,柔當屯時,固難 在上,不失義者也。 二當屯世,雖不能自濟,而居中得 班、分布之義。下馬爲班、與馬異 欲行也。欲從正應,而復班 不字。 ,乃獲正應而字育矣。 剛 ,故屯難。 陽 苟貞 所逼,故 固不易,至於 遭,回。 爲 然逼近於 難 婚媾,正 也。 如 以女子陰柔,苟 如,不能 十年,屯極 辭 設 應也。 初,陰乃陽 也 匪 Œ 逼 自濟, 處 進 乘 於寇 也。 也。 應

於人 乎? 能 守其志節,久 何也? 初爲賢 (明剛 曰:此自據二以柔 必 獲 正之人, (通, 况 圃 君子守道 爲 寇 近 以 剛 侵 不 耐 逼 回

象曰:六二之難,乘剛也。「十年乃字」,反

如此。

爲義,更不計初之德

如何

也。

易之取

義

常也。

六三,即鹿无虞,惟入于林中。君子幾不如待反其常,與正應合也。十,數之終也。其患難也。至於十年,則難久必通矣,乃其患難也。至於十年,則難久必通矣,乃

虞人也。 自濟,又无應援,將安之乎? 六三以陰柔居剛,柔既不能安屯,居 之者,則惟陷 不中正,則妄動 入山 入于林莽中。 林者必有虞人以導之,无導 雖 貪於所求,既不足 君子見事之幾 如即 鹿 剛 而 无 以 而

象曰:「即鹿无虞」,以從禽也。君子舍之,微,不若舍而勿逐,往則徒取窮吝而已。

往吝窮也。

六四,乘馬班如,求婚媾,往吉,无不利。 如也。 不利 自輔, 其才不足以 六四以柔順居近君之位,得於上者也,而 虞而即鹿,以有從禽之心也。 以貪禽也。 事不可而妄動,以從欲 不 時之屯,若能求在下之賢,親而用之,何所 輔陽剛中正之君,濟時之屯,則吉 己之婚媾也。 而 舍之不從,若往,則可吝而 也。 則可濟矣。 己既不足以濟時之屯,若能求賢以 居公卿之位,己之才雖不足以 當屯之時,不可 濟 若求此陽剛之婚媾,往 屯,故欲進 初陽剛之賢,乃是正應, 也。无虞 而 動 復止 困 君子則見幾 一窮也。 慽 乘 動 而 而 猶 即 馬 與共 无 鹿, 濟 所 班 无

象曰:求而往,明也。

居得致之地,已不能而遂,至暗者也。知己不足,求賢自輔而後往,可謂明矣。

九五,屯其膏,小貞吉,大貞凶 之也。 膏」。 又非恬然不爲,若唐之僖、昭也。不爲則 之事是也。故小貞則吉也。 政,諸侯復朝,謂以道馴致,爲之不暴也。 有所不下,是威權不在己也。 不下,是「屯其膏」,人君之屯也。既膏澤 非有損也。 之輔,則能濟屯矣。以其无臣也,故「屯其 而欲驟正之,求凶之道,魯昭公、高貴鄉公 五居尊得正,而當屯時,若有剛明之賢爲 屯,以至於亡矣。 人君之尊,雖屯難之世,於其名位, 若盤庚、周宣脩德用賢,復先王之 唯其施爲有所不行,德澤有所 小貞則漸正 威權去己,

青澤不下及,是以德施未能光大也,人君

之屯也。

也。若陽剛而有助,則屯既極可濟矣。進,窮厄之甚,至於「泣血漣如」,屯之極居則不安,動无所之,乘馬欲往,復班如不大以陰柔居屯之終,在險之極,而无應援,上六,乘馬班如,泣血漣如。

象曰:「泣血漣如」,何可長也?

而伸之,觸類而長之,天下之能事畢矣!時也。分三而又兩之,足以包括衆理,引此,其能長久乎? 夫卦者事也,爻者事之此,其能長久乎? 夫卦者事也,爻者事之

物之穉也。」屯者物之始生,物始生穉小,也。物生必蒙,故受之以蒙。蒙者蒙也,蒙、序卦》:「屯者盈也,屯者物之始生

象 曰:

「屯其膏」,施未光也。

必行之物,始出未有所之,故爲蒙。及其險,遇險而止,莫知所之,蒙之象也。水,下,艮爲山,爲止,坎爲水,爲險。山下有蒙昧未發,蒙所以次屯也。爲卦,艮上坎

三瀆,瀆則不告。利貞。蒙,亨,匪我求童蒙,童蒙求我。初筮告,再

,則爲亨義

也。 蒙,乃童蒙來求 蒙有開發之理,亨之義也。 己,而後應之, 下,爲君所信嚮,當以道自守,待君至誠 而方在童蒙,與二爲正應,而中德又同,能 童蒙,童蒙求我」,五居尊位,有柔順之德, 二,二乃發蒙者也,故主二而言。 致亨之道。 六五爲蒙之主,而九二發蒙者 二之道以發其蒙也。二以 我謂二也。二非蒙主,五既 則能用其道,匪我求於童 於我也。筮,占决也。「初 卦才時中,乃 剛中之德 「匪 順異於 一我求 求 在

正,又二雖剛中,然居陰,故宜有戒。則瀆慢矣,故不告也。 發蒙之道,利以貞筮告」,謂至誠一意以求已則告之。 再三

「蒙亨」,以亨行時中也。「匪我求童蒙,童蒙彖曰:蒙,山下有險,險而止,蒙。

求我」,志應也。

我,志應也」,二以剛明之賢處於下,五 中,得中則 必待人君致敬盡禮而後往者,非欲自爲尊 苟自求之,必无能信用之理。 童蒙居上,非是二求於五,蓋五之志應於 中也。「時」謂得君之應,「中」謂處得 也」,蒙之能享,以亨道行也,所謂 所爲,故爲昏蒙之義。 「蒙亨,以亨行 山下有險,内險不可處,外止莫能進,未知 二也。賢者在下,豈 大,蓋其尊德樂道,不如是不足與有爲也。 時也。 「匪我求童蒙,童蒙 口 自進 以求於 古之人所以 亨道 時 君 以 求 其 時

七一八

瀆蒙也。 「初筮告」,以剛中也。 「再三瀆,瀆則不告」,

象,「以

果行

育德」,觀

其

出

而

未

能

通

行

則

告之必 意 初筮 也 之道告 「煩數,不能誠一,則瀆慢矣,不當告也 」,求者告者皆煩瀆矣。 調調 不能信受,徒 而開發之。 誠 而來,求决其蒙,則當以 再三,煩數也。 爲 煩 瀆, 故 曰「瀆蒙 來 筮之 剛 中

蒙以養正 純 之至善也。 發 桂 陰皆處蒙者也 戒於二,實養蒙之道也。 一未發之蒙而養其正,乃作聖之功 而 辭 後 禁,則扞格 「利貞」,彖復 ,聖功也 蒙之六爻,二陽爲治蒙者, 而 伸其 難 勝。 義,以 未發之謂蒙,以 養 Ī 明 一於蒙 不 止 學 也 四 爲

也。若人蒙穉,未知所適也。君子觀蒙之一「山下出泉」,出而遇險,未有所之,蒙之象象曰:山下出泉,蒙,君子以果行育德。

初 蒙之欲 梏,則 ;六,發蒙,利用刑人,用説桎梏,以往,吝。 雖 可 梏。 嘗偏 立而 道。 以 使心未能喻,亦當畏威以從,不敢肆其昏 之初,威之以刑者,所以説去其昏蒙之桎 設刑罰以齊其衆,明教化以善其俗,刑罰 知畏,然後從而教導之。 初以陰暗居下,下民之蒙也。 爻言發之之 以果决其所行, 以 畏 養育其 廢也。 而 移 桎梏,謂 後教化行,雖聖人尚 發下民之蒙,當 善教 終不能發,苟免而无耻,治化不可 風易俗矣。 然 明 後 无 故爲政之始,立法居先。 德 由 漸能 拘 也 而 東 觀其始出 人。 知 苟專用刑以 也。 善道 明刑 既 不去 自古聖王爲治 以刑禁率之, 德 禁以示之,使之 而 M 革 未 而 其 其 不尚 有所 爲 昏蒙之桎 非 治,則 心 刑, 向 治蒙 雖 則 未 則

得而成矣,故以往則可吝。

复知教化在其中矣。 治蒙之始,立其防限,明其罪罰,正其法处,使之由之,漸至於化也。或疑發蒙之也,使之由之,漸至於化也。或疑發蒙之象曰:「利用刑人」,以正法也。

九二,包蒙吉,納婦吉,子克家。 廣 故雖婦人之柔闇,尚當納其所善,則其明 者也。荷恃其明,專於自任,則其德不弘 則吉也。卦唯二陽爻,上九剛 之蒙,成治蒙之功。其道廣,其施博,如是 也。必廣其含容,哀矜昏愚,則能發天 與六五之君相應,中德又同,當時之任者 包,含容也。 二有剛中之德,而應於五 又 以諸爻皆陰,故云婦。 二居蒙之世,有剛明之才,而 ,用於時 而過,唯九 堯、舜之 圃 獨 明 下

也。二能主蒙之功,乃人子克治其家也。皆在於二。以家言之: 五,父也;二,子子能治其家也。五既陰柔,故發蒙之功,爲善」也。二能包納,則克濟其君之事,猶聖,天下所莫及也,尚曰「清問下民,取人

能尸其事乎?
动。苟非上下之情相接,則二雖剛中,安之情相接,故得行其剛中之道,成發蒙之之情相接,故得行其剛中之道,成發蒙之子而克治其家者,父之信任專也。二能主

象曰:「子克家」,剛柔接也。

乃見人之多金,説而從之,不能保有其身世。正應在上,不能遠從。近見九二爲群也。正應在上,不能遠從。近見九二爲群也。正應在上,不能遠從。近見九二爲群三以陰柔處蒙闇,不中不正,女之妄動者

者也,无所往 圃 利矣。

象曰:「勿用取女」,行不順也。

女之如此,其行邪僻不順,不可取也。

六四,困蒙,吝。

發其蒙,困於昏蒙者也,其可吝甚矣。 四以陰柔而蒙闇,无剛明之親援,无由自

不足也,謂可少也

象曰:困蒙之吝,獨遠實也。

賢明之人也,不能親賢以致困,可吝之甚 明矣,故困於蒙。可羞吝者,以其獨遠於 蒙之時,陽剛爲發蒙者。 於剛,乃愚蒙之人,而不比近賢者,无由得 四,陰柔 而 最遠

也。

「實」謂陽剛也

六五,童蒙,吉。 童 任 五以柔順居君位,下應於二,以柔中之德 ,取未發而資於人也。爲人君者,苟能 剛明之才,足以 治天下之蒙,故吉也。

至誠任賢以成其功,何異乎出於己也?

象曰: 童蒙之吉,順以巽也。

舍己從人,順從也。降志下求,卑巽也。 能如是,優於天下矣。

上九,擊蒙,不利爲寇,利禦寇。

九居蒙之終,是當蒙極之時。人之愚蒙既

之。 極,如苗民之不率,爲寇爲 然九居上,剛極而不中,故戒「不利爲 亂者,當 擊伐

爲寇也。若舜之征有苗,周公之誅三監, 寇」。治人之蒙,乃禦寇也。 肆爲剛暴,乃

象曰:「利用禦寇」,上下順也 禦寇也,秦皇、漢武窮兵誅伐,爲寇也。

暴,下得擊去其蒙,禦寇之義也。 「利用禦寇」,上下皆得其順也。 上不爲過

需、《序卦》:「蒙者蒙也,物之穉也。 物穉 IE

則吉者,當辯

也

不 雲上於天,有蒸潤之象。 需者,飲食也,故曰「需者飲食之道 也。」夫物之幼穉,必待養而 爲之阻,故須待而後進也。 乾健之性,必進者也。 大意,須待之義、《序卦》取所須之大者耳。 物,故需爲飲食之道,所以次蒙也。 可 不養也,故受之以需,需者飲食之道 乃處坎險之下,險 飲食所以潤 成。 養物之所 卦之 也。 益於

需,有孚,光亨,貞吉,利涉大川。 此 需者,須待也。 涉 有孚則光明而 進,而遇險未能 正之德,而誠信充實 卦才言之,五居君位,爲需之主,有剛健中 大川」也。 而 需 ,何所不濟? 凡貞吉,有既正且吉者,有得 能亨通,得貞正而吉也。 進也,故爲需待之義。 以二體言之、乾之剛 於中,中實有孚也。 雖險无難矣,故「利 健 以 以 +

義不困窮矣。 彖曰:需,須也。險在前也,剛健而不陷,其

矣」。 需待而 剛健之人,其動必躁,乃能需待而 需之義,須也。 至善者也。 輕動,故不陷 行也。 故夫子贊之云「其義不困 於險,其義不至於 以乾之剛健,而能 以險在於前,未可 困 動 需 遽進,故 一。處之 窮也。 待,不

「以正中」,兼二言,故云「正中」。

「以正中」,兼二言,故云「正中」。

「以居天位而得正中也。居天位,指五。

以居天位而得正而吉也。所以能然者,

而能亨通,得貞正而吉也。所以能然者,

以居天位而得正中也。居天位,指五。

道之至善也。以乾剛而能需,何所不利?既有孚而貞正,雖涉險阻,往則有功也,需

利涉大川」,往有功也。

之義。 成雨。 雲氣 日 天、需而爲雨之象,懷其道德,安以待時 畜其才德 飲食以養其氣體,宴樂以和其心志,所謂 居易以俟命」也。 雲 蒸而上 上於天,需 雲方上於天,未成雨也,故爲 陰陽之氣交感而未成 而未施於用也。 升於天,必待陰陽和洽,然後 君 子以 飲 君子觀雲上於 食 雨 「宴樂。 澤,猶君子 須 待

九二,需于沙,小有言,終吉。

象曰:「需于郊」,不犯難行也。 初九、需于郊、利用恒、无咎。 則 遠,利在安守其常,則无咎也。不能安常 需者,以遇險,故需 故爲「需于郊」。 躁 動犯難,豈能 郊,曠遠之地也。 需於遠而无過也? 而後進。 初最遠於險。 「利用恒,无 處於曠

咎」,未失常也。

須,而恬然若將終身焉,乃能 常也。君子之需時也,安静自守,志雖有 可以无咎矣。雖不進,而志動者不能安其 地 ,不犯險難 而 進 復 宜 安處 用常也。 不失其常 則

善也。 言語之傷,而无大害,終得其吉也 以剛陽之才,而居柔守中,寬裕自處,需之 小者至於有言,言語之傷,至小者也。二 已「小有言」矣。凡患難之辭,大小有殊。 坎爲水,水近則有沙。二去險漸近,故爲 需于沙」。 雖去險漸近,而未至於險,故 漸近於險難,雖未 至 於患害, 小 有

九三,需于泥,致寇至。 以吉終也。 象曰:「需于沙」,衍在 雖 衍,寬綽也。 二雖近險,而以寬裕居中,故 小有言語及之,終得其吉,善處者也 中也。雖「小有言」,

剛

健上進者也。

初能需待於曠遠之

曠遠者,不

犯

冒險

難 而

行

也。

陽之爲

至也。 泥,逼於水也。 動之象,故致寇也。 三,剛而不中,又居健體之上,有進 既進 逼於險,當致寇 苟非敬慎,則致 難 喪 之

象曰:「需于泥」,災在外也。 不敗也。 自我致寇,敬

敗矣。

非戒其不得進也,直使敬慎毋失其宜耳。 需之時,須而後進也。 災,患難之通 三切逼上體之險難,故云「災在外也」。 致,若能「敬慎」,量宜而進,則无 致寇,由己進而迫之,故云自我。 寇自己 稱 当對告 而言則分也。 其義在相 時 喪敗 而 三之 動, 也。

難 傷於險難者也,故云「需于血」。 四以陰柔之質處於險,而下當三陽之進, ,則不能安處,必失其 穴,物之所安也。 順以從時,不競於 居,故云「出自 既傷于險

其道也

六

四,需于血,出自穴。

競者 險難 之德,徒以剛競於險,適足以致凶耳。 也。 ,所以不至於 若陽居之,則必凶矣。 N N 也。 以柔! 居 蓋无 陰,非 中正 能

象曰:「需于血」,順以 退,是順從以聽於時,所以不至於凶也。 四以陰柔居于險難之中,不能固處,故退 出自穴」。蓋陰柔不能與時競,不能 聽 也

則

矣。 以俟之,所須必得也。 五以陽剛居中,得正位乎天位,克盡其道 以此而 需,何需 不獲? 既得貞正,而 故宴安 所需 酒 食

九五、需于酒食、貞吉。

象曰:「酒食,貞吉」,以中正 ·需于酒食」而貞且吉者,以五得中正 也

而

盡

必遂,可謂吉矣。

終吉。 上六,人于穴,有不速之客三人來,敬之,

七二四

吉也。 理? 陰位,非所止之正,故无争奪之意,敬之則 得爲安乎? 曰:三陽乾體,志在上進,六 誠盡敬以待之,雖甚剛暴,豈有侵陵之 安處,群剛之來,苟不起忌疾忿競之心,至 物,需時而進者也。需既極矣,故皆上進。 安也。安而既止,後者必至。「不速之客 終,終則變矣。 需 三人」,謂下之三陽。乾之三陽非在下之 止於六,乃安其處,故爲「入于穴」。穴,所 不速」,不促之而自來也。 以 險 故終吉也。 在 前 需 在需之極,久而得矣。 時 或疑以陰居三陽之上, 而 後 進。 上六既需得其 上六 居險之

未大失也。 象曰:不速之客來,「敬之終吉」,雖不當位,

爲所安。象復盡其義,明陰宜在下而居「不當位」,謂以陰而在上也。爻以六居陰

陽不能陵,終得其吉。雖「不當位」,而未上,爲「不當位」也。然能敬慎以自處,則

乾坎 上下

至於大失也。

融强,所以訟也。 以二體言之,上剛下險, 上黎言之,天陽上行,水性就下,其行相 上象言之,天陽上行,水性就下,其行相 上黎言之,天陽上行,水性就下,其行相 是,所以成訟也。以二體言之,上剛下險, 以為 ,所以成訟也。以二體言之,上剛下險, 以本,於此就下,其行相

訟,有孚,窒惕,中吉,終凶。

須窒塞未通。不窒,則已明无訟矣。事既訟者,與人争辯,而待决於人,雖有孚,亦妄,凶之道也。卦之中實,爲有孚之象。訟之道,必有其孚實。中无其實,乃是誣

得中則吉也。「終凶」,終極其事則凶也。未辯,吉凶未可必也,故有畏惕。「中吉」,

利見大人,不利涉大川。

「不利涉大川」也。平之事,當擇安地而處,不可陷於危險,故人則能以其剛明中正决所訟也。訟非和人則能以其剛明中正决所訟也。訟非和訟者,求辯其曲直也,故利見於大人。大

彖曰:訟,上剛下險,險而健,訟。

訟也。險而又健,是以訟也。若健而不險,不生訟也;險而不健,不能爲險健相接,内險外健,皆所以爲訟也。訟之爲卦,「上剛下險」,險而又健也。又

孚信,亦必艱阻窒塞而有惕懼。不窒則不中,中實之象,故爲有孚。處訟之時,雖有自外來而成訟,則二乃訟之主也。以剛處訟之道固如是。又據卦才而言,九二以剛訟有孚,窒惕,中吉」,剛來而得中也。

義。 得中而言,乃善也,爻則以自下訟上爲 善也,而爻中不見其善。蓋卦辭取其有孚 之由爲義者,此是也。 訟而不過之義,是以吉也。 由,則更不言所變之爻也。 成訟矣。 二以 陽剛 又居險陷之中,亦爲 ,自外來 卦義 而 得中, 卦有更取 據 不取 窒塞 卦 爲 辭 成 以 惕 卦之 二乃 成 懼之 剛 桂 來

「終凶」,訟不可成也。

意於其事則凶矣,故曰「不可成也」。 成謂訟非善事,不得已也,安可終極其事? 極

訟者,求辯其是非也。

窮盡其事也

五是也。 其人,則或不得其中正也。中正大人,九故「利見大人」,以所尚者中正也。聽者非訟者,求辯其是非也。辯之當,乃中正也,

七二六

不利涉大川」,入于淵也。

中正險陷之象。險,則陷其身矣,乃入于深淵也。卦中有險人則陷其身矣,乃入于深淵也。卦中有與人訟者,必處其身於安平之地,若蹈危

天上水下,相違而行,二體違戾,訟之由象曰:天與水違行,訟,君子以作事謀始。

始之義廣矣,若慎交結、明契券之類是也。始,絶訟端於事之始,則訟无由生矣。謀知人情有争訟之道,故凡所作事,必謀其也。若上下相順,訟何由興?君子觀象,也。若上下相順,訟何由興?君子觀象,

初六,不永所事,小有言,終吉。

有言」,終得吉也。有言,災之小者也。不矣。以上有應援,而能不永其事,故雖「小可長之事,以陰柔之才而訟於下,難以吉其事,則雖「小有言」,終得吉也。蓋訟非訟之初,因六之才,爲之戒曰:若不長永訟之親居下,不能終極其訟者也。故於六以柔弱居下,不能終極其訟者也。故於

永其事而不至於凶,乃訟之吉也。

象曰::「不永所事」,訟不可長也。

六以柔弱而訟於下,其義固不可長永也。

即戒,訟非可長之事也。水其訟,則不勝而禍難及矣。又於訟之初

雖「小有言」,其辯明也。

爲對敵也。 爲對敵也。

爲敵。五以中正處君位,其可敵乎? 是九二自外來,以剛處險,爲訟之主,乃與五二五相應之地,而兩剛不相與,相訟者也。

爲訟 而義不克也。 若能知其義之不可,退

歸 而 逋 避,以寡約自 處 ,則得无過眚也。

必逋者,避爲敵之地也。三百户,邑之至 小者。若處强大,是猶競也,能无眚乎?

告,過也,處不當也,與知惡而爲有分也。

象曰:「不克訟」,歸逋,竄也。

所也。 義既不敵,故不能訟,而逋竄,避去其

自下訟上,患至掇也。

自下而訟其上,義乖勢屈,禍患之至,猶拾

掇而取之,言易得也。

六三,食舊德,貞,厲終吉。

自守。 則終必獲吉也。 而受,「食舊德」謂處其素分。「貞」謂堅固 二剛之間,危懼,非爲訟者也。 三雖居剛而應上,然質本陰柔,處 「厲終古」謂 守素分而无求則不訟矣。 雖處危 地,能知 禄 者 險 危懼 稱 而 德 介

> 處 危謂在險而成乘皆剛,與居訟之時也。

或從王事无成

皆以陰柔不終而得吉,四亦以不克而渝得 則不永,三則從上,皆非能訟者也。二爻 從上而成不在己也。訟者剛健之事,故初 而從上九所爲,故曰「或從王事无成」,謂 柔,從剛者也,下,從上者也。三不爲訟,

吉,訟以能止爲善也

象曰:「食舊德」,從上吉也。 守其素分,雖從上之所爲,非由己也,故无

成而終得其吉也

九四,不克訟,復即命,渝安貞,吉。 也。 與對敵,其訟无由 克訟。三居下而柔,不與之訟。初,正應 四以陽剛而居健體,不得中正,本爲訟者 而順從,非與訟者也。 承五,履三,而 圃 應初。 興,故「不克訟」也。 四 雖 五,君也,義不 剛 健欲訟,无

九五,訟,元吉。 能如是,則爲无失矣,所以吉也。 象曰:「復即命,渝安貞」,不失也。

吉大而不盡善者有矣。正,所以元吉也。元吉,大吉而盡善也。以中正居尊位,治訟者也。治訟得其中

中正之道,何施而不元吉?象曰:「訟,元吉」,以中正也。

上九,或錫之鞶帶,終朝三褫之。

所獲,其能安保之乎? 故終一朝而三見輕牙,百其理也。設或使之善訟能勝,窮喪身,固其理也。設或使之善訟能勝,窮惡者也。人之肆其剛强,窮極於訟,取禍

象曰"以訟受服,亦不足敬也褫奪也。

窮極訟事,設使受服命之寵,亦且不足敬,

而可賤惡,况又禍患隨至乎?

而以順行,師之義也。以爻言之,一陽而之象。以二卦之義言之,内險外順,險道之象。以二卦之義言之,地中有水,爲衆聚上坎下。以二體言之,地中有水,爲衆聚。以二卦之義。以於訟也。爲卦,坤師、《序卦》:「訟必有衆起,故受之以師。」

陰之主而在上,君之象也。師以一陽爲衆爲衆陰之主,統衆之象也。比以一陽爲衆

師,貞,丈人吉,无咎。

陰之主而在下,將帥之象也

也。 吉 貞 尊 起 賈,則衆心畏服 賤,授之以衆,乃以衆心未服,請莊 尊嚴之稱。 而 師之道,以正爲本。 德業,衆所畏服,則是也。 則安能得人心之從? 不吉者。 於微賤 (爲主。 畏 M 不以正,民弗從也,强驅之耳。 所謂丈人,不必素居崇貴,但 也。 无咎也。 吉且 其動 ,遂爲大將,蓋其謀爲有以 帥 蓋有吉而有咎者,有无咎而 雖正 師 无咎,乃盡善也。丈人者, ,乃丈人矣。又如 總衆,非衆所尊信畏服 也,帥之者必丈人, 興 故司馬穰苴擢自微 師 動衆以 如 穰 苴 毒天下, 故師 淮 既 其 賈 使 陰 誅 才 爲 侯 將 則 以 莊

彖曰:「師」,衆也。「貞」,正也。能以衆

可以王矣。

從而歸正,王道止於是也。 能使衆人皆正,可以王天下矣。得衆心服

剛中而應,行險而順,

以順動,所謂義兵,王者之師也。上順下之君爲正應,信任之專也。雖行險道,而言二也。以剛處中,剛而得中道也。六五

以 咎也。 怨,民 此毒天下而民從之,吉,又何咎矣? 克,无咎謂合義。 民心從之者,以其義動也。古者東 師旅之興,不无傷財害人,毒害天下,然 心從也。 如是故吉而无咎。 「又何咎矣」,其義 吉謂 故 征 而 无 必 西

「地中有水」,水聚於地中,爲衆聚之象,故象曰:地中有水,師,君子以容民畜衆。

七二九

險,「行險而順」也。

七二.0

爲師也。君子觀地中有水之象,以容保其

民,畜聚其衆也。

初六,師出以律,否臧凶。

之所戒也 律 以 謂 初, 師 在 亦 在 號令 行 X 无法,幸而 以禁亂誅 邦國興師 則 師之始也,故言出師 師 道 雖 也。 節 丽 善 言 制 亦 暴 而言,合義理,則 善謂 ,律謂號令節制。 爲 X 不敗且勝者時有之矣,聖人 而 本, 所 ,雖使勝 動。 克 勝,凶 荷動 以 之義 捷,猶凶道也。 統 謂 制 不 殃 以 是以 及行 於衆。不以 行 民 義 師 害 律 師 則 之道 義 法 之道 雖善 也 也 制

象 X 日 師 道也 出 「師 當 以 出 律、失 以 律」,失律 律則 X 凶也 矣。雖幸 而勝 亦

師卦惟九二一陽,爲衆陰所歸,五居君位,九二,在師中吉,无咎,王三錫命。

善,則 將,閩 之力 閫 者有 三也。 居下 是 儒 其義最大。 不 既專意任,●復厚其寵數。 師之道,威和 道,不專則无 中道,故 外 其 重 有 矣,唯一 之事 而 論 而 而 正 能成 外之事 凡事至于三者,極也。 能 下不 應,二 魯祀周公以天子禮樂,以 專制其 古 致 則 師專主其事,而爲衆陰所歸,故 功 而 人臣之道,於事无所敢專, 信也。 者 專 ,得專制之。 一乃師 ൬ 成功之理,故得 並至則吉 无咎。 制之。 ,皆君所與 事, 安天下,故王 唯 之主,專 他卦九二爲六五 雖制之在己, 蓋恃 在 也。 師 而 蓋禮不稱則威 專 則 在 職 制 既 則 中 師 可。 當 錫 其 六五在上, 處 失 爲 專 爲周公能 爲 寵 事 之盡 自古 古。 爲 制 然 命 也 所 下 因 至 ៣ 也。 其 世 唯 任 于 凡 之 命 師 得

● 「意」,涂刻本作「倚」。

身所能爲者,皆所當爲也。蓋子之也」,未嘗以曾子之孝爲有餘也。蓋子之位,則爲周公之事。由其位而能爲者,皆位,則爲周公之事。由其位而能爲者,皆心,則爲周公之事。由其位而能爲者,皆禮樂,是不知人臣之道也。夫居周公之爲人臣不能爲之功,則可用人臣不得用之爲人臣不能爲之功,則可用人臣不得用之

命」,懷萬邦也。象曰:「在師中吉」,承天寵也,「王三錫

以恩命,褒其成功,所以「懷萬邦」也。發此義,與前所云世儒之見異矣。 王三錫權,而有成功之吉? 象以二專主其事,故王也。人臣非君寵任之,則安得專征之王也。

三居下卦之上,居位當任者也。不唯其才六三,師或輿尸,凶。

陰柔,不中正,師旅之事,任當專一

二既

故發此義。軍旅之事,任不專一,覆敗尸」,衆主也,蓋指三也。以三居下之上,功,若或更使衆人主之,凶之道也。「輿以剛中之才爲上信倚,必專其事乃有成以剛中之才爲上信倚,必專其事乃有成

倚付二三,安能成功? 豈唯无功,必以象曰:「師或輿尸」,大无功也。

必矣。

唯取其退之得宜,不論其才之能否也。 无咎。見可而 師之進,以 其仁深矣。 而 不能進而完師以退,愈於覆敗遠矣。可進 「左次」,退舍也。量宜進退,乃所當也,故 而克捷者也。 退,乃爲咎也。 强勇也。 進,知難 知不 易之發此義以示後世, 能 四 進 以 而退,師之常也。 柔 而 居陰,非 退 ,故左次。 能 度 進

六四,師左次,无咎。

凶也。

象曰:「左次无咎」,未失常也。

无咎。 必 行 爲 師 失 之道,因 也。 如 時 四 施 退 宜 次,乃得其 ,乃其常也 ,故左次未 宜,是 以

子輿尸,貞凶。 六五,田有禽,利執言,无咎。長子帥師,弟

長子 其罪 道 索 以 則 若 道。 生民之害,不 \overline{H} 凶 禽 當以 獵 毒 禽獸入于田中,侵害稼穑,於義宜獵 君位, 師之興,必以蠻夷猾夏,寇賊姦宄,爲 也。 也。 獸者也,非田 而 天下 取之,如此 討之也。 長子帥 若以 ,其咎大矣。 弟子,凡非長者也。 興師之主 可 弟子衆主之, 師。 懷 而動,乃得无咎。若輕 若秦皇、漢武皆窮山 來, 有 二在下 也,故言 禽也。任將授 「執言」,奉辭 然後 則 奉 而爲 興師 自古任將不 解 所 爲 師之主, 以 任 、誅之。 雖 也, 師之 將 林 正 以 之 明 動 取

> 子 專 儀 而 相州之敗是也 致 覆 敗 者 如晉 荷 林 父 邲之戰, 唐 郭

尸」,使不當也。 象曰:「長子帥師」,以中行也,「弟子輿

當也,其凶宜矣。行。若復使其餘者衆尸其事,是任使之不長子,謂二以中正之德合於上,而受任以

上六,大君有命,開國承家,小人勿用。 之深 挾其 有國 不可 不可 非一道,不 爲 有功也。 上,師之終也,功之成也。 卿大夫也。 慮遠 功 家 用 用 乎 丽 也,賞之以 也,故戒 戒也。 爲 開國,封之爲諸 ? 必皆君 政也。 漢 承,受也。 使 之英、彭所 此專言師終之義,不取爻 勿 金帛禄位可 小人平時易致驕盈,况 子 也,故 用。 侯也。 師 小人者,雖 大君以 成成以 以 旅 亡也。 也,不 之興,成 小人 承家, 爵 聖 命賞 可 有 有 使 功 功 功 以

順之極,師既終而在无位之地,善處而无義,蓋以其大者。若以爻言,則六以柔居

咎者也。

用」,必亂邦也。 象曰:「大君有命」,以正功也,「小人勿

有之矣。

一也,雖賞其功,小人恃功而亂邦者,古也,雖賞其功,小人則不可以有功而任用

大君持恩賞之柄,以正軍旅之功。師之終

故爲比也。又衆爻皆陰,獨五以陽剛居君也。爲卦,上坎下坤。以二體言之,水在也。爲卦,上坎下坤。以二體言之,水在比,親輔也。人之類,必相親輔,然後能比,親輔也。人之類,必相親輔,然後能比、《序卦》:「衆必有所比,故受之以比。」

比,吉,原筮,元永貞,无咎。 位,衆所親附,而上亦親下,故爲比也

此三者,則无咎也。 此三者,則无咎也。 此三者,則无咎。。 以之。 於謂可以常久,貞謂得正道。 其可比者而比之。 統謂占决卜度,非謂以 道,苟非其道,則有悔咎,故必推原占决, 道,苟非其道,則有悔咎,故必推原占决, 此三者,則有悔咎,故必推原占决, 是之此下,必有此三者,下之從上,必有其 此、吉道也。人相親比,自爲吉道。故《雜 此、吉道也。人相親比,自爲吉道。故《雜

不寧方來,後,夫凶。

也。」又曰:「是謂我非夫。」凡生天地之間乎? 夫,剛立之稱。《傳》曰:「子南,夫後,則雖夫亦凶矣。夫猶凶,况柔弱者汲以求比。若獨立自恃,求比之志不速而汲以求比。若獨立自恃,求比之志不速而

凶矣。 持,相待莫先也。 志相求。 之至, 未有能 欲比之志不可緩也 上下合志以相從。苟无相求之意,則離 下,下親輔於上,親戚朋友鄉黨皆然,故當 一、未有 大抵人情相求則合,相持則睽。 不相親 兩志不相求,則睽矣。 獨 比 立 人之相親 而能自存者也。 者 也。比之道 固有道,然 君懷 雖 一,由 撫 剛 相 而 而 其 兩 柔

以剛處中正是也。

彖曰: 比吉也。

比,輔也,下順從也 輔也。 比 以陽居尊位,群下順從以親輔之,所以 吉道也。 比吉也」,比者吉之道也。 也 「下順從也」,解卦所以爲比也。 「比,輔也」,釋比之義,比者相 物相親比,乃 爲 五 親

原筮,元永貞,无咎」,以剛中也。 推原筮决相比之道,得「元永貞」而後可以

> 卦辭本泛言比道,彖言[元永貞]者,九五 爲 居中正,盡比道之善者也。 无咎。所謂「元永貞」,如 君 德 ,元也。 居中得正,能 五是 以陽剛當尊位 永 也 一,以 而 貞 陽 也。 剛

七三四

「不寧方來」,上下應也。 相應也。 下民之附,則危亡至矣。故上下之志,必 之比,以安民也。以後王之私言之,不求 相應也。以聖人之公言之,固至誠求天下 立,故保民以爲安。不寧而來比者,上下 民不能自保,故戴君以求寧,君 人之生,不能保其安寧,方且 在卦言之,上下群陰比於五,五

「柔」,涂刻本作「强」。

「後,夫凶」,其道窮也

比其衆,乃「上下應也」。

來求附比

不

能

獨

疾 有 衆必相 親比,困 **不相** M 後,則不能成比,雖夫亦凶矣。 无所 比,而 親 比 而 致凶, 窮之道也。 後能遂其生。 能遂者也。 若相從之志 天地之間,未 示

象 日 地上有 水,比,先王以建 萬 國, 親

屈以

諸侯。

夫物 以爲比 侯,所以比天下也。 侯」。 相親比而无間者,莫如水在地上,所 也。先王觀比之象,「以建萬國 建立萬國,所以比民也,親撫諸 親

初六,有孚,比之无咎。

中心不信而親人,人誰與之? 初六,比之始也。相比之道,以誠信爲本。 有孚誠,乃无咎也。孚,信之在中也。 故比之始,

有孚盈缶,終來有他吉。

缶 誠信充實於内,若物之盈滿於缶 ,質素之器。 言若缶之盈實其中,外不 中也。

> 外也。 外以求比乎? 加文飾,則終能來有他吉也。 若誠實充於内,物无不信 誠信中實,雖他外皆當 他,非 · 贵 此 用 飾

象曰:比之初六,有他吉也。

而來從。孚信,比之本也。

吉? 上六之凶,由无首也 孚,則終致有他之吉。其始不誠,終焉得 言比之初六者,比之道在乎始也。始能 有

六二,比之自内,貞吉。

也。 自失也。 己。 才而 以中正之道應上之求,乃自 比者也。二處於內,「自内」謂 二與五爲正應,皆得中正,以中正之道 汲汲 己以得君,道合而進,乃得正而吉也。 用,雖在乎上,而以身許國,必由於 以 求比者,非君子自重之道,乃 内 由己 也,不自失 也 相 擇

象曰:「比之自内」,不自失也。

後出也。 卷出也。 後出也。 一之道,降志辱身,非自重之道也。 故伊上之道,降志辱身,非自重之道也。 故伊上之道,降志辱身,非自重之道也。 故伊上之道,降志辱身,非自重之道也。 故伊上之道,降志尽,以待上之

六三,比之匪人。

義,各不同也。 故可傷。二之中正,而謂之匪人,隨時取也。比於匪人,其失可知,悔吝不假言也,不中,二,存應而比初。皆不中正,匪人三不中正,而所比皆不中正。四,陰柔而

六四,外比之,貞吉。 得悔吝,其亦可傷矣。深戒失所比也。 人之相比,求安吉也,乃比於匪人,必將反象曰:「比之匪人」,不亦傷乎!

貞正 又比賢從上,必以正道則吉也。 人,能比於剛明中正之賢,乃得正而吉也。 以六居四,亦爲得正之義。又陰柔不中之 上也。親賢從上,比之正也,故爲貞吉。 與,宜也。 四 與初不相應,而 而 吉也。 五,剛陽中正,賢也,居尊 君臣 五比之,外比於五,乃 相比,正也。相比 數説 位 得 相 相

須,其義始備。

象曰:外比於賢,以從上也。

居君位,四比之,是比賢且從上,所以「外比」,謂從五也。五,剛明中正之賢,又

誠,吉。 九五,顯比,王用三驅,失前禽,邑人不

吉也。

誠意以待物,恕己以及人,發政施仁,使天人君比天下之道,當顯明其比道而已。如五居君位,處中得正,盡比道之善者也。

民

皥

皥,而莫知爲之者也。「邑人不誠

言其至公不私,无遠邇親疎之别也。

追,來者則取之也。此王道之大,所以

比於物,若田之三驅,禽之去者,從

而

不

其

天下自然來比。來者撫之,固不煦煦然求

矣,故曰「失前禽」也。王者顯明其比道,

命者,不出而

反

之正,取三驅爲喻,曰「王用三驅,失前禽, 下蒙其惠澤,是人君親比天下之道也。 去,不忍盡物,好生之仁也。只取其不用 子之畋,圍合其三面,前開一路,使之可 子不合圍」也。成湯祝網,是其義也。天 也,故推其仁心爲三驅之禮,乃禮所謂「天 邑人不誡,吉」。先王以四時之畋不可廢 能得天下之比乎? 故聖人以九五盡比道 違道干譽,欲以求下之比,其道亦狹矣,其 人者也。禽獸前去者皆免 若乃暴其 小仁, 如 於鄉黨親戚,於衆人,莫不皆然,「三驅,失 身誠意以待之。 比君之道也。用之與否,在君而已,不可 臣於君言之,竭其忠誠,致其才力,乃顯其 无私治天下,於顯比見之矣。非惟人君比 不期誡於居邑,如是則吉也。 都,諸侯國中也。 邑者,居邑,《易》中所言邑皆同。王者所 可巧言令色,曲從苟合,以求人之比己也。 阿諛逢迎,求其比己也。在朋友亦然,脩 天下之道如此,大率人之相比莫不然。 親己與否,在人而已,不 誠,期約也。 聖人以大公 待物之一,

以

天下孰不親比於上?

象曰:顯比之吉,位正中也

前禽」之義也

顯比 處正 得中也,比與隨是也。言「中正」者,得中 爲善,故云正中。凡言「正中」者,其處 一中之地,乃由正中之道也。比以不偏 所以吉者,以其所居之位 得正 中 也。 Ĩ

七三

與正也、訟與需是也。

舍逆取順,失前禽也。

言來者撫之,去者不追也。 逆,來者爲順也。故所失者前去之禽也, 去者皆免矣。比以向背而言,謂去者爲

「邑人不誠」,上使中也。

不期誡於親近,上之使下,中平不偏,遠近

上六、比之无首、凶。

始比不以道,隙於終者,天下多矣。 一大陰柔不中,處險之極,固非克終者也。 之无首,至終則凶也。此據比終而言。然 之无首,至終則凶也。此據比終而言。然 者或有矣,未有无其始而有終者也。故比 者或有矣,未有无其始而有終者也。故比 者或有矣,未有无其始而有終者也。故比

象曰:「比之无首」,无所終也。

也」。 違。始不以道,終復何保? 故曰「无所終此既无首,何所終乎? 相比有首,猶或終

異乾上下

六四畜諸陽爲成卦之義,不言二體,蓋 聚者小。 志,是以爲畜也。 所説,得位得柔,巽之道也,能畜群陽之 畜道之小者也。又四以一陰得位,爲五陽 順,唯能以巽順柔其剛健,非能 爲巽所畜,故爲 之物,乃居巽下。夫畜止剛健,莫如巽順 也,止則聚矣。爲卦,巽上乾下。 比,則志相畜,小畜所以 畜。」物相比附 小畜,《序卦》:「比必有所畜,故受之以小 所畜之事小,以陰故也。 則爲聚,聚,畜也。 畜也。 小畜謂 然巽,陰也,其體柔 以 次比也。 小 畜大,所 力止之也, 乾在上 又相 彖專以 畜, 止

其重者。

小畜,亨,密雲不雨,自我西郊。

陽者四,畜之主也。 四遠、故云郊。 加 東北,陽方。 雲之畜聚雖密,而不成雨者,自西郊故 陽倡,不順也,故不和,不 成雨。陽倡而 雲,陰陽之氣。 不能成雨。 西南,陰方。自陰倡,故不 以人觀之,雲氣之興,皆自 陰 據 二氣交 和,順 四 而言,故云自我。畜 也,故 而 和, 和 則 和 則相畜固 不 能 若陰 成 也。 雨 和 先 而

彖曰: 畜也。 字 重 得位也,上下五陽皆應之,爲所 言成卦之義也。 , 亦文勢然也 卦名,文勢當然。 陰 小畜,柔得位而上下應之,曰小畜 而 彖解成卦之義,而 畜 五陽,能係 以陰居四,又處 單名卦,惟革有「曰」 圃 不 能 加 固,是以爲小 「曰」字者,皆 畜也。 上位,柔 以

健而巽,剛中而志行,乃亨。

剛。 則 以 以成卦之義言,則爲 志在於行也。 二五居中,剛中也。 陽 排 言畜陽 才言 爲 剛 也。 中。 則 剛居中爲剛 内 以 才如是,故畜 柔巽,言能亨則 健 陽性 而 陰畜 外異,健 上進,下復乾體 陽, 而 得 以卦才言, 而 雖 中,又爲中 能異 由 小而能 剛 中。 也。

「密雲不雨」,尚往也。「自我西郊」,施未

亨也。

行也。

象曰:風行天上,小畜,君子以 故不 而上 畜道 之不能成大,猶西郊之雲不能成雨 而 和 一,故不 和 不能成大,如密雲而 則相 而 不能成雨,其功施未行也。 成雨 固 而 成 蓋 雨 自我陰方之氣先倡 二氣 不成 懿 不 雨。 文德。 和 陽 也。 陰陽 小畜 尚 交

乾之剛

健

而

爲巽所畜。

夫剛

健之性,惟

初

與

則道 爲 德。 小畜之象,以懿美其文德,文德方之道 小 古 柔 小也 畜 制 順 德經綸之業,小則文章才藝。 畜聚 也。 其 爲 剛 能 爲藴畜之義。 君子 畜 健 止 也,但柔 之, 觀小畜之義,以懿美其文 雖 順 口 君子所蕴畜者,大 以 以 擾 畜 係之耳,故 止之,然 君子觀 非 爲 能

初九,復自道,何其咎? 有 如是則有咎之義。 善補過 上,乃其道也,故云「復自道」。 才,足以上進而復,與在 何過咎之有? 初九陽爻而 「无咎」者,如是則无 過]咎,故云「何其咎」,无咎之甚明 也」。 乾體。 雖 无咎而又有吉也。 使爻義本善,亦不害於不 初九乃由其道而行,无 陽在上之物,又剛健之 咎矣,故云「无咎者, 古。 上同志,其進復於 復既自道 諸爻言 也。

> 陽 四 爲正應,在畜時乃相畜者也。 剛 之オ, 由 其 道 뻾 復 /,其 義 古 也

九二、牽復、吉。 曰:牽復在中,亦不自失也 雖在 畜 體 也。 夫同 畜於乾,而反與二相牽,何也? 則時已變矣,尚何教誡乎? 皆以陽剛居中,爲陰所畜,俱欲上復。 爻之辭,皆謂如是,則可 二陽並進,則陰不能勝,得遂其復矣,故吉 二以陽居下體之中,五以陽居上 五 而 一陽也。 患 言,則異畜乎乾; 曰:遂其復,則離 四上,而爲其所畜則同,是同志者也 相 憂,二五 在易,隨時取義,皆如 同志,故相 全卦 畜 以 矣 如 而言,則 是。 乎? 五爲異體,異 牽 若已然, 連 此 體之中, 曰:凡 圃 陰 復。 五

也。 一居中得正 陽之復,其勢必强。 者也,剛 柔 進退,不 二以處中,故 失乎 中 雖 道

象

象

"「復自道」,其義吉也。

强於進,亦不至於過剛 過 剛 乃自失也。

爻止言牽復而吉之義,象復發明其在中

九三,輿説輻,夫妻反目。

視,不順其夫,而反制之也。 制陽,如夫妻之反目也。反目謂怒 行也。「夫妻反目」,陰,制於陽者也,今反 情相求也。又暱比而不中,爲陰畜 能制之者也。故説輻反目,三自爲也。 惑,既而遂反制其夫,未有夫不失道 也,故不能前進,猶車輿説去輪輻,言不能 三以陽爻,居不得中,而密比於四,陰陽之 婦 人爲 目 制 而 夫 相 者 妻 寵

象曰:「夫妻反目」,不能正室也

不以道,故四得制之不使進,猶夫不能正 夫妻反目,蓋由不能正其室家也。 三自處

室家,故致反目也。 ,有孚,血去惕出,无咎。

> 以人君之威嚴,而微細之臣有能畜止 然,則不免乎害矣。 遠,其危懼免也。如此,則可以无咎。不 其孚誠以應之,則可以感之矣。 畜衆陽者也,諸陽之志係乎四。四苟欲以 孚誠,則五志信之,從其畜也。 四 力畜之,則一柔敵衆剛,必見傷 於畜時處近君之位,畜君者也。 此以 柔畜剛之道也。 卦 故其傷害 害, 獨 若 内有 唯

者,蓋有孚信以感之也。

象曰:「有孚」「惕出」,上合志也。

者也。 惕出而无咎也。 四既有孚,則五信任之,與之合志,所以得 五既合志,衆陽皆從之矣。 惕出則血去可知,舉其輕

九五,有孚攣如,富以其鄰。

尊位, 小畜,衆陽爲陰所畜之時也。五以中正居 孿如 加 謂 有孚信,則其類 牽 連 相從也 皆應之矣,故曰 五 必 援挽,與之

七四一

七四二

下 必攀挽於上,期 爲小人所困 勢,如富者推 相 在下之助以成其力耳 ,與之戮力,非 濟 是 一, 正 以 其 其 人 財 於同進,在上者必援 獨推 力與鄰比共之也。 鄰 爲 群邪所厄 己力以及人也, 也 五 以 1,則在 居 尊 固 引 位 下 君 資 於 者 子 之

象曰:「有孚孿如」,不獨富也。

上九 唯 衆同欲,不獨 有孚攣如」,蓋 ,既雨既處,尚德載,婦貞厲 其至誠,故得衆力之助,而 有 其 其 富 鄰類皆牽攣 也。 君子之處 能 濟 而從之, 其 難 也 厄 與

既和而 載 極 而 九以巽 既 而 止 處」,止也。 散 四 者 用 止,畜之道成矣。 也 順之極,居卦之上,處畜之終,從畜 柔巽之德,積滿而至於成 一,爲 小 畜畜之小,故 四 陰之畜陽,不和 所止 也。 大畜 極 既 而 雨, 成。 畜之大,故 則不 也。 一尚 能 和 止。 也。 陰 德

> 安有 以柔 柔 載路。」「婦貞厲」,婦謂 可 不 之畜 婦制其夫,臣制其 而 戒 乎? 制 剛 剛 非 ,婦若貞固 載,積滿 朝 夕 也。 君,而能安者乎? 守此,危厲 能 陰。 成 \sim 詩》云 以 由 陰 積 之道 而 累 畜 而 陽, 也

月幾望,君子征凶。

也。 於陽 畜其 月望 矣,尚何戒 敵矣,君子 陰已能畜陽,而云幾望,何也? 志 則 幾望,將盈 ጢ 也,非 X 與 矣。 乎? 動 日 力能 敵 則 於幾望 之時。 矣。 凶 制 也。 幾望,言其 也。 而 若已 君子謂陽。 爲之戒曰 然不已,則將 望, (盛將 則 此 陽已 以 征, 敵 婦 柔 也 消 動 將

象曰:「既雨既處」,德積載也。「君子征

凶」,有所疑也。

極 既 ,君子動則有 雨 既 處」,言畜 M 道 也 積 滿 陰 而 敵 成 陽 也 則 必消陽, 將盛 履

虎尾,不咥人,亨。

若前知疑慮而警懼,求所以制之,則不至小人抗君子則必害君子,安得不疑慮乎?

第 党 上 下

於凶矣。

也。 畜 足道,故《易》中唯言柔 踐,履於物爲藉,以柔藉剛,故爲履 之道也,故爲履。 分,尊卑之義,理之當也,禮之本也,常履 天上澤下。天而在上,澤而處下,上下之 美惡之分,是「物畜然後有禮」,履所以繼 履。] 夫物之聚,則有大小之别,高下之等, 履、《序卦》:「物畜然後有禮,故受之以 剛履柔,而曰柔履剛者,剛乘柔,常理 也。 言履藉於剛,乃見卑順説應之義 履,禮也。 禮,人之所履也。 履,踐也,藉也。 乘剛,不言剛乘 履物爲 也。 爲卦, 柔 不 不

> 之至當也。人之履行如此、雖履至危之 地,亦无所害。 柔履藉於剛,上下各得其義,事之至 履,人所履之道 故「履虎尾」而 也。 天在 上 丽 澤 不見咥嚙 處 順 下, 理 以

彖曰:履,柔履剛也。

所以能亨也

當,雖履虎尾,亦不見傷害。以此履行,其乎陽,天下之至理也。所履如此,至順至説順應乎乾剛而履藉之,下順乎上,陰承説以陰柔履藉乾之陽剛,柔履剛也。兑以説而應乎乾,是以「履虎尾,不咥人,亨」。

亨可知。

剛

中正,履帝位而不疾,光明也

是也。光明,德盛而輝光也。履道之至善,光明者也。疾謂疵病,夬履九五以陽光中正,尊履帝位,苟无疾病,得

象曰:上天下澤,履,君子以辯上下,定

七四三

民志。

也。 上下无定志也。 之何其可一也? 欲其不亂,難矣! 于富侈,億兆之心交騖於利,天下紛然,如 庶士至于公卿日志于尊榮,農工商賈日 限,故皆有定志而天下之心可一。後世 有預於己也。 而進之。 終身居之,得其分也。 可以言治; 下之分明,然後民志有定,民志定, 象,以辯别上下之分,以定其民志。 履當如是,故取其象而爲履。 天在上,澤居下,上下之正理也。 ,使各當其分,以定民之心志也。 古之時,公卿大夫而下,位各稱其德 士脩其學,學至而君求之,皆非 民志不定,天下不可得 農工商賈勤其事 君子觀履之象,而分辯上 位未稱德,則君 君子觀 ,而所享有 人之所 然後 而治 此 夫 履 志 自 舉 上 之 由

> 履不 善,乃守其素履者也 其進也將有爲也,故得其進則有爲 往則有咎。 耳,非欲有爲也。 之素,則其進 素而往,則无咎矣。 夫人不能自安於貧 也,而陽剛之才,可以上進,若安其卑下之 處 者,行之義。 賢者則安履其素,其處也樂, 也乃貪躁 既得其進,驕溢必矣,故 初處 而 至下 動,求去乎貧賤 素 在 而 下 賤 者

象曰:素履之往,獨行願也。

戰于中,豈能安履其素也?耳。獨,專也。若欲貴之心與行道之心交好。獨,專也。若欲貴之心與行道之心交安履其素而往者,非苟利也,獨行其志願

九二,履道坦坦,幽人貞吉。

上進,故有幽人之戒。恬之人處之,則能貞固而吉也。九二陽志之道也。雖所履得坦易之道,亦必幽静安九二居柔,寬裕得中,其所履坦坦然,平易

初九,素履往,无咎。

四四四

象曰:「幽人貞吉」,中不自亂也。

中若躁 能 履 堅固 道 在 而 動 於 吉。 安静。 ,豈能安其所履? 蓋其中心安静,不以利欲自 其 中 恬 正 故必 則 所 幽 履 安裕。 則

六三,眇能視,跛能履,履虎尾,咥人凶,武人

亂

也。

爲于大君。

其所 M 剛 而 于大君」,如武暴之人而居人上,肆 危地,必及禍 是履於危地,故曰「履虎尾」。 得中,履非 躄之履,其 三以陰居陽,志 乃 已,非 也 履? 爲 群 能 故 其 行 陽 順 患,故 正,以 不遠 如 所 履 欲 盲 而 與 剛 眇之視,其見不 遠 曰「咥人凶」。 柔 是 才既 而 到 丽 以 體 也 務剛,其履 剛 不足,而 本陰柔,安能 躁 不 以不善履 中 蹈 危 Œ 又處 ·明 ; 其 武 如 而 而 躁 人 此 履 跛 得 志 疼 爲 不 堅

象曰:「眇能視」,不足以有明也。「跛

能

履」,不足以與行也。

「咥人」之「凶」,位不當也。「武人爲于大遠,而乃務剛,所履如此,其能免於害乎?陰柔之人,其才不足,視不能明,行不能

君」,志剛也。

凶 志剛也。 以柔居三,履非其正,所以 也。 以武 志 剛 人爲喻者, 則 妄動,所履 以 其 致禍 處 不 由其道 害, 陽,才弱 被 咥 一,如 而 而

武人而爲大君也。

九

四、履虎尾、愬愬、終吉。

베 雖 能 過,故爲「履虎尾」。 九 君多懼之地,无相得之義。 近 畏懼,則當終吉。 獲吉也。 四陽剛而乾體 而 不處,故能兢 ,雖居四, 慎畏懼,則終免於危 蓋 愬愬,畏懼之貌 九 雖 剛 剛 勝者也,在 五 而 復 志柔, 剛 决 之 四 若 近

七四六

象曰:「愬愬終吉」,志行也。

也,居柔,以順自處者也。不處也。去危則獲吉矣。陽剛,能行者能愬愬畏懼,則終得其吉者,志在於行而

九五、夬履、貞厲。

厲也。 桂 足者乎? 剛明之才,苟專自任,猶爲危道,况剛明不 顧,雖使得正,亦危道也,可固守乎? 履帝位而光明者也。 若自任剛明,决行不 之議,雖蒭蕘之微必取,乃其所以爲聖也, 剛足以决,勢足以專,然而未嘗不盡天下 任其剛决而行者也。 夬,剛决也。 五以陽剛乾體,居至尊之位 可見。 古之聖人,居天下之尊,明足以照, 《易》中云「貞厲」,義各不同,隨 如此則雖得 IE. 一,猶危 有

象曰:「夬履貞厲」,位正當也。

戒夬履者,以其正當尊位也。居至尊之

雖使得正,亦危道也。

位,據能

專之勢,

而自任

剛决,

不

復畏

上九,視履考祥,其旋元吉。

上處履之終,於其終視其所履行,以考其上處履之終,於其終視其所履行,以考其上處履之終,於其終視其所履行,以考其上處履之終,於其終視其所履行,以考其

周旋无虧,乃大有福慶之人也。人之行貴上,履之終也。人之所履善而吉,至其終象曰。「元吉」在上,大有慶也。

乎有終。

泰。」履得其所則舒泰,泰則安矣,泰所以泰、《序卦》:「履而泰,然後安,故受之以

次履 地陰陽之氣相交而 也。 爲 , 卦,坤 陰 和,則萬物生成,故爲 在 上,乾陽 居下。 天

泰,小往大來,吉亨。

通

小人往處於外,是君子得位,小人在下,天 言之,大則君 居於内也。 下之泰也。泰之道,吉而且亨也。不云 也。陽爲君子,陰爲小人,君子來處於内, 下,臣盡誠以事君,上下之志通,朝廷之泰 和暢,則萬物生遂,天地之泰也。 小謂陰,大謂陽。往,往之於外也。 元吉」「元亨」者,時有污隆,治有小大,雖 陽氣下降,陰氣上交也。 上,小則臣下,君推 誠 以人 來,來 陰陽 以 任 事

萬 彖曰:「泰,小往大來,吉亨」,則是天地交而 物通也,上下交而其志同也。 「小往大來」,陰往 而陽來也, 則是天地 陰

泰,豈一概哉? 言吉亨則可包矣。

内陽 陽之氣相交,而 人,則上下之情交通,而 而外陰,内健而外順,内君子而外小人, 萬 物 得 其 遂 志 其 意 通 同 泰 也 也。 在

君子道長,小人道消也。 陽來居內,陰往居外,陽進 長,小人道消」,所以爲泰也。 之道也。君子在内,小人在外,是「君子道 和,又取「君子道長」。 健在内,坤順在外,爲「内 陰陽交和,乃君子 健 丽 而 陰 既取陰陽交 外順」,君子 退 也。

乾

相天地之宜,以左右民。 象曰:天地交,泰。后以 財成天地之道

之道長也。

之道,輔相天地之宜」,以左右 天地交而 施爲之方也。 人君當體天 財成」,謂體天地交泰之道,而 陰陽和,則萬物茂遂,所以 地 「輔相天地之宜」,天 通泰之象,而「以財成天地 財 生民 制 泰也。 地通 成其 也。

七四八

之利 用天 乃得遂其生養,是左右之也。 之生,必賴君上爲之法制以教率輔翼之, 泰 輔相天地之宜」,以左右輔助於民也。 則 秋氣 也。 時,因地利 萬 物 成 如春氣發生萬物, 茂遂 實 萬 ,輔助化育之功,成其 ,人君體之而 物,則 爲收 爲 則爲播植 斂 法 之 制 法; 費 使 民 乃 之 美 民

初 九,拔茅茹,以其彙征,吉。

也。 能 與善,實乃 君子之進,必以其類,不唯志在相先,樂於 賢者以其類進同志以行其道,是以吉也。 茹,根之相牽連者,故以 牽援,如茅之根然,拔其一則牽連而起矣。 則志在上進也。 初以陽爻居下,是有剛明之才而在下者 獨立不賴朋類之助者也。 時之否,則 相 賴 以 君子退而 君子之進,必與其朋類相 濟。 故君 爲 窮處; 象。 子小人,未有 自古君子得 彙,類 時 既 泰 也

> 位,則天下之賢萃於朝廷,同 後其黨勝而天下否矣。 天下之泰,小人在位,則不肖者並進,然 蓋各從其類 志 協力 也。 7,以成

象曰:「拔茅」「征吉」,志在外也 進也。 進,同也,故取茅茹彙征之象,志在外,上 時將泰,則群賢皆欲上進。三陽之志欲

九二,包荒,用馮河,不遐遺,朋亡,得尚于

中行。

而 爲上所專任,故二雖居臣位,主治泰者也, 包含荒穢之量,則其施爲寬裕詳密,弊革 四者,處泰之道也。 二而言。「包荒,用馮河,不遐遺,朋亡」, 所謂上下交而其志同也。 中,下應於二。君臣同德,是以剛中之才, 二以陽剛 法度廢弛,庶事无 得中,上應於五, 人情安肆,則政 節。 治之之道,必 故治泰之道,主 五. 以 柔 舒 順 有 緩 得

才之在 去,而 遠慮,及於遐遠之事哉? 人心狃於泰,則苟安逸而 用,乃聖賢之爲也。「不遐遺」,泰寧之時 及庶事,雖遐遠不可遺。 似相反也。 含寬容,此云「用馮 故曰「用馮河」。 君,英烈之輔,不能挺特奮發以革其弊也, 蓋由狃習安逸,因循 越險也。 有爲於斯時也。 河」,泰寧之世,人情習於久安,安於守常, 則 於因循,憚於更變,非有馮河之勇,不能 理而人安之。若无含弘之度,有忿疾之 无深遠之慮,有暴擾之患,深弊未 近患已生矣,故在包荒 一解陋 自古泰治之世,必漸至於衰替, 一。皆遐 不知以含容之量,施剛果之 或疑上云「包荒」,則是包 馮河,謂其剛果足以濟深 遠者也,時泰則固遺之 河」,則是奮發改革, 而 然。 若事之微隱,賢 已,惡能復深思 治夫泰者,當周 自非 也。 剛 「用馮 斷之

矣。 之私 情肆 之義也。尚,配也。 禁奢侈則害於近戚,限田産則妨於貴家 制事,牽於人情,卒不能行者多矣。 若夫 矣。「朋亡」,夫時之既泰,則人習於安,其 之德,故曰「得尚于中行」,言能配合中行 牽於朋比也。治泰不能朋亡,則爲之難 如此之類,既不能斷以大公而必行,則是 治泰之道,有此四者,則能合於 ,則不能也,故云「朋亡」。 自古立法 而失節。 將約而正之,非絕去其朋 九一 與

惰

事

心

象曰:「包荒」,「得尚于中行」,以光大也。 大也。 此,則能配合中行之德,而其道光明顯 象舉「包荒」一句,而通解四者之義。 言如

其孚,于食有福 九三,无平不陂,无往不復,艱貞无咎。 勿恤

三居泰之中,在諸陽之上,泰之盛也。 物

其施 之戒 踰 福 食有 不失道 所 能 陂,往者復,則爲否矣。 也,无常往 理 方泰之時,不敢安逸,常艱危其思慮 脱艱貞 求 可 而 於 如 也 禄 長 福 爲,如是則可以无咎。 日 必否,故於泰之盛與陽之將進,而 循 則 也。 益也 M . 環,在 ,不失所期。), 則 无常安平而 喪敗者也 雖盛 可常保其泰,不勞憂恤,得其 而不返者,謂陰當復也。 蓋德善日積 下者必升,居上者必降。 禄食謂 而 非 爲孚如是,則於其 滿。 福祉。 不險陂者,謂无常 當知天理之必然, 則 自 處泰之道 古隆 福禄 善處 日 盛、未有 泰者,其 ·臻,德 正固 平者 ~,既 禄 爲 泰 泰

象曰:「无往不復」,天地際也

往 下,必復于上,陰升于上,必復于 「无往 來之常理也。因天地交際之道,明否泰 不復」,言天地之交際 也。 下,屈 陽 降 伸 于

> 六四,翩翩不富以其鄰,不戒以孚。 則有 既過中,則將變矣。聖人於三,尚云艱貞 從者 上。 翩就 過中矣,理必變也,故專言始終反復之道。 乃失其實,其志皆欲下行,故不富 乃時運之否泰,或交或散,理之常也。 不待戒告而誠意相合也。 二陰亦志在趨下。 六 不常之理,以 四處 福 ,其志同也。 夫人富 下,與其鄰同也。鄰,其類也,謂 蓋 泰之過中,以 三爲將中, 而其類從者,爲利也。 爲戒 三陰皆在下之物,居上 也 翩翩,疾飛之貌。 陰在上,志在 知戒則可 夫陰陽之升降 保。 而 下 不富 相從 復,上 四 五 四

與

而

翩

孚」,中心願也 象 日 . 翩 翩 不 富」,皆失實也。 不不 ·戒以

五,泰之主,則復言處泰之義

已

翩翩,下往之疾。不待富而鄰從者,以三

泰

與者,蓋其中心所願故也。理當然者天今乃居上,是失實也。不待告戒而誠意相陰在上,皆失其實故也。陰本在下之物,

史謂湯爲天乙,厥後有帝祖乙,亦賢王六五,帝乙歸妹,以祉,元吉。 也,衆所同者時也。

定謂湯爲天乙,厥後有帝祖乙,亦賢王也, 是禮法,使降其尊貴,以順從其夫也。六 五以陰柔居君位,下應於九二剛明之賢。 五能倚任其賢臣而順從之,如帝乙之歸妹 五能倚任其賢臣而順從之,如帝乙之歸妹 五能倚任其賢臣而順從之,如帝乙之歸妹 五能倚任其賢臣而順從之,如帝乙之歸妹 之功也。元吉,大吉而盡善者也,謂成治秦 之功也。

象曰:「以祉,元吉」,中以行願也。

從之乎? 賢,所聽從者皆其志願也。非其所欲,能行其志願也。有中德,所以能任剛中之所以能獲祉福且元吉者,由其以中道合而

上六,城復于隍,勿用師。 矣。 者。 命必自近始。 正,亦可羞吝。 方自其親近而告命之,雖使所告命者得其 上,豈可用也? 道,上下之情不通矣,民心離散,不從其 下之情通而心從也。今泰之將終,失泰之 隍也。上,泰之終六,以小人處之,行將 及泰之終,將反於否,如城土頹圮,復反于 掘隍土積累以成城,如治道積累以成泰。 有貞固守此則凶吝者,有雖得正亦凶吝 此不云「貞凶」,而云「貞吝」者,將否 「勿用師」,君之所以能用其衆者,上 凡「貞凶」「貞吝」,有二義: 邑,所居,謂親 用之則亂。 自邑告命,貞吝 衆既不可用, 近,大率告

七五二

而方告命,爲可羞吝,否不由於告命也。

象曰:"「城復于隍」,其命亂也。

「城復于隍」矣、雖其命之、亂不可止也。

乾坤上下

否之匪人,

闢,相因而不息,泰極則復,否終則傾,无人道,故曰「匪人」,謂非人道也。消長闔皆人道也。天地不交,則不生萬物,是无皆無靈,故爲萬物之首。凡生天地之中者,天地交而萬物生於中,然後三才備,人爲

常而不變之理,人道豈能无也? 既否則

不利君子貞,大往小來。泰矣。

表曰:「否之匪人,不利君子貞」,君子正道否不則反是,故「不利君子貞」,君子正道否不則反是,故「不利君子貞」,君子正道否則反是,故「不利君子貞」,君子正道否不是正位不交而萬物不通也,上下不交而天則是天地不交而萬物不通也,上下不交而天下无邦也。内陰而外陽,内柔而外剛,内小人面外君子,小人道長,君子道消也。

命,上下相交,所以治安也。今上下不交,所以爲治也。上施政以治民,民戴君而從下之義不交,則天下无邦國之道。建邦國夫天地之氣不交,則萬物无生成之理。上

外,君子往居於外,小人來處於内,「小人是天下无邦國之道也。陰柔在内,陽剛在

象曰:天地不交,否,君子以儉德辟難,不可

道長,君子道消」之時也

榮以禄。

故宜晦處窮約也。 之時。君子居顯榮之地,禍患必及其身, 為難,不可榮居禄位也。否者,小人得志 過難,不可榮居禄位也。否者,小人得志

初六,拔茅茹,以其彙貞,吉亨。

時,在下者君子也。否之三陰,上皆有應,君子之道,易隨時取義,變動无常。否之時,則以同貞爲亨。始以内小人下,有牽連之象也。泰之時,則以同征爲下,有牽連之象也。泰之時,則以同征爲下,有牽連之象也。泰之時,則以同征爲

則伸道免禍而已。君子進退,未嘗不與其道之亨也。當否而能進者,小人也,君子六能與其類貞固其節,則處否之吉,而其在否隔之時,隔絶不相通,故无應義。初

象曰:「拔茅」「貞吉」,志在君也。類同也。

六二,包承,小人吉,大人否亨。

也。大人當否,則以道自處,豈肯枉己屈順乎上以求濟,其否爲身之利,小人之吉小人而言,則方否於下,志所包畜者,在承六二,其質則陰柔,其居則中正。以陰柔

云大人,能如是則其道大矣。 大人於否之時,守其正節,不雜亂於小人 大人於否之時,守其正節,不雜亂於小人 象曰:「大人否亨」,不亂群也。

六三,包羞。

羞耻也。 者也。其所包畜謀慮,邪濫无所不至,可非能守道安命,窮斯濫矣,極小人之情狀三以陰柔,不中不正而居否,又切近於上,

象曰:「包羞」,位不當也

當故也。處不當位,所爲不以道也。陰柔居否,而不中不正,所爲可羞者,處不

九四,有命无咎,疇離祉。

才而 四以 之進,亦以其 其福祉。 忌而已。若能使動必出於君命,威柄 同進,以 於君命,則可以濟時之否,其疇類皆 於上,則无咎,而其 道方否之時,處逼近之地,所惡在居功取 得高位者也,足以輔上濟否。 陽剛健體,居近君之位,是以濟否之 濟天下之否,「疇 離,雕也。 類同也。 志行矣。 君子道行,則與 離祉」也。 能 使 然 事 附 其類 小人 皆 一歸 當 出 離 君

象曰:「有命无咎」,志行也。

有君命則得无咎,乃可以濟否,其志得

行也。

道休息天下之否,以馴致於泰。猶未離於下之否,大人之吉也。大人當位,能以其五以陽剛中正之德,居尊位,故能休息天九五,休否,大人吉。其亡其亡,繫于苞桑。

保 忘亡,治而不忘亂,是以身安而國家可 者安其位者也,亡者保其存者也,亂者有 知此戒,所以致禍敗也。 甚,聖人之戒深矣。漢王允、唐李德裕,不 之爲物,其根深固,苞謂叢生者,其固 桑」,謂爲安固之道,如維繫于苞桑也。桑 之復來, 曰其亡矣, 其亡矣。其「繫于苞 其治者也。是故君子安而不忘危,存而 反泰,不可便爲安肆,當深慮遠戒 否也,故有「其亡」之戒。否既休息,漸將 也。」 《繋辭》曰:「危 常虞 尤 不 否

象曰:大人之吉,位正當也。

下之否,是以吉也。无其位,則雖有其道 有大人之德,而得至尊之正位,故能休天 何爲乎? 故聖人之位,謂之大寶。

上九,否之終也。 物理 極 丽 必反,故泰極

上九,傾否,先否後喜。

傾 則否,否極則泰。上九否既極矣,故否道 覆 而 也。 先 極 否也; 後 傾,喜也。

否傾 則泰矣,後喜 也

象曰: 否終則傾,何可長 也!

否,屯之上六則不能變屯也。 剛陽之才而後能也。 否終則必傾,豈有長否之理? 理之常也。 然反危爲安,易亂 故否之上九則能 極 爲 治, 而 必反, 必有

三 乾離 上下

必與人同力乃能濟,同人所以次否也。爲 同人,與否義相反,故相次。 同人。」夫天地不交則爲否,上下相同則爲 火之性炎上,與天同也,故爲同人。以二 卦,乾上離下。以二象言之,天在上者也, 同人,《序卦》:「物不可以終否,故受之以 體言之,五居正位,爲乾之主,二爲離之 又世之方否,

五相應,天火相同,故其義大。也。又卦唯一陰,衆陽所欲同,亦同人之主,二爻以中正相應,上下相同,同人之義

同人于野,亨,利涉大川,利君子貞。 道,无遠不同也,其亨可知。能與天下大 故必于野,謂不以暱近情之所私,而于郊 生千歲之後,若合符節。推而行之,四海 謂天下至公大同之道。 故雖居千里之遠, 暱比,此復言宜以君子正道。君子之貞, 大川,利君子貞」。 上言「于野」,止謂不在 之不可濟? 何艱危之不可亨? 同,是天下皆同之也。天下皆同,何險 野曠遠之地,既不繫所私,乃至公大同之 之同者,以其私意所合,乃暱比之情耳。 野謂曠野,取遠與外之義。夫同人者,以 天下大同之道,則聖賢大公之心也。 故「利涉 常人 阻

同人之道,利在君子之貞正。故其所同者則爲阿黨,蓋其心不正也。故私意,所比者雖非亦同,所惡者雖是亦異,之廣,兆民之衆,莫不同。小人則唯用其

彖曰:同人,柔得位,得中而應乎乾,曰「同

人。

取天火之象,而彖專以二言。 得其正位也。五,中正,而二以中正應之, 得其正位也。五,中正,而二以中正應之, 以柔順中正應之,各得其正,其德同也,故 以柔順中正應之,各得其正,其德同也,故 以柔順中正應之,

同人日

此三字羨文。

私,天德也。至誠无私,可以蹈險難者,乾之行也。无「同人于野,亨,利涉大川」,乾行也。

處

物不失其方也。

文明 以 健,中正而應,君子正也。

中正之道相應,乃君子之正道也。 又以二 體言其義。 有文明之德,而剛 健以

唯君子爲能通天下之志。

之道,然後能中正合乎乾行也。 明大同之義;剛健則能克己,故能盡 心者,通於理而已。文明則能燭理,故 天下之志萬殊,理則一也。君子明理,故 能通天下之志」。聖人視億兆之心猶 大同 能

象曰:天與火,同人,君子以類族辨物。 子小人之黨,善惡是非之理,物情之離合, 辨物」,各以其類族辨物之同異也。 火」者,天在上,火性炎上,火與天同,故爲 事理之異同,凡異同者君子能辨明之,故 同人之義。君子觀同人之象,而「以類族 不云「火在天下」、「天下有火」而云「天與 若君

> 初 九,同人于門,无咎。

九居同人之初,而无繫應,是无偏私,同人 在外則无私昵之偏,其同博而公,如此則 之公者也,故爲出門。同人出門謂在外,

无過咎也

象曰:出門同人,又誰咎也。 私。 由生也。既无所偏黨,誰其咎之? 「出門同人」于外,是其所 人之同也,有厚薄親 疎之異,過 同者廣,无所偏

六二,同人于宗,吝。

之道爲私 黨也。同於所繫應,是有所偏與,在同 剛中之德,乃以中道相同,不爲私也。 二與五爲正應,故曰「同人于宗」。 狹矣,故可吝。二若陽爻,則爲 宗謂宗

象曰:「同人于宗」, 吝道也。

吝,故 諸卦以中正相應爲善,而 五不取君義 蓋 私 比非 在 同 人君之道, 則 爲可

七五七

咎所

七五

相 同 以 私 叮 吝 也

九三,伏戎于莽,升其高陵,三歲不興。 伏藏 道 志 同人 故 三以陽居剛 而 又畏 同之。 與 皆欲同之,三又與之比,然二以中正 之時,志在 兵戎于林莽之中,懷惡 五 懼,時 相 然理不直 應,三以剛 而 升高陵以 不 於同。 得 ,義不勝,故 中,是剛暴之人也 强居二五之間,欲 卦 顧望 惟 而 如 陰,諸 内負 不 此至於三 敢 不直 顯 陽 發 之 之 奪

象曰:「伏戎于莽」,敵 狀 歲之久,終 ,然不曰凶者,既 不 敢 興。 不敢發,故未至 剛 此 也。 爻 深 「三歲 見 小人之情 不 X 興」, 也。

安行也?

伏 所 藏也。 敵者五 一、既剛 至于三歲不興矣,終安能 ,弗克攻,吉。 且 正,其可 奪乎? 行 故 乎 畏 ? 憚

兀 剛 而 不 中正,其志欲同二,亦與五爲仇 九

四

乘

其

墉

吉也。 宜矣。 之義, 强而 不克 隔 者 攻奪,則其凶大矣。 墉 也 不能 也 耳 能 若肆 墉 反 反。 苟能自知義之不直 垣 乘其 則 其 所 吉 四 邪 以 墉」,欲攻之,知 以剛 矣。 限 欲,不能 隔 三以 居柔 也 畏 義 剛 反 四 而 故 居 思 加 切 能 有 剛 義 不 近 義不 改, 困 故 理,妄 攻, 于 而 五 直 其 終 則 能 其 爲 反 而 如

象曰:「乘其墉」,義弗克也。 其 吉, 則 困 丽

反

則

也

者,二 者,衆 者,由 也。 義 所 别。 以 (乘其墉) 以 陽 其 爻 邪 義 所 居二五之間也, 攻 不 同 而弗克攻之者,以其 E 勝, 欲 也。 義 困 不 窮 獨 勝 而 也 反 四 於 初 其 有 終 法 争奪 所 義之弗 遠, 則 以 也 故 之義 得 取 克

九五,同 人,先號咷而後笑,大師克相

專以 邪不 語默无不同,天下莫能 語,二人同心,其利斷金。」中 當 也。 九 吝,况人君乎? 五. 非 義 言君道,而 大同之體也。 又先隔 云「大師」、云「克」者,見二陽之强也。九 聚辭》云:「君子之道,或出 與天 君位,而爻不取人君同 直 不可分,分乃二也。 理隔奪,必用大師克勝之,乃得相遇 Ŧi. 「大師 ·勝正、雖爲 理勝 同 私暱應於二,而失其中正之德。 則號咷,後遇則笑,是私 于二,而 下大同, 克 故 明二人同 相 不 二之在下,尚 爲三 所隔,終必得合,故「後笑」 勝 遇」,五 而獨 五既於君道无取,故更不 憤 四 心,不 抑 私一人,非君道也。 二陽所 間 與二正應,而二陽 至于「號咷」。 人之義者,蓋 可 也 可間 以 誠 或 以 隔 通 同 所 處 暱之情,非 同 隔 者 金 同, ,或默或 於宗爲 Ŧi. 之義 石 人君 出處 自 也, 也。 五 然 以

至微,故聖人贊之曰:「同心之言,其臭如水火,无所不能人,故云其利斷金。其理

相

遇

言

謂 切 先所以 直理勝、終能克之、故言能相克也。 能勝,見二陽之强 而 然 號咷 也。 雖 者,以中誠 其 敵 剛 也。 强 理直,故不勝其忿 至 用 大師 然 相 克

上九,同人于郊,无悔。

所悔 則 郊,在外而遠之地。 同,亦无 上九居外而无應,終无與同者也。 至,終或有 也 悔。 睽 雖 悔。 欲 同 求 處 之志不 遠 同 者必 耐 ·遂,而 无 與, 相 親 始 其終无 故 相 有 與, 日

象曰:「同人于郊」,志未得也。

居遠莫同,故終无所悔。然而在同人之

七五九

道,求同之志不得,遂雖无悔,非善處也

離草上丁

之義。大有,盛大豐有也。 尊執柔,物之所歸 爲大有之象。又一柔 之處高,其明及遠,萬物之衆,无不照見, 大有所以次同人也。爲卦,火在天上。 受之以大有。」夫與 大有、《序卦》:「與 也。 人同 人同者,物之所歸 居尊,衆陽並 上下應之,爲大有 者,物必 歸 應,居 焉,故 也。 火

大有,元亨。

彖曰: 是也。 也。 便爲訓 其義者,如比吉、謙亨是也。 卦之才可以元亨也。凡卦德,有卦 大有,柔得尊位,大中而上下應之,曰 由 剛 有 戒者,如師貞丈人吉、同人于野 健文明,應天時行,故能 以 其 桂 才而言者,大有元 有 因 元亨也 其 名 亨是 掛 自 亨 有

「大有」。

有之義 矣。」此不 其德如此,是以「元 而不善者與不能亨者,有矣。 大通,何由 行,順乎天時也,故曰「應乎天而 二。二、乾之主也,是應乎乾也。 於乾之九二。 卦之德,内剛健而外文明。六五之君 便 有 識 得大 卦 元亨,由其 五之性柔順 義 離乾成大有之義。 有乎? 亨」也。 才故得 大有則必 而明 王弼 諸卦具 元 亨。 順 云:「不 時行」。 順 元 大有 應乾 應 平

亨。 利 之事莫不皆然,必善爲先。 衰 成 之義,他卦則不能有此義,爲善爲大而已。 蠱 元 也 何以有失也? 至於善惡治亂是非,天下 者物之先也,物之先豈有不善者乎? 事 曰:元之在乾,爲元始之義,爲首出庶物 曰:元之爲大可矣,爲善何也? 元者,善之長也。」 貞, ,衰固後於興也。 而 、升、鼎 有大善之義。 不 後有敗,敗 曰:諸 則 兼 彖 利 也。 皆 貞, 卦之元 釋 唯升之彖誤隨 則釋 非先成者也。 爲 有元亨者四 大 得 與乾不 爲元亨,盡元 亨,恐 而後有失,非 故《文言》曰: 疑 同, 他 卦:大有、 與 興 卦,作大 日: 何也? 乾 而 義 坤 後 得 也。 元 則 有 同

初九,无交害,匪咎,艱則无咎。

而安群生也

天休命。 象曰:火在天上,大有,君子以遏惡揚善,順

火高在天上,照見萬物之衆多,故爲大有。

盛、當代天工、治養庶類。 萬物衆多,則有善惡之殊。 絶衆惡,揚明善 大有,繁庶之義。 遏惡揚善」而已。 1類,以 君子 惡懲善勸,所以順天命 奉 觀 順 大 君子享大有之 治衆之道,在 天休美之命。 有之象,以遏

有而 若能 言富有本匪有咎也,人因富有自爲咎耳, 九居大有之初,未至於盛,處卑无應與,未 以有咎也 盡免,况其下者乎?「匪咎,艱則无咎」, 大凡富有,鮮不有害。 有驕盈之失,故「无交害」,未涉於害也。 享富 不能思艱 有 而 就 畏, 知難處 則驕侈之心生矣,所 ,則自无咎也。 以子貢之賢,未能 處富

在大有之初,克念艱難,則驕溢之心无由象曰:大有初九,「无交害」也。

九二,大車以載,有攸往,无咎。 以 以二之才可往而无咎。至於盛極,則不可 而 能勝載重物也。可以任重行遠,故有攸往 此,所以能勝大有之任,如大車之材强壯 則才勝,居柔則謙順,得中則无過,其才如 九以陽剛居二,爲六五之君所倚任。 往矣。 矣,所 无咎也。 以 不交涉於害 大有豐盛之時,有而未極,故 也。 剛 健

九三,公用亨于天子,小人弗克。 象曰:「大車以載」,積中不敗也。 壯大之車,重積載於其中而不損敗,猶九 三居下體之上,在下而居人上,諸侯人君 一材力之强,能勝大有之任也。

> 奉上之道,故曰「小人弗克」也。 小人處之,則專其富有以爲私,不知公以 其有爲天子之有也,乃人臣之常義也。 若 侯之位,有其富盛,必用亨通乎天子,謂 也,此理之正 也。 故三當大有 之時,居諸 以

象曰:「公用亨于天子」,小人害也。 大有爲小人之害也。 其富强,益爲不順,是小人大有則爲害,又 上之道,以其爲己之私,民衆財豐,則反擅 待上之徵賦。若小人處之,則不知爲臣 蕃養其衆,以爲王之屏翰, 豐殖其財,以 也。自古諸侯能守臣節,忠順奉上者, 公當「用亨于天子」,若小人處之,則 爲 則 害 奉

九四,匪其彭,无咎。 者也。 道,「匪其彭」則得无咎,謂能謙損,不處其 九四居大有之時,已過中矣,是大有之盛 過盛 則凶咎所由生也。 故

處

之之

有?

凡土地之富,人民之衆,皆王者之有

尊,率土之濱,莫非王臣,在下者何敢

專其

之象也。公侯上承天子,天子居天下之

之狀。《雅·大明》云:「駟騵彭彭。」言武驅》云:「汶水湯湯,行人彭彭。」行人盛多太盛,則致凶咎。彭,盛多之貌。《詩·載太盛,則得无咎也。四近君之高位,苟處

王戎馬之盛也

於滿極也。 於滿極也。賢智之人,明辨物理,當也。皙,明智也。賢智之人,明辨物理,當他不處其盛而得无咎者,蓋有明辨之智

吉。「威如」,有威嚴之謂也。既以柔和孚求。人君執柔守中,而以孚信接於下,則象。人君執柔守中,而以孚信接於下,則求。人君執柔守中,而以孚信接於下,則不正常大有之時,居君位,虚中,爲孚信之六五,厥孚交如,威如,吉。

善處有者也,吉可知矣。信接於下,衆志説從,又有威嚴使之有畏,

威如之吉,易而无備也。 象曰:「厥孚交如」,信以發志也。

上之道。備謂備上之求責也。 「大方」,從乎上者也。上以孚信接於下, 是有子信以發其下孚信之志,下之從上, 上有孚信以發其下孚信之志,下之從上, 上有孚信以發其下孚信之志,下之從上, 以以誠信事其上,故「厥孚交如」。由 以以或信事其上,故「厥孚交如」。由

五有文明之德,上能降志以應之,爲尚賢五之孚信,而履其上,爲蹈履誠信之義。唯至明所以不居其有,不至於過極也。有唯至明所以不居其有者也。處離之上,明之極也。有上九在卦之終,居无位之地,是大有之極,上九,自天祐之,吉无不利。

古,女所主旨,元所不引引。 享其福慶。「自天祐之」,行順乎天而獲天崇善之義。 其處如此,合道之至也,自當

象曰:'大有上吉,「自天祐也」。 之中,皆樂據權位,唯初上不處其位,故初 謙退不居。 溢,乃天祐也。 道,故天祐助之,所以吉也。君子滿 祐,故所往皆吉,无所不利也。 順,故在上而得吉,蓋「自天祐也」。 九无咎,上九无不利。 不可以盈豐而復處盈焉,非所宜也。 六爻 也。」履信謂履五,五虚中,信也。思順謂 順,又以尚賢也,是以自天祐之,吉无不利 所助者順也,人之所助者信也。 履信思乎 大有之上,有極當變。 尚賢謂志從於五。大有之世, 《繋辭》復申之云:「天之 由其所爲 上九在上,履信思 順 天合 们 不

伊

川易傳卷之一

伊川易傳卷之二

周 易 L 經

故大有之後,受之以謙也。 謙。」其有既大,不可至於盈滿,必在謙損 下,地中有山也。地體卑下,山高大之物, 謙、《序卦》:「有大者不可以盈,故受之以 處卑之下,謙之義也。 而居地之下,謙之象也。 以崇高之德,而 爲卦,坤上艮

謙,亨,君子有終。

謙有亨之道也。 人以謙巽自處,何往而不亨乎? 有其 德 圃 不 居 謂 「君子有 之謙。

> 身不易,自卑而人益尊之,自晦 競,内充,故退讓 行而固守,不能有終也。 必競,有德必伐,雖使勉慕於謙,亦不能安 顯,此所謂「君子有終」也。 終」,君子志存乎謙巽,達理,故樂天而不 而不矜。 安履乎謙, 在小人則有欲 而德益 而 終

上行。 彖曰: 「謙亨」,天道下濟而光明,地道卑

天道虧盈 所以其氣上行,交於天,皆以卑降而亨也。 明。下際謂下交也。地之道,以其處卑, 之道,以其氣下際,故能化育萬物,其道光 濟」當爲「際」。 丽 益謙 此明 謙 而能 亨之義。 天

陽是也 以天行而言,盈者則虧,謙者則益,日月陰

地道 變盈 而流謙,

以 地勢而 言,盈滿者傾變而反陷,卑下者

七六五

流 注 而 益增也

鬼神害 盈 而 福 謙

鬼 福 神謂造化之跡。 祐之,凡過而損,不足而益者,皆是 盈滿者禍害之,謙損者

人道惡盈而好 謙

謙 人之至德,故聖人詳言,所以戒盈 人情疾惡於盈滿,而好與於謙巽也。 也。 加 謙者 勸

謙尊而光,卑而 也。 卑屈 謙 爲卑巽也,而其道尊大而光顯,自處雖 君子至誠於謙,恒而不變,有終也,故 ,而其德實高,不可加尚,是「不可 不可踰,君子之終也。 踰

象曰: 地中有山,謙,君子以裒多益寡, 稱 物

尊光。

平施

内 地 藴高大之象,故爲謙也。 卑下,山之高大而在地中,外卑下 不云「山 在地 而

象曰:「謙謙君子」,卑以自牧也。

順。 高 多者,增益寡者,稱物之多寡以均其施與, 下、損過益不及之義。 地 益寡,稱物平施」,君子觀謙之象,山 中」,而 下,是高者下之,卑者上之,見 也。 諸象皆然,觀文可見。「君子以 若言崇高藴於卑下之中,則 曰「地中有山」,言卑下之中蕴 以施於事, 抑 則 文理 其崇 裒取 高 而 裒 多 在

使得其平也。

初六,謙謙君子,用涉大川,吉。

所不吉 謙之至,故爲謙謙,未見其失也。 卑下之至,謙 於謙乎? 雖用涉險難,亦无患害,况居平易乎? 如是者,君子也。 初六以柔順處謙 也? 日: 初 IIII 柔居下,乃其常也 又謙 ,又居一卦之下,爲自處 自處至謙,衆所 謙 而 也,故曰「謙 以柔居下,得 共 ,但見其 謙」。 與 无 也, 過 何

也。自牧,自處也。《詩》云:「自牧謙謙,謙之至也。謂君子以謙卑之道自牧

歸夷。」

六二,鳴謙,貞吉。

貞則吉者,六二之「貞吉」,所自有也。「貞吉」。凡貞吉,有爲貞且吉者,有爲得「鳴謙」。居中得正,有中正之德也,故云「鳴謙」。居中得正,有中正之德也,故云二以柔順居中,是爲謙德積於中。謙德充二以柔順居中,是爲謙德積於中。謙德充

象曰:「鳴謙貞吉」,中心得也。

中心所自得也,非勉爲之也。●二之謙德,由至誠積於中,所以發於聲音,

古之人有當之者,周公是也。身當天下之所從,有功勞而持謙德者也,故曰「勞謙」。得其位,爲下之上,是上爲君所任,下爲衆三以陽剛之德而居下體,爲衆陰所宗,履九三,勞謙,君子有終,吉。

尊乎? 常情。平時能謙,固已鮮矣,况有功 然,可謂有勞而 大任,上奉幼弱之主,謙恭自牧,夔夔如畏 辭特重。 剛居正,能終者也。 不變,乃所謂有終,有終則吉也。 也。唯君子安履謙順,乃其常行,故久而 之心不忘,則不能常久,欲其有終,不可得 君子行之有終,則吉。 雖使知謙之善,勉而爲之,若矜負 能謙矣。既能勞謙,又須 此爻之德最盛,故象 夫樂高喜勝,人之 九三以 勞可

云:「勞而不伐,有功而不德,厚之至也。能勞謙之君子,萬民所尊服也。《繫辭》象曰:「勞謙君子」,萬民服也。

● 「勉」下,涂刻本有小字「一有强字」。

也者,致恭以存其位者也。」有勞而不自矜

語以其功下人者也。德言盛,禮言恭。謙

六四,无不利 如此。 也。 伐, 爲善也哉? 也。 位者,蓋能致 其常行,非爲保其位而爲之也。 圃 夫謙也者,謂致恭以存其位者也。 以其自處之禮言之,則至恭,此所謂 德言盛 不 有功而 言以 溢,是以能終吉也。 致其恭異以守其位,故高 如言爲善有令名,君子豈爲令名而 ,禮言恭」, 其功勞 **撝謙** 不自以爲 亦言其令名者,爲善之故也。 恭 ,所以能存其位,言謙之道 而自 以其 德,是 謙,以下 德言之,則至 夫君子履 其德弘厚之至 而 而言存其 於人也。 不 液謙,乃 存,守 危 謙 滿滿 也。

賢臣之上故也。動息進退,必施其謙,蓋居多懼之地,又在

凡人之謙,有所宜施,不可過其宜象曰:「无不利撝謙」,不違則也。

六五或用侵伐是也。

唯四以處近君之地,

也。

如

得其宜也。如是然後中於法則,故曰「不違則也」,謂如是然後中於法則,故曰「不違則也」,謂據勞臣之上,故凡所動作,靡不利於施謙,

六五,不富以其鄰,利用侵伐,无不 後能 五之謙柔,當防於過,故發此義 著,然後盡君道之宜,而 然君道不可專尚謙柔,必 之親也,爲人君而持謙順,天下所歸心也。 富 之尊,而執謙順以接於下,衆所歸也,故不 富者衆之所歸,唯財爲能聚人。 加 懷服天 能 有其鄰 下,故利用 也。 鄰,近也。 行侵 无所 須威 伐 不富而 不利 也。 武 五以 利。 相濟 威德 也 君位 得人 並 蓋

巽以

讓勞謙之臣,動作施爲,无所不利

於

撝謙也。

撝,施布之象,如人手之撝也。

宗,而己居其

上,當恭畏以

奉謙德之君,卑

自

處,九三又有大功德,爲上所任

四居上體,切近君位,六五之君又以

(謙柔

衆所

象日 "「利用侵伐」,征 不服 也。

能 征 君之中道,謙之過 服 其文德謙 而 不用 異所不能 威武 也。 何 以平治天下? 服 者也。 文德 所 非 人 不

上六,鳴謙,利用行師,征邑國。

者也。 濟。 行 矣,故利在以剛武自治。 非任天下之事,然人之行己必須 見於聲色,故曰「鳴謙 志,故至發於聲音; 六以柔處柔 師,謂用剛 上,謙之極 鳴 謙, 極 謙 順之極,又處謙之極,極 武。「征邑國」,謂自治其私 志 而反 也,至於大甚,則反 未得也,可用行 又柔 居高,未得遂其謙 0 邑國,已之私 雖居无位之地 處謙之極,亦 師 剛 八爲過 征 柔 乎 有。 邑 相 必 之 謙

謙 至 於鳴 極 而 居上,欲謙之志未得,故不勝其切 也 雖 不當位 · 謙 既 過 極 了宜以 剛

國也。

象

武自治其私,故云「利用行師征邑國」也。

=== === 震坤 上下

聲,通暢和豫,故爲豫也 陽始潛閉於地中,及其動 以 謙 以豫。」承二卦之義而 爲和豫之義。 也,坤又承之以順,是以動而上下順 爲卦,震上坤下,順動之象。 豫、《序卦》:「有大而能 、豫也。 則 有豫樂也。 九四爲動之主,上下群陰所共 以二象言之,雷出 豫者,安 爲次也,有既大而 謙,必豫,故受之 而 和悦樂之 出 動而 地 於 和 奮 應、故 地 順 一發其 應 是

豫,利 建侯 行 師

豫,順 從 師。 順則萬民悦服,兵 而 有 夫建 而 功 動 侯樹 ,故悦豫之道,利於建侯行 也。 屏,所以 豫之義,所利 、師之興,衆心和悦 共安天下,諸 在 於 建 師 則 侯 侯 也 順 和

君 又 E 萬 邦 動 脯 聚大衆 下 順 ,諸侯從王, 非 和 悦 不 能 師衆順令之象。 使之服從 也。

彖

豫,剛

應而志行,順

以

動,豫。

豫 順 違 理 行 以 順 得行也。 「志行」,温 剛 者 一,唯 師,豈 理,順 以 豫 應」, 順 動 亦 至 故故 而 順 順 理 謂 謂 有 動 乎 陽 天 而 順 而 不 四 理 己。 地 動 以 志上行, 順 則 爲 加 又爲 如 動 群陰 乎? 天 E 大人所以先天後天 之, 豫 地 動 一、震 如之而 動 所 丽 天地之道,萬 而衆順 况 應 而 動 建 上下 而 弗違 剛 侯 ,所以 坤 得 順 行 順 衆 况 從 師 爲 乎? 豫也 ",其 應 物之 建 而 動 也 志 不 侯 而

以 天 地 復 順 聖人以順動」,故經 以 詳 動 以 日月之度不過差,四 言 則 順動,故日 順 刑 動 罰 之道。 清 月不 而 民 天 過 服 地 뻮 之運,以 時之行不 四 時不太; 其 愆 順 聖人 動 3

正

而

民

興於善

刑罰

清 簡 而 萬 民 服 也

豫之時 義 大 矣 哉

之上 象曰:雷出地奮,豫,先王以作 豫、遯、姤、 時 哉 意 既 頤、大過、解、革言時,各以 者,皆贊其 一帝,以 義 有 言 公欲 消謂 餘 豫 也,故復贊之云:「豫之時 順 人研 西己 豫之時義。 之道矣,然其旨 祖 旅言時 大矣哉,豫 考。 味其理,優柔 義,坎、睽、 諸 以 挂 下十一 之時 以其大 味淵 涵 樂崇德 泳 蹇言 永,言 者 與 而 卦是 義、用大 也 識之也 義 時 殷 大矣 盡 也。 用 薦 而

聲 先 始潛 順 閉 雷 鬱,及 樂 震 王 者,陽氣 閉 以 觀 發 地 褒崇功德,其殷盛至於薦之上 雷 奮 和 中, 出 奮 發 順 地 一發,陰 及其動 則 積 而 通 中 奮 暢 而 陽 列則 和 和 發 相 暢發於聲之象,作 豫 於 出 薄 聲 故 地 而 樂 爲 奮 成 豫 震 聲 之 也。 也。 也。 象 也。 坤 始 陽

盛也。薦上帝,配祖考,盛之至也。推配之以祖考。殷,盛也。禮有殷奠,謂

初六,鳴豫,凶。

必至於凶也。鳴,發於聲也。 滿極,不勝其豫,至發於聲音。輕淺如是,不中正之小人處豫,而爲上所寵,其志意

象曰:「初六鳴豫」,志窮凶也。

六二,介于石,不終日,貞吉。 勝其豫,至於鳴也,必驕肆而致凶矣。 云初六,謂其以陰柔處下,而志意窮極,不

樂,心悦之,故遲遲遂至於耽戀不能已也。 樂,心悦之,故遲遲遂至於耽戀不能已也。 正自守,可謂特立之操,是其節介如石之 正,才與時合也。唯六二一爻處中正,又 正,才與時合也。唯六二一爻處中正,又

神妙矣乎! 寧用終日,斷可識矣。 者也。君子見幾而作,不俟終日。 瀆,其知幾乎! 終日,故貞正 者,見之於先,豈復 也,吉凶之端可先見而未著者也。 微,故不至於過也。 於下以和易,故過 至於瀆者,蓋知幾也。 柔知剛,萬夫之望。」夫見事之幾微者,其 夫子因二之見幾,而極言知幾之道 也,久則溺矣。 二以中正自守,其介如石,其去之速,不俟 而不已。交於上以恭巽,故過則爲諂 曰:『介于石,不終日,貞吉。』介如石焉, 知幾其神乎! 君子上交不至 而吉也。 如二,可謂見幾而作者也。 幾者,動之微、吉之先見 君子上交不諂,下交不 則 至 所謂幾者,始 爲 有 不知幾,則至於過 君子知微知彰, 處 瀆。 X 豫 也? 於諂 君 不可安且久 子見於幾 ,下交不 動之 獨言· 《易》 日 知 明 吉 交

曰 則知剛矣,知幾如是, 剛,相對者也。 堅,則不惑而 哲 别 見 「萬夫之望。」 也 事之幾微,故能其介如 其 判 明,見幾而動,豈俟終日也? 别可見矣。 君子見微則知彰矣,見柔 衆所仰也,故贊之 微與彰 石,其 ~柔 守 既 與

能不終日而貞且吉者,以有中正之德象曰:「不終日貞吉」,以中正也。

也。

爻

中正故其守堅,而能辨之早,去之速。

言六二處豫之道,爲教之意深矣。

六三,盱豫悔,遲有悔。

也。 退皆有悔吝。當如之何? 前,則見棄絶,亦有悔也。 望於四,則以不中正不爲四所取,故有 正 六三陰而居陽,不中不正之人也。以不 而 四, 處豫,動皆有悔。 豫之主,與之切近,苟 盱,上視也。 蓋 在正身而已。 處 身不正 遲 遲 而 上 膽 不 悔 中

中正,故无悔也。君子處己有道,以禮制心,雖處豫時,不失

自處不當,失中正也,是以進退有悔象曰:「盱豫」有悔,位不當也。

九四,由豫,大有得,勿疑,朋盍

簪

也。 信,唯至誠 其无助也? 勿有疑慮,則朋類自當盍聚。 无同德之助,所以 下之任,危疑之地也,獨當上之倚任,而 簪」,四居大臣之位,承柔弱之君,而當 行其志,以致天下之豫也。「勿疑,朋 所由也,故云「由豫」。 五之君順從之,以陽剛而任上之事,豫之 而衆陰悦順,爲豫之義。四,大臣之位,六 豫之所以爲豫者,由 或曰: 卦唯一陽,安得同德之助? 而 簪、聚也。 己。 荷盡 疑 九四也,爲動之主,動 也。 「大有得」,言得 其至誠,則 簪之名簪,取 唯當盡其 夫欲上下之 何 至誠, 患乎 下 天 大 盍

九五 之正也。 者,豫和順之道也,由和順之道,不失爲臣 事而致時於豫者也,故唯戒以至誠 君位,而專主乎豫,聖人宜爲之戒,而 曰 居上位 曰「有隕自天」是也 如此而專主於豫,乃是任 |而至誠求助,理必得之。 四以陽剛 勿疑。 天下之 迫 姤之 不 然 近

象曰:「由豫,大有得」,志大行也 其志得大行也。 由己而致天下於樂豫,故爲「大有得」,謂

六五,貞疾,恒不死。

所能 故 疾苦也。 專權之臣 在於四。 不能自立者也。 六五以陰柔居君位,當豫之時,沉溺於豫, 云「貞疾,恒不死」,言貞而有疾,常疾而 制 也,乃柔弱不能自立之君,受制於 六居尊位,權雖失 四之陽剛得衆,非躭惑柔弱之君 也,居得君位貞也,受制於下有 權之所主,衆之所歸,皆 而位未亡也

> 四也。 王也。 資之於人,宜也, 躭豫而失之於人,危亡 言大臣任天下之事之義,於五則言柔弱居 逼,則失權者也。 之道也。故蒙相應,則倚任者也, 主,然彼吉而此疾者,時不同也。 豫,乃是任得其人,安享其功,如太甲、 義,故不同也。若五不失君道,而四主於 尊,不能自立,威權去己之義,各據爻以 之道非一,而以 不死,如漢、魏末世之君也。 而於五乃見其强逼者,四本无失,故於四 蒙亦以陰居尊位,二以陽爲 豫爲多。 又上下之心專歸於 在 四不言失正 人君致危亡 童蒙 蒙之 豫 相 而 成 取

未亡也。 象曰:「六五貞疾」,乘剛也,「恒不死」,中

貞而 中之尊位未亡也 疾,由 乘剛爲剛 所逼也。「恒不死」,

七七四

上六,冥豫成,有渝无咎。

也。 能 變之義。人之失,苟能自變,皆可以无咎, 渝之无咎。 義,所以勸遷善也,故更不言冥之凶,專言 故冥豫雖已成,能變則善也。 反者也。 戒懼,况陰柔乎? 乃躭肆於豫,昏迷不 上六陰柔,非有中正之德,以陰居上,不正 有渝變,則可以无咎矣。在豫之終,有 而當豫極之時,以君子居斯時,亦 在豫之終,故爲昏冥已成也。 聖人 八發此 若 知 當

然乎? 當速渝也。 昏冥於豫,至於終極,災咎行及矣,其可長象曰:「冥豫」在上,何可長也?

悦豫之道,物所隨也,隨所以次豫也。爲隨,《序卦》:「豫必有隨,故受之以隨。」夫

隨,爲隨之義。 之上,陽來下 言之,乾之上來居坤之下,坤之初往居乾 卦 之取義,尤爲詳備 有取爻義者,復有更取卦變之義者,如隨 於澤中,澤隨 長男,隨之義也。 而説,皆隨之義。女隨人者也,以少女從 , 兑上震下, 兑爲説, 震爲動, 説 於陰 而 凡成卦,既取二體之義,又 動,隨之象也。 又震爲雷,兑爲澤,雷 也。 以陽下陰,陰必 又以 丽 卦變 説 動

隨,元,亨,利,貞,无咎。

也。 矣,豈能亨乎? 其正,然後能 從長,皆隨 之從善,臣下之奉命,學者之徙義,臨 所隨,與己隨於人,及臨 隨之道,可以致大亨也。君子之道,爲衆 隨得其道,則可以致大亨也。 也。 大亨而无咎。 隨之道,利 事 在於貞正 失其正則有咎 擇 所 隨 凡 隨 皆 事 得 而 君 隨

彖曰:隨,剛來而下柔,動而説,隨。

大亨貞,无咎,

而天下隨

時

象

隨 下賤。 乾之上九來居坤之下,坤之初六往居乾之 桂 大亨而 上說,動而可說也,所以隨也。 上,以陽剛來下於陰柔,是以上下下,以 下隨之乎? 不能亨,不得正,則非可隨之道,豈能使天 時」。 一所以爲隨,以剛來而下柔,動 能如是,物之所説隨也。又下動 得正,能 天下所隨者時也,故云「天下 大 亨 而 得正 ,則爲无咎。 如是,則可 而說也,謂 貴 而

隨時之義大矣哉!

贊隨時之義大,與豫等諸卦不同,諸卦 之者,欲人知其義之大,玩而識之也。 也。 要,非造道之深,知幾能權者,不能與 君子之道,隨時 故贊之曰「隨時之義大矣哉」。 而 動,從宜 適變,不可 凡 於此 爲 此 贊 時 典

與義是兩事。

日 外,隨時之道也 適其宜 則入居於内,宴息以安其身。 人宴息」,君子畫則自强不息,及嚮 然,取其最明且 子觀象,以隨 雷震於澤中,澤隨 澤 中 也。 有雷 禮: 君子畫不居 時 ,隨,君子 近 而 動。 者言之。 震 耐 以 隨時之宜,萬事 動,爲隨之象。 繒 「君子以 晦 内,夜 起 人宴息。 居隨 昏晦, 不 繒 時, 居 晦

初九,官有渝,貞吉,出門交有 也。 之言雖失而多從,所憎之言雖善爲惡也 情,愛之則見其是,惡之則見其非 有功」,人心所從,多所親愛者也。 易也,故曰「官有渝貞吉」,所隨 官,主守也。 九居隨時而 有渝而不得 震體且動之主,有所隨 既有所隨,是其所 正,乃過 動也。 功。 主守 得 故 常人之 出 Ē 者 一門交 則 有 也 吉 變

理 ? 苟 暱,交不以 以 故出 親 愛 而 門 私,故其隨當而 隨 而交則有功也。 之,則 是 私 情 有 功。 所 出門 與 謂 贵 合 非 私 īE.

象曰 "「官有渝」,從正吉也

(有隨而變,必所從得正則吉也。 所從不

正,則有悔吝。

出門交有功」,不失也

失而有功。 出門而交,非牽於私,其交必正矣,正則无

六二,係小子,失丈夫。

其咎大矣。 也。 也 若志係於初,則失九五之正應,是失丈夫 爲之戒云:若係小子,則失丈夫也。 在下,小子也,五正應在上,丈夫也。 一應五而比初,隨先於近柔,不能固守,故 了在隨之時,當爲之戒也。 係小子而失丈夫,舍正 二有中正之德,非 應而從不 必 至如是 初陽

象 日 : 「係小子」,弗兼 與 也

也。 從之理。二苟係 人之所隨,得正則遠邪,從非則失是,无兩 所以戒人從正當專 初,則失五矣,弗能兼 一也 與

六三,係丈夫,失小子,隨有求得,利居貞。 善。 也。 上。荷取愛説以遂所求,如此,乃小 可得 无應,无隨之者也,近得三之隨,必與之親 隨則善也。 故下失於初。 不能自立,常親係於所近者。 體,而切近於四,故係於四也。 丈夫也,居下者,小子也。 上,而上與之,是得所求也,又凡所求 丈夫,九四也。 故三之隨四,有求必得也。 也。 背是從非,舍明 雖然,固 如昏之隨明,事之從善,上 、小子,初也。 舍初從上,得隨之宜 不 逐暗,下隨也。 可非理 。陽之在上者, 枉 上係於四 雖 大抵陰柔 道 人之隨 與 以 也,上 隨 四 初 者 於 於 亦 頒 同

諂 正 一,則 趨利之爲 所 謂 有 也。 求 而必得者,乃正事 故云「利居貞」。 君 自處於 子之

象曰:「係丈夫」,志舍下也。

隨

也。

九 既 四,隨有獲,貞凶。有孚,在道,以 而從上,舍卑而從高也,於隨爲善矣。 隨於上,則是其志舍下而 不從也。 舍下 明,

以 皆德及於民,而民隨之。 古之人有行之者,伊尹、周公、孔明是也, 中,動爲合於道,以明哲處之,則又何咎? 衆心皆隨於君。若人心從己,危疑之道 九 也,故凶。 隨於己。 獲,則雖正亦凶。「有獲」,謂得天下之心 成其 四以陽剛之才,處臣位之極,若於隨有 君之功,致其國之安。 爲臣之道,當使恩威 居此地者奈何? 其得民之隨,所 其至誠存乎 唯 一出於上, 孚誠積於

> 道」也,唯其明哲,故能 中,是「有孚」也,其所施爲无不中道,「在 威震主而主不疑,亦由中有 人大賢,則不能也。 而无逼上之嫌,勢重而 何過咎之有? 是以下 其 次 信 无專强之過,非聖 如是 如 而上不疑,位 誠孚,而 唐之郭子儀 以 明」也,復 處无 極

甚失也,非明哲能如是乎?

明功也

象

曰:「隨有獲」,其義凶

也。

「有

孚在道

何

.咎?

在道,則无咎,蓋明哲之功也。 居近君之位而有獲,其義固凶。 能 有 孚而

九 五,孚于嘉,吉。

九五居尊得正 善,其吉可 正中,爲隨善之義。 人,隨道之吉,唯在 知。 圃 嘉, 中實,是其 善也。 隨 善而 己。 自 中 人 誠 君 下應二之 在 至於 於 庶 隨

象曰: 「孚于嘉吉」,位正中也

七七七七

也,蓋心所説,隨則不知其過矣。 六二也。隨以得中爲善,隨之所防者過中也,所謂嘉也,其吉可知。所孚之嘉,謂處正中之位,由正中之道,孚誠所隨者正

上六,拘係之,乃從維之,王用亨于西山 業,蓋興於此。上居隨極,固爲大過,然在 此。 於他則過矣。 得民之隨與隨善之固,如此乃爲善也,施 盛其王業於西山。 市,蓋其人心之隨,固結如此,用此 難,去豳來岐,豳人老稚扶攜以隨之如 太王用此道,亨王業于西山。太王避狄之 從維之」,又從而維繫之也,謂隨之固結如 上六以柔順 拘係之」,謂隨之極,如拘持縻係之。 「王用亨于西山」,隨之極如是。 而居隨之極,極乎隨者 西山,岐山 也。 周之王 故 昔者 能 万 也。 亨 歸

隨之固如拘繫維持,隨道之窮極也。

蠱而 《左氏傳》云:「風 蠱所以 成 撓亂,是爲有事之象,故云蠱者,事也。 也。 下於少男,亂其情也。 Ш 乃有事也。 隨於人者,必有事也。无事則何喜何隨 以蠱。」承二卦之義以爲次也。 蠱、《序卦》:「以喜隨人者必有事,故受之 而 也,以卦之才言之,所以治蠱 治之,亦事也。 在文爲蟲皿,皿之有蟲,蠱壞之義。 回則物亂,是爲蠱象。 次隨 爲卦,山下有風,風 也。 蠱,事 落 以卦之象言之,所以 山,女惑男。」以長 風 也。 遇山 蠱之義,壞亂 蠱 M 在 非 夫喜悦以 回,物皆 Щ 訓 也 下, 事 女 既 遇 蠱 ?

蠱,元,亨,利涉大川。

既蠱則有復治之理。自古治必因亂,亂則

象曰:「拘係之」,上窮也。

開 也 致「元亨」也。 治, ,故曰「利涉大川」。 理自然也。 蠱之大者,濟時之艱難險 如卦之才以治蠱, 則 阻 能

先甲三日,後甲三日。

然也。 後利 誠,●慮淺而事近,故勞於救世而亂不革, 世 弊可久之道。「先甲」謂先於此,究其所以 道,當思慮其先後三日,蓋推原先後,爲救 第,甲令,皆謂首也,事之端 功未及成而弊已生矣。 則知備之之方。善救則前弊可革,善備則 究其所以然,則知救之之道,慮其將然, 日二日至於三日,言慮之深,推之遠 甲,數之首,事之始也,如辰之甲乙。 也。 變更之首。 可久,此古之聖王所以新天下而垂後 後之治蠱者,不明聖人先甲後甲之 「後甲」謂後於此,慮其將然也。 制作政教之類,則云甲, 甲者,事之首,庚 也。治蠱之 也。 甲

> 其首也。 發號施令之事,則云庚,庚猶

重

也,有所更變也

彖曰: 蠱,剛上而柔下,巽而止,蠱。 以卦變及二體之義而言。 巽而上止,止於巽 謂乾之初九上而爲上九,坤之上六下而 下,變而爲艮巽。艮,止也。巽,順也。下 男雖少而居上,女雖長而在下,尊卑得正 上,陰柔,卑而在下者也,今來居於下。 初六也。陽剛,尊而在上者也,今往居於 蠱,是以元亨也。 上下順理,治蠱之道也。 順 也。 「剛上而 由剛之上、柔之 以異順之道治 柔下」, 爲

蠱元亨而天下治也。

矣。 治蠱之道,如卦之才,則「元亨而 夫治亂者,苟能使尊卑上下之義正, 天下

0 誠」,涂刻本作「誠」。

七七九

七

亨也,如此則「天下治」矣。 止於順,則何蠱之不治也? 其道大善而在下者巽順,在上者能止齊安定之,事皆

「利涉大川」,往有事也。

是往有所事也。方天下壞亂之際,宜涉艱險以往而濟之,

感,所以能治蠱而致元亨也。 以然,要終而備其將然。先甲後甲而爲之也。聖人知終始之道,故能原始而究其所也。聖人知終始之道,故能原始而究其所夫有始則必有終,既終則必有始,天之道

濟民,君子之所事,无大於此二者。民,養育其德也。在己則養德,於天下則爲有事之象。君子觀有事之象,以振濟於爲山下有風」,風遇山而回,則物皆散亂,故象曰:山下有風,蠱,君子以振民育德。

对六雖居最下,成卦由之,有主之義。居初六雖居最下,成卦由之,有主之義。居初六雖居最下,成卦由之,有主之義。居初六雖居異順,體乃陰柔,在下无應而主才,雖能異順,體乃陰柔,在下无應而主才,雖能異順,體乃陰柔,在下无應而主才,雖能異順,體乃陰柔,在下无應而主,雖能異順,體乃陰柔,在下无應而主,雖能異順,體乃陰柔,在下无應而主,雖能異順,體乃陰柔,在下无應而主,雖能異順,體乃陰柔,在下无應而主,雖能異順,體乃陰柔,在下无應而主,雖能異順,體乃陰柔,在下无應而主,雖能異則爲有子,而其考得无咎。 子幹蠱之大法也。

象曰:「幹父之蠱」,意承考也。

則終得其吉也。盡誠於父事,吉之道也。祗敬其事,以置父於无咎之地,常懷惕厲,子幹父蠱之道,意在承當於父之事也,故

九二陽剛,爲六五所應,是以九二,幹母之蠱,不可貞。

下,而幹夫在上,陰柔之事也,故取子幹母九二陽剛,爲六五所應,是以陽剛之才在

初六,幹父之蠱,有子,考无咎,厲終吉。

之義,得幹母蠱之道也。 相 而得中,是能巽順而得中道,合「不可貞」 不能使之爲羲、黄、堯、舜之事也。 使之爲成王而已。 周公之聖輔成王,成王非甚柔弱也,然能 道則可矣,又安能使之大有爲乎? 乎? 若於柔弱之君,盡誠竭忠,致之於中 如是乃中道也,又安能使之爲甚高之事 曰「不可貞」,謂不可貞固,盡其剛直之道。 己下意,巽順將承,使之身正事治而已,故 則傷恩,所害大矣,亦安能入乎? 在乎屈 則陰柔可知。 也。從容將順,豈无道乎? 之,使得於義。不順而致敗蠱,則子之罪 蠱」之道 爲義。 近。二巽體而處柔,順義爲多,「幹母之 也。 以剛陽之臣,輔柔弱之君,義亦 夫子之於母,當以柔巽輔導 若伸己剛陽之道,遽然矯拂 守成不失道則可矣,固 以婦人言之, 二巽體 且以

象曰:「幹母之蠱」,得中道也。

九三,幹父之蠱,小有悔,无大咎。 二得中道而不過剛,幹母蠱之善者也

善事親也。 小之悔,終无大過咎也。然有小悔,已非 以剛陽之才,克幹其事,雖以剛過 順,事親之本也。又居得正,故无大 也。然而在異體,雖 三以剛陽之才,居下之上,主幹者也,子 「幹父之蠱」也。 以陽處剛而不中,剛之過 剛 過 而 不 爲),而有· 无 過。 小

象曰:「幹父之蠱」,終无咎也。

「終无咎也」。 咎也。蓋剛斷能幹,不失正而有順,所以以三之才,「幹父之蠱」,雖小有悔,終无大

六四,裕父之蠱,往見吝。

寬裕以處其父事者也。夫柔順之才而處四以陰居陰,柔順之才也,所處得正,故爲

事 正 ず,則不 一, 僅 能 勝 循 圃 常自守 見吝也。 圃 己。 以 陰 若往 柔 面 幹過常之 无應助

往安能濟?

象曰:「裕父之蠱」,往未得也。

以 所往,則未得也。 四之才,守常居寬裕之時 加其所任,則不勝矣。 則可矣,欲 有

潔

自

六五,幹父之蠱,用譽。

任 爲創始開基之事,承其舊業則 剛陽之賢而倚任之,然己實陰柔,故不能 應於九二,是能任剛陽之臣也。 才則不能。繼世之君,雖柔弱之資,苟能 五居尊位,以陰柔之質,當人君之幹,而 幹父之蠱」。 剛賢,則 可以爲 夫創業垂統之事,非剛明之 善繼 耐 成令譽也。 可 雖能 矣,故爲 下應 太 下

象曰:「幹父」「用譽」,承以德也 甲、成王 ,皆以臣 而 「用譽」者也。

幹父之蠱,而用有令譽者,以其在下之賢

上九,不事王侯,高尚其事 象所謂「志可則」者,進退合道者也 有得失小大之殊,皆自「高尚 有量能度分,安於不求知者,有清介自 敦尚其事,守其志節而已。士之自高尚, 事之地,是賢人君子不偶於時,而高 承 守,不屑天下之事,獨潔其 潔自守者,有知止足之道,退而自保者, 時,既不得施設於天下,則自善其身,尊高 之始,曾子、子思之徒是也。不屈 尚其事」。古之人有行之者,伊尹、太公望 守,不累於世務者也,故云「不事王侯,高 所事之地也。 上九居蠱之終,无繫應於下,處事之外,无 亦非一道: 有懷抱道德,不偶於時 輔之以剛中之德也 以剛明之才,无應援而處无 身 其 者 事」者也 道以 所 前

處

狥

高

王侯,蓋進退以道,用舍隨時,非賢者能之如上九之處事外,不累於世務,不臣事於

乎?

其所存之志,可爲法則

也。

臨也。 事,凡所臨皆是。 與水相際,臨近乎水,故爲臨。天下之物, 臨 爲比,澤上有地則爲 密近相臨者,莫若地與水,故地上有水則 之業,由事而生。」二陽方長而盛大,故爲 大矣,故受之以臨也。韓康伯云:「可大 臨、《序卦》:「有事 。」「臨者大也」,「蠱者事也」,有事則 爲卦,澤上有地。澤上之地,岸也, 在卦,取自上臨下臨民 前 臨也。 後可大,故受之以 臨者、臨民、臨 口

臨,元,亨,利,貞。

以卦才言也。 臨之道,如卦之才,則大亨

而正也。

至于八月,有凶。

孽萌,是以浸淫不知亂之至也 驕侈主,●樂舒肆則綱紀壞,●忘禍亂 戒於盛也。方其盛而不知戒,故狃安富 消矣,是有凶也。大率聖人爲戒,必於方 自古天下安治,未有久而不亂者,蓋不能 盛之時。方盛 之戒曰:陽雖方長,「至於八月」,則 而圖其永久。若既衰而後戒,亦无及 二陽方長於下,陽道嚮盛之時,聖人 而 慮衰,則可以 防其滿 豫 其道 則 矣。 豐 텘 爲

大亨以正,天之道也。 說而順,剛中而應,

「主」,涂刻本作「生」。

❷ 「網」,原作「剛」,據涂刻本改。

七八三

剛 順 以 坤, 浸 莫不大亨 了天之道 能 正 和 大亨 和 説 也 順 而 而 而 而 二陽長於下 順 也」。 른 得 得正,合天之道 也 正 以此臨人,臨 也。 化育之功所以不息者, 剛 和 得 **兑**爲説 脯 中 漸 道 進也。 而 説 事,臨天下, 有 剛 乃 應助 正 下兑上 和 而 也 是 和

「至于八月有凶」,消不久也。《夬・彖》云:「决而和。」

之,則消 陽消矣,故云「消不久也」。在陰陽之 至遯凡八月,自建子至建未 臨,二陽生,陽方漸盛之時,故聖人爲之戒 八月,謂 云:陽雖方長,然至于八月則消,而凶矣。 之,常不至於滿極,則无凶也。 則 陽 爲 長 爲之誠 陽生之八月。 君子 如 循環,不 ·,陰爲· 使知 小 極 可 陽始生於 人,方君 易 則 有凶 也。 也 一陰 之理 以 子 復,自復 道 人 事 氣 長 而 長 之 虞 而

初九,咸臨,貞吉。 澤之上 大之意,故爲「无窮」「无疆」之義 民之心。无疆,廣大无疆限也。含容有 窮,至誠无斁也。 窮」,親 地」爲臨 相臨與含容,无若水之在地,故「澤 一有地。 臨 也。 於民,則有教導之意思 君子觀親臨之象,則「教思无 澤,岸也,水之際也。 觀含容之象,則 有 也 容 上 物之 保 廣 无

位、蓋 當位 正 正 之位。初得正位,與四感應,是以 初,感之者也,比他卦相應尤 咸,感也。陽長之時,感 一爲重。 道,是以吉也。 所信任,得行其 初終之義爲重也。 凡言貞吉,有既正且吉者,有 他 卦 志 初 ,獲乎上 動 臨則以 上爻不 於陰。 重。 初得 言 ൬ 四 得 得 Œ 四 · , 位 位 行 道 應 居 其 君 於

正則吉者,有貞固守之則吉者,各隨其

事也。

象曰:「咸臨貞吉」,志行正也。

所謂「貞吉」,九之志在於行正也。以九居

陽,又應四之正,其志正也。

曰:「人固未易知。」古人用字之意皆如所樹歟? 是未可知也。」《史記》:侯嬴所食之粟,伯夷之所樹歟? 抑亦盗跖之所食之粟,伯夷之所樹歟? 抑亦盗跖之不利。」,未順命也。

又陰陽相應,故象特明其非由説順也。也,是以吉而无不利。五順體而二説體,之長,而又得中,至誠相感,非由順上之命不殊也。九二與五感應以臨下,蓋以剛德此,今人大率用對「已」字,故意似異,然實此,今人大率用對「已」字,故意似異,然實

長也。 象曰:「甘臨」,位不當也。「既憂之」,咎不

陽,是處不當位也。既能知懼而憂之,則陰柔之人,處不中正,而居下之上,復乘二

强勉自改,故其過 「咎不長也」。

六四,至臨,无咎。

圃 位,而下應於剛陽之初,處近君之位,守正 之至也。 四居上之下,與下體相比,是切臨 也。 任賢,以親 臨道尚近,故以比爲至。四居 臨 於下,是以无咎,所處 於下,臨 IE

象曰:「至臨无咎」,位當也。

其正,與初相應,爲下賢,所以无咎,蓋 居近君之位,爲得其任,以 位之當也 陰 處 四、爲 得

六五,知臨,大君之宜,吉。

由

適足爲不知。惟能取天下之善,任天下之 區自任,豈能周於萬事? 也。夫以一人之身,臨乎天下之廣,若區 臣,是能倚任於二,不勞而治,以知臨下者 五以柔中順體居尊位,而下應於二剛中之 故自任其知者,

> 聰明,則无所不周。 其吉可知。 知大矣。五順應於九二剛中之賢,任之以 臨下,乃己以明知臨天下,大君之所宜也, 是不自任 其知,則其

象曰:「大片之宜」,行中之謂也。

非道同德合,豈能用也? 之功,蓋由行其中德也。 君臣道合. 蓋以 能倚任剛中之賢,得「大君之宜」,成知臨 氣類 《相求。 人君之於賢才, 五有中德,故

上六,敦臨,吉,无咎。 故曰 是以吉而无咎。六居臨之終,而不取 非能臨者,宜有咎也。 應卑,高而從下,尊賢取善,敦厚之至也, 於陽,又其至順,故志在從乎二陽。尊而 上六,坤之極,順之至也,而居臨之終,敦 厚於臨也。與初二雖非正應,然大率陰求 「敦臨 」,所以吉而无咎。 以其敦 陰柔在上, 厚於順

觀

盤

而

不

薦

有

乎

· 願若。 時

爲義

也

義,臨无過極,故止爲厚義。上,无位之

予聞之胡翼之先生曰:「君子居上,爲天

地,止以在上言。

象曰:「敦臨」之吉,志在内也。

篤,其吉可知也。 「志在内」,應乎初與二也。 志順剛陽而敦

觀 觀。 民俗 故受之以觀。」觀 觀者,爲觀於下也。 物則爲觀,爲觀於下則爲觀。 觀、「序卦》:「臨者大也,物大然後可觀 陽在上,四 ,仰觀之義 リ則爲 風 行 地 觀; 上, 也。 陰在下,陽剛 修德行政,爲民 徧 所 在諸爻,則惟 觸 以 人君上觀天道 萬 次 類 臨 居 , 也 周 尊,爲群下所 如 瞻 觀 取觀見,隨 凡 樓 之 仰 觀 觀 象也 一則爲 下, 謂 視 觀 之 於

> 望也 莫不 散,而 不可 之至也。 也。 瞻仰 下 勿使誠 表儀,以爲下民之觀,當莊嚴如始盥之初, 於地,求神之時也。 故爲天下之觀,當如宗廟之祭始盥之時, 之表儀,必極 盡 盥者事之始,人心方盡其精誠,嚴 之矣。」盤,謂祭祀之始,盤 如既薦之後,則下民盡其至誠,顒然 精一不若始盥之時矣。 意少散如既薦之後,則天下之人, 其 至既薦之後,禮 乎 誠 其莊敬 , 顒 然瞻仰之矣。 薦,謂獻 則 數 下 繁 觀 居上者正其 腥 縟 仰 獻 手 ""**,** 則 而 熟之 酌 顒, 仰 化 鬱 也。 肅 時 鬯

彖曰:大觀在上 德甚 五 居 「順 大,故曰「大觀在上」。下坤而 尊位,以 而 巽」也。 剛陽中正之德,爲下 順 而 五居· 巽 (,中正 中正 以 以 觀 異順 天下。 所 上巽, 、觀,其 中正

七八七

之德爲觀於天下也

觀盥而不薦,有孚顒若」,下觀 而化也。

散也。 瞻仰而從化也。「不薦」,謂不使誠意少 爲觀之道,嚴敬 如始盤之時,則下民 至誠

天下服矣。 觀天之神道 而四時不忒,聖人以神道設教而

仰觀 而 其妙用,設爲政教,故天下之人涵泳其 忒。至神之道,莫可名言,惟聖人默契,體 天道至神,故運行四時,化育萬物,无有差 无 神,體神道以設教,故天下莫不服 天道至神,故曰神道。觀天之運行,四 不知其功,鼓舞其化而莫測其用,自然 有差忒,則見 而 戴服,故曰「以神道設教而天下服 其 八神妙。 聖人見天道之 心。夫 德 時

設教

教,如奢則約之以儉,儉則示之以禮是也。 教也。天子巡省四方,觀視民俗,設爲政 故先王體之爲省方之禮,以觀民俗而設政 「風行地上」,周及庶物,爲由歷周覽之象, 「省方」,觀民也。「設教」,爲民觀也。

初六,童觀,小人无咎,君子吝。 子而如是,則可鄙吝也 子之道,乃常分也,不足謂之過咎。 觀也。小人,下民也,所見昏淺,不能 觀深遠。初乃遠之,所見不明,如童蒙之 上,聖賢之君也,近之則見其道德之盛,所 近,如童稚然,故曰「童觀」。 六以陰柔之質,居遠於陽,是以觀見者淺 陽剛 中正 若君

君

象曰:「初六童觀」,小人道 人道也」。 所觀 不明,如童稚,乃小人之分,故曰「小 也

象曰:「風行地上」,觀,先王以省方觀民

六二,闚觀,利女貞。

魏也。 其彷彿,雖能順從,乃同女子之貞,亦可羞君子不能觀見剛陽中正之大道,而僅闚覘象曰:「闚觀」「女貞」,亦可醜也。

六三,觀我生,進退。

我生」,我之所生,謂動作施爲出於己者。也。若居當其位,則无進退之義也。「觀三居非其位,處順之極,能順時以進退者

未至失道也 觀 其 所 生 丽 隨 隨 宜 時 進退,所 進退,求不 以 處 失道,故无 雖 非 E 而

悔咎,以能順

也

觀己之生,而進退以順乎宜,故未至於失象曰:「觀我生,進退」,未失道也。

六四,觀國之光,利用賓于王。

道也。

廷,輔戴之以康濟天下。 夫聖明在上,則懷抱才德之人皆願進于朝 五,觀見而能 身乎? 當觀天下之政化,則人君之道 身而云國者,在人君而言,豈止觀 之光」,觀見國之盛德光輝也。不指君之 之君也。四切近之,觀見其道,故云「觀國 觀莫明於近。五以剛陽中正居尊位,聖賢 可見矣。 國家之治,光華盛美,所宜 四雖 順從者也。 陰柔,而異體居 四既觀見人君之 「利用賓于王」 正,切 賓于王朝, 以其行 近 於 德

七八九

象曰:「觀國之光」,尚賓也。君賓禮之,故士之仕進於王朝,則謂之賓。「利用賓于王」也。古者有賢德之人,則人效其智力,上輔於君,以施澤天下,故云

若天下之俗未合君子之道,則是己之所爲矣,則是己之所爲政化善也,乃无咎矣。乎己而已。觀己之生,若天下之俗皆君子,五居人君之位,時之治亂,俗之美惡,繫九五,觀我生,君子无咎。

政治未善,不能免於咎也。

象曰:「觀我生」,觀民也。

云「觀民以察己之道」是也。否,當觀於民,民俗善則政化善也。王弼我生,出於己者。人君欲觀己之施爲善

上九,觀其生,君子无咎。

工? 是其咎也。 一、問題之德處於上,爲下之所觀,而 一、問出於己者,德業行義也。既爲天下 一、問出於己者,德業行義也。既爲天下 也,謂出於己者,德業行義也。既爲天下 也,謂出於己者,德業行義也。既爲天下 也,謂此於己者,德業行義也。既爲天下 也,謂此於己者,德業行義也。既爲天下 也,謂此於己者,德業行義也。既爲天下 也,謂此於己者,德業行義也。既爲天下 也,謂此於己者,德業行義也。既爲天下

象曰:「觀其生」,志未平也。

不失所望而化之矣。不可以不在於位故,自慎省。觀其所生,常不失於君子,則人雖不在位,然以人觀其德,用爲儀法,故當

故云「志未平也」。平謂安寧也。安然放意无所事也。是其志意未得安也。

三三 離震 上下

噬嗑。《 之治 小 必 之象也。 以 其間,故天下之事 不得合,在天下則爲有强梗或 象,推之於天下之事 物之象。口中有物,則隔其上下,不得嗑 卦上下二剛 嗑,合也。 合之者也, 噬嗑 則 齧之,則得 噬嗑,嗑者合也。」既 得 懲 序卦 成 戒 矣。 大 中虚之中,又一剛爻,爲頤中有 口中有物間之,齧而 爻 則誅 嗑,故 凡天下至於一國一家,至於 可 而 所以 中柔,外剛 戮 不 觀 爲 ,在 得 以 而 次觀也。 噬, 齧也。 噬 合也。 有 除去之,然後天下 後 嗑。 口 미 有 則爲 中 觀 所 聖人以卦之 讒邪間 當用刑 然後 虚,人頤 後合之也。 合,故受之 有物 隔 隔 有來 쀎 於 口 而

> 爲義。 合矣。 无不 者,天下之大害也。聖人觀噬嗑之象, 間於其間也,除去之則和合矣。 子 萬 後能遂,凡未合者,皆有間也。若 也。去天下之間,在任刑罰,故 之於天下萬事,皆使去其間 親 事,所以不和合者,皆由 和且治矣。 戚 以至天地之生,萬物之成, 朋友之間,有離貳怨隙者,蓋 在二體, 明 噬嗑者,治天下之大 照 而 威 有 震 帰 間 而 乃用 也 全 合之, 一,无 故 取 君 皆 刑 用 間 讒 臣 合 間 之 用 刑 則 推 帰 父 邪 而 則

噬嗑,亨,利用獄。

象也。

矣。 也。 不得亨者,以 利 噬 用刑」,而云「利 嗑亨」, 挂自 「利用獄」,噬 天下之間 有 非 有亨義 間 刑 而 也, 用獄」者 嗑之之道,宜用 獄 也。 噬 何 而 以 天下之事 嗑之, 「, 卦 去之? 有 則 明 不云 照之 刑 亨 所 獄 通

其情則 刑 也 利 於 知爲 獄 間之道,然後 也 獄 者 所 以 미 究 以 察 設 情 防 僞 與 致 得

彖曰:頭中有物曰噬嗑,

噬嗑而亨。

「噬嗑而亨」。害,噬而嗑之,則其害亡,乃亨通也,故云害,噬而嗑之,則其害亡,乃亨通也,故云頤中有物,故爲噬嗑。有物間於頤中則爲

剛柔分,動而明,雷電合而章。

以二象 也。 以 能照則无所隱情 而 「合而 雷 排 不 電合 相雜,爲明辨之象。 才言也。 動而 章」也。 言 而 其 章」, 明 動 」,下震 剛爻與柔爻相間 照 而 雷 ,有威則莫敢不畏。 與 明 震 威並 上 而 故 一離,其 電 行,用獄之 明辨,察獄之本 復 耀, 言威 相 動 須 Щ 剛柔分 照 道 明 並 上既 並 也。 見, 也。 用

> 柔 剛則 得 宜 以 獄之主,以柔 六 曰 爲不當。 行」,謂居尊 也。 : 五以 柔居剛爲「利用獄」,以剛居柔爲利否? 中 剛 傷於嚴 而 柔 柔居 Ł 質 行 而 位。 暴,過 中,爲用 也, 利 處 雖 剛 於用 「雖不當位 不 居 圃 當 柔 用 得中,得用獄之宜也 位 則失於寬縱,五爲 獄」者,治獄之道,全 「柔得中」之義。「上 也,用柔 利 用 」,謂以柔居五 獄 非 也 治 獄之 用

象曰: 見之物,亦有 雷電之象,法其 象无倒置者,疑此文互也。 雷電,噬嗑,先王以 嗑 明 象,電明 與威 以以 明罰 m 明其刑罰 雷 雷電 勑 威 法。 先 相

王

觀

須

並

飭

其

初九,屨校滅趾,无咎。

法令。

法者,明事理

而

爲之防者也。

之人。當用刑之始,罪小而刑輕。校,木九居初,最下无位者也,下民之象,爲受刑

六二,噬

膚滅

鼻,无咎。

(趾,蓋取禁止其行,使不進於惡也。

則

校

長

其

也。 人有 械 无 以位爲正。 也。 餘 故 當位者,蓋 偶,豈容无也? 大誡,此小人之福也。」言懲之於小與初, 於惡矣,故得 得 位,爵位之位,非陰陽之位也。 四爻皆爲用刑之人。 也,其過小,故屨之於足,以 王弼 无咎也。 小過,校而滅其趾,則當懲懼,不敢進 上處尊位之上,過於尊位,亦无位者 以 初終之義爲大。臨之初九,則 若需上六云不當位,乾上九云 爲 光卷。 初與 无陰陽之位,陰陽 然諸卦初上不言當位 上无位,爲受刑之人, 《繋辭》云:「小懲 初居最下,无位者 滅 傷其 係 於 趾 奇 不 而

惡,故云不行也。古人制刑,有小罪屨校而滅傷其趾,則知懲誡而不敢象曰:「屨校滅趾」,不行也。

以服人,與嚴刑以待剛强,義不相妨。以服人,與嚴刑以待剛强,義不相妨。以其身也。二以中正之道,其刑易服,然乘器人之肌膚,爲易入也。滅,没也,深入至甚中正,則罪惡者易服,故取噬膚爲象。噬其中正,則罪惡者易服,故取噬膚爲象。噬二居中得正,是用刑者也。四爻皆取噬爲義,二應五之位,用刑者也。四爻皆取噬爲義,

象曰:「噬膚滅鼻」,乘剛也。

强之人,不得不深嚴也。深嚴則得宜,乃深至滅鼻者,乘剛故也。乘剛乃用刑於剛

三居下之上,用刑者也。六居三,處不當六三,噬腊肉,遇毒,小吝,无咎。 所謂中也。

毒惡之味,反傷于口也。用刑而人不服,怨懟悖犯之,如噬齧乾腊堅韌之物,而遇

位,自處不得其當,而刑于人,則人不服

而

七九三

七九四

雖 梗 大 反 難 可 要 致 吝 噬 服 怨 至 間 傷 而 而嗑之,雖其身處 亦 於遇毒,然用 小 미 噬 圖 而嗑之,非 吝 也 刑非 然當 位 有咎 爲不 噬 不 當也 也 當 嗑之時 一, 而 一,故 强

象曰:「遇毒」,位不當也。

刑者難服而反毒之也。 六三以陰居陽,處位不當,自處不當,故所

九

道。 四 剛 乾胏 過 其守,則吉也。 剛 至 九 |堅難 四 明則傷於果,故 中,是其間愈大而用 ,噬乾胏,得金矢,利艱貞,吉。 矢取直 居近君之位,當噬嗑之任者也。 雖用剛直之道 噬者也。 肺,肉之有聯骨者。 九四 九四 噬至堅而「得金矢」,金取 戒 陽德 利 以 剛 知 圃 在克艱其事 剛 刑愈深也,故 明體 難; 直,爲得剛 乾肉而兼骨, 陽而 居柔則 而 居柔 云「噬 直之 守 貞 四 木 固 已

象 六五,噬乾肉,得黄金,貞厲无咎。 凡言「未光」,其道未光大也。 日 剛 貞,❶蓋其所不足也,不得中正 : 者 「利艱貞吉」,未光 皆不 貞 也。 在 噬 嗑, 也 四 最 故也 爲 戒於 善 利 艱

嗑之時 六五 剛 而 四居大臣 黄,中色,金,剛 非易嗑也,故爲「噬乾肉」也。「得黄金」, 下,其勢易也。 乾胏者,五 五在卦愈上,而爲「噬乾肉」,反易於 懷 而 危 四 雖 党 輔 厲 處 之位,得其助 中剛,然實柔 以剛、「得黄 可 則 居尊位,乘在 不 得 貞 无咎也。 物。 在卦將極矣,其爲間甚大, 固 而 五居 金也。 懷危懼 、體,故 也。「貞厲 以 上之勢,以 中爲 柔 戒 哉 居 得中道 五. 尊 以 一无應, 无咎」, mi 必 刑 四之 正 當 處處 固 於 暰 而

古

,故戒以堅貞。

剛

丽

不

貞者

有矣,凡失

象曰:「貞厲无咎」,得當也。

當,居中用剛而能守正慮危也。 所以能无咎者,以所爲得其當也。所謂

上九,何校滅耳,凶。

故何校而滅其耳,凶可知矣。何,負也,謂謂「惡積而不可揜,罪大而不可解」者也,卦之終,是其間大,噬之極也。《繫辭》所上過乎尊位,无位者也,故爲受刑者。居一力,何也派耳。

象曰:「何校滅耳」,聰不明也。

在

頸

也。

知,積成其惡,故以校而滅傷其耳,誡聰之人制法,罪之大者,何之以校,爲其无所聞人之聾暗不悟,積其罪惡,以至於極。 古

艮離上下

不明也。

賁、《序卦》:「嗑者合也,物不可以苟合而

照見其上,草木品彙皆被其光彩,有實飾水。山者,草木百物之所聚也,下有火,則有文也,實所以次噬嗑也。爲卦,山下有上下,物之合聚,則有次序行列。合則必上下,物之合聚,則有次序行列。合則必已,故受之以賁,賁者飾也。」物之合則必已,故受之以賁,賁者飾也。」物之合則必

賁,亨,小利有攸往。

之象,故爲賁也

行,有實而加飾,則可以享矣。文飾之道,物有飾而後能亨,故曰无本不立,无文不

彖曰: 賁亨,

可增其光彩,故能

小利於進也。

卦爲賁飾之象,以上下二體剛柔交相爲文有攸往」: 天文也。文明以止,人文也。柔來而文剛,故亨,分剛上而文柔,故「小利

體本坤,剛往文其上而爲艮,乃爲山下有飾也。下體本乾,柔來文其中而爲離,上

七九五

七九六

明也。 待生生之本也。 又能 爲「小利有攸往」。 也。 也, 止於文明者,人之文也。 止謂處於文 也」,此承上文言陰陽剛柔相文者,天之文 上下,各主一事者,蓋離明足以致亨,文柔 加進也。 實也,但加之文彩耳。 能利者,以有本也。 盛,由飾而 乾之中爻,往文於艮之上也。事由 以爲賁也。 亨」,柔來文於剛 不行,故賁 火,止於文 小進 「分剛上而文柔,故小利有攸往 質必有文,自然之理。 二卦之變,共成賁義,而彖分言 也。「天文也,文明以止,人文 能 明 賁之道能致亨,實由飾 則能 行,故小利有攸往。 而 成賁 亨也。 ,而成文明之象,文明所 有上則有下,有此則 亨者,亨通 實飾之道,非能增 也。 事由文而顯盛,故 「柔 天下之事,无 來 理必有對, 也。 而文剛 夫往 飾 圃 往者, 一,分 能 而 有 其 故 而 亨 飾 加

> 知道者,孰能識之? 天文,天之理也,人 彼,有質則 有文,一不 獨 立 則 爲文。 非

觀乎天文,以察時 變,

文,人之道也

變。觀其運行,以察四時之遷改也。 天文謂日月星辰之錯列,寒暑陰陽之代

觀乎人文,以化成天下。 人文,人理之倫序。

附于地剥是也。 取二體,又取消長之義者,雷在地中復,山 尊位,大中而上下應之,曰大有是也。 由也,柔得位 險與天水違行是也。 者,如屯取動乎險中,與雲雷訟取上剛 上文柔。凡卦,有以二體之義及二象而 象,取山下有火,又取卦變,柔來文剛,剛 天下成其禮俗,乃聖人用賁之道也。 賁之 而上下應之, 日小畜, 柔 有取二象兼取二爻交變 觀人文以教化天下, 有取 一爻者,成卦之 得 成

是也。 也。 乃居 无妄 形爲 柔 實本是泰 是 復 損 爲 上艮,本坤上爻變 居五者,皆云柔 據 益下,謂剛居上,柔在下 木上有火鼎是也,鼎又以卦形爲象。 加 來 成 也。 取 兼 義 變之理? 云剛 象者 尊位,是 桂 取 者,風雷益兼取損上益下,山下有澤 卦之變,皆自乾、坤,先儒 爻之義 艮 有以 損下益上是也。 此成卦之義也。 而言,非 在 小卦, 豈 來,豈 「**,** 山 上,故 者 用 下 進 下有雷頤,頤中 成卦者,巽乎水而上水井, , 夬之剛 離,本乾中 進而上行。 自上 謂 有 而 云剛· 加 乾 F 就 成 坤 也,非謂 體 卦 上,非自下體 艮。 中升 重而 而 决柔, 姤之柔遇剛 有既以二象成卦 ,損於上,益於下, 如剛上柔下、損上 來也? 柔,居下者也, 爻變而 降 離 爲 有物日 自下體 在 不達、故謂 也。 泰,又由 内,故 凡以柔 成 如訟、 有以 噬 껪 離 而 上 云 泰 上 嗑

> 四,皆由乾坤之變也。 也。乾坤變而爲六子,八卦重而爲六十

曰:山下有火,賁,君子以明庶政,无敢

折獄

象

无 自用 折獄者,專用情實,有文飾則没其情矣,故 用 象之所取,唯以「山下有火」,明照庶物,以 政,成文明之治,而无果敢於折獄 上 山者,草木百物之所聚生也,火在其下而 獄者,人君之所致慎也,豈 君子觀山下有火,明照之象,以修明其 敢用文以折獄 明爲戒,而 照,庶類皆被 乎? 乃聖人之用 賁 亦自有「无敢 其 也 光 明 心也,爲戒深矣。 爲賁 미 '恃其 折獄」之義。 飾 之象也。 明 也。 而 折 輕 庶

初九,實其趾,舍車而徒。

德而在下者也。君子在无位之地,无所施初九以剛陽居明體而處下,君子有剛明之

貴也。 爲 貴,君子所賤。以車徒爲言者,因趾與行 從難 明守義,不近與於二而遠應于四,舍易而 守節處義,其行不苟,義或不當,則舍車輿 而 於天下,惟自貴飾其所行而已。 而應四,應四正也,與二非正也。 而寧徒行,衆人之所羞,而君子以爲貴也。 「舍車而徒」之義,兼於比應取之。 義也。 所以 ,如舍車而徒行也。 是故君子所貴,世俗所羞,世俗所 行也。 君子修飾之道,正 守節 義,君子之 趾取在下 其所行 初比二 九之剛

象曰:「舍車 之難,舍車而 舍車而徒行者,於義不可以乘也。 正也,從二非正 而徒」,義弗乘也。 徒行也。 也。 近舍二之易,而 君子之賁,守其義 初應四 從

四

重。 明,惟爲實飾,善惡則繫其質也 於所附,猶善惡不 故取須義。須,隨頤而動者也,動 物者,不能大變其質也,因其質 卦之爲賁,雖由兩爻之變,而文明之義爲 二實賁之主也,故主言賁之道。 由于賁也。● 二之文 而加飾耳, 止 唯 飾於

象曰:「賁其須」,與上興也。

質而實之,善惡在其質也。 以須爲象者,謂其與上同興也。 動,動止惟繫所附 也。 猶 加 飾于物, 隨 E 因 其 而

九三,賁如,濡如,永貞吉。

盛 之盛者也,故云「賁如」。 三處文明之極,與二四二陰,間處相實 飾之盛,光彩潤澤,故云「濡如」。 ,則有潤澤。《詩》云:「麀鹿濯 如 解助 光彩之 也。

六二,實其須。

而已。

七九八

⁰ 由」。原作「猶」,據四庫本《伊川易傳》改。

帰

耳

下 難 故 貞吉」, 比於二,二柔文一剛,上下交費,爲賁之 乎常 戒 以常 也,故永貞 三與二四非正應,相比 永 貞 E (則吉。 賁者 飾 三與 也 四 賁 而成 相 飾 賁 之事 相 又 賁,

飾而不常,且非正,人所陵侮也,故戒能永象曰:永貞之吉,終莫之陵也。

尤也。

盛

也。

六

四 也。 其相 未 爲 正 故云「白 四 獲 與初爲 ,實如,皤如,白馬,翰如,匪寇婚媾 則吉也。 三所隔 如。 親矣。 賁 初 也。 四 馬」。其從正應之志如飛,故云 ,故不 匪爲九三之寇讐所隔 E Œ 馬,在 其實既常而 己之所乘與動於下者,馬之象 應,相賁者也。 應,終必獲親,第始爲其 獲相 下而 賁 一而皤 動者也、未獲 正,誰能陵之乎 如。 本當實如,而 ",則婚 皤,白 相 媾 賁 也, 間 遂 ?

「終无尤也」。尤,怨也,終得相賁,故无怨媾,然其正應,理直義勝,終必得合,故云爲可疑也。雖爲三寇讐所隔,未得親於婚四與初相遠,而三介於其間,是所當之位四與初相遠,而三介於其間,是所當之位

六五, 實于丘園, 東帛戔戔, 吝,終吉。 若能 從焉,獲賁於外比之賢,「賁 柔之才不足自守,與上之 而 最近城邑,亦在 丘 於上九也。 陰比于陽,復无所繫應,從之者也,受賁 六五以陰柔之質,密比于上九剛陽之賢 近 坂,丘謂 受實於上九,受其裁制,如 者,指上九也。 在外而近且高者。 自古設險守國,故城 外 丽 六五雖 近 者。)剛 居君位,而 一十丘 丘園 陽 袁 東帛 相 圃之地 謂 園」也。 比 壘多依 在 丽 间 志 外

八00

其 也 戔 能 戔 受人剪製 戔戔然。「東帛」喻六五本質,「戔戔」謂 之「東帛」,及其制爲衣服,必剪裁分裂 而蒙不言吝者,蓋童蒙而賴於人,乃其宜 則 功,終爲吉也 ,非童幼而資實於人爲可吝耳。 ,剪裁分裂之狀。 從於人,成賁之功,終 雖其柔弱不能自爲,爲可吝少,然 而成 河用也。 帛未用則束之,故謂 其資於人,與蒙同 獲其吉也。 然享 戔

也」。 能從人以成實之功,享其吉美,是「有喜

象曰:六五之吉,有喜也。

象曰:「白賁无咎」,上得志也。

故戒以質素則无咎,飾不可過也。上而得志,處實之極,將有華僞失實之咎,功,爲得志也。與他卦居極者異矣。既在又受其實,故雖居无位之地,而實尸實之得志者,在上而文柔成實之功,六五之君「白實无咎」,以其在上而得志也。上九爲

象也。 地,山 剥於陽,故 也,極則必反,故實終則剥也。 矣,故受之以剥。」夫物至于文飾,亨之極 剥、《序卦》:「賁者飾也,致飾然後亨則盡 一陽,陰始自下生,漸長至于盛極,群陰消 高 起 爲 地 剥 上,而反附著於地,頹 也。 以二體言之,山 卦五 剥之 陰 附 於 而

剥,不利有攸往。

言晦迹,隨時消息,以免小人之害也。剥喪於君子,故君子不利有所往,惟當巽剥者,群陰長盛,消剥於陽之時。衆小人

彖曰:剥,剥也,柔變剛也。

「不利有攸往」,小人長也。

順而止之,觀象也。君子尚消息盈虚,天

行也

順之,乃合乎天行 虚,天行也」,君子存心消息盈虚之理 之道,君子當觀而 乃能觀剥之象也。 君子當剥之時,知不可有所往,順時而 也。 體之。 卦有順止之象,乃 理有消衰,有息長, 「君子尚消 加 息 處 止 能 盈 剥

子隨時敦尚,所以事天也。有盈滿,有處損,順之則吉,逆之則凶。

象曰:山附於地,剥,上以厚下安宅。

矣。 以厚其本,乃所以安其居也。《書》曰: 剥者也。 其居也。下者,上之本,未有基本固 與居人上者,觀剥之象 艮重於坤、「山附于地」也。山高起於地, 而反附著于地, 圮剥之象也。 爲人上者,知理之如是,則安養人民, 故上之剥必自 而厚固 下,下 `上,謂人君 其下, 剥 則 上危 圃 以 安 能

初六,剥牀以足,蔑貞凶。「民惟邦本,本固邦寧。」

蔑,无也,謂消亡於正道也。陰剥陽,柔變足。陰自下進漸,消蔑于貞正,凶之道也。牀以足」,剥牀之足也。剥始自下,故爲剥汰以足」,剥牀之足也。剥始自下,故爲剥陰之剥陽,自下而上。以牀爲象者,取身陰之剥陽,自下而上。以牀爲象者,取身

剛,是邪侵正,小人消君子,其凶可知。

象曰:「剥牀以足」,以滅下也。

没也。侵滅正道,自下而上也。 取牀足爲象者,以陰侵没陽于下也。滅,

六二,剥牀以辨,蔑貞凶。

剥至于辨,愈蔑於正也,凶益甚矣。辨,分隔上下者,牀之幹也。陰漸進而上

象曰:「剥牀以辨」,未有與也。

盛,有與猶可勝也,示人之意深矣。 陽未有應與故也。小人侵剥君子,若君子 , 以被蔑而凶。當消剥之時而无徒 五與,則可以勝小人,不能爲害矣, 唯其 五與,則可以勝小人,不能爲害矣, 唯其 人, 以 , 不能爲害矣, 唯其

六三,剥之无咎。

之陰異矣。志從於正,在剥之時,爲无咎衆陰剥陽之時,而三獨居剛應剛,與上下

耳。 也,難乎免矣,安得 正,其勢孤 者也。三之爲,可謂善矣,不言吉,何也 曰:方群陰剥陽,衆 言其无咎,所以 弱,所 應在无位之地,於 動 吉也? 小人害君子,三 也。 其義爲 无 斯 雖從 咎 時

象曰:「剥之无咎」,失上下也。

如東漢之吕强是也。同,是與其同類相失,於處剥之道爲无咎,三居剥而无咎者,其所處與上下諸陰不

六四,剥牀以膚,凶。

甚,貞道已消,故更不言蔑貞,直言凶也。滅其身矣,其凶可知。陰長已盛,陽剥已始剥於牀足,漸至于膚。膚,身之外也,將

象曰:「剥牀以膚」,切近災也。

五爲

君位,剥已及四,在人則

剥

其膚

六五,貫魚以宫人寵,无不利。 剥及其膚,身垂于亡矣,切近於災禍也。

群陰順 陽 陰之主 剥 剥 此 義,以一陽在上,衆陰有順從之道,故發 人,妻妾侍使也。 義。 如宫 及君位 M 别設 也。 序,如貫魚然 ,剥之極也,其凶 義以 則无 魚,陰物,故以爲象。 所 開 以陰言,且取獲寵愛之 不 小 利 ,反獲寵愛於在 人遷善之門。 也。 可知,故更不言 宫人,宫 五 五 上之 中之 能 一,群 使

善之意,深切之至也。 一群陰,駢首順序,反獲寵愛於陽,則終无過群陰,駢首順序,反獲寵愛於陽,則終无過群陰消剥於陽,以至於極,六五若能長率

上九,碩果不食,君子得興,小 大之果不見食,將見 諸陽消剥已盡,獨有上九一爻尚 變,則純 陰 矣。 然陽 无可盡之理,變於上 復生之理。 人剥 廬。 存, 上 九 如 亦 碩

或曰: 之時 无陽 爲坤 何 此 處 所容其身也。 剥廬」,若小人,則當剥之極,剥其廬矣,无 是,在卦亦衆陰宗陽,爲共載之象。「小人 風》、《下泉》所以居變風之終也。理既 心願 則復生於下矣。故十月謂之陽月,恐疑其 剥 理,以見陽與君子之道不可 則生於下,无間可容息也。 配月,則坤當十月。 在 剥 盡 其亂 也。陰亦然,聖人不言耳。陰道盛 言「終有凶」? 上便有復生之義,何也? 極 載於君子,「君子得輿」也。 ,陽來爲復;陽未嘗盡 則爲純坤,豈復有陽乎? 陰陽之消 一則及 可知。 其 更不論爻之陰陽,但言小人 廬 ,必待盡 亂 矣。 以氣消息言,則陽剥 曰 : 極則自當思治,故衆 廬,取 上九 而 也,剥 亡也 後 聖人 夬之上六, 在 復生於下 居剥之極, 曰 《詩 上之象。 盡 發 或 於上, 以 明此 . 桂 如 I 極

用更言却有復生之理乎? 陰,陰,小人之道也,故但言其消亡耳, 之義,見君子之道不可亡也。夬者,陽 上 有 陽,陽无可盡之理,故 明其有復 何 消 生

象 廬」,終不可用也 日 :"「君子得輿」,民所載也,「小人剥

爲民 但言剥極之時小人如是也 之窮耳,「終不 Œ 道 消 所 承 剥 載 既 也。 極 可用也」。非 ,則人復思治,故陽 若小人處剥 謂 之極 九爲小人, 川則 剛君子 小人

=== 坤震 上下

卦,一陽生於五陰之下,陰極而 於下,窮上 則復來,陰 下,故受之以復。]物无 復、《序卦》:「物不可以終盡,剥 極 圃 反 則 陽生 下也,復所 陽剥 剥 盡之理 以 極 次 於 剥 上 陽復也。 故故 窮上反 也。 而 復 剥 爲 生 極

> 之義。 中,故爲復 復反,君子之道消極而復長也 歲十月,陰盛既 也。陽,君子之道。 極,冬至則一 陽 一、故爲 陽消 復 生 極 於 反 地 而

復,亨,出入无疾,朋來无咎。 「復亨」,既復則 也, 長進於外, 出也。 「出入无疾」,出入謂生長,復生於内,入 亨通,澤於天下,故復則有亨盛之理 亨盛而生育萬物。君子之道既復 亨也。 陽 先云出,語 氣 復 生 於下,漸 ,則漸以 順耳。 也。

也。 之,而其類漸 疾」,謂微 折,觀草木於朝暮,則可見矣。「出人无 氣至微,故多摧折。 始生,其氣至微,故多屯艱。陽之始生,其 陽生非自外也,來於内,故謂之人。物之 所謂咎,在氣則爲差忒,在君子則爲 陽生長,无害之者也。既 進 而 來,則將亨盛,故「无咎」 春陽之發,爲陰寒所 无

抑塞 萬 復,豈能便勝於小人? 以朋來而无咎也。 諸陽之來,然後能 生至微,固未 之才有无疾之義,乃復道之善也。 之,固不能止其復 物 ,衆陽之功也。 不 ·得盡 其 能勝 理。 成生物之功而无差忒 群 也 三陽子丑寅之氣生成 若君子之道,既消 陽之當 陰而發生萬 ,但爲阻 必待其朋類漸 復, 礙 雖 耳。 物,必待 使 陽始 有 而 而 卦 疾

反復其道,七日來復,利 則 子道長則小人道消,故「利有攸往」也。 長至于陰長,歷八月也。 云 而 謂消長之道,反復迭至。 七日,謂七更也。 來復。姤陽之始消也,七變而 能協力以勝之也。 臨云八 有攸往。 陽之消,至七日 陽 進 月 則 有 成復、故 陰退,君 凶 一,謂 陽

動而以順行,是以「出入无疾,朋來无咎」。

彖曰:

「復亨」,剛

反。

「反復其道,七日來復」,天行也。 无疾,朋來而无咎也。 以順行」也。 才言其所以 順行」,是以「出入无疾,朋來无咎」,以 反,既來反 復亨」,謂 ,則漸長 剛 然也。 陽剛 反 而 反 下動 盛 亨 而順 也。 而 朋之來,亦順 亨通矣。 m 動, 陽 上順,是「 岡川 是以 消 得 極 動 動也。 出人 動 而 而 桂 而 以 來

利有攸往」,剛長也。

復其見天地之心乎!

之心也。非知道者,孰能識之? 以静爲見天地之心,蓋不知動之端 理也。陽剛君子之道長,故「利有攸往 者,天地之運行如是也。 其道反復往來, 迭消 陽復於下,乃天地生物之心也。先 迭 息。 消長相 Ł 日 因 而 乃天 一天之 來 儒 商旅 復 地 皆

不行,后不省方。 象曰:雷在地中,復,先王以至日閉關,

八〇五

八〇六

也。 象而順天道也。 雷 使商旅不得行,人君不省視四方,觀復之 當至日,陽之始生,安静以養之,故閉 下而甚微,安静而後能長。先王順天道 養其陽也 雷在地 ,陰陽相 中,陽始復之時也。 薄 而 在一人之身亦然,當安静 成聲,當陽之微 陽始生於 未能 關 發

初九,不遠復,无祗悔,元吉。 《玉篇》云:「適也。」義亦同。 謂 庶幾,乃「无祗悔」也。 最先者也,是不遠而復也。失而 反善之義。 復者,陽反來復也。陽,君子之道,故復爲 不至於悔也。《坎》卦曰「祗既平,无咎」, 不至於悔,大善而吉也。 不失則何復之有? 惟失之不遠而復,則 至 既平也。 初剛陽來復,處卦之初,復之 顔子无形顯之過,夫子謂其 過既未形 祇宜音祗,抵也。 「无祗悔」, 後有復 改,何

> 《五經文字》、《群經音辨》並見衣部。 嘗不知,既知,未嘗不遽改,故不至於悔, 乃「不遠復」也。 是有過也。 悔之有? 既未 然其明 能 祗,陸德明音支,《玉篇》、 不勉 加 剛,故一有不善,未 而 中 ,, 欲 不 踰

象曰:不遠之復,以修身也。

問之道无他也,唯其知不善則速改以從善 不遠而復者,君子所以修其身之道 也

六二,休復吉。 而已。

比 也,復禮則爲 能下仁也,復之休美者 二雖陰爻,處中正而切比於初,志從於陽, 而下之,所以美而吉也。 仁。 初陽復,復於仁也。 也。 復者,復於禮

者,天下之公,善之本也。 爲復之休美而吉者,以其 初復於仁,二能 能 下仁 也。

象曰:休復之吉,以下仁也。

Щ

而下之,是以吉也。

六三,頻復,厲无咎。

道,與其復而危其屢失,故云「厲无咎」。 者也。復貴安固、頻復頻失、不安於復也。 復善而屢失,危之道也。聖人開遷善之 三以陰躁、處動之極,復之頻數而不能固

復何咎? 過在失而不在復也。

不可以頻失而戒其復也,頻失則爲危,屢

象曰:頻復之厲,義无咎也

頻復頻失,雖爲危厲,然復善之義則 无

咎也。

六四,中行獨復。

間,初方甚微,不足以 此爻之義,最宜詳玩。 故聖人但稱其能獨復,而 善矣。不言吉凶者,蓋 獨能復,自處於正,下應於陽剛,其志可謂 相援,无可濟之理, 四行群陰之中,而 四以柔 不欲言其獨從道 居群陰之

> 日: 而 必 以陰居陰、柔弱之甚、雖有從陽之志、 凶 也。 曰: 然則 不 言无咎,何也?

終不克濟,非无咎也

象曰:「中行獨復」,以從道 也。

六五,敦復,无悔。

稱其獨復者,以其從陽剛君子之善道也。

陽復方微之時,以柔居尊,下復无助,未能 者也,故无悔。 六五以中順之德,處君位,能敦篤於復善 雖本善,戒亦在其中矣。

致亨吉也,能无悔而已。

象曰:「敦復无悔」,中以自考也。

以中道自成也。五以陰居尊, 順,能敦篤其志,以中道自成 ,則可以 處中而 體

上六,迷復凶,有災眚,用行師,終有大敗,以 也。 自成謂成其中順之德。

以陰柔居復之終,終迷不復者也。迷而 不

其國君凶,至于十年不克征

能行。既迷於道,何時而可行也? 来,告,己過,由自作。既迷不復善,在己 則動皆過失,災禍亦自外而至,蓋所招也。 「大敗」,以之爲國,則君之凶也。「十年」 大敗」,以之爲國,則君之凶也。「十年」 大敗」,以之爲國,則君之凶也。「十年」 後有 後有,是過,由自作。既迷不復善,在己 能行。既迷於道,何時而可行也?

攸往。

象曰:迷復之凶,反君道也。

电 乾震 上下

妄。」復者,反於道也,既復於道,則合正理无妄,《序卦》:「復則不妄矣,故受之以无

无妄,元,亨,利,貞。其匪正有眚,不利有人欲則妄矣。无妄之義大矣哉!乾上震下。震,動也,動以天爲无妄,動以而无妄,故復之後受之以无妄也。爲卦,

有匪 往 邪心,苟不合正理,則妄也,乃邪心也,故 妄之道,則可以致大亨矣。无妄,天之道 妄之道,利在貞正,失貞正則妄也。 也,卦言人由无妄之道也。 合其德」也。无妄有大亨之理,君子行无 妄也。人能合无妄之道,則所謂 之化育萬物,生生不窮,各正其性命,乃无 无妄者,至誠也。至誠者,天之道也。天 則妄也 正則爲過告。 既已无妄,不宜有往, 「利貞」,法无 「與天 地

謂初九也。坤初爻變而爲震,剛自外而。彖曰:无妄,剛自外來,而爲主於内。

來

妄之主。動以天爲无妄,動而以天,動爲也。震以初爻爲主,成卦由之,故初爲无

正爲主於内,无妄之義也。九居初,正也。主也。以剛變柔,爲以正去妄之象。又剛

動 之體 而 道 下 大亨通而貞正,乃「天之命也」。 天命謂天 復以中正相應,是順理而不妄也。 故其道 動 也,所謂 健,剛中而應,大亨以正,天之命也。 也 而上健,是其動剛健也。 「剛中 无妄也。 加 應」,五以剛 剛健,无妄 居中正,二

矣? 天命不祐,行矣哉! 「其匪正有眚,不利有攸往。」无妄之往,何之

往則悖於天理,天道所不祐,可行乎哉?也。更有往,將何之矣? 乃人於妄也。而不往,何由有匪正乎? 无妄者,理之正而不往,何由有匪正,蓋由有往。若无妄所謂无妄,正而已。小失於正,則爲有過,

象曰:天下雷行,物與无妄,先王以茂對時,

育萬物。

言,猶「盛行」「永言」之比。「對時」,謂順 妄」也。先王觀天下雷行發生賦與之象 草木,使各得其宜,乃對時育物之道也。 妄,王者體天之道,養育人民,以至昆 纖高下,各正其性命,无有差妄,「物與无 驚蟄藏,振萌芽,發生萬物,其所賦 雷行於天下,陰陽交和,相薄 天與之无妄也。茂,盛也。「茂對」之爲 合天時。天道生萬物,各正 而以茂對天時,養育萬物,使各得其宜,如 其 而成聲,於是 性 命 與,洪 丽 不

初九,无妄,往吉。

无妄,不可復有往也,過則妄矣。爻言「往何所不吉? 卦辭言「不利有攸往」,謂既柔而居内,中誠不妄者也。以无妄而往,九以陽剛爲主於内,无妄之象,以剛實變

八一〇

吉」,謂以无妄之道而行則吉也。

往而不得其志也。 則事得其理,以之臨人則人感而化,无所物,无不能動,以之修身則身正,以之治事以无妄而往,无不得其志也。蓋誠之於象曰:无妄之往,得志也。

六二,不耕穫,不菑畬,則利有攸往 耕 則 則是人心所作爲,乃妄也。 造其事,因其事理所當然也。 乎中正,乃无妄者也,故極言无妄之義。 耕,農之始,穫,其成終也。田一歲曰菑 又應五之中正,居動體 也,故以耕穫菑畬譬之。六二居中得正 凡理之所然者非妄也,人所欲爲者乃妄 三歲曰畬。不耕而 是 則必有穫,菑則必有畬,是事理之固然, 理 應物,非 妄也, 穫與 穫,不菑 而 柔順 因事之當然, 而 畬是也。 首造其事, 畬 ,爲動能順 ,謂不首

> 隨時而爲也 矣,豈待累聖繼作也? 開之也。 人隨時制作,合乎風氣之宜,未嘗先時 利天下者,皆造端也,豈非妄乎? 非 心 意 之所 若不待時,則一聖人足以 造作 也。 或 時乃事之端,聖人 E : 聖 人 制 日 盡 • 爲 而 以

象曰:「不耕穫」,未富也。

未者,非必之辭,臨對曰「未順命」是也。 末者,非必之辭,臨對曰「未順命」是也。 京而爲也。其始耕菑,乃設心在於求穫 富而爲也。其始耕菑,乃設心在於求穫 金,是以其富也,心有欲而爲者,則妄也。 本,是以其富也,心有欲而爲者,則妄也。 之災。

也。人之妄動,由有欲也。妄動而得,亦於上,欲也,亦妄也,在无妄之道,爲災害三以陰柔而不中正,是爲妄者也,又志應

之,固不足以爲得也。人能知此,則不爲 得之福,災亦隨之, 妄得之得,失亦 言有得則有失,不足以爲得也。行人邑 借使邑人繫得馬,則行人失馬,乃是災也。 行人得之以爲有得,邑人失牛乃是災也。 如或繫之牛,「或」謂「設或」也,或繫得牛, 乃无妄之災害也,設如有得,其失隨至。 牛,行人之得,邑人之災。」言如三之爲妄, 象,而發明其理云: ●「无妄之災,或繫之 知其失必與稱也。故聖人因六三有妄之 矣,况復凶悔隨之乎? 必有失,雖使得其所利,其動而妄,失已大 妄動矣。 人,但言有得則有失,非以爲彼己也。 知者見妄之得,則 妄 稱

何足以爲得乎?「行人得牛」乃邑人之災也,有得則有失,象曰:行人得牛」乃邑人災也。

九四,可貞,无咎。

四,无尚剛之志也。「可貞」與「利貞」不姓。, 九居陰,得爲正乎? 曰:以陽居咎也。九居陰,得爲正乎? 曰:以陽居的體,若復處剛,則爲過矣,過則妄也。居可,无尚剛之志也。「可貞」與「利貞」不可,而以陽所

象曰:「可貞无咎」,固有之也。謂利於貞也。

貞固守之,則无咎也。

九五,无妄之疾,勿藥有喜。

以藥治,則有喜也。人之有疾,則以藥石之病者也。以九五之无妄,如其有疾,勿謂无妄之至者也,其道无以加矣。疾,爲,以中正當尊位,下復以中正順應之,可

❶ 「發」,原誤作「法」,據四庫本《伊川易傳》改。

攻去其邪,以養其正。若氣體平和,本无攻去其邪,以養其正。若氣體平和,本无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,乃是渝其无疾,不足患也。若遂自攻治,及之域,以秦其正。若氣體平和,本无

象曰:无妄之藥,不可試也。

可試也」。試,暫用也,猶曰少嘗之也。治之,是反爲妄也,其可用乎? 故云「不人之有妄,理必修改。既无妄矣,復藥以

行,過於理也,過於理則妄也。故上九而上九居卦之終,●无妄之極者也。極而復

上九,无妄,行有眚,无攸利。

行,則有過告,而无所利矣。

象曰:无妄之行,窮之災也。

爲災害也。 无妄既極,而復加進,乃爲妄矣,是窮極而

積,故止爲畜義。 積,故止爲畜義。 大畜、(序卦):「有无妄然後可畜,故受之 大畜、(序卦):「有无妄然後可畜,故受之 大畜、(序卦):「有无妄然後可畜,故受之

皆藴畜至大之象也。在人,爲學術道德充莫大於天而在山中,艮在上而止乾於下,大畜,利貞,不家食吉,利涉大川。

利貞。 時,濟天下之艱險,乃大畜之用也,故「利 者固有矣。既道德充積於內,宜在上位以 專言其大者。 積於内,乃所畜之大也。 涉大川」。此只據大畜之義而言,象更以 也,故不家食則吉。所畜既大,宜施之於 天下之吉也。 享天禄,施爲於天下,則不獨於一身之吉, 若夫異端偏學,所畜至多,而不正 若窮處而自食於家,道之否 人之蘊畜,宜得 凡所畜聚,皆是 IE 道 故 云

剛 彖 日 上而 實。 實而 以卦之才德而言也。 大畜剛健、篤實、輝光,日新其德。 人之才「剛 尚賢,能止健,大正也 有輝光。 畜之不已,則其德日新也。 健篤 實」,則所 乾體 剛健, 畜能 艮體 大,充 篤

「剛上」,陽居上也。陽剛居尊位之上,爲

在上與尊尚賢德、能止至健,皆大正之義。止乎健者,非大正則安能?以剛陽「尚賢」之義。止居健上,爲「能止健」之

不家食吉」,養賢也

利涉大川」,應乎天也。

大畜之人,所宜施其所畜以濟天下,故不食於家則吉,謂居天位享天禄也。國家養食於家則吉,謂居天位享天禄也。國家養育蘊畜之人,宜濟天下之艱險也。《彖》更有蘊畜之人,宜濟天下之艱險也。《彖》更天也」。六五,君也,下應乾之中爻,乃大天也」。六五,君也,下應乾之中爻,乃大意之君,應乾而行也。所以能應乎天,故不畜之君,應乾而行也。所以能應乎天,故不

卦之才德而言,諸爻則惟有止畜之義。蓋

易體道隨宜,取明且近者。

行,以畜其德。 象曰:天在山中,大畜,君子以多識前言往

天爲至大而在山之中,所畜至大之象。君

德,乃大畜之義 其用,察言以求其心, 大,在多聞前古聖賢之言與行,考跡 子 親象 以 大其藴 也。 畜。 識 人之蕴 而得之,以 畜, 由 畜 成 以 學 其 觀 而

初九,有厲利已。

健體 義。 而 爲合志,蓋陽皆上進之物 畜 他 加 止 大畜,艮 卦, 進, 於己,安能敵 无相止之義 則 艮三爻皆取止之爲義。 而居下,必上進者也, 相 則 則 應 有危厲,故利在已而 止畜乾 四 乃 與 爲 初 相 爲正 在上得位之勢? 也,故乾三爻皆取 止 畜。 應相 ,故有同 F 援者也;在 六四· 與三皆陽,則 初以陽剛 不進也。 在上, 志之象, 若 被 犯 止 又 大 之 在 爲

勢而進,有災必矣。 有危則宜已,不可犯災危而行也,不度其象曰:「有厲利已」,不犯災也。

九二,輿説輹

不可,則止而不行,如車輿脱去輪輹,謂不得中道,故進止无失,雖志於進,度其勢之之勢,豈可犯也? 二雖剛健之體,然其處二爲六五所畜止,勢不可進也。五據在上

行也。

象

曰:「輿説輹」,中无尤也。

進止自 宜,故 盛衰,勢之强弱,學易者所宜深 健而不足以進,四與五陰柔 不行也,不行則无尤矣。 九處不得中,故戒以 者,不至於過柔耳。 輿説輹而不行者,蓋其處得 无過尤 无過 差,故但 也。 善莫 言 有 剛 中,中 危宜已。 入善於 輿説 初與 而能 中 剛 輹 而 道 二乾體, 識 中。 才 止 二得中 也 謂 也。 動 時之 其 柔 不 剛 能 失 初 中

三剛健之極,而上九之陽亦上進之物,又九三,良馬逐,利艱貞,日閑輿衛,利有攸往。

防。 者 處 鋭於進,雖剛明,有時而失,不得不誠 有 速 有 由 百 上之應 攸往 畜之極 鋭 貞 也 與 相 合 應以 進,故戒以 E 當自日常閑習其車興與其 之道。 矣。 志 雖其進之勢速,不可恃其才之健 而忘備與 進者 而 而 三、乾體而居正 進 思變也,與三乃不相 興者用行之物,衛者所以 也。 ,其進如 知難與不失其 慎也,故宜艱難 三以剛健之才,而 良馬 能貞者 之馳 貞 防衛,則 也。 其事 逐,言 畜 也,當 也。 志 在 而 而 既 與 其 利 自 E 志

象曰:「利有攸往」,上合志也。

九陽性上進,且畜已極,故不下畜三,而與所以利有攸往者,以與在上者合志也。上

六四,童牛之牿,元吉。

合志

上進

也。

居最下,陽之微者,微而畜之則易制,猶童以位而言,則四下應於初,畜初者也。初

刑戮。 拂, 牛而 惡於未發之前,則大善之吉也 若童犢始角,而加之以牿,使觝 故上之惡既甚,則雖 位 艮 發,則易而无傷,以况六四能畜 元吉也。牛之性觝 止於初則易,既盛而後禁,則扞格 君之邪心,下畜止天下之惡人。人之惡, 體居上位而 ,當畜之任者 下之惡既甚,則雖聖人治之,不能 加牿,大善而吉也。 莫若止之於初, 得正,是以 也。 觸 大臣之任,上畜 聖人救之,不能 以 如童牛 角、故 概論畜道, Œ 德 牿 而 居大臣 止上下之 觸之性 以 加 而難 牿 制 止人 免 則 則 違 免 四

象曰:六四元吉,有喜也。

是 加 下傷於刑誅。 天下之惡,已盛而止之, 也 吉,不勞而 ,上畜亦然。 无傷,故可 故畜止於微 則上勞於 喜 小之前 也。 四之畜 禁制 則大 初 丽

六五,豶豕之牙,吉。

絶其 其躁 尚 欲之心乎? 而 且 之惡不可以力制也,則察其機,持其要,塞 豶去其勢,則牙雖存,而剛躁自止,其用 爲 機 密法嚴刑,不能 之衆、發其邪欲之心、人君欲力以制之、 此,所以吉也。 用若「豶豕之牙」也。 心,道之斯行,止之則戢,故不勞而 六五居君位,止畜天下之邪惡。 威 迫 如 猛 刑 於 、本原,故不假刑法嚴峻而惡自止也。 利。 止 猛,雖繫之維之,不能使之變也。 聖人操得 飢 盗 而 民 若强制其牙,則用力勞而 寒,雖 修政教,使之有農桑之業,知廉 聖人 有 欲 勝也。 刑 君子發豶 ·其要,則視億兆之心猶 則 殺 心,見利 知 H 豕,剛躁之物,而 所 施 夫物有總攝,事 其能 以 豕之義,知天 則 止之之道,不 動 荷 勝億: 夫以 不 不能 治,其 兆 知 億 利 教 若 有 下 如 IŁ. 牙 雖 兆

> 其勢也。 政於此,是猶 知其本、 恥之道, 得 雖賞之不竊矣。 其 要而 患豕牙之利 己。 不 嚴 故 ,不制其牙而 刑 止惡之道,在 於彼 前 豶

象曰:六五之吉,有慶也。

不勞无傷而俗革,天下之福慶也。其傷甚而无功。若知其本,制之有道,則在上者不知止惡之方,嚴刑以敵民欲,則

上九,何天之衢,亨。

字。 也。 亨,非畜道之亨也。 曠 往 予聞之胡先生曰:天之衢亨,誤 極 小畜畜之小,故 濶 來 而 散。 无 ,故謂 天衢 事 極則 有 ,天路也,謂 極既當變,又陽性上行,故遂散 之天 蔽 反,理之常也,故 阻 衢。 也。 極 而 天 成,大 在 虚空之中,雲氣 畜 衢之亨,謂其 道 畜 則 畜 畜之大,故 變矣,變而 極 加 而 「何」 亨通 飛 亨。

象曰:「何天之衢」,道大行也。

狀也。以象有「何」字,故爻下亦誤加之。何謂天之衢? 以道路大通行,取空豁之行也。以天衢非常語,故象特設問曰:何以謂之天衢? 以其无止礙,道路大通

外實而 生也,飲食衣服,以養形 設卦,推養之義,大至於天地養育萬 人口所以飲食養人之身,故名爲頤。 震,上下二陽爻,中含四陰,上止而下動, 頤。」夫物既畜聚,則必有以養之,无養則 頤、《序卦》:「物畜然後可養,故受之以 德、養人,皆頤養之道 不能存息,頤 人養賢以及萬民,與 中虚,人頤頷之象也。頤,養也。 所以次大畜 也。動息節宣,以 人之養生、養形、養 也, 也。 威儀 卦,上艮下 行義, 物,聖 聖人

以養德也,推己及物,以養人也。

頤,貞吉,觀頤,自求口實。

實」之道,則善惡吉凶可見矣。頤,自求口實」,觀人之所頤,與其「自求口養育萬物,各得其宜者,亦正而已矣。「觀人、養於人,皆以正道則吉也。天地造化,頤之道,以正則吉也。人之養身、養德、養頤之道,以正則吉也。人之養身、養德、養

家曰:「頤貞吉」,養正則吉也。「貞吉」,所養者正則吉也。「自求口實」,謂其自養也。「自市」,所養者正則吉也。「所養」,謂所其所養也。「自求口實」,觀其自養也。

矣哉! 天地養萬物,聖人養賢以及萬民,頤之時大

聖人則養賢才,與之共天位,使之食天禄,則養育萬物。養育萬物之道,正而已矣。聖人極言頤之道,而贊其大。天地之道,

地之宜 以其大者也。 哉!」或云「義」,或云「用」,或止云「時」, 之之政。 非 所 俾 口一時」。 天 養則 以養 施 地 澤於天下。 不生。 ,以養天下,至於鳥獸草木,皆有養 萬 與聖 其道配天地,故夫子推 民 也 人之功 聖人裁成 萬物之生與養,時爲大,故 夫天地之中,品 養賢以及萬民」也,養 曰 : 天地之道 頤 之 頤之道 物之衆, 輔 時 大矣 相天 督

飲食。飲食。如下有雷,頤,君子以慎言語,節

以二 以 陽 1 山之生物,皆動其根荄,發其萌芽,爲養之 養身也,故君子觀其象以養其身,慎言 ,中含四陰,外實中 動 頭 以上下之義言之,艮止而震 體言之,「 頷之象。 Ш 下 以 有 虚 桂 雷」,雷 頭 形言之: 口之象。 震 動,上 於 上 Щ 下二 口 下。 止 所

初 失。 言語 九、舍爾靈龜、觀我朵頤,凶 道 取養 於人者皆是,節之則適宜 令政教出於身者皆是,慎之則必 語 ,養德養天下,莫不然也 以 義 飲 在身爲飲食,於天下則凡貨資 養 食 其 也。 德 事之至近而 ,節飲食以養其 在身爲言語 所繫至大者,莫過 而 ,於天下則 无 體 傷 不不 當 射 唯 推 用 凡 就 而 之 養 无 命 於 口

也。 所以 體 以 之初九,亦假 四,不能自守,志在上行,説所欲而 辭 靈龜,乃 蒙之初六,蒙者也,爻乃主 爾。 而 不 求養於外也。 朵 龜 在 能 頭者] 九,陽體 觀 頤之時,求頤, 咽息不食,靈龜 我 四 外而言,爾 圃 也,然 剛 朵 明,其 頭,我 才雖 非 人所 79 如是 才智足以養 對 謂 喻其明智, 謂 發 爾 初 欲 ,然以 之也,假 也。 蒙 而 也, 設 而 朵頤 上 陽 舍 言 應 居 ൬ Œ 設 初 爾 者 於 動 者 之 之 之 頤 可

也。 也。 以陽 朵頤 心既 而 爲朵動 動,則其自失必矣。迷欲 從 陰,則 其 頤 何 頷,人人見 所不至? 食 是 而 以 而 欲 失 M

象曰:「觀我朵頤」,亦不足貴也。

之,則動頤垂涎,故以爲象。

明之有? 爲可賤也。 明之有? 爲可賤也。人之貴乎剛者,爲其能照 故其才亦不足貴也。人之貴乎剛者,爲其 故其才亦不足貴也。人之貴乎剛者,爲其 故其才亦不足貴也。人之貴乎剛者,爲其 故其才亦不足貴也。人之貴乎剛者,爲其

六二,顛頤,拂經,于丘頤,征凶。

二既不能自養,必求養於剛陽,若反下求民賴司牧之養,皆以上養下,理之正也。 天子養天下,諸侯養一國,臣食君上之禄,天子養天下,諸侯養一國,臣食君上之禄, 人者也。 二,陰柔,不能自養,待養於人者也。

理而 則得 顛頤 非其 則有 S) 經常 於初 以自養,初上二爻皆非其與,故往求則悖 取辱得凶必矣。六二中正,在他卦多吉, 而 上者勢力足以養人、非其族類、妄往求之、 二陽,既不可顛頤于初,若求頤于上九,往 N 得凶也 (應而 丘,在外而 凶也。 N_o 則 則拂經,不獲其養爾, 妄求於上 何也? 미 爲顛倒,故云「顛頤」。 往 在頤之時,相應則相養者也。上 行 今有人,才不足以自養,見在 求養,非道妄動,是以凶也。 也。 曰:時然也。 高之物,謂上九 。若求養於丘 陰 則 柔 顛則 也。 既 往 不足 卦 拂 必 一,往 IF 違 有

象曰:六二征凶,行失類也。

征而

從上則凶者,非其類故

也。

往求

而失

其類,得凶宜矣。行,往也。

六三,拂頤,貞凶,十年勿用,无攸利。

故 也。 也。 不 頤 不 合於義,自養則成其 戒 之道 中正,又在動之極,是柔邪不正 可用,无所往 以一十 得頤之正 其養如 唯 ·年勿 E 此 一則吉。 一而利也 則 拂 用」。 違 所養皆吉,求養養 德。 於頤之正道,是 三以陰柔之質, 十,數之終,●謂 三乃拂違正 而 人 以 動 而 道 則 者 M 處

象曰:「十年勿用」,道大悖也 理 所 也 以 戒終不可用,以其所由之道,大悖義

六四,顛頤,吉。虎視耽耽,其欲逐逐,无咎。 頤。 則 居下,在下之賢也,與四爲應 不足以自養,况養天下乎? 兀 正,是能順 爲 在人上,大臣之位。 順,今反求下之養,顛 然己不勝其任,求在下之賢 於初,賴初之 六以 養 也。 倒 陰居之,陰柔 ,四又柔 初 也,故 以上養下 九 m 以 順 順 曰 剛 從 顛 而 陽

> 之,以 可濟 謂所 則能 居上位,以貴下賤,使在下之賢由己以行 求養於下,下非 則 威嚴,又所施不窮,故能 有常,若間或无繼,則其政 人之所輕,故必養其 剛陽,不廢厥 起,輕於陵犯,亂之由 若或下易其上,則政 威望,爲下民所尊畏,則事行 之咎,故爲吉也。夫居上位者,必有才德 拂 經,四 須用者 重其體貌,下不敢易。 濟其事,則 若取於人而 則吉,何 必必 職,然質本陰 其應類,故 逐 天下得其養, 逐 无繼 也? 威嚴 相繼 出而 也。 无咎 則 曰: ,耽耽然 而 敗矣。「其欲」 人違,刑 柔 又從於人者必 六四雖 爲 木 不 而 拂 「窮矣。 也。二 二在上 而 乏,則 賴 衆心 經 己无 人 如虎視 能 施 以 服從。 其 顛 既 而 順 四 而 曠 濟 事 則 頤 有 從 怨 敗 反

⁰ 終」,原脱,據涂刻本補。

德義者也。以君而資養於臣,以上位而 之? 自三以下,養口體者也, 四以上,養 養於下,皆養德也。 其道,上下之志 相 應 而 施 於民,何 吉 賴 如

象曰: 顛頤之吉,上施光也。

吉孰大焉? 顛倒求養,而所以吉者,蓋得剛陽之應以 濟其事,致己居上之德施光明被于天下,

六五,拂經,居貞吉,不可涉大川。 賢,故順從之,賴其養己以濟天下。 剛之性,故戒 其身,澤及天下,故吉也。 之位也,必居守貞固,篤於委信,則能輔翼 既以己之不足而順從於賢師傅,上,師傅 養人者也,反賴人之養,是違拂於經常。 陰柔之質,才不足以養天下,上有剛陽之 六五頤之時,居君位,養天下者也。 以 能居 貞則吉。 陰柔之質,无貞 以陰柔之 君者, 然其

> 君也。 之際,非剛明之主,不可恃也,不得已而 王之才,不至甚柔弱也,當管、蔡之亂,幾 艱險者則有矣。 不保於周公,况其下者乎? 故《書》曰: 難變故之際,故云「不可涉大川」也。 才,雖倚賴剛賢,能持循於平時,不可 「王亦未敢誚公,賴二公得終信。」故艱 於上九,則據爲臣致身盡忠之道 發此義者,所以深戒 以成 於爲 處 濟 險 艱

以養天下也。 居貞之吉者,謂能堅固 順從於上九之賢, 象曰:居貞之吉,順以從上也。

言,故不同也。

上九,由頤,厲吉,利 天下由之以養也。以人臣而當是任,必常 柔順而從於己,賴己之養,是當天下之任, 懷危厲 上九以剛陽之德,居師傅之任,六五之君 則吉也。 如伊 涉大川 尹、周公,何當不憂

大川」。 忘也 當盡 不濟天下艱危,何足稱委遇而 勤 而 天下之艱危,成天下之治安,故 倚 兢 誠 賴於己,身當天下 畏 竭 得君如此之專,受任如此之重,苟 力, 故 得 脯 終 不 古。 顧 慮,然惕 大任,宜竭 夫以 君之才不足, 謂之賢乎? 厲 其 日 則 「利涉 (才力, 不 可

若上九之當大任如是,能兢畏如是,天下象曰:「由頤厲吉」,大有慶也。

被其德澤,是大有福慶也

養於木,乃至滅没於木,爲大過之義 則能動,動則 動,故受之以大過。」凡物養 大過,《序卦》曰:「頤者養也,不養則不 ,上兑下巽,澤在 有過,大過所以次頤 木上,滅木 偂 也。 後 能成 澤者潤 也。 成成 爲 大 미

> 見,以其比常所見者大,故謂之大過。 過 之大過於常也 道无不中,无不常,以世人所不常見,故謂 堯、舜之禪讓,湯、武之放伐,皆由道 大者耳,非有過於理 中,乃求中之用 用過乎儉是也。蓋矯之小過,而後能及於 過於中者則有之,如行過乎恭,喪過乎哀, 理也,其制事以天下之正理,矯失之用,小 過於常者皆是也。夫聖人盡人道,非過於 過 者 也。 陽 聖賢道德功業大過於人,凡事之大 過 也 故故 也。 爲 大者 所謂· 也。 過、過之大與 惟 大過 其大,故不 者,常事之 大 也。 如

大過,棟橈,利有攸往,亨。

九 取其勝重, 過於中,而 小 過,陰 四、皆取 過 棟 四 上下弱矣,故爲 於上下; 象,謂 陽 聚 於 任 大過 中 重 ·, 可 也 謂 棟 陽 橈 橈 過 重 取其本末 之象。 矣。 於 中。 九三 棟 陽

强,君子盛而小人衰,故「利有攸往」而亨弱,中强而本末弱,是以橈也。陰弱而陽

也。棟,今人謂之檩。

彖曰:大過,大者過也。

「大者過」,謂陽過也。在事爲事之大者

過,與其過之大。

「棟橈」,本末弱也。

者過」。在小過,則曰「小者過」,陰過也。謂上下二陰衰弱。陽盛則陰衰,故爲「大

剛過而中,巽而説行。「利有攸往」,乃亨。

是處不失中道也。下巽上兑,是以巽順和言卦才之善也。剛雖過,而二五皆得中,

説之道而行也。在大過之時,以中道異説

而行,故「利有攸往」,乃所以能亨也。

大過之時大矣哉!

哉」。如立非常之大事,興百世之大功,成「大過之時」,其事甚大,故贊之曰「大矣

絶俗之大德,皆大過之事也。

象曰:澤滅木,大過,君子以獨立不懼,遯世

澤,潤養於木者也,乃至滅没於木,則過甚无悶。

「遯世无悶」也。如此,然後能自守,所以顧,「獨立不懼,遯世无悶」也。天下非之而不大過人之行。君子所以大過人者,以其能矣,故爲大過。君子觀大過之象,以立其矣,故爲大過。君子觀大過之象,以立其

爲大過人也。

初六,藉用白茅,无咎。

《繫辭》云:「苟錯諸地而可矣,藉之用茅,慎守斯術而行,豈有失乎? 大過之用也。薄而用可重者,以用之能成敬慎之道也。以茅,過於慎也,是以无咎。茅之爲物雖柔在下,用茅藉物之象。不錯諸地,而藉柔的以陰柔異體而處下,過于畏慎者也。以

全 書

八二四

其 安 也。 重。 敬慎之至也。 用 何 咎之有 可重也,慎斯術也以往,其无所失矣,言 人之過於敬慎,爲之非難,而 以之藉薦 而无過。 慎之至也。」夫茅之爲物薄 ",則爲重慎之道,是用之重 茅雖至薄之物,然用之可 苟能慎斯道,推 而行之於 可以 保 甚 圃

象曰:「藉用白茅」,柔在下也。 事 ,其无所失矣。

九二,枯楊生稊,老夫得其女妻,无不利。 陽之大過,比陰則合,故二與五皆有生象。 以 以 柔在下,爲以茅藉物之象,敬慎之道 陰柔處卑下之道,惟當過於敬 慎 而 也。 己。

其 處,用柔 九二當大過之初,得中而居柔,與初密比 九三是也。 而 相 相 與。 與 可 相 知。 初既切比於二,二復无應於上, 濟 得中用柔,則能成大過之功, 者也 是剛 過之人,而 過 剛 則 不 能 能 有 以 所爲 中自

> 也。 作「荑」字,與「稊」同 「生繁華於枯荑。」謂枯根也。 與四是也。 无所不利也。 老夫而得女妻,則能成生育之功。 二得中 枯矣。楊枯槁而復生稊,陽過而未至於極 遽至吉也。稊,根也。劉琨《勸進表》云: 居柔而與初,故能復生稊,而无過極之失, 九二是也。 九二陽過 二不言吉,方言无所不利,未 楊者,陽氣易感之物,陽 而 在大過,陽爻居陰則善,二 與初,老夫得女妻之象。 鄭玄《易》亦 過 則

象曰:老夫女妻,過以相與也。

於常分,謂九二初六陰陽相與之和 老夫之説少女,少女之順老夫,其 相 一過於 與過

九三,棟橈 X

常也。

非剛柔得中,取於人以自輔,則不能也。 夫居大過之時,興大過之功,立大過之事, 也。 柔之象乎? 也。 既 輕,時之變易。 任也。或曰 且變,豈復有用柔之義? 故不勝其任,如棟之橈,傾敗其室,是以 於中和而拂於衆心,安能當大過之任 中,剛過之甚者也。以過甚之剛, 雖小事必取於人,當天下之大任,則可 能 過 九三以大過之陽,復以剛自居而 三方過剛 於 取棟爲 剛 立,况大過之事乎? 强,則 三,巽體 象者,以其无輔,而不能 曰:言易者 ,上能繫其志乎? 三居過 不能與人同,常常之功尚 而 而應於上,豈 ,貴乎識勢 用剛,異既 應者謂 以聖人之才, 動 志 之重 字? 終 不 无 勝 相 則 知 從 用 違 得 而 重 X

不可加助,是「不可以有輔也」。之,如棟橈折,不可支輔也。棟當室之中,剛强之過,則不能取於人,人亦不能親輔

象曰:棟橈之凶,不可以有輔也。

九四,棟隆吉,有它吝。

既居四 也。 剛 濟之義;四 何也? 曰: 有它志,吝爲不足之義,謂 它」則有累於剛, 剛柔得宜,而志復應陰,是「有它」也。 「有 宜矣,若又與初六之陰相應,則過也。 大過之時,非 之隆起,是以吉也。 能用柔相濟,既不過剛,則能勝其任,如棟 四 曰:二比初則 ,則可吝也 居近君之位,當大過之任者也。 蓋大過之時,動則過也。 ,剛柔得宜矣,復牽繫於陰,以害其 與初爲正應,志相繫者 二得中而比於初,爲 陽剛不能濟,以剛處柔,爲得 无不利,四若 雖未至於大害,亦可 隆起,取不下橈之義 應 可少也。 「有它」謂 初則 居柔 也。 以柔相 爲吝, 九 或 事 吝 爲

象曰:棟隆之吉,不橈乎下也。

棟隆起則吉,不橈曲以就下也,謂不下繋

於初也。

九五,枯楊生華,老婦得其士夫,无咎,无譽。 上六過極之陰,老婦也。 之陰,其 无應助,固不能成大過之功,而上比過極 士夫而得老婦,雖无罪咎,殊非美也,故云 過極之陰,得陽之相濟,不爲无益也。 婦則爲壯矣,於五无所賴 功也,上生華秀,雖有所發,无益於枯也。 下生根梯, 九五當大過之時,本以中正 无 咎无譽」,象復言其可 (所相濟者,如枯楊之生華。 枯楊 則能復生,如大過之陽 醜 也,故反稱婦得。 五雖非少,比老 也。 居尊位 興 一,然下 成 以 事

乎? 枯楊 亦 爲可醜也。 不 老婦 生 根 愐 得 加 1 生 華,旋 夫, 豈能 復 枯矣, 成生育之功? 安能 久

上六,過涉滅頂凶,无咎。

象而 己。 也。 小人狂躁以自禍,蓋其宜也,復將何尤,故 也,直過常越理,不恤 曰无咎,言自爲之,无所怨咎也。 上六以陰柔處 小人之所謂大過,非能爲大過人之事 取 如過涉於水,至滅没其 涉 義 過極,是小人過常之極者 危 Ļ, 頂 履險 其 凶 因澤之 蹈 可 禍 知。 mi

=== | | | | | | | | | |

陷,坎 重,不加 坎,坎者陷也。」 習坎、《序卦》:「物不 所 其名,獨坎加習者,見其重險,險 以次大過 理 也 无 過 可 習謂 以 而 不 終過,故受之以 重習。 ·已,過 他 極 桂 則 必 雖

彖日

「習坎」,重險

也。

也。 習,重也,如「學習」「温習」皆重復之義 中 陷,水之體也。 坎,陷也。 在 中陷之象,在下動之象。 居陽中則爲麗。 中,故爲坎陷之義。陽居陰中則爲陷,陰 陰,陽實陰 中麗之象,在下巽之象。 復有 一始於中,有生之最先者也,故爲水。 險, 卦之所言,處險難之道。坎,水 虚,上下无據,一陽陷於二陰之 其 義大 凡陽,在 也。 桂 陰,在上説之象, 上者 中 陷則爲 一陽上下 止 之象,在 險。 也。

也。不行則常在險中矣。 以誠一而行,則能出險,有可嘉尚,謂有功水火,何險難之不可亨也?「行有尚」,謂心誠一,故能亨通。至誠可以通金石,蹈以誠一,故能亨通。至誠可以通金石,蹈習坎有孚,維心亨,行有尚。

水流而不盈,行險而不失其信。

水就下,皆爲信義有孚也。 水就下,皆爲信義有孚也。坎中實, 生也。初六云坎窞,是坎中之坎,重險也。 大水性之流行而未盈於坎,既盈則出乎坎 大流而不盈」,陽動於險中,而未出於險, 重也。初六云坎窞,是坎中之坎,重險也。 本就下,皆爲信義有孚也。

「維心亨」,乃以剛中也。

爲有孚之象。至誠之道,何所不通? 以維其心可以亨通者,乃以其剛中也。中實

剛中之道而行,則可以濟險難而亨通也。

行有尚」,往有功也。

若止而不行,則常在險中矣。坎以能行以其剛中之才而往,則有功,故可嘉尚,

爲功。

天險不可升也,地險山川丘陵也。 王公設險

以守其國。險之時用大矣哉!

險 高 險之用也。 物采,凡所以杜絶陵僣,限隔上下者,皆體 也。若夫尊卑之辨,貴賤之分,明等威,異 故贊其大矣哉! 山河城池,設險之大端 國,保其民人。是有用險之時,其用甚大, 不 也。 可 不 陵也,故設爲城郭溝 可升者,天之險也。 王公,君人者。觀坎之象,知險之 Щ 池之險,以 川丘陵,地之 守其

象曰:水洊至,習坎,君子以常德行習教事 有常。 常久其 其教令之事。 仍 海,洊習而 坎爲水,水流仍洊而至。 如 游之象也。 水 一德行。 之有 故君子觀坎水之象,取其 不驟者也。 常,取其洊習相受,則 人之德行,不常則僞 水自涓滴至于尋丈,至于江 夫發政行教,必使民熟於聞 其因 兩坎相習,水流 勢就 有 下,信 以 也,故 習 熟 而 則

喻,遽責其從,雖嚴刑以驅之,不能也,故聽,然後能從,故三令五申之,若驟告未

初六,習坎,人于坎窞,凶。當如水之洊習。

其凶可知。 智,坎中之陷處。已在習坎中,更入坎窞, 得當,非能出乎險也,唯益陷於深險耳。 可以陰柔居坎險之下,柔弱无援,而處不

由習坎而更入坎窞,失道也,是以凶象曰:習坎入坎,失道凶也。

能

九二,坎有險,求小得。 二當坎險之時,陷上下二陰之中,乃 于深險,是所 出乎險中,亦可小自濟,不至如初 之地,是有險也。 出於險,乃不失道也。 自保者,剛 中而 求 己。 小 得也。 然其剛中之才,雖 剛 則才足自衛,中 君子處 險 益 難 陷 未 至 而 能 則 能

動不失宜。

方爲二陰所陷,在險之地,以剛中象曰:「求小得」,未出中也。

之險也。至陷于深險,是所求小得,然未能出坎中至陷于深險,是所求小得,然未能出坎中方爲二陰所陷,在險之地,以剛中之才,不

六三,來之坎坎,險且枕,入于坎窞,勿用。 之甚 也,故戒「勿用」。 亦險。枕謂支倚。居險而支倚以處,不安 險,故云「來之坎坎」。 于險之中,之上則重險也,退來與進之皆 處不善,進退與居皆不可者也。來下則入 六三在坎陷之時,以陰柔而居不中正,其 云「人于坎窞」。 也。 所 處 如此,唯益人於深險耳,故 如三所處之道,不可用 既進退皆險,而 居

險,終豈能有功乎? 以陰柔處不中正,雖進退皆險,處又不安,若用此道,當益入于象曰:「來之坎坎」,終无功也。

處,不可用也。 去而失其道,益困窮耳。故聖人戒如三所人之所欲出也,必得其道,乃能去之。求平易之地,尚致悔咎,况處險乎? 險者,

六四,樽酒簋貳,用缶,納約自牖,終无咎。 故設牖 結於君之道。 質實如此,又須「納約自牖」。「納約」謂進 當不尚浮飾,唯 尚飾,莫如燕享之禮,故以燕享喻之。言 欲上之篤信,唯當盡其質實而已。多儀而 可間,又能開明君 險難之時,唯至誠見信於君,其交固而 以其在高位,故言爲臣處險之道。大臣當 六四陰柔而下无助,非能濟天下之險者。 處,以况君心所明處。 二簋之食,復以瓦缶爲器,質之至也。其 所以通明。 牖,開通之義。 以質實。 心,則可保无咎矣。 「自牖」,言自通明之 《詩》云:「天之牖 所用 一樽之酒, 室之暗也, 夫 不

之事 其荒 明 老 幼 所 多 强 諫 如 能 蔽 明 謂 民 反 而 者。高 之序, 手。 行。 ĺ 蔽 其 處 勁 君 如 告之, 者 如 ,,推而及之,則能悟其心矣。 也 也 是 乃 者,率多取 樂之非 暗 君者,未有不因 心蔽於荒樂,唯其 能 且 且 處 臣 非不 求 則 如 祖 |四老人之力,孰與張良群 故 如 群 也 以 素知 雖 篪 信 也。 因 漢 所 忠信善道 臣争之者衆矣。 ,如其不 明也,如其蔽 艱 則 其所明 祖 其賢而 險之時 通者明 毛 件 易 愛戚 人心有所蔽 公 也,故云「納 其 訓 而 省何? 結 而 姬,將易太子,是其 一蔽也 處 所 温 `,終得无咎 牖 重之,此 及 於 也。 明者也。 厚明 其 爲 而 君 故 道, 事 嫡庶之義,長 有 不 心 必於 當就 爾 察何 辯 , 則 必必 其不蔽 約 亦 所 者,其 悟 故訐 自古 所 也。 自 公卿及 雖力 其 通 開 自 ? 之 不 牖 明 其 通 如 之 説 詆 四 首 能 蔽 且 處 所 之 所

> 也。 其子 長安 及其餘,孟 大臣 就 通? 天下 心之所明也,從其心之所 爲教者亦然。 計,故其 其 (君,不肯使質於齊,此其 諫之雖强,既 故左 明之異耳。 之士 而欲使之長 然而 聽 師 ? 子 不 也 觸 所謂「成德達才」是也 從彼而 一如響。 其言 夫教必就人之所 龍 又如趙王太后 因 久富貴者,其 日 之 其 蔽矣,其 從 非 切 明而導之以長久之 此者 惟告於 9 明 孰 與 而 能 蔽於私愛也 由 長 周 人,然後 君 聽乎? 心之所 愛其 攻 外所 者 其 如 長 少子 蔽 叔 此 推 者 愛 與 明 孫

象 日 誠 質實之至,剛柔 可終保无 象》只舉首句, : 實 「樽酒簋 而 己。 咎。 剛 貮 柔 君臣之交,能 相 如 指四 剛柔際也 際接 此 比多矣。 與 之道 五

樽

酒

簋

貢

舌

而

常者,

能

如

此

則

謂

君

一之交

際

也

九五,坎不盈,祗既平,无咎。

九五在坎之中,是不盈也,盈則平而出矣。 九五在坎之中,是不盈也,盈則平而出矣。 大,居尊位,宜可以濟於險,然下无助也。 二陷於險中未能出,餘皆陰柔,无濟險之 才。人君雖才,安能獨濟天下之險? 居 君位而不能致天下出於險,然下无助也。 君位而不能致天下出於險,則爲有咎,必 君位而不能致天下出於險,則爲有咎,必

象曰:「坎不盈」,中未大也。

九五剛中之才,而得尊位,當濟天下之險難,而坎尚不盈,乃未能平乎險難,是其剛中之道未光,也。險難之時,非君臣協中之道未光大也。險難之時,非君臣協力,其能濟乎? 五之道未大,以无臣也。人君之道,不能濟天下之險難,而以治不不稱其位也。

上六、繋用徽纆,寘于叢棘,三歲不得,凶。

能出矣。故云至于三歲之久,不得免也,經,因寘于叢棘之中,陰柔而陷之深,其不以其陷之深,取牢獄爲喻。如繫縛之以徽上方以陷柔而居險之極。其際之沒者也

象曰:上六失道,凶三歲也。其凶可知。

不興」、「十年乃字」是也。 以陰柔而自處極險之地,是其失道也,故以陰柔而自處極險之地,是其失道也,故以陰柔而自處極險之地,是其失道也,故

== == 離離 上下

受之以離,離者麗也。」陷於險難之中,則離、《序卦》:「坎者陷也,陷必有所麗,故

以虚明之象。 火,火體虚,罷於物 爲附麗之義, 必 严甩也 有 所附 明 麗,理 也 取 自然 其 取 中 而明者也。 其陰麗於上下之 也,離 虚 ,則爲明義。 所以 又爲日,亦 次 ~陽,則 坎 離爲 也

離,利貞,亨。畜牝牛,吉。

德 德,由養以成,既麗於正,當養習以成其順 則吉也。 也。 主之事,皆其所麗 正,得其正則可以亨通,故曰「離利貞亨」。 離,麗也,萬物莫不皆有所麗,有形則有麗 畜牝牛吉」,牛之性順,而 也 既附麗於正,必能 在人,則爲所親附之人、所由之道、所 「畜牝牛」,謂養其順德。 也。 順於 人之所麗,利於貞 又牝焉,順之至 Œ 道 如牝牛, 人之順

彖曰:離,麗也。日月麗乎天,百穀草木麗

乎

土。

地之中,无无麗之物。 離 穀草木則麗於土 麗 也,謂 正則能亨也 附麗 也。 萬物莫不 如日月 在 人當審 各有 /則麗 其所麗, 所麗 於天,百

重明以麗乎正,乃化成天下。麗得其正則能亨也。

而處中正,可以化天下,成文明之俗也。處中正,麗乎正也。君臣上下皆有明德,以卦才言也。上下皆離,重明也。五二皆

爲正乎? 也。 其 至 而 位,六麗於正 二五以柔順麗於中正,所以能亨。 不失輕 順 或 以麗 日 重,則可以言易矣。 : 曰:離主於所麗。 二則中 位 中正,則吉,故曰「畜牝牛吉」 ,乃爲正也。 Œ 矣, 五以 學者知時 五,中正之 陰 居陽,得 人能養

若云兩明,則是二明,不見繼明之義,故云象曰:明兩,作離,大人以繼明照于四方。

柔麗

乎中正,故亨,是以「畜牝牛吉」也。

大凡以 兩 相繼之象,以 德言則聖人,以位言則王者。 大人觀離明 **洊隨之義** 明兩」,明而重兩,謂相繼也。「作離」,明 而 爲 離,繼 明相繼,皆繼明也。 ,然離之義尤重也。 明之義 世繼其 也。 明德,照臨于四 震巽之類,亦取 舉其大者,故 「大人」,以 方。

初九,履錯然,敬之无咎。

以世襲繼照言之。

是不明所麗,乃有咎也。 是不明所麗,乃有咎也。雖未進,而跡已動 「履錯然」,謂交錯也。雖未進,而跡已動 之才,若知其義而敬慎之,則不至於咎矣。 之才,若知其義而敬慎之,則不至於咎矣。 之才,若知其義而敬慎之,則不至於咎矣。 是不明所麗,乃有咎也。雖未進,而跡已動 是不明所麗,乃有咎也。雖未進,而跡已動

其中矣。

象曰:履錯之敬,以辟咎也。

免過咎也。居明而剛,故知而能辟,不剛履錯然欲動,而知敬慎,不敢進,所以求辟

明則妄動矣。

六二,黄離,元吉。

之君,其明如是,所麗如是,大善之吉也。離」。以文明中正之德,上同於文明中順之美也。文明中正,美之盛也,故云「黄二居中得正,麗於中正也。黄中之色,文

所以己苦者,从其得户道也。 象曰:「黄離元吉」,得中道也。

離以中爲重。所以成文明,由中也,正在所以元吉者,以其得中道也。不云正者,

嗟,凶。 九三,日昃之離,不鼓缶而歌,則大耋之

隨,坎,重險相習,離,二明繼照,艮,内坤,上下皆順;震,威震相繼;巽,上下順八純卦皆有二體之義。 乾,内外皆健,

人三三

也。 乃「大耋之嗟」,爲其凶也。 達者則知其常理,樂天而已,遇常皆樂,如 憂,乃爲凶也。 歌 達者順理爲樂。 以理言之,盛必有衰,始必有終,常道也。 日昃之離,日下昃之明也,昃則將没矣。 明當繼之時,人之始終,時之革易 事最大。 外 鼓缶而歌」。 皆 ,樂其常也。 止 耋」與「昳」同。 九三居下體之終,是前明將盡 兑,彼己相說。 不達者則恐恒有將盡之悲, 大耋,傾没也。人之終盡 不能. 缶,常用之器 如是,則以大耋爲嗟 加 此處死生之道 離之義,在 也。 也 鼓缶 一,故爲 後 而 人

日既傾昃,明能久乎? 明者知其然也,故象曰:「日昃之離」,何可久也!

何足以爲凶也!

求人以繼其事,退處以休其身,安常處

順,

也。

九四,突如其來如,焚如,死如,棄如。

道也。 以不 勢,氣焰如焚然,故云「焚如」。 若舜、啟然。 九 假言凶也。 故云「棄如」。 紹之義,承上之道,皆逆德也,衆所棄絶, 不善如 也。夫善繼者,必有異讓之誠,順承之道, 居 承之義。 離 四,離下體 Œ 體 又承六五陰柔之君,其剛盛陵爍之 此,必被禍害,故曰「死 而 而 在上而近君,繼承之地也。 剛盛之勢,突如而來,非善繼者 處 四,剛躁 今四「突如其來」,失善繼之 而升上體,繼明之初,故言 至於死棄,禍之極矣,故不 而 不 中正,且 四之所行, 如。 重 失繼 以陽 剛。 繼

上陵其君,不順所承,人惡衆棄,天下所不象曰:「突如其來如」,无所容也。

六五居尊位而守中,有文明之德,可謂善六五,出涕沱若,戚嗟若,吉。

之德,與所麗中正,泰然不懼,則安能保其明,知憂畏如此,故得吉。若自恃其文明言其憂懼之深耳,時當然也。居尊位而文璧」,所以能保其吉也。「出涕」「戚嗟」,極懼之深,至於「出涕」,憂慮之深,至于「戚强之間,危懼之勢也。唯其明也,故能畏矣。然以柔居上,在下无助,獨附麗於剛矣。然以柔居上,在下无助,獨附麗於剛

象曰: 六五之吉,離王公也。

吉也?

所以能吉也。不然,豈能安乎?在上之勢,而明察事理,畏懼憂虞以持之,「六五之吉」者,所麗得王公之正位也。據

以辨天下之邪惡,而行其征伐,則有嘉美能斷足以行威刑,故王者宜用。如是剛明明則能照,剛則能斷。能照足以察邪惡,九以陽居上,在離之終,剛明之極者也。上九,王用出征,有嘉。

之功也。征伐,用刑之大者。

折首,獲匪其醜,无咎。

非其醜類,則无殘暴之咎也。《書》曰: 整亦甚矣。故但當折取其魁首,所執獲者若盡究其漸染詿誤,則何可勝誅? 所傷約之以中,則傷於嚴察矣。去天下之惡, 於明極則无微不照,繼極則无所寬宥,不

殲厥渠魁,脇從罔治。」

象曰:「王用出征」,以正邦也。

天下之惡,所以正治其邦國,剛明居上之王者用此上九之德,明照而剛斷,以察除

伊川易傳卷之二

道也。

伊川易傳卷之三

周易下經

感也,以説爲主,恒,常也,以正爲本。而 婦,故咸與恒皆二體合爲夫婦之義。 故 乾、坤、下經首咸、繼以恒也。天地二物, 地萬物之本,夫婦人倫之始,所以上經首 然後有上下,有上下然後禮義有所錯。」天 然後有父子,有父子然後有君臣,有君 然後有男女,有男女然後有夫婦,有夫 咸、《序卦》:「有天 二卦分爲天地之道。 地然後有萬物,有萬 男女交合而 成夫 咸, 臣 婦 物

> 應也。 之義。男志篤實以下交,女心説而上應, 者,故二少爲咸也。 下,少女少男也。 動 男感之先也。 説之道自有正也,正之道固有説焉。 ,剛柔皆應,說也。 男先以誠感,則女説 男女相感之深,莫如 **艮體篤實,止爲誠慤** 咸之爲卦,兑 巽而 上 而 小 艮

咸,亨,利貞,取女吉。 相感 凡君臣上下,以至萬物,皆有相感之道。 亨之理也。 通。以至父子、夫婦、親戚、朋友,皆情意 則君臣之道通。上下能相感,則上下之志 感也。物之相感,莫如男女,而少復甚焉。 咸,感也。不曰感者,咸有皆義,男女交相 物之相感,則有亨通之理。 ,則和順 利貞,相 mi 亨通 感之道利 事物皆然,故 君 臣 在於正 能相 咸 也。 感,

義。以此義取女,則得正而吉也。上剛下,二氣感應,相與止而説,男下女之以正也。「取女吉」,以卦才言也。卦有柔臣之以媚説,上下之以邪僻,皆相感之不臣之以近,則入於惡矣,如夫婦之以淫姣,君不以正,則入於惡矣,如夫婦之以淫姣,君

女,是以「亨利貞,取女吉」也。柔上而剛下,二氣感應以相與,止而説,男下象曰:咸,感也。

得正,取女如是則吉也。卦才如此,大率和之至也。相感之道如此,是以能亨通而相應而和合,是「相與」也。「止而説」,止相應而和合,是「相與」也。「止而説」,止期居下,亦柔上剛下也。陰陽二氣,相感相於,爲堅慤之意。艮止於下,篤誠相下於説,爲堅慤之意。艮止於下,篤誠相下於説,爲堅慤之意。艮止於下,篤誠相下於説,爲堅慤之意。艮止於下,篤誠相下於説,爲堅慤之意。艮止於下,篤誠相下。以男下女,相感,爲堅愈也。在卦,則柔爻上而剛爻下,成之義感也。在卦,則柔爻上而剛爻下,

感道利於正也。

平。 天地感 平。天下之心所以和平,由聖人感之也。 既言男女相感之義,復推極感道,以盡 通之理,知道者默而觀之可 致和平之道,則天地萬物之情可見矣。 觀天地交感化生萬物之理,與聖人感人心 萬物,聖人至誠以感億兆之心而天下和 地之理、聖人之用。天地二氣交感而 觀其所感,而天地萬物之情可見矣。 而 萬 物化生,聖人感人心而天下和 也。 化生 感 天

則能受,實則不能入矣。虚中者,无我也。通氣之象,而虚其中以受於人。夫人中虚通徹,是二物之氣相感通也。君子觀山澤、生潤下,土性受潤,澤在山上而其漸潤象曰:山上有澤,●咸,君子以虚受人。

❶ 「上」,原誤作「下」,據阮刻本《周易正義》改。

合而受之,非聖人有感必通之道也。中无私主,則无感不通。以量而容之,擇

初六,咸其拇

宜矣。 《深輕重之異,識其時勢,則所處不失其 未足以進也。拇,足大指。人之相感,有 未足以進也。拇,足大指。人之相感,有 ,有

動而感未深,如拇之動,未足以進也。初志之動,感於四也,故曰「在外」。志雖象曰:「咸其拇」,志在外也。

戒。復云「居吉」,若安其分,不自動,則二,中正之人,以其在咸而應五,故爲此

吉也。

執守者隨於物也。剛陽之才,感於所説而 九三以陽居剛,有剛陽之才,而爲主於内, 危,故三感而從之。股者,在身之下,足之 極,故三感而從之。股者,在身之下,足之 上,不能自由,隨身而動者也,故以爲象。 上,不能自由,隨身而動者也,故以爲象。 上,不能自由,隨身而動者也,故以爲象。 上,不能自由,隨身而動者也,故以爲象。

隨之,如此而往,可羞吝也。

象曰:「咸其股」,亦不處也。志在隨人,所

執下也。

也。 隨人,是所操執者卑下之甚也 爻亦然,故云「亦不處也」。「不處」謂 亦不處也」,前二陰爻皆有感而動,三雖陽 在外也,雖凶居吉,順不害也。」「咸其股, 處,故諸爻之象辭,意 云「亦」者,蓋象辭本不與易相 「亦」者,承上爻辭也。 有剛陽之質,而不能自主,志反 上云:「咸其拇,志 有 相 續者。 比,自作 此言 在 於 動

九四,貞吉,悔亡。 心也 四无所取,直言感之道,不言咸其心,感乃 在下而動之微,腓取先動,股取 感者,人之動也,故皆就 前 四 言感之道,貞 在 中而 憧憧往來,朋從爾思。 居上,當心之位,故爲 正則吉而悔亡; 人身取 以其隨。 象。 拇 感 九 取

塗雖 之私 同歸 乎? 違 心,既主於一 感也,是其朋類則從其思也。以有係之私 之心,如寒暑雨暘,无不通,无不應者,亦 初 不 雖 慮?] 夫子因 則思之所及者有能感而動,所不及者不能 不通,若往來憧憧然。 貞而已矣。「貞」者,虚 係,則害於感通,乃有悔也。 「憧憧往來,朋從爾思」,夫貞一則所感无 故 以 也 物 E 有 殊 心感物,所 而殊塗,一致而 《繋辭》曰:「天下何思何慮? 戒 萬 故 而 於 則 貞 殊 其 有 貞 事 其意,則 歸則同,慮雖 一成 隅 悔 感之道,无所 有萬變,統之以 極論感通之道。 感狹矣。 也。 事,豈能廓 窮天下无 又 百慮。天下何思何 用其私 四 中 天下之理 説 百 无我之謂 不通, 體 圃 聖人感天下 然 一,居 其 不感通 心以感物, 夫以 无所 ,則无能 致則一。 有 陰 也, 天下 所 思慮 不 而 通 私 應

感必 心,豈 則 理矣 也。 此 故 後 精 蠖之屈,以 所 則 故曰「屈信 者屈也,來者信 來,暑往則 往則日來, 信 以往來屈 知 義 應復爲感,感復有應,所以不已也。 有 E 有應。 感應之理矣。 蓋 ,復取物以明之。 過 人 「寒暑相 屈 : 能 神,以 所謂 此 天 无 不 以 日月 水信-屈 下 寒 所 相 往,未之或 凡有 信明感應之理。 則 致用 推 來 何 感 感 不 也。 无 相 感 思 而 應 也,屈信 而 寒 動 推 信,信而 也。 也 歲 也 何 利生焉」。 龍蛇之藏 皆 暑 龍蛇之蟄,以存身也。 而 0 成」,功 慮 ? 爲感,感則 相 知也。」前云屈 明 尺蠖之行,先 故 利用 ? 相 推 生焉 日 日 後 用 感 而 用由 往 安身,以 所 有 屈則有信,信 感, 月相 其 歲 而 則 屈 思 利 成 以 寒往則暑 是 月來, 觀 必 動也,有 推而 生焉。」 存 慮 有 而 崇德 息其 尺 屈 信之 之 一尺 應, 成 蠖 而 明 往 月 私

> 象曰:「貞吉悔亡」,未感害也,「憧 或知」, 其施 也; 所爲 息相 身 知化育之道,德之至盛也,无加 神知化,德之盛也。」既云「過此以往,未之 此矣,故云「過此以往,未之或知也」。 用安身, 人於神妙,所 而 致用 合理 感, 用,安處 後 更以此語終之,云窮極 以 乃 能 則 施 崇德也」,承上 屈 奮 也 事 其 以 信 迅 致其 正 也。 也 身,所以崇大其 積 而 不 與 用 身安,聖人能 君子潛 盤 也。 施 則 文 乃 不 潛 致 屈 心 能 心 用 信 精微之義, 於此矣。 至神之妙 奮 德 精微 而 也 事 矣 業 言,利 憧 盡 行積 也。 往 利 於 動

來」,未光大也 感 則 貞 則 之道狹矣,故云「未光大也」。 害於感矣。 吉 而 悔亡,未爲 「憧 憧 往 私 來」, 感所 以 害 私 也 一, 係 心相感, 私

九五

,咸其脢,无悔

説者,則得人君感天下之正,而无悔也。所不見也。言能背其私心,感非其所見而豈能感天下乎? 脢,背肉也,與心相背而若係二而説上,則偏私淺狹,非人君之道,九居尊位,當以至誠感天下,而應二比上,

二而説上,感於私欲也。 戒使背其心而咸脢者,爲其存心淺末,係象曰:「咸其脢」,志末也。

亦猶今人謂口過曰唇吻、曰頰舌也。「輔裝見於口舌之間,小人女子之常態也,豈以不能以至誠感物,而其欲感物之極也,故不能以至誠感物,而上陰柔而説體,爲説之主,又居感之極,是上六,咸其輔頰舌。

唯至誠爲能感人,乃以柔説騰揚於口舌,象曰:「咸其輔頰舌」,滕口説也。

頰舌」皆所用以言也

恒、《序卦》:「夫婦之道,不可以不久也,故受之以恒,恒,久也。」咸,夫婦之之以恒,恒,久也。」咸,夫婦之之以恒也。是,是是之常道也。,此受之以恒,便,人也。」咸,夫婦居室之常道也。論交感之情,則少爲惡之義。恒,長男在長女之上,男尊女卑,是婦居室之常道也。為交感之情,則少爲爲咸,而震巽爲恒也。為交感之情,則少爲爲咸,而震巽爲恒也。,以男下女,是男女交易咸,而震巽爲恒也。,以男下女,是男女交易咸,而震巽爲恒也。,以男下女,是男女之,,以男下女,是男女交人,以男下女,是男女之,以男下女,是男女之,以男不久也,也之義也。

亨,乃无咎也。恒而不可以亨,非可恒之恒,亨,无咎,利貞,利有攸往。

八四二

彖曰:恒,久也。 謂 道 定則不能常矣。 所以能亨,由貞正也,故云「利貞」。 之道也; 也,故利於有往。 也 恒 謂 爲 可 有 小人恒於惡,失可恒之道也 2. 咎矣。 恒 久之道 又常久之道,何往不利? 唯其有往,故能恒也, 如 ,非守一隅 君子之恒 於善 而 不 夫 知 口 所 恒 變 恒

應,恒。剛上而柔下,雷風相與,巽而動,剛柔

皆

恒者,長久之義。

則 乃其常也。 而 巽,震上巽下,亦剛上而柔下也。 初 下」,謂 卦 風 柔居下, 才有此四者,成恒之義也。「剛 剛 發,一 爻上 乾之初 一者相 而柔爻下 乃恒道也 巽而動」,下巽順,上震動,爲 上居於四,坤之初 須,交助其勢,故 也。 「雷 二爻易處 風 相與」, 云 下居 剛 則 H 相 雷 處 成 而 與, 震 Ŀ 震 於 柔

利

有攸往,終則有始也

以 恒之道也,卦所以爲恒 皆相應。 豈能常也? 而 己。 巽 而 巽而 動 剛 柔 天 「剛柔皆應」,一 動,常久之道 地 相 造化, 應,理之常也 也 恒 也。 久 不 桂 已 動 剛柔之爻 此 者 圃 四 不 順 ·順, 動

恒於不正,皆不能亨而有咎也。道」。其道,可恒之正道也。不恒其德,與正,失正則非可恒之道也,故曰「久於其恒之道,可致亨而无過咎,但所恒宜得其

「恒亨,无咎,利貞」,久於其道

也

於可恒之道,則合天地之理也。天地之所以不已,蓋有恒久之道。人能

天地之道,恒久而不已也。

物 而 天下之理,未有不動而 ,雖山嶽之堅厚,未有能不變者也 復始,所 以 恒 而 不 窮。 能 恒者也 凡 天 地 所 動],故恒 生之 則終

變易,乃常道也,故云「利有攸往」。明理非一定之謂也,一定則不能恒矣。唯隨時

之如是,懼人之泥於常也。

初

六,浚恒,貞凶,无攸利。

萬物之情可見矣。 人久於其道而天下化成。觀其所恒,而天地日月得天而能久照,四時變化而能久成,聖

른 月之久照、四時之久成、聖人之道所以 化之,以成美俗也。「觀其所恒」,謂 道者孰能識之? 常久之理。 來變化,生成萬物,亦以得天,故常久不 順天之道,往來盈 此極言常理。日月,陰陽之精氣耳。 唯其 得天」,順天理也。 聖人以常久之道,行之有常,而 天地常久之道,天下常久之理,非 觀此,則天地萬物之情理 縮,故能久照而 四時,陰陽之氣耳,往 不已。 天下 觀 미 能 知 見 H

《曰:雷風,恒,君子以立不易方。

自立於大中常久之道,不變易其方所也。君子觀雷風相與成恒之象,以常久其德,

道也。泥常如此,无所往而利矣。世之責 矣,而初乃求望之深,是知常而不知變也。 初居下而四爲正應,柔暗之人能守常而不 知時矣。 與深、微與盛之地也。 恒安其處,亦致凶之道。凡卦之初終,淺 求之深,是不能恒安其處者也。柔微 望故素而致悔咎者,皆浚恒者也。 而不度勢,求望於上之深,堅固守此,凶之 浚,深之也。「浚恒」謂求恒之深也。 能度勢。 而不下,又爲二三所隔,應初之志異乎常 四震體 而陽性,以剛 在 下而求深,亦不 居高,志上 志既 守常 而 F 不

居恒之始,而求望於上之深,是知常象曰:浚恒之凶,始求深也。

八四三

而

宜也。知度勢之甚也,所以凶,陰暗不得恒之

九二,悔亡。

矣。人能識重輕之勢,則可以言易矣。 中而應中,其處與動,皆得中也,是以亡其悔於中也。能恒久於中,則不失正矣。中重於中也。能恒久於中,則不失正矣。中重於正,中則正矣,正不必中也。是能恒久於中也。能恒久於中,則不失正矣。中重於中也。能恒久於中,則不失正矣。中重於中也。能恒久於中,則不失正矣。中重於正,中則正矣,正不必中也。是能恒久中之德而應於中,德之勝也,足以亡其悔

恒久於中,豈止亡其悔,德之善也。所以得悔亡者,由其能恒久於中也。人能

象曰:九二悔亡,能久中也

乃志從於上六,不唯陰陽相應,風復從雷,三,陽爻,居陽位,處得其位,是其常處也。九三,不恒其德,或承之羞,貞吝。

吝乎? 也。「貞吝」,固守不恒以爲恒,豈不可羞則羞辱或承之矣。「或承之」,謂有時而至於恒處而不處,不恒之人也。 其德不恒,

人既无恒,何所容處? 當處之地,既不能象曰:「不恒其德」,无所容也。

九四,田无禽。

无所容處其身也。

恒、處非其據,豈能恒哉?

是不恒之人,

云「安得禽也」。 處非其位,雖久何所得乎? 象曰: 久非其位,安得禽也?

以田爲喻,故

六五,恒其德,貞。 婦人吉,夫子凶

爲失也; 貞,故吉,若丈夫而以順從於人爲恒,則 夫以 順 君之道乎? 君道言者,如六五之義,在丈夫猶凶,况人 又中,陰柔之正也,故恒久其德則爲貞 失其剛陽之正,乃凶 五應於二,以陰柔而 爲 恒也 順從爲恒者,婦人之道,在婦人則爲 在恒,故不可耳。 在它卦,六居君位而應剛,未 也。 應陽剛,居中 五,君位 君道豈可以柔 ,而不以 而 所 也 應

以此爲恒,其凶宜矣。

從婦 日 凶也 婦人貞吉,從一而終也,夫子制義,

上六,振恒,凶 從爲 如 則以義制者也,從婦人之道,則爲凶也。 五之從二,在婦人則爲正而吉,婦 正,以順爲 德,當終守於從一。夫子 人以

六居恒之極,在震之終,恒極則不常,震終

振書 以 則動 能堅固其守,皆不常之義也,故爲「振 振 爲恒也。 極。以陰居上,非其安處,又陰柔不 ,抖擞運 動之意。 振者,動之速也,如 在上而其動无節, 振 衣 恒, 如如

象曰: 甚矣。象又言其不能有所成立,故曰「大 不常,豈能有所成乎? 居上之道,必有恒德,乃能 振恒在上,大无功也 居上而不恒,其 有功。

若躁

動

无功也」。

所,故受之以遯,遯者,退也。」夫 遯、《序卦》:「恒者久也,物不 天在上之物,陽性上進。 也,避也,去之之謂也。 去,相須之理也,遯 一所以 爲卦,天下有山。 山,高起之物,形 繼恒 可 也。 以久居其 久則 遯,退 有

N

遯,故 進,天乃上 雖 盛,陽消而 高 起, 爲 遯 體 退,小人漸盛,君子退而避之, 進 去之義。 乃 而去之,下陵 止 0 物 二陰生於下,陰長 有 上 陵 而 之象 上去,是 而 止 相 將 違 不

遯,亨,小利貞。

故爲遯也

事 有 退藏 道,不可大貞,而尚利小貞也 長,而未至於甚 人道長之時,君子知幾退 遯者,陰長陽消,君子遯藏之時也。 有不 亨也。 以伸其道,道不屈 齊,與 在 事,亦有由遯避而 時消 盛,君子 息,无 則爲亨,故遯 尚 必 避,固善也。 有遲 同 亨者。 也 遲 致 陰 力之 柔 君子 雖 所 然 方 小 以

彖曰:「遯亨」,遯而亨也。

自「剛當位而應」以下,則論時與卦才,尚君子遯藏,所以伸道也。此言處遯之道,小人道長之時,君子遯退,乃其道之亨也。

有可爲之理也。

剛當位而應,與時行也。

時消 中正 扶持其道,未必於遯藏 以 雖 剛 遯 息。 陽之德,處中正之位,又下與六二以 之時,君子 相應,雖陰長之時,如卦之才,尚當 荷可 以致其力,无不至誠自 處之,未有必 而不爲,故曰 遯之義。 1「與時 盡 隨 五 以

行也」。

小

利貞,浸而

長也

遯之時義大矣哉!

當陰 **豈肯坐視其亂而不救**? 貞」之教。 人之意未便遽已也,故有 遯者陰之始長,君子知微,故當深戒,而 貞其道,所謂「小利貞」,扶持使未遂亡也。 蓋陰長 長之時,不可 必以浸漸,未能 聖賢之於天下,雖 大貞,而 遽 必區區致力於未 「與時行」、「小利 盛,君子尚可小 尚「小利貞」者, 知道之將廢, 聖

人贊其「時義大矣哉」!或久或速,其義理,更不假言也。此處遯時之道也。故聖之於漢、晉是也。若有可變之道,可亨之之於漢、晉是也。若有可變之道,可亨之一。以漢、晉是也。若有可變之道,可亨之一。以漢、晉人,

而嚴。

皆大也。

畏,則自然遠矣。 足以致其怨忿,唯在乎矜莊威嚴,使知敬乎小人。遠小人之道,若以惡聲厲色,適達,是遯避之象也。君子觀其象,以避遠違,是遯避之象也。君子觀其象,以避遠

初六,遯尾厲,勿用有攸往。

後,不及者也,是以危也。初以柔處微,既進,故初乃爲尾。尾,在後之物也,遯而在他卦以下爲初。遯者往遯也,在前者先

晦藏,往既有危,不若不往之无災也。已後矣,不可往也,往則危矣。微者易於

象曰: 遯尾之厲,不往何災也。

災、處微故也。古人處微下,隱亂世,而不也。往既有危,不若不往而晦藏,可免於見幾先遯,固爲善也,遯而爲尾,危之道

去者多矣。

二與五爲正應,雖在相違遯之時,二以中六二,執之用黄牛之革,莫之勝説。

言也。在遯之時,故極言之。 革也。「莫之勝説」,謂其交之固,不可勝二五以中正順道相與,其固如執係之以牛固。黄,中色,牛,順物,革,堅固之物。正順應於五,五以中正親合於二,其交自正順應於五,五以中正親合於二,其交自

象曰:執用黄牛,固志也。

執之以牛革也。 上下以中順之道相固結,其心志甚堅,如

八四七

九三,係遯,有疾厲,畜臣妾吉。

危也。 土 正 正 害於遯矣,故爲有疾也。 貴速而 陽志説陰,三與二切比,係乎二者也。 然君子之待小人,亦不如是也。 之道也,故以畜養臣妾,則得其心爲吉也。 愛之則忠其上。係戀之私恩,懷小人女子 一,則雖係,不得爲有疾,蜀先主之不忍棄 一應,以暱比相親,非待君子之道。 民是也。 臣妾,小人女子,懷恩而不知義,親 遠,有所係累,則安能速且遠也 雖危,爲无咎矣。 遯而不速,是以 三與二非 若以 ? 遯

不可大事也。 象曰:係遯之厲,有疾憊也,「畜臣妾吉」,

九四,好遯,君子吉,小人否。安則吉,豈可以當大事乎?也,蓋力亦不足矣。以此暱愛之心畜養臣趣而有係累,必以困憊致危,其有疾,乃憊

四與初爲正應,是所好愛者也。君子雖有四與初爲正應,是所好愛者也。君子雖有四與初爲正應,是所好愛者也。君子雖有四與初爲正應,是所好愛者也。君子雖有四與初爲正應,是所好愛者也。君子雖有

能勝其私意,而至於不善也。 君子雖有好而能遯,不失於義,小人則不象曰:君子好遯,小人否也。

九五,嘉遯,貞吉。 古。 時,故云「與時行,小利貞」,尚有 道,時止時行,乃所謂嘉美也,故爲貞正 九五中正,遯之嘉美者也。 係之失,所以爲嘉 處,是其心志及乎動止莫非中正,而 九五非无係應,然 也。 在《彖》則 與二皆以 處得中正之 中 概 濟遯之 言遯 Ē 无 私 而

意",於爻至五,遯將極矣,故唯以中正處

然人君之所避遠乃遯也,亦在中正而已。遯言之。遯非人君之事,故不主君位言,

象曰:「嘉遯貞吉」,以正志也。

人之遯也,止也,唯在正其志而已矣。得正,而應中正,是其志正也,所以爲吉。志正則動必由正,所以爲遯之嘉也。居中

上九,肥遯,无不利。

寬綽有餘裕也。遯者窮困之時也,善處則外矣,又下无所係,是遯之遠而无累,可謂死所係滯之爲善。上九乾體剛斷,在卦之肥者,充大寬裕之意。遯者,唯飄然遠逝,

无應則无累,故爲剛决无疑也。 其遯之遠,无所疑滯也。蓋在外則已遠象曰:「肥遯,无不利」,无所疑也。

爲

肥矣。

其遯如

此

,何所不利?

乾下。 義也 也。 也。 陽之壯盛也。 遯則必壯,大壯所以次遯 進盛之義。 遯者,陰長而陽遯也。 遯,故受之以大壯。」遯爲違去之義,壯爲 大壯、《序卦》:「遯者退也,物不 剛陽大也,陽長已過中矣,大者壯盛 又雷之威震而在天上,亦大壯之 乾剛而 震動,以剛而 衰則必盛,消息相須,故既 也。 動,大壯之義 爲卦,震 可 大壯, 以 上

大壯,利貞。

正,强猛之爲耳,非君子之道壯盛也。大壯之道,利於貞正也。大壯而不得其

彖曰:大壯,大者壯也,剛以動故壯。

陽爲大。陽長以盛,是「大者壯也」。下剛所以名「大壯」者,謂大者壯也。陰爲小,

而上動,以乾之至剛而動,故爲大壯。爲

大者壯與壯之大也。

見矣。「大壯利貞」,大者正也。正大而天地之情可

而云「正大」,恐疑爲一事也。 之理,學者默識心通可也。不云「大正」, 之理,學者默識心通可也。不云「大正」, 之理,學者默識心通可也。不云「大正」, 天地之情可見矣」。天地

象曰:雷在天上,大壯,君子以非禮弗履。象曰:雷在天上,大壯,君子之大壯不可能復禮。古人云:「自勝之謂强。」《中庸》於「和而不流」、「中立而不倚」,皆曰「强哉「和而不流」、「中立而不倚」,皆曰「强哉至於克己復禮,則非君子之大壯者,莫若克己至於克己復禮,則非君子之大壯者,其是之人,故云「君子以非禮弗履。也,故云「君子以非禮弗履」。

初九, 壯于趾, 征凶有孚。

必也。 凶 九在下,用壯而不得其中。夫以剛處壯, 雖居上猶 圃 初,陽剛 有 用壯, 壯于趾也。趾, 在下而進動之物。 乎。 乾 不可 孚,信也,謂以壯往,則得 體 而 行,况 處下, 壯于進者也。 在下乎? 故 征 則其 凶 在下 可

象曰:壯于趾,其孚窮也。

在最下而用壯以行,可必信其窮困而

九二,貞吉。

凶也。

中道,无不正也。 所勝爲義。 或曰: 是剛柔得 二雖以陽剛當大壯之時,然居柔 人能識時義之輕重 貞非以 中,不過於壯,得貞正而吉也。 以陽 九 居二爲 剛健體當大壯之時,處得 在四,則有不正之戒。 ,則可以學易矣。 戒乎? 曰: 而 處中,

象 "「九二貞吉」,以中也

所 以 正,况陽剛 貞正 而吉者,以 而乾體乎? 其 得 中道也。 中則不

九三,小人用壯 ,君子用罔,貞厲,羝羊觸藩,

其角。

首 用 亂。 也。 勇, 藩 傷莫與,貞固守此,則 无不宜。 苟剛之太過, 之極者也。 九三以剛居陽 君子小人以地言,如「君子有 在 籬當 君子 ,叛爲喜觸,故 其壯,齒者醫,角者觸,蹄者踶。 君子志剛,故用 以其至剛,蔑視於事,而无所忌憚也。 剛柔得中,則不折不屈,施於天下而 其 則 前 爲 極壯 也 用 罔。 而 取 蓋 如 處壯,又當乾體之終,壯 爲象。 所 此,在小人則爲用壯 罔。 小人尚 當 危 則无和 必 道 罔,无 羊喜觸 觸。 也。 力、故 通而 順之德,多 也,猶 凡 喜用壯 藩 羊壯 物莫 用 无 義 其 云蔑 壯 如 於 不 爲

> 何也? 此,必 方言其危,故未及於凶也。凡可以致凶 用,必至摧 羸 日: 困 困 其 如三之爲,其往足以 也。 角矣。 三壯 猶 甚 人 如 尚 此 剛壯,所當必 而 致 不 凶,而 至凶, 而

象曰:「小人用壯」,君子罔也。 爲用 在小人,則爲用 罔 志 氣剛 其强壯之力。在君子,則 强,蔑視於事,靡所

未至者,則

厲

也

九四,貞吉,悔亡,藩决不羸,壯于大輿之輹 時,小 其壯 也。 他 也? 故戒以貞則吉而悔亡。蓋方道 四爲不正,方君子道長之時,豈可有 四,陽剛長盛,壯已過中,壯之甚也。 卦, 也。 藩所 失則 重剛 以 高 害 而居柔,未必不爲善也,大 限 大之車 亨進之勢,是有 隔 也 -,輪輹 」,藩籬· 强 决開,不 壯 悔 其 也。 復 行之利 然居 若 過 長 不 在 困

顧

憚也。

云壯于輹,謂壯于進也。「輹」與「輻」同。處也。車之敗,常在折輹,輹壯則車强矣。可知,故云「壯于大輿之輹」。 輹,輪之要可知,故云「壯于大輿之輹」。 輹,輪之要

未止也。以至盛之場,用壯而進,故莫有剛陽之長,必至於極。四雖已盛,然其往象曰:「藩决不羸」,尚往也。

當之。 往」,其進不已也。 止也。 藩 决開 以至盛之陽,用壯 而 不 羸 困,其 而 力 進,故莫 也 「尚 有

六五,喪羊于易,无悔。

剛 有 和 悔。五,以位言則正,以德言則中,故 而 羊群行而喜觸,以象諸陽並進。 ,是喪其壯于和易也。 悔。 易之道,使群陽雖 並進,五以柔居上,若以力制 唯和易以待之,則 壯 无所用 如此,則 群陽 也 則 无 四陽 所 可 難 能 以 用 方長 勝 用 其 无 而

象曰:「喪羊于易」,位不當也。

所以必用柔和者,以陰柔居尊位故也。若

上六,羝羊觸藩,不能退,不能遂,无攸利,艱

則吉。

其所 也。 不能固其守,若遇艱困,必失其壯。失其 不能 能退」也。 陰柔之人,雖極用壯之心,然必 羝羊但取其用壯,故陰爻亦稱之。 六以陰 藩籬,進 處震終而當壯 爲 終其壯,有 才本陰柔,故不能勝己以就義,是「不 如 則礙身,退 此,无所 極,其過 摧 往 必縮 則 圃 可知。 妨 利 ,是「不能遂」也。 也。 角,進退皆不可 如羝羊之觸 陰柔 處壯,

壯,則反得柔弱之分矣,是艱則得吉也。 用壯則不利,知艱 而處柔則吉也。 居壯之

吉」,咎不長也。 象曰:「不能退,不能遂」,不詳也。 「艱則

終,有變之義也

吉也。 非其處而處,故進退不能,是其自處之不 自當變矣。 詳慎也。 「艱則吉」,柔遇艱難,又居壯終, 變則得其分,過咎不長乃

晉,康侯用錫馬蕃庶,晝日三接。

=== 離坤 上下

坤上,明出地上也。日出於地,升而益明, 壯則必進,晉所以繼大壯 晉,晉者進也。」物无壯 故爲晉。晉,進而光明盛大之意也。 晉、《序卦》:「物不可以終壯,故受之以 盛爲進 ,故《彖》云「晉,進也」。 卦有有 而終止之理,既 也。爲卦,離 凡物 在 成

> 正也。 隨卦可見。晉之盛而无德者,无用有也。 晉之明盛,故更不言亨,順乎大明,无用戒 足而可以有功也。有不同者,革、漸是也, 云「元亨」者,固有也,云「利貞」者,所不 德者,有无德者,隨其 宜也。乾、坤之外,

而言,則進升高顯,受其光寵也。 臣相得。在上而言,則進於明盛, 寵遇之至也。晉進盛之時,上明下順,君 之厚,又見親禮,晝日之中,至於三接,言 車馬,重賜也,蕃庶,衆多也。不唯錫與 治安之侯也,故受其寵數,錫之馬衆多也。 安之侯也。上之大明,而能同德,以順附 晉爲進盛之時,大明在上,而下體順附,諸 侯承王之象也,故爲康侯。「康侯」者,治 在臣

彖曰:晉,進也。

「康侯用錫馬蕃庶,晝日三接」也。明出地上,順而麗于大明,柔進而上行,是以

也。 不能 上者 以 明 大明之君,諸侯之象也 天子也。 德,是康民安國之侯 之君,安天下者也。 爲「康侯用錫馬蕃庶,晝日三接」也。 行,噬嗑、睽、鼎是 上附於大 享 而 ,故爲晉。 ,進也,明 離在上者,柔居君位,多云柔進 龍 順麗 坤麗 也,諸侯治 包明盛之義。 錫 於 不曰「公卿」而 爲 而 明之君 離,以 進 見親禮,畫日之間,三接 所以 能 而 於下 待下 盛 也。 不謂之進者,進爲前 也 順 也。 明 也,故謂之「康 諸侯能順附天子之明 麗 者也,在下 寵 「柔 於大 出地上,離 遇 六五 明出 日 親密之義 進 侯」,天子 (明,順 以柔居君 於地,益 而 ·而順 上 行 在 侯 德之臣 一是以 附 治 丽 三, 凡 坤上 見 大明 進 位 進 於 於 於 是 1 而

> 象 初六,晉如 守,則悻 之信也。 信,則當安中自守,雍容寬裕,无急於求 以 昭 遂其進,唯得 初居晉之下,進之始也。「晉如」,升進 也,「明明德」於天下,「昭明 也。」君子觀「明出地上」而 日 而始進,豈遽 明 推如」,抑退也。於始進 自 明德」在己,故云「自 明之也。 昭其明德。 明 出 悻以 推 苟欲信之心切,非 地 如,貞吉,罔孚,裕无咎 能 上,晉 傷於義矣,皆有 傳 正 深見信於上? 苟上未見 則 E 去蔽致知,「昭明德」於己 沿吉也。 「昭德 君子 昭 而言,遂其 「罔孚」者,在 以 益明 塞違、昭其 自 汲 德」於外也 咎 昭 盛之象, 汲 也 明 以 (進,不 失 故 也。 其 下 度 而

則

无咎,

君子

處進退之道

也

无進无 久速唯時,亦容有爲之兆者。 而失其職,一日不可居也。然事非一概, 未受命當職任故也。若有官守,不信於上 守以爲裕,故特云初六裕則无咎者,始進 人恐後之人不達寬裕之義,居位者廢職失 退,或遲或速,唯義所當,未嘗不裕也。 者,始欲進 抑,唯獨行正道 而 未 當位 故 也。 也。 君子之於進 寬裕則无咎 聖

王母。 六二,晉如,愁如,貞吉,受兹介福,于其

彰,上之人自當求之。蓋六五大明之君, 无應援,不能自進,然其中正之德,久而必 者,指六五也。二以中正之道自守,雖上 愁如貞吉」。王母,祖母也,謂陰之至尊 難也。然守其貞正,則當得吉,故云「晉如 雖也。然守其貞正,則當得吉,故云「晉如 強於進者也,故於進爲可憂愁,謂其進之 六二在下,上无應援,以中正柔和之德,非

與之同德,必當求之,加之寵禄,受介福於

王母也。介,大也。

象曰:「受兹介福」,以中正也。

之道,久而必亨,况大明在上而同德,必受「受兹介福」,以中正之道也。人能守中正

大福也。

六三,衆允,悔亡。

眾所是三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在以六居三,不得中正,宜有悔咎。而三在

象曰:「衆允」之志,上行也。

上行,上順麗於大明也。上從大明之君,

衆志之所同也。

九四,晉如鼫鼠,貞厲。

属」者,開有改之道也。 展上同德,順麗於上。三陰皆在己下,勢與上同德,順麗於上。三陰皆在己下,勢與上同德,順麗於上。三陰皆在己下,勢與上同德,順麗於上。三陰皆在己下,勢以九居四,非其位也。非其位而居之,貪

象曰:「鼫鼠貞厲」,位不當也。

爲非據。貪而懼失則畏人,固處其地,危賢者以正德,宜在高位,不正而處高位,則

可知也。

順附,故其悔得亡也。下既同德順附,當六以柔居尊位,本當有悔,以大明而下皆六五,悔亡,失得勿恤,往吉,无不利。

察則有蔽,盡天下之公,豈當復用私寫則有蔽,盡天下之公,豈當復用私所,思其用明之過,至於察察,失委任之照,患其用明之過,至於察察,失委任之照,患其用明之過,至於察察,失委任之照,患其用明之過,至於察察,失委任之照,也。六五,大明之主,不患其不能明察則有蔽,盡天下之心,過天下之志,勿復權誠委任,盡衆人之才,通天下之志,勿復

象曰:「失得勿恤」,往有慶也。

成天下之大功,是往而有福慶也。以大明之德,得下之附,推誠委任,則可以

上九,晉其角,維用伐邑,厲吉,无咎,貞吝。 甚也。 之上,進之極也。剛極則有强猛之過,進 極則有躁急之失。 故取角爲象。以陽居上,剛之極也。 角,剛而居上之物。上九以 无所用而 可 以剛 維 獨用於伐 而 極於進,失中之 剛居卦之極, 邑 在晉 則

厲而吉且无咎也。伐四方者,治外也,伐

爲貞。 義 遷善愈速。 也。 其居邑者,治内也。 德,故於貞正之道爲可吝也。 於厲,而吉且无咎也。 而於自治則有功也。 ~,極 人之自治 於剛 進,雖 如上九者,以之自治,則 剛剛 自治有功,然非 極則 言「伐邑」,謂 復云「貞吝」以盡其 嚴厲非安和之道 守道 愈 固 不失中正 中 進 内自治 和之 雖 極 傷 則

象曰:「維用伐邑」,道未光也。

光大,故亦可吝。聖人言盡善之道。也。夫道既光大,則无不中正,安有過也。夫道既光大,則无不中正,安有過也。夫道既光大也,以正理言之,猶可吝

明夷、《序卦》:「晉者、進也、進必有所傷、

成明夷,故義 也。 人於地中,明傷而昏暗也,故爲明夷。 暗之卦,暗君在上,明者見傷之時 卦,明君在 已,必有所傷,理自然 故受之以明夷。 爲卦,坤上離下,明入地中 上,群賢並 與晉正 夷者, 一相反。 進之時 也 傷 引,明夷 也。」夫進之不 也。 晉者明盛之 所 也。 以 也。 明夷 反 次 晉 昏 晉 日

明夷,利艱貞。

正也。在昏暗艱難之時,而能不失其正,君子當明夷之時,利在知艱難而不失其貞

彖曰:明入地中,明夷。

所以爲明君子

也

文王如是,故曰「文王以之」。當紂之昏爲人内有文明之德,而外能柔順也。昔者離者文明之象,外卦坤,坤者柔順之象。内文明而外柔順,以蒙大難,文王以之。

暗 而 日 外足 順 「文王以之」。 以事紂,蒙犯大難,而 明 以 夷之時 遠 禍患,此 前 文王 文王所用之道也,故 内 内 有 不 文 失 明 其 之 (明聖, 德 外

以之。 利艱貞,晦其明也。内難而能正其志,箕子

之道 子能 處其 明夷 不 能 守其 晦 (國,内 藏 之時,利於處 也,故曰 藏 晦其明,而自守其正志,箕子所 IE. 其 則 明也。 切 「箕子以之」。 近 非 其 賢 不 明。 艱 難,故云「内難 晦 戹而 箕子 其 明,則被 不失其貞 當紂之時, 禍 正 然箕 患 一,謂 用 身 ;

而明。 如,明夷」,君子以莅衆,用晦

明所 子 傷於察 觀 明人地中之象,於莅衆也,不極 以 照 、太察則 君子无所 盡 事 不 圃 照,然用 无含弘之度。 明之過, 其 故 明 君 則

食」,言困窮之極也。

事未

顯

加

處甚艱

之盡 用晦 察,則己不勝其忿疾,而 察 不明也。 人情睽疑而 面 平隱 乃 用 所以爲明也。 晦 古之聖人設前 也。 然後 不安,失莅衆之道,適所以爲 能 容 物 若自任其明,无所不 和 旒 无寬厚含容之德 衆 屏樹者,不欲 衆 親 而 明

初 食,有攸往,主人 顯 害其 也。 九 子于行」,謂去其 傷陽之明,使不得上進,是于飛 九,陽明上升者也,故 初九,明 君子明照,見事之微,雖始有見傷之端,未 也,君子則能見之矣,故行去避之。「君 明 所 翼見傷,故 夷于飛,垂其翼。 以 體 行者。 耐 居明夷 八有言。 垂 「君子于行,三日不食」, 、禄位 杂。 取 而 之初,見 凡小人之害君子, 飛象。 退 君子于行,三日不 藏 也。 傷 香 而傷其翼 之始 三日不 暗 在 也。

去之。 言也。 俗之見怪而遲疑其行也。若俟衆人盡識 見 之人乎? 以 而 所往適,則「主人有言」也。 傷未顯 見幾之明 人將鉗我於市。」雖二儒者亦以爲過甚之 去,避胥靡之禍也。 如穆生之去楚,申公、白公且非之,况世俗 曰:初傷之始也,云「垂其翼」,謂傷其所 垂翼,傷 則傷已及而不能去矣。此薛方所以爲明, 非衆 一方鋒 飛 揚 爾,其事則未顯也。 雄 世俗之人未能見也,故異而 起,而 而去之,則世俗孰不疑 所 又如袁閎於黨事未起之前,名德之 人所能 已 不 以 但譏其責小禮,而不知穆生之 明 不獲其去也。 能 獨潛身土室,故人以爲狂生, 矣,何得衆 也。 識 也。 夫知 當其言曰:「不去,楚 故 君子見幾 明 幾者,君子之 人猶 然君子不以世 或 夷之始,其 日 怪? 未 -識 傷至於 非之。 故故 故 也? 亟 有 見 獨

> 卒 免 黨 錮 之 禍。 所 往 而 人有 言, 胡 足

象曰:「君子于行」,義不食也

怪也

然,故安處而无悶,雖不食可 君子遯藏 而 困 窮,義當 然也。 也 唯 義 之

六二,明夷,夷于左股,用拯馬壯吉。

馬,則 切也。 爲本也。「夷于左股」,謂傷害其行 手足之用,以右爲便,唯蹶張 避之爾。 陰闇小人傷明之時,亦不免爲其所傷,但 處,處之至善也。雖君子自處之善, 六二以至明之才,得中正 上,於行之用爲不甚切,左又非便用者。 君子自處有道,故不能深相 獲免之速 雖然,亦必自免有道。 足者,所 以 行 也。 也。 而 傷 體 用左,蓋 股 拯用壯健之 害,終能 順 在 順順 脛足之 圃 然當 闇所 不甚 右 時 違 自 立

八五九

傷

,其自處有道,故其傷不甚。

自

拯有道,

而 吉

君

子爲

陰

八六〇

爲於斯時也。下,所謂吉者,得免傷害而已,非謂可以有矣,故云「馬壯則吉」也。二以明居陰闇之故獲免之疾。用拯之道不壯,則被傷深

象曰: 六二之吉,順以則也。

明傷之時而能保其吉也。則,謂中正之道。能順而得中正,所以處六二之得吉者,以其順處而有法則也。

三與上正相應,爲至明克至暗之象。「不九三,離之上,暗之極也,又處剛而進。上,至確在上而處窮極之地,正相敵應,之上,至暗在上而處窮極之地,正相敵應,之上,至暗在上而處窮極之地,正相敵應,方獲其大首,「在前而明方也,「狩」,败而去乎?「南」,在前而明方也,「狩」,败而去乎?「南」,在前而明方也,「将」,或之事。上,與大首,「得其大首」,不可疾貞。上九三,明夷于南狩,「得其大首」,不可疾貞。

可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。舊染污俗未能遽可疾貞」,謂誅其元惡。

象曰:南狩之志,乃大得也。

志苟不然,乃悖亂之事也。「得其大首」,是能去害,而大得其志矣。如商、周之湯、武,豈有意於利天下乎?如商、周之湯、武,豈有意於利天下乎?

六四以陰居陰,而在陰柔之體,處近君之六四,入于左腹,獲明夷之心,于出門庭。

● 「潰」、涂刻本作「潰」。

象曰:「入于左腹」,獲心意也。 左腹」。 爲用。 也。 也。 位,是陰邪小人居高位,以柔邪順於君者 之事暗君,必先蠱其心,而後能行於外。 得其心。凡姦邪之見信於其君,皆由奪其 當用,故爲隱僻之所。人之手足,皆以右 結於上。 未有由顯明以道合者也,必以隱僻之道自 柔邪順從之,以固其交。 庭」,既信之於心,而後行之於外也。 心也。不奪其心,能无悟乎?「于出門 六五,明夷之君位,傷明之主也,四以 四由隱僻之道,深入其君,故云「入于 世謂僻所爲僻左,是左者隱僻之所 入腹謂其交深也。其交之深,故 右當用,故爲明顯之所, 夫小人之事君 左不 邪 臣

六五,箕子之明夷,利貞。 其心意也。得其心,所以終不悟也。 「入于左腹」,謂以邪僻之道入于君,而得

> 謂之仁與明也,若箕子,可謂貞矣。 陰柔,故爲之戒云「利貞」,謂宜如箕子之 而内守其正,所謂内難 也,故佯狂爲奴,以免於害。 明之極者也。 隨時。 上六處坤之上而明夷之極,陰 貞固也。若以君道言,義亦如是。 人君有 切近於紂矣。若不自晦其明,被禍可必 於難。箕子,商之舊臣,而同姓之親,可 害必矣,故當如箕子之自晦藏,則可 主。五切近傷明之主,若顯其 位言。上六陰暗傷明之極,故以爲明夷 五爲君位,乃常也。然《易》之取義,變動 近至暗之人,以見處之之義,故不專 五切近之,聖人因以 而能 雖晦藏其明, 正其志,所以 (明 則 五 以 以 以 見 暗傷 爲 五 免 傷 之 君 切

箕子晦藏,不失其貞固,雖遭患難,其明自

象曰: 箕子之貞,明不可息也。

當含晦之時,亦外晦其明,而内正

其志也。

八六二

上六,不明晦,初登于天,後入于地。是亡其明,乃滅息也,古之人如楊雄者是也。存,不可滅息也。若逼禍患,遂失其所守,則

終,明傷之極者也 暗,後入于地也。上,明夷之終,又坤陰之 當及遠,初登 夷傷,故 上,至高之地。明在至高,本當遠照,明既 上居卦之終,爲明夷之主,又爲明夷之極 不 明 而 于 天也。 反昏 晦 也。 乃 夷 本居于 傷 其 明 高 而 明 昏

地」,失則也。 象曰:「初登于天」,照四國也。「後入于

乃被傷而昏暗,是「後入于地」,失明之道初登于天,居高而明,則當照及四方也。

異離上下

也。

失則失其道也

家人、《序卦》:「夷者傷也、傷於外者必反

戰 巽方,非巽有齊義也。 子》書以明内齊外爲義,古今善之,非 也。 象之意也。 取自内而出之象,爲家人之義也。 道,蓋治家之道也,推 者則能施於國,至於天下治。治天下之 爲家人之道。 外巽内離,爲 之序,正倫理,篤恩義,家人之道也。 及於外之象。二與五正男女之位於内外, 生自火,自内 内之道。父子之親,夫婦之義,尊卑長幼 反於内,家人所以次明 於家,故受之以家人。」夫傷困 也 夫人有諸身者則能 所 而 風 明於内而巽於外,處家之道 謂 出也。 自火出。火熾 齊乎巽,言萬物 而行之於外耳。 自内而 夷 如戰乎乾,乾非有 施於家,行於家 也。 家人者, 出 則風生,風 于外,則 由 潔 令文 家 中 於 取 故 而 必

一家人,利女貞。

正者身正也,女正者家正也,女正則男正夫夫婦婦而家道正,獨云「利女貞」者,夫家人之道,利在女正,女正則家道正矣。

彖曰:●家人,女正位乎内,男正位乎外,男

可知矣。

女正,天地之大義也。

外之道,正合天地陰陽之大義也。二,處内也,男女各得其正位也。尊卑内景以卦才而言。陽居五,在外也,陰居

家人有嚴君焉,父母之謂也。

之則也。程則法度廢。有嚴君而後家道正,家者國長則法度廢。有嚴君而後家道正,家者國也。雖一家之小,无尊嚴則孝敬衰,无君家人之道,必有所尊嚴而君長者,謂父母

正,正家而天下定矣。 父父,子子,兄兄,弟弟,夫夫,婦婦,而家道

父子兄弟夫婦各得其道,則「家道正」矣。

推一家之道,可以及天下,故家正則天下

定矣。

有恒。

象曰:風自火出,家人,君子以言有物而行

修,則身正而家治矣。 動,不可易也。君子觀風自火出之象,知動,不可易也。君子觀風自火出之象,知重之由内而出,故所言必有物,所行必有恒也。物謂事實,恒謂常度法則也。德業但也。物謂事實,恒謂常度法則也。德業

初九,閑有家,悔亡。

法度,則人情流放,必至於有悔,失長幼之悔矣。治家者,治乎衆人也,苟不閑之以有家之始,能以法度爲之防閑,則不至於初,家道之始也。閑謂防閑法度也。治其

● 「彖」,原作「象」,據涂刻本改。

云无悔者,群居必有悔,以能閑故亡耳。亡也。九,剛明之才,能閑其家者也。不至。能以法度閑之於始,則无是矣,故悔序,亂男女之别,傷恩義,害倫理,无所不

象曰:「閑有家」,志未變也。

傷多矣,乃有悔也。志變而後治,則所家之善也,是以悔亡。志變而後治,則所未流散變動而閑之,則不傷恩,不失義,處閑之於始,家人志意未變動之前也。正志

六二,无攸遂,在中饋,貞吉。 夫以英雄之才,尚有 失其正理。 禮,以恩奪義,唯剛立之人,則能不以 治於家者也,故「无攸遂」,无所爲 三上是也。六二以陰柔之才而居柔,不能 人之處家,在骨肉父子之間,大率以情勝 ,况柔弱之人,其能勝妻子之情乎? 如 故家人卦,大要以剛爲善, 溺情愛 圃 不 而 能自守 可也。 私 初 愛

> 「中饋」。 其正而吉也。婦人居中而主饋者也,故云順處中正,婦人之道也,故「在中饋」則得二之才,若爲婦人之道,則其正也。以柔

二以陰柔居中正,能順從而卑巽者也,故象曰:六二之吉,順以巽也。

爲婦人之貞吉也。

九三,家人嗃嗃,悔厲吉,婦子嘻嘻,終吝。 也。 子嘻嘻」,則終至羞吝矣。在卦,非有嘻嘻 道齊肅,人心祗畏,猶爲家之吉也。若「婦 傷,故必悔於嚴厲,骨肉恩勝,嚴過故 急,故「家人嗃嗃」然。 得正而過乎剛者也。 上,主治乎内者也。以陽居剛而不中,雖 嗷嗷相類,又若急束之意。九三在内卦之 嗝嗝,未詳字義,然以文義及音意觀之,與 雖悔於嚴厲,未得寬猛之中,然而 治内過 治家過 剛 嚴,不能无 ,則傷於嚴 悔

嘻嘻之甚,則致敗家之凶,但云吝者,可吝避於嚴也。嘻嘻,笑樂无節也。自恣无避,則終致敗家,可羞吝也。蓋嚴謹之過,節,則終致敗家,可羞吝也。蓋嚴謹之過,節,則終致敗家,可羞吝也。蓋嚴謹之過,

失家節也。 象曰:「家人嗚嗚」,未失也,「婦子嘻嘻」,

之甚,則至於凶,故未遽言凶也。

嘻嘻」,是无禮法,失家之節,家必亂矣。雖嗚嗚,於治家之道未爲甚失。若「婦子

則爲大吉也。四高位,而獨云富者,於家保有其富者也。居家之道,能保有其富,正,爲安處之義。異順於事而由正道,能六以巽順之體而居四,得其正位,居得其六四,富家大吉。

而言高位,家之尊也,能有其富,是能保其

家也,吉孰大焉?

象曰:「富家大吉」,順在位也。

者也。富,家之大吉也。以巽順而居正位,正而巽順,能保有其富

九五,王假有家,勿恤吉。

象曰:「王假有家」,交相愛也。

「王假有家」之道者,非止能使之順從而

乎? 若身修法立,而家未化,未得爲假有 刑家,「交相愛也」。能如是者,文王之妃 已,必致其心化誠合,夫愛其内助,婦愛其

上九,有孚,威如,終吉。 威嚴則能終吉。保家之終,在「有孚,威 間,慈過則无嚴,恩勝則掩義,故家之患, 忘恭順,而家不亂者,未之有也。故必有 常在禮法不足而瀆慢生也。長失尊嚴,少 治家以有孚爲本。治家者,在妻孥情愛之 至誠,己且不能常守也,况欲使人乎? 故 孚信,則能當久,而衆人自化爲善。不由 本。治家之道,非至誠不能也,故必中有 上,卦之終,家道之成也,故極言治家之

如」二者而已,故於卦終言之。 家之道也

象曰:「威如」之吉,反身之謂也。 治家之道,以正身爲本,故云「反身之謂」。

當先嚴其身也。威嚴不先行於己,則人怨 孟子所謂「身不行道,不行於妻子」也 而不服,故云威如而吉者,能自反於身也。 爻辭謂治家當有威嚴,而夫子又復戒云:

離兑上下

異,是其志不同行也,亦爲睽義。 之義也。又中少二女,雖同 下兑,離火炎上,兑澤潤下,二體相違,睽 也,故家人之後,受之以睽也。爲卦,上離 睽者乖也。」家道窮則睽乖 睽、《序卦》:「家道窮必乖,故受之以 離散,理必然 居 ൬ 所歸

睽,小事吉。

彖曰: 睽,火動而上,澤動而下。 睽者,睽乖離散之時,非吉道也。 之善,雖處睽時,而「小事吉」也 二女同居, 以卦才

其志不同行。

之少 贊其 言 女雖同居,「其志不同行」,亦爲睽義。 而 彖先釋睽義,次言卦才,終言合睽之道 睽者,本同也,本不同則非睽也 下,二物之性違異,故爲睽義。中少二 也 時 用之大。 同 處,長則各適 火之性動而上,澤之性 其 歸 其 志異 也。 女 動 而

能合也

以小事吉。説而麗乎明,柔進而上行,得中而應乎剛,是

亦可以· 麗 剛 應剛 柔居尊位 卦才如此,所以小事吉也。兑,説也。 上行」,晉、鼎 ,不能致大吉 在 也,又爲 雖 上,而彖欲 而睽之時 小濟,是於小事吉也。 不能 有 明。故爲 説 合天下之睽,成天下之大事 是 ,相與之道未能深固,故二 順 也。 見柔居尊者 ,何也? 麗明之善,又得中道 説 方睽 順 티: 而附麗於明。凡 乖之時,六五 ,則曰「柔 五以 五,陰柔, 明而 進 以 應 而 而

散之時,必君臣剛陽中正,至誠協力而後必遇主于巷,五噬膚,則无咎也。天下睽

天地睽 物 睽 而 而 其 其 事 類 事同也,男女睽 也。 睽之時 崩 大 而其志通 父矣哉 也 萬

異 萬類 之道也。 推物 之用,其事至大,故云「大矣哉」! 萬殊,而聖人爲 天地之和,禀陰陽之氣, 求之志則 化育之事則同 高地下,其體睽也,然陽降陰升,相合而 人則明物 而 也 理 理之同,以明睽之時用,乃聖人合睽 本 八通也。 見同之爲同者,世俗之知 同,故天下之大,群生之衆,睽 以「天地」「男女」「萬物」明之,天 理之本同 也。 能同之。 生物萬殊,睽 ,所以 男女異質,睽也 則相類 能同 處睽之時, 天下 也,然 也。 也。 前 而 物 M 和 散 雖 得 相 成

象曰:上火下澤,睽,君子以同而異。

不大同 大同 當異 象。 庸》曰「和而不流」是也 隨俗習非之人也,要在 於秉彝則同矣,於世俗之失則異也。不能 上火 ·者,亂常拂理之人也, 也 君子觀睽異之象於大同之中,而 下澤,二物之性違異,所 ',於世俗所同者則有 夫聖賢之處世,在 同 而 不能 能異 時 人理之常, 以爲 而 耳。 獨 獨異,蓋 睽 異者, 知 離 命中 莫 所 之

初 司 有 能 非相應者,以 同是陽爻,同居下,又當相應之位,二陽本 動於下,有悔可知,所以得亡者,九四 九,悔亡,喪馬,勿逐自復,見惡 上,亦以 九居卦初,睽之始也。 德相與,故相遇。 睽,本異則 其悔也。 剛 陽 、睽離 何睽? 在睽故合也。上下相與,故 在 睽,諸爻皆有應。 无與,自 馬者,所以行也。 唯 在睽乖之時,以 初 與四,雖非應而 然同 人无咎。 類 夫合則 相 合。 在 剛

> 絶也。 與相通 以仇 化姦 馬也。 故必見惡人則无咎也。 咎之道也,又安能化不善而使之合乎? 小人乖異者至衆,若棄絶之,不幾盡天下 馬 上行 復 者也。 X 君 得 子乎? 也。 也。 四既 爲善良,革仇敵爲臣民者,由 當睽之時, 與之合,則 睽 惡人,與己 獨 如 无與, 此則失含弘之義,致凶 古之聖王,所以 則不 雖 乖 能 同德者相與,然 異 行 (者也。 矣,是勿逐而 能 行,是喪其 見者, 弗 能

象曰:「見惡人」,以辟咎也。

怨咎也。无怨咎,則有可合之道。君子,而禍咎至矣。故必見之,所以免避能得也,若以惡人而拒絶之,則將衆仇於睽離之時,人情乖違,求和合之,且病其不

九二,遇主于巷,无咎。

二與五正應,爲相與者也。然在睽乖之

非 所謂 也。 矣。 巷」。 曲求於相遇,覬其得合也,故 學易者識 時,陰陽 功矣。而居睽離之時,其交非 下,上應六五之君,道合則志 應,當委曲 枉己屈道也 當委曲 巷者,委曲之途也。 委曲者,以善道宛轉將就使合而已, 必能合而後无咎,君臣睽 相 此 應之道衰,而剛柔 以 相求,期 相 則 求 知 也。 變 於會遇,與之合也。 通 二以 矣。 遇者,會逢之謂 行,成濟睽之 相戾之意勝 剛 故 曰「遇主 固。 離,其咎大 中之 五五 當 德 雖 于 委 居 īĒ.

當 誠 迎 誠 力以扶持之,明義 逢 其 ,期使之信合 睽之時,君心未合,賢臣 「遇主於巷」,未失道也。 也 意 ,如是 巷 非 宛 邪 轉 僻 而 曲 以求其合也。 理以 己。 徑也,故夫子特云「遇 至 致 其知 誠 在 以 下, 人 杜 感動 遇非 竭 蔽 之, 力 惑 枉 盡 道 以 盡

失道也。主于巷,未失道也」。未,非必也,非必謂

有終。 六三,見輿曳,其牛掣,其人天且劓,无

初

E 天且 也。 合志 際乎? 三居二剛之間,處不得其所安, 義,適合居剛守正之道也。 故力進以 行之具也。 見侵陵可知矣。三以正應在上,欲進與 陰柔,於平時 重傷也。 力犯也,故重傷於上,爲四所傷也。 應 極 有終合之理,始爲二陽所 劓」,天,髠首也。 在後者牽曳之而已,當前者進者之所 ,而四阻於前,二牽於後。 而 四隔止之,三雖 三不合於二與四,睽之時自无合 犯之,是以 興曳牽於後也,牛掣阻 且不 足以自立,况當睽離 傷 劓,截鼻也。 陰柔 也。 其 天 處 、於正應,則 而 戹,是无初 剛 車牛,所 又 丽 「其人 ,劓,言 志行 於前 以

八七〇

執止之義也。也,後必得合,是有終也。掣,從制從手,

象曰:「見輿曳」,位不當也。「无初有終」,

遇剛

也

安行,智者知幾而 合以正道,自无終睽之理。 遇剛也。不正而合,未有久而 以六居三,非正也,非正則不安。又在二 陽之間,所以 「无初有終」者,終必與上九相遇而 有 如是 固守。 艱 戹,由 故賢者順 「位不當 不離者也。 合,乃 也。 理 而

九四,睽孤,遇元夫,交孚,厲无咎。 睽之至善者也,故目之爲元夫,猶云善士 以 間,是睽 九當睽之初,遂能與 離之時,孤立无與,必以氣類相求而合,是 九 「遇元夫」也。 四當睽時,居非所安,无應而 離 孤 處者也。 夫,陽稱; 同德,而亡 以剛! 元 陽之德,當睽 善善 睽之悔,處 在二陰之 也。 初

> 當睽 間,處不當位,危且有咎也。 厲 會遇 也。 交孚,故得无咎也 時之不能行,何危之不能 各有孚誠也。 四 而 與初皆以 也。 乖 无咎也。 四 之時,各无應援,自然同 則過中,爲睽已甚,不若初之善也。 同 德相遇,必須至誠 陽處一卦之下,居相應之位, 上下二陽以至誠相合,則 當睽離之時,孤 濟 ? 以 相與交孚, 德 遇元 居二陰之 故 相 雖 親 夫 處 故 而 危 何

象曰:「交孚」「无咎」,志行也。

也? 咎而 子陽剛之才,而 之,云可以行其志,救時之睽也。蓋 誠相 初四皆陽剛。君子當睽乖之時,上下以至 己。 交,協志同力,則其志 唯有君子則能 卦辭但言无咎,夫子又從 至 誠 行其 相 輔,何 、志矣。 可以行,不 所 不能 以 而 止 濟 君 明 无

六五,悔亡。厥宗噬膚,往何咎?

之幼 也。 六 孔 則 五 輔翼之,故得悔亡。 知 而 二正應也。 雖 以 明 有 可 然 所以入之者深也。 中興之勢,蓋由任賢聖之輔,而 稚 往 陰 當睽之時,非 而 ¨, 而 柔 柔之才,二輔以陽之道 而 下 當 有 有 興盛王之治 慶、復 睽 噬 九二 離 膚」、噬齧其肌膚 之時, 剛陽之賢,與之爲 何過 人之者深,豈能合也 「厥宗」,其黨也,謂 咎之有? 而 以 居 劉禪 尊位 而深人之, 而 之昏 以周成 有 深 姬 人之 應 悔 弱 九 以 可

象 日 爻辭 是往 任 復 賢 推 但言「厥宗噬膚」,則可 厥宗噬膚」,往有慶也。 輔,使以 朔 m 其義,言人 有福 慶 其道 也 深 君 . 雖己 入於己,則可 以 才 不足 往 而 ?,若能 无 以 有

後説之弧,匪寇婚媾,往遇雨則吉。上九,睽孤,見豕負塗,載鬼一車,先張之弧.

黨,而 凡 也。 之 甚,則 之間 有? 察 鬼本无形,而 而 戾 極 F 而 高,高極矣,動則下也。 又背負泥塗,見其 然居睽極无所不疑,其見三如豕之污穢 其 失道既 終必合也。 而 面 也 居 如人適東,東 才性 多疑。 而常 上之睽乖既極,三之所處者正 難合,剛極則躁暴而不詳,明極 卦 妄之極也。 猜成 多自疑猜,妄生乖 之終, 睽之極 在 極 離之上,用明之極 如 孤 其 上九 ,則必反 心此,自 獨 罪 見 先張之弧 也。 :惡,如 載 物理 有六三之正應,實不 極矣,動 睽 可惡之甚也。既惡之 之一車,言其 上之與三,雖 Æ 也。 孤 理,故 見 極 既 ,始疑惡 離,雖處骨 也。 載 陽 而必反,以 則 極 也。 鬼 剛 上於 川則 西 如 滿 也 居 人雖有 而 睽 動 爲正 以 欲射 肉 理 極 而 車 无 近 親 則 剛 必 如 則 也 孤 爲 疑 反 升 明 堂 親 调 而 咈 之

於 也 而 匪 Ē 反,故與三非 寇 疑 婚 三實 之 媾 者 之語 无惡, 妄 也 復爲 與 故 妄 他 後 寇讐,乃婚 安 卦 説 能 同 弧 常 前 ? 面 弗 義 媾 故 射 則 紁 也 殊 睽 必 也 此 極 復

謂 故 睽 陰 陽 既 云往 極 交 合 則 而 不 而 遇 疑 益 和 雨 和 暢 加 則吉」。 合。 則吉 則 爲 陰 雨 也 陽 往者 E 合而 於 自 益 此 始 和 以 則 疑 往 爲 而 也 睽 雨

蹇

象 日 遇 雨 之吉 群 疑亡 也

无 所 雨 矣。 所 以 者 能 陰 不 疑 和 陽和 故 者 也 以 云 群 群 始 疑 疑 睽 盡 **_**; 而 L 能 睽 也 終 極 和, 其始 而 合 故 睽 吉 則 也 也 皆

之以 蹇,《 蹇。 序 桂 蹇 ₩: 者 睽 難 者 也。 乖 也 睽 乖 乖 之 必 時 有 難 必 有 故 蹇 受

> 有峻 也。 難 難 蹇 阻 險在前 爲 所 故 卦 以 爲 次 坎 而 蹇 睽 上 止 也 也 艮 不 能進 下。 蹇 也 坎 險 阻 險 前 之 也 有 義 險陷 故 艮, 爲 後 止 蹇

t

是以 道 利 濫 必 難 蹇 順 利 艮 西 一,而 難 於順 南, ,故「利見大人」也。 方。 在 易 西 雖 吉 之時 乎 堅固 坤方。 南,不利東北,利見大人,貞 則 使 也。 守 處平易之地,不 艮, 荷 難 貞 其守,故貞 Ш 必有聖賢之人, 可 免, 若遇 正 坤, 也 舒; 亦 難 體 設 地 悪 止於 而 使 止 也, (則吉· 德 不 而 難 利止 濟難者 體 險 能 險 也 不 順 固 也。 解 則 於危險也。 則 知 而 其 在 能 必以大 難 凡 義 守 不 易。 蹇 濟 益 處 難 命者 失 天 甚 正 難 之 東 於邪 Œ 下 矣。 德 者 時 北 不 Ż 之 處

彖 Ė . 蹇 難 也 一,險 在 前 也

爲

也

蹇,難 始難 爲 難之義,各不同 難也,困 難 列則 圃 也。 未得通,困者力之窮, 義 亦難也,同爲難 有未足。 蹇之爲難,如乾之爲健,若易之 也。 蹇有險阻之義。 「險在前 而義 則異。 也」,坎險 蹇 乃 險 屯亦 屯者 阻 在 艱

見險而能止,知矣哉!

前,下止而不得進,故爲蹇。

得也。善,故諸爻除五與二外,皆以往爲失,來爲善,故諸爻除五與二外,皆以往爲失,來爲其能止爲知也。方蹇難之時,唯能止爲以卦才言處蹇之道也。上險而下止,「見以卦才言處蹇之道也。上險而下止,「見

蹇利西南」,往得中也。「不利東北」,其道

窮

位 蹇之時,利於處平易。 東北艮方爲險阻。 一是往 而 得平易之地,故爲 九上 西南坤方爲順易, 居 五 利 而 也。 得 中 正之 五. 居

> 極也。 矣,故 義也。 往而 坎險之中 成坎,故但取往 不利東北。「其 方蹇而又止危險之地,則 而謂之平易者,蓋 而得 道 窮 中,不取成 也」,謂 卦本坤 蹇 蹇之 益 坎之 由 甚 五

「利見大人」,往有功也。當位「貞吉」,以正

邦也。

如此 初六雖以陰 除初外,餘皆當正位,故爲貞 矣,往而有功也。 於見大人」也。大人當位,則成濟蹇之功 蹇難之時,非聖賢不能濟天下之蹇,故「利 正之道。夫子又取卦才而言,蹇之諸爻, 正道 正其邦 居陽 可以濟於蹇矣。 而 能濟天下之蹇者,唯大 處 下,亦陰之正也。 正 而吉也。 以

蹇之時用大矣哉!

矣哉」. 天下之難,豈易平也? 非聖賢處蹇之時,濟蹇之道,其用至大,故云「大

行,從平易之道,由至正之理,乃 不 能 , 其 用 可 謂 大 矣。 順 時 而 處 蹇之時 量 險 而

日 子修德以俟時而已。 之,无歉於心則 用 而 反求諸己。」故遇艱蹇,必自省於身,有失 己而益自修。孟子 以「反身修德」。 下險阻,故爲蹇也。 山 一之峻 也。 致之乎? Щ 上有水,蹇,君子以反身修德 阻 ,上復有水,坎水爲 是反 加勉,乃自修其德 君子之遇 身也。 ·曰:「行有不得者,皆 君子觀蹇難之象,而 製 有 阻 險陷之象,上 所未善則 ,必反求 也。 君 改 諸

初六,往蹇,來譽。

來。 來者 當蹇之時,以陰柔无 六居蹇之初,往進則益人於蹇,「往蹇」也。 1,對往 止而 不進,是有見幾知時之美,來 之辭。 上 進 援 則 而進,其蹇 爲往 不 進 可 則 知 則 爲

然其

才不足以

濟蹇也,小可濟,則聖人當

有 譽 也

象 曰:「往蹇來譽」,宜待也。

在蹇 蹇往 見幾 碩 方蹇之初,進則益蹇,時之未可進也,故宜 義 加 而止以待時,可行而後行也。 而往,則蹇也,蹇終則變矣,故上已有 善來,然則无出蹇之義乎? 諸 爻皆 日

六二,王臣蹇蹇,匪躬之故。 使不勝,志義可 於蹇難之中,其蹇蹇者非爲身之故也。 **豈易勝其任**? 故爲蹇於蹇也。 大蹇之中,致力於蹇難之時,其艱蹇至甚, 任,故謂之王臣。 與五相應,是中正之人爲中 二以中正之德,居艮體,止於中正 嘉 所以蹇於蹇也。 二雖中正,以 放稱 雖上下同德,而 其忠蓋不爲己也 正之君 陰柔之才, 志在濟君 五 者也。 一方在 所

盛稱以爲勸矣。

象曰:「王臣蹇蹇」,終无尤也。

功,然終无過尤也。聖人取其志義,而謂雖艱戹於蹇時,然其志在濟君難,雖未成

九三,往蹇,來反。

其无尤,所以勸忠蓋也。

可以求安,故以來爲反,猶《春秋》之言三,在蹇爲得其所也。處蹇而得下之心,立,故皆附於九三之陽而喜愛之。九之處內,在下之陰也。方蹇之時,陰柔不能自象曰:「往蹇來反」,内喜之也。

「歸」也。

六四,往蹇,來連。

合,得處蹇之道也。 性則益入於坎險之深,「往蹇」也。 能與衆 也,是與下同志,衆所從附也,故曰「來 與三相比相親者也,二與初同類相與者 與三相比相親者也,二與初同類相與者 四居上位,而與在下者同有得位之正,又 之時,同處艱戹者,其志不謀而同也。又 之時,同處艱戹者,其志不謀而同也。又

象曰:「往蹇來連」,當位實也。

濟?當位不曰正而曰實,上下之交主於者,當位以實也。處蹇難,非誠實何以高。為得其實,初以陰居下,亦其實也。當所各得其實,初以陰居下,亦其實也。當所是以得衆矣。又以陰居陰,爲得其四當蹇之時,居上位,不往而來,與下同四當蹇之時,居上位,不往而來,與下同

誠 實,用各有其所也。

九五,大蹇,朋來。 禪之孔 是 大蹇之 於難也。 爲 能 也。 也。 君,得剛明之臣而能濟大難者則有矣,劉 自古聖王濟天下之蹇,未有不由賢聖之臣 欲以陰柔之助,濟天下之難,非所能 未足以濟蹇也。 助豈小也? 時,而二在下,以中正相應,是其朋助之來 五居君位 也。 之助者、湯、武得伊、吕是也。中常之 濟天下之蹇也。 方天下之蹇,而得中正之臣 當蹇而又在險中,亦爲大蹇。 雖賢明之君,苟无其臣,則 明,唐肅 中,非得剛陽中正之臣 故凡六居五、九居二者,則多由 ,而在蹇難之中,是天下之大 得朋來而无吉,何也? 宗之郭 以剛陽中正之君,而方在 二之中正,固有 子儀,德宗之李 相 相 輔之,不 不能 大蹇之 助矣, ·輔,其 日 也。 晟 濟 蹇

> 則贊助之而已,故不能成大功也。 賢於君,則 助 二,則其功多不足,屯、否之類是也。 而 有功,蒙、泰之類是也。 輔 君以 君所 不能,臣不及君, 九居五、六居 蓋臣

象曰:「大蹇朋來」,以中節也 應助,是以其中正之節也。上下中正而 朋者,其朋 濟者,臣之才不足也。 中正,雖大蹇之時,不失其守,蹇於蹇以 才不足以濟者,豈少乎? 類 也。五有中正之德,而 自古守節秉義,而 漢李固、王允,

二亦

晉周顗、王導之徒是也。

上六,往蹇,來碩,吉,利見大人。 以碩 有出蹇之道。 也。不往 裕之稱。 六以陰柔居蹇之極,冒極險而往,所 也。 蹇之道,戹塞窮蹙。 而來,從五求三,得剛陽之助,是 來則寬大,其蹇紓 上六以陰柔,故不得出,得 矣。 碩,大也,寬 蹇之極, 以蹇

弗

相

則能 得 義。 也? 剛陽之助, 五 德之人,則能濟於蹇,故爲利也。各爻取義 助,故无能濟蹇之義。在上六,蹇極 曰:在五不言,以其居坎險之中,无剛陽之 不言其濟蹇之功,而上六利見之,何也? 舒則爲 五 有濟於蹇也。 ,剛陽中正,而居君位,大人 利見大人」,蹇極之時,見大德之人 吉矣。 可以 非 紓 蹇 大人謂 剛陽 而 른 中正 五,以相 在蹇 ,豈能 極之時 也。 出 比發此 而 乎蹇 見大 在

人」,以從貴也。 象曰:「往蹇來碩」,志在内也。「利見大寒曰,唯上處蹇極而得寬裕,乃爲吉也。

寇也。

諸爻皆不言吉,上獨言吉者,諸爻皆

不同,如屯初九之志正,而於六二則目之爲

得正,各有所善,然皆未能出於蹇,故未足

有 上六應三而從 助,是以 碩 而 五、「志在 吉 也 内 六 也。 以陰 柔 蹇既 當蹇之 極 而

所以云「從貴」,恐人不知大人爲指五也。求自濟,故「利見大人」,謂從九五之貴也。極,密近剛陽中正之君,自然其志從附,以

解,利 險也 下。 爲雨,雷雨之作,蓋陰陽交感,和暢而 散,解者散也,所以次蹇也。爲卦,震上 故受之以解。」物无終難 散,故爲解。 解、《序卦》:「蹇者難也,物不可以終 西南,无所往,其來復吉,有攸往, 一、故爲 震,動也。 患難解散之象。 解者,天下患難 坎,險也。 之理,難 動於險外,出 又震爲雷 解散之時 極 則 也。 緩 坎 坎 必

夙吉。

是,則人心懷而安之,故利 之難方解,人始 西南,坤方。 急治之,當濟 以 坤之體,廣大 寬大簡易,乃 離 艱苦,不 於 口 平易。 其 復 西 宜 以 南 當天 也 也 煩 书 嚴 下 如 湯

復盛; 已,故 下,亂 也,謂 夙 辭。 亂 除 之乃吉也。 事矣,是无 當解之事也。 已解散,无所爲也。 吉,有攸往,夙吉。」「无所往」, 也,既安定,則爲 有攸往,夙吉」,謂尚有當解之事 則吉也 ,而後禍患生。 商 ,明法度,進復先代明王之治,是「來復 桀 自古聖 政,皆從寬易 之 既 不 反正理 事之復生者,不早爲,則將漸大,故 虐 能 除 所往 則 成善治,蓋 面 當解 王 夫天下國家,必紀綱法 以 也,天下之吉也。 不復 救 也。 寬 而 可久可繼之治。 難 聖人既解其難而安平无 也。 治 未盡者,不早去,則 有爲,姑隨 定亂,其始未暇 「有攸往」,謂 則當修復治道 ; 不 「无 武 , 知 王 來復 所 誅 謂天下之難 往 紂 時 其,發 丁,其 之義 之暴 ,則早爲 自 維 尚 一,正紀 漢 持 來 遽 度 有 也。 語 將 復 而 以 爲 廢 所 而

> 彖 坎險,震動 日 解 險 險 以 動 以 動 動 而 也 免乎險,解 不 險則非 難,不

也 ,故爲解

則不能出難

動

而

出於險外,是免乎險難

動

解,利西南」,往 得 衆 也。

解難之道,利在廣大平易, 以 寬易而 往

濟

「其來復吉」,乃得中也 解 ,則得衆心之歸 也。

然後來復先王之治,乃得 之事,未能 不云「无所往」,省文爾。 成治道也,必 待 中 救亂 解 道 謂 難 除難,一 无 合宜也 所 往, 時

「有攸往,夙吉」,往有 有所爲則夙吉也 害深 矣。 早則往 功也。 而

有

功,

緩

則惡

滋

而

天 地 解 而 雷 雨 作,雷雨作而 百果草木皆甲

拆。● 解之時大矣哉!

之大。 既 雷雨,雷雨作 合德也。 民,至於昆蟲草木,乃順解之時,與天 之功,由解 王者法天道,行寬宥,施 明處解之道,復言天地之解,以 天地之氣開散,交感而 ൬ 成, 而萬物皆生發甲拆。 故贊 解之時大矣 恩惠,養 和暢 見 育 哉 天 則 解 地 兆 地 成 時 Ī

曰: 雷雨作,解,君子以赦過宥罪。 也。 天地 宥,寬之。 之象,體其發育,則施恩仁,體其解散 則非義也,故寬之而已。君子觀雷雨作解 與 解 散 明 而 過 兩 成雷雨,故 失 而 作 則赦之可也,罪惡而赦之, 離 語 不同。 「雷雨作」而爲解 赦,釋之。 ";則

初六,●无咎。

行寬釋也。

六居解初,患難既解之時,以柔居剛,以陰

以休息之。爻之辭寡,所以示意。 處得宜,則爲无咎矣。 得剛柔之宜。 應陽,柔而能剛之義。 患難既 解,安 既无患 方 解 之 寧 初 難 无 宜 前 事 自 唯 自 處

爲得其宜。難既解而處之剛柔初四相應,是剛柔相際接也。剛象曰:剛柔之際,義无咎也。

得

宜,其

柔

相

義无咎也」。

其有間而害正也。六五以陰柔居尊位,其九二,即明足以照之,威足以懼之,剛足以斷上,則明足以照之,威足以懼之,剛足以斷上,則明足以照之,威足以懼之,剛足以斷之,故小人不敢用其情,然尤常存警戒,慮

- 「拆」、涂刻本作「坼」。
- 「六」,原誤作「九」,據卦象改。

直 明 无由行矣,桓敬之不去武三思是也。 而吉也。 田之獲狐也,獲之則得中直之道,乃貞正 害之事。狐者,邪媚之獸。三狐指卦之三 初 陰,時之小人也。 則可以正君心而行其剛中之道。 也。群邪不去,君心一人,則中直 ,其變尚易。 近之,則移其心矣。 ,其威易犯,其斷不果而易惑,小人 黄,中色。矢,直物。黄矢謂 二既當用 獲謂能 况 ,必須能去小人, 變化除去之,如 難 方 解 田者,去 ൬ 治之 之道 中

其中直之道得行,乃正而吉也。 所謂貞吉者,得其中道也。除去邪惡,使象曰:「九二貞吉」,得中道也。

奪之至。雖使所爲得正,亦可鄙吝也。小在下以負荷,而且乘車,非其據也,必致寇六三陰柔,居下之上,處非其位,猶小人宜六三,負且乘,致寇至,貞吝。

誰咎也? 象曰:「負且乘」,亦可醜也。 也。 何 ? 非在 人而 處下之上,猶小人宜負而反乘,當致寇奪 是化爲君子矣。三陰柔小人,宜在下而 難解之時,而小人竊位,復致寇矣。 上之物,終可吝也。 竊盛位,雖勉爲正事,而氣質卑下,本 曰: 大正非陰柔所能也,若能之, 若能大正則 自我致戎,又 則 如 反

也,故滿假而陵慢其上,侵暴其下,盜則乘 者,小人之事,乘者,君子之器。以小人 寇之道,謂:「作《易》者,其知盗 取,將誰咎乎? 其據,德不 而奪之。小人而居君子之位,非其所 而乘君子之器,非其所能安也,故盗 者乘釁而至,苟无釁隙,則盜安能 負荷之人,而且乘載,爲可醜惡 .稱 其器,則 聖人又於《繫辭》明其致 寇戎之致,乃己 也。 犯? 乎!」盗 乘 處 堪 非

是招盗使奪之也,皆自取之之謂也。教誨淫者使暴之也。小人而乘君子之器,乎盗,使取之也。女子而夭冶其容,●是横暴而至者也。貨財而輕慢其藏,是教誨其過惡而伐之矣。伐者,聲其罪也。盗,

九四,解而拇,朋至斯孚。

其應,故謂遠之爲解。 其應,故謂遠之爲解。 其應,故謂遠之爲解。 其應,故謂遠之爲解。 其應,故謂遠之爲解。 其之誠未至,安能得人之孚也? 初六 以之誠未至,安能得人之孚也? ,則賢人 以之誠未至,安能得人之孚也? ,則賢人 以之誠未至,以爲應。拇,在下而 以內,則君子之黨進, 以內,則君子之黨進, 以內,則君子之黨進, 以內,則對,在下而 以內,以內,則賢人

象曰:「解而拇」,未當位也。

小人,則其失正必矣,故戒必解其拇,然後四雖陽剛,然居陰,於正疑不足,若復親比

至也。
至也。
至也。
至也。

文,而小人容於其間,是與君子之誠未

於來君子,以其處未當位也。解者,本合

六五,君子維有解吉,有孚于小人。 六五居尊位,爲解之主。人君之解也,以 君子通言之。君子所親比者,必君子也, 理者,世云見驗也。可驗之於小人。小人 乎者,世云見驗也。可驗之於小人。小人 子黨去,則是君子能有解也。小人去,則 之黨去,則是君子能有解也。小人去,則 之黨去,則是君子能有解也。小人去,則 君子自進,正道自行,天下不足治也。 教曰:君子有解,小人退也。

❶ 「治」,原作「治」,據四庫本《伊川易傳》改。

則君子之道行,是以吉也。

也 獲之。 解? 之時 一六,公用射隼于高墉之上,獲之无不利 也。」鷙 圃 子藏器於身,待時 所不利? 夫子於《繫辭》復伸其義曰: 上 見防限之嚴,而未去者,上解之極也。 墉,墙内外之限也。害若在内,則是未 終而言也。 上六尊高之地,而非君位,故曰公,但據解 極之時,而獨有未解者,乃害之堅强者也。 隼 而 不括,是以出而 居解極,解道已至,器已成也,故能射而 者禽也,弓矢者器也,射之者 事之當解與己解之之道至者,時也。 發,則安能獲之? 也,若出墉外,則是无害矣,復何所 故 害之物 既獲之,則天下之患,解已盡矣,何 在墉上,離乎内 隼,鷙害之物,象爲害之小人。 在 墉上,苟无其器,與不 而動,何不利之有? 有獲,語 所以解之之道,器 而未去也。 成器 人也。 而 云高 動 者 君 待 動 解 解

> 有爲 以時 夫行 結謂 如 是 而无成功,或颠 而 而 一身至於天下之事,苟无其器,與不 阻礙。聖人於此發明藏器待時之義。 動,小則 動,故无括結,發而 括塞,大則喪敗。 覆者,皆由 无不 是 利矣。括 也。 自古喜

至解終而未解者,悖亂之大者也。象曰:「公用射隼」,以解悖也。

射之,

艮兑上下

所以

解之也,解則天下平矣。

皆上應,是説以奉上,亦損下益上之義。 義。 物,是損下而益上 高,澤體深,下深則上益 損所以 受之以損。」縱緩則 損、《序卦 又澤在 繼 》:「解者緩也、緩必 解 山下 也。爲卦,艮上兑下。 ,其氣 也。 必 有 又下爲兑説,三爻 上通 高,爲損 所失,失 潤 有 及草 下益 則 所 失,故 山 損 木百 上之 也, 體

則損也。 柔 者,損下益上之義,益則反是 增上之高,則危墜至矣,豈非損乎? 下 艮,自上九之變也。 三本剛 又下兑之成兑,由六三之變也,上艮之成 本,則上下安固矣,豈非益乎? 上者施其澤以及下則益也,取其下以自 則爲益,取下而益於上則爲損。 而成剛,亦損下益上之義。 損上而益於 譬諸壘土,損於上以培厚其基 而 成柔,上本 取於 在 下以 故損 厚

損,有孚,元吉,无咎,可貞,利有攸往。 理也。 之道,不 有孚也。 損,或過,或不及,或不常,皆不合正理,非 差,可貞固常行,而利有所往也。 之道也。 損,减損也。 損而 可行也。 損之道,必有孚誠,謂至 非有孚,則无吉而有咎,非可貞 順理,則大善 凡損 抑其過,以就義理,皆損 而 吉,所 人之所 誠 損 无過 順 於

曷之用? 二簋可用享。

爲害矣。 凡人欲之過者,皆本於奉養,其流之遠,則 心。 聖人以寧儉爲禮之本,故爲損 理而已。 於末者,人欲也。 酷殘忍,本於刑罰,窮兵黷武,本於征討。 墙,本於宫室,酒 也。天下之害,无不由末之勝也。峻宇雕 之約,可用享祭,言在乎誠 以享祀言之。享祀之禮,其文 損者,損過而 也,故云「曷之用? 誠敬爲本。多儀備物,所以將飾其誠 飾過其誠,則爲僞矣。損飾所以 先王制其本者,天理也,後人流 就 中,損浮末而就 損之義,損人欲以復天 池 一簋 肉 林, 可用 本 而 於飲食 已,誠 享」。 最 發 本 明 繁,然以 其 實 爲 敬之 存 義, 也。 本 簋 誠

損之所以爲損者,以損於下而益於上也。彖曰:損,損下益上,其道上行。

八八三

八八四四

損 而 以 益 取 損而 道之盡善也 爲高者,豈可謂之益乎? 下 下 「有孚,元吉,无咎,可貞,利 則爲 以 以 益 益 至誠,則 , 損 故 下 云 而 有此「元吉」以下四者, 其 益 道 F 上 則爲損。 行 有攸往」。 夫 損 損 基本 上 而

其序 簋 必有嚴 然者。无本不立,无文不行。父子主恩, 有 後人不達,遂以爲文飾當盡去,故詳言之。 簡 夫子特釋「曷之用? 本必 直 可以享也。 ,非物采則无别。 禮 謂 讓 有 順之體,君臣主敬,必有承 當損 存 末,有實必有文,天下萬事,无不 乎内 去浮飾 厚本損末之謂 ',待威 二簋可用字」,卦 儀 文之與實,相 曰何 而 後行, 所 也。 用 哉? 夫子恐 尊 接之 卑有 須 辭 而

> 也。 不當時而損益之,則非也 不足,損益皆損 甚,則非 質,用之當有時,非 夫子恐人之泥 **簋足以** 實,乃當損 不 可 謂文飾 缺 、薦其 也。 也 之時 未過 及夫 滅矣。 損 言也,故 剛 也。 剛 ௱ 文之勝 益 益 謂當 其 柔,有 損之,與損之至於 故云曷 柔 所用 復 也 務 明之日 末 時 圃 實 所 必 之 剛 用之,不 圃 順 流 用 爲過,柔爲 損 時 哉? 二簋之 遠 飾 圃 也 過 可 喪

損益盈虚,與時偕行。

「與時偕行」也。 損之,不足者益之,虧者盈之,實者虚之,或損或益,或盈或虚,唯隨時而已。過者

己之道所當損者,唯忿與欲,故以懲戒其下之象。君子觀損之象,以損於己,在修山下有澤,氣通上潤,與深下以增高,皆損象曰:山下有澤,損。君子以懲忿窒欲。

忿怒,窒塞其 (意欲 也

初 九,已事過 己 剛 乃无咎也。若享其成功之美,非損己益上 益於上者,事既已,則速去之,不居其功, 也。下之益上,當損己而不自以爲功。 初者也,故聽於初。初當酌度其宜,而 也,於爲下之道爲有咎矣。四之陰柔,賴 損之義,損剛 應於四,四以陰柔居上位,賴初之益 以益之,過與不及,皆不可 往,无咎,酌損之。 益柔,損下益上也。初以 也。 所 者 損 陽

象曰:「已事遄往」,尚合志也。

與上合志也。 尚,上也,時之所崇用爲尚。 四賴於初,初益於四,與上 初之所尚者,

合志也

九二,利貞,征凶,弗損益之。 六五陰柔之君,以 二以剛中,當損剛之時,居柔 柔説應上則失其剛中之 而説 體 Ŀ

應

者,有雖无邪心,而唯知竭力順上爲忠者, 蓋不知「弗損益之」之義也 足以損之而已,非損己而益上也。 中,則失其 德,故戒 乃「益之」也。若失其剛貞,而 「弗損益之」,不自損其剛貞,則能益 所 (貞正 利 在 |貞正 而 凶矣,守其 也。 征 ,行也。 中乃 用柔説,適 世之愚 其上, 貞也。 乎

象曰:「九二,利貞」,中以爲志也。

者? 中,則有益於上矣。 中重於正,中則正矣,正不必中也。 以中爲志也。志存乎中,則自正矣。 若守其中德,何有不善? 九居二非正也、處說非剛也、而得中爲善。 豈有中而有過者? 二所謂利貞, 豈有 中而 大率 不正

六三,三人行則損一人,一人行則得其友。 謂 損者,損有餘 下三陽,上三陰。三陽同行 也,益者,益不足也。三人, ,則損九三

八八六

《繋解》 唯 猶 也。」 則 男女構 而當 而 四 相 以 陽,四五二陰,同德 損,但言其減一耳。上與三雖本相 二者,一 二爻升降 精 精 密 損 則 相 行 與,則其志專,皆爲得其友也。 三雖 益 損 絪 損 比 則 醇 上 》盡其義曰: 則生萬物之化醇。 人, 車 也 損 精,萬物化生。《易》曰:『三人行 矣,此損 緼,交密之狀。 一人,一人則得其友,蓋天下 與二相對待,生生之本也,三則餘 然 而 一人」也。 異 ,所以能生也。 陰同 男女精氣交構,則 體 人行 卦皆成,兩相 圃 行, 益之大義也。 應上,非同 「天地絪縕,萬物化醇 相比,三與上應,皆 則 則 上以 損 得 天地之氣, E 醇謂 其友。』言致 柔易剛 與也。 六以 行 化 陰 醲 夫子又 者 爲 厚,醲 生 也。 初二二 而 陽, 萬 應, 相 謂 無 豈 厚 交 於 與 兩 由 之 不

此也。 天地之間,當損益之,明且大者莫過也。 天地之間,當損益之,明且大者莫過可二也? ● 故 三則 當損,言 專致乎 一

一人行而得一人,乃得象曰:一人行而得一人,乃以

六四,損其疾,使遄,有喜,无咎。 咎。 也。 其不 善也 四 過,爲可喜也 而 則疑所與矣,理當損去其一人,損其餘也。 以陰柔居上,與初之剛陽相應。 應剛,能自損以從剛陽也,損不善以 人之損過,唯 善也,故曰「損其疾」,疾謂 損於不善,唯使之遄速,則 初之益 四,損 患不速,速則不至於深 其柔 得友也。 而益之以 若三人行, 有 疾 喜 病 在 剛, 而 不 損 從 善 損 无 時

象曰:「損其疾」,亦可喜也。

「二」,涂刻本作「三」。

0

清美所疾,固可喜也。云「亦」,發語辭。

六五於損時,以中順居尊位,虚其中以應六五於損時,以中順居尊位,虚其中以應在下之賢也。能如是,天下孰不損己自盡在下之賢也。能如是,天下孰不損己自盡矣。十,衆辭。龜者,决是非吉凶之物。矣。十,衆辭。龜者,决是非吉凶之物。衆人之公論,必合正理,雖龜筴不能違也。衆人之公論,必合正理,雖龜筴不能違也。衆人之公論,必合正理,雖龜筴不能違也。衆人之公論,必合正理,雖龜筴不能違也。

象曰:「六五」「元吉」,自上祐也。

地之理,故自上天降之福祐也。

所以得元吉者,以其能盡衆人之見,合天

人也,行損道以損於人也。損己從人,徙凡損之義有三.損己從人也,自損以益於无家。

歸服,无家,謂无有遠近内外之限也。 外也,故曰「得臣无家」。 益之,天下孰不服從? 之。 於義 有所往,往則有益矣。在上能不損其下 下,則无咎而得其正,且吉也。如是,則宜 大矣。若不行其損,變而以剛陽之道益於 九居損之終,損極而當變者也。 上,若用剛以損削於下,非爲上之道,其 下之當損者也。 取自損以益人,損時之用,行損道以損天 損於人,行其 四五二爻,取損 也 自損益人,及於物也,行損 義 上九則取不行其損爲義 也: 各因 己從 從服之衆,无有 得臣,謂 其時,取大者言 。以剛 下體三爻, 得人 道以 陽居 心 内 咎 而

象曰:「弗損益之」,大得志也。

也。君子之志,唯在益於人而已。居上不損下而反益之,是君子大得行其志

異震上下

卦益,損上益下,所以爲益,此以義言也。 損也, 陰變而爲陽者, 益也。上卦損而下 震二卦,皆由下變而成。 怒,兩相助益,所以爲益,此以象言也。 風二物,相益者也,風烈則雷迅,雷激則 下厚則上安,故益下爲益 然,益所以繼損也。爲卦,異上震下。雷 益。」盛衰損益 益、《序卦》:「損 如 循環,損 而 不已必益,故受之以 陽變而爲陰者, 極必益,理之自 巽 風

益,利有攸往,利涉大川

益之道,可以濟險難,「利涉大川」也 益者,益於天下之道也,故「利有攸往」。

其道大光 以卦義與卦才言也。卦之爲益,以其「損

彖曰:益,損上益

下,民説无疆,自上下下,

自上下下之義。 道之大光顯也。 疆,謂无窮極也。 上益下」也。 損於 陽下居初,陰上居四,爲 自上而降己以下下,其 上 而 益 下,則 民説之无

.利有攸往」,中正有慶。

是以中正之道益天下,天下受其福慶也。 五以剛陽中正居尊位,二復以中正應之,

利涉大川」,木道乃行。

「木」。或以爲上巽下震,故云「木道」,非也。 濟艱險,乃益道大行之時也。「益」誤作 危險難,則所益至大,故「利涉大川」也。 益之爲道,於平常无事之際,其益猶小,當艱 於

益,動而巽,日進无疆 進,廣大无有疆限也。 也。爲益之道,其動巽順於理,則 又以二體言卦才。下動而上異,「動而異」

能成大益也?

動

而不

順於理,豈

其益

日

天施地生,其益无方。

極也。天地之益萬物,豈有窮際乎?也。有方所,則有限量。无方,謂廣大无窮育萬物,各正性命,其益可謂无方矣。方,所下也。天道資始,地道生物,「天施地生」,化以天地之功,言益道之大,聖人體之以益天以天地之功,言

凡益之道,與時偕行。

行」也。下之道,應時順理,與天地合,「與時偕下之道,應時順理,與天地合,「與時偕天地之益无窮者,理而已矣。聖人利益天

則无過矣。益於人者,无大於是。 善能遷,則可以盡天下之善,有過能改, 之道,无若「見善則遷,有過則改」也。見 之,无若「見善則遷,有過則改」也。見 國烈則雷迅,雷激則風怒,二物相益者也。

初九,利用爲大作,元吉无咎。

初九,震動之主,剛陽之盛也。居益之時, 其才足以益物,雖居至下,而上有六四之 大臣應於己。四,巽順之主,上能巽於君, 下能順於賢才也。在下者不能有爲也,得 在上者應從之,則宜以其道輔於上,作大 在上者應從之,則宜以其道輔於上,作大 在上者應從之,則宜以其道輔於上,作大 是之用,以行其志,必須所爲大善而吉,則 无過咎。不能元吉,則不唯在己有咎,乃 累乎上,爲上之咎也。在至下而當大任, 小善不足以稱也,故必元吉,然後得无咎。 外善不足以稱也,故必元吉,然後得无咎。 外善不足以稱也,故必元吉,然後得无咎。

下皆有咎也。在下者本不當處厚事,厚事,重大之事也。在下者本不當處厚事,厚事,並於濟大事

用享于帝,吉。六二,或益之十朋之龜,弗克違,永貞吉,王

十朋之則元吉者,蓋居尊自損,應下之剛 質本陰柔,故戒在常永貞固,則吉也。 善。」夫滿則不受,虚則來物,理自然也。 孰不願告而益之? 孟子曰:「夫苟好善, 至善,故元吉也。六二虚中求益,亦有剛 益之道,非永貞則安能守也? 損之六五 二,中正虚中,能得衆人之益者也,然而 能違也。「永貞吉」,就六二之才而言。 者,占吉凶、辨是非之物,言其至是,龜不 者,衆辭。 故或有可益之事,則衆朋助而益之。「十」 則四海 中正之道,虚其中以求益 六二處中正而體柔順,有虛中之象。 人處 柔 圃 居剛,柔爲虚受,剛 之内,皆將 衆人所是,理之至當也。「龜」 輕千里而 ,而能順從天下, 爲固守,求益之 來,告之以 求

局之應,而以柔居柔,疑益之未固也,故戒陽之應,而以柔居柔,疑益之未固也,故戒陽之應,而以柔居柔,疑益之未固也,故戒

用」也。

象曰:「或益之」,自外來也。

在其中矣。 在其中矣。 在其中矣。 在其中矣。 在其中矣。 在其中矣。 在其中矣。 在其中矣。 在其中矣。 在其中矣。 在其中,能受天下之善而固守,則有

用圭。六三,益之,用凶事无咎,有孚,中行,告公

爲益者也。果於爲益,用之凶事則无咎。居陽應剛,處動之極,居民上而剛决,果於三居下體之上,在民上者也,乃守令也。

義? 處 有孚中行。 乎 則 玉 圭 不可 不 信與之矣。專爲而无爲上愛民之至誠, 疾 患 當 凶 或曰: 三乃陰柔,何得反以 誠,而所爲合於中道,則誠意通於上,而 力庇其民,故无咎 一,所以 能 能 而 承 可 難 事 以 雖 也; 通 使上信之,是猶告公上用圭 使, 也。 非 禀 謂 剛 曰 : 當 於 患 達於上矣。 常之事 也 通達 所以 X 雖有 圭者,通信之物。 難 三,質 上,安得自任,擅爲益乎? 難 非常之事。 又三陰爻而 應 誠信也。 申信 以以 `,則可量宜應卒,奮不顧身, 誠意 剛 雖 乃 義 也 也。 在下 本 而 志 在 陰 在乎剛 可爲,然必 有誠 所爲不合中行, 下專自任,上必忌 凡 然 而 三居下之上, 不 祭祀 有爲之道,固 中 禮云:大夫 其 孚而 剛果 ,故發此 也 居 朝 陽 玉 得 調用 任 有 居 中道 也 乃 事 其 唯於 動 在 丁,其 執 之 自 爲 當 圭 Ŀ 平 亦 固 下

> 何 極 ? 剛 果 易》以所勝 於 行 也 爲 以 義,故不 此 行 益 論 其本質 非 剛 果 也 侕

象曰:益用凶事,固有之也。

无咎,若平時,則不 急,則可也。 上,乃專任其事,唯救民之凶災,拯時 也」,謂專固 六三益之獨 可 自 乃處急難變故之權宜 用 任其 於 可 事 凶事者 也 也。 居下 以 其 當 禀 固 故故 之 承 有 艱 得 於 之

六四,中行告公從,利用爲依,遷國。

之體 國爲 以益 是不足於中 輔上 於上也。 四 也 「當益時,處近君之位,居得其正 一,而下 於君 上 依,依附 ,非有剛特之操,故「利用爲依」。 |依剛中 唯處不得其中, 上、告於上而獲信從矣。 順應 也。 於 之君 上 於初之剛 故云: 也。 而 致其益,下 若行 遷 而 陽 國。 得 所應又不中 ,如是可 中 順 順 道 一,以 副 下 以柔巽 則 陽之 柔巽 而 益 遷 可

八九二

才 不安其居則遷,遷國者,順下而 以 其 事 利 用 如 是也。 自 古 動 國 也 邑, 民

象曰:「告公從」,以益志也。
即之曰:告公而獲從者,告之以益天下之志也。志苟在於益天下,上必信而從之。事君者,不患上之不從,患其志之不誠也。五,剛陽中正,居尊位,又得六二之中正相應,以行其益,何所不利?以得六二之中正相應,以行其益,何所不利?以陽實在中,有孚之象也。以九五之德、之才、之位,而有孚之象也。以九五之德、之才、之位,而有孚之象也。以九五之德、之才、之位,而有孚之象也。以为五之德、之才、之位,而有孚之象也。以为五之德、之才、之位,而有孚之象也。以为五之德、之才、之位,而有孚之象也。以为五之德、之才、之位,而有孚之象也。以为五之德、之才、之位,而有孚之象也。以为五之德、之才、之位,而有孚之。以为其至誠,故武天下,天下之人,无不德」,人君至誠,益於天下,天下之人,无不。

上九,莫益之,或擊之,立心勿恒,凶。 速改也 擊之矣。「立心勿恒凶」,聖人戒人存心不 也,故云「勿問之矣」。天下至誠懷吾德以 可專利,云「勿恒」,如是,凶之道也,所當 益之極,衆人所共惡,故无益之者,而 不奪不饜。聖賢之深戒也。 曰:「放於利而行,多怨。」孟子謂先利 理,求之極,則侵奪而致仇怨。故夫子 益己,其害大矣。欲之甚,則昏蔽 善自益者也。利者,衆人所同欲也。 益之極,求益之甚者也,所應者陰,非 上居无位之地,非行益於人者也,以 爲惠,是其道大行,人君之志得矣。 九以 剛 而 專欲 忘 剛 而 求 則 取 處

來也。

來也。
「莫益之」,偏辭也。「或擊之」,自外

危 益之極,擊之者自外而至,是也。《繫辭》 道,則人亦益之,何爲擊之乎? 既求益於 者,非其偏己之辭也。苟不偏己,合於公 於人,人亦欲與之。若切於好利,蔽於自 苟公其心,不失其正理,則與衆同利,无侵 定其交而後求,君子脩此三者,故全也。 曰:「君子安其身而後動,易其心而後語, 者「自外來也」。 莫肯益之,而有擊奪之者矣。云「莫益之」 私,求自益以損於人,則人亦與之力争,故 理者,天下之至公,利者,衆人所同欲。 人,至於甚極,則人皆惡而欲攻之,故擊之 以 六二中正虚己,益之者自外而至,是 苟爲不善,則千里之外違之。 上九求 動,則民不 與也; 人爲善,則千里之外應 懼以語,則民不應

三 三 **.**

小人方盛之時,君子之道未勝,安能顯然

八九三

也。 甚盛 庭」。 之辭。君子之道雖長盛,而不敢忘戒備 以 之悔,是尚有危理,必有戒懼之心,則无 故至誠以命衆,使知尚有危道。 之於公朝,使人明知善惡,故 之道。今既小人衰微,君子道 E 聖人設戒之意深矣 , 决彼之甚衰, 若易而无備, 則 道决去之? 孚,信之在中,誠意也。 故含晦俟 時 云「揚 湿感,當 漸漸 號者,命衆 雖以 有 圖 消 不虞 于 顯 此 患 之 王 之 行

告自邑,不利即戎,利有攸往。 治也。 然不 敷文德是也。 道勝革之。 戎」,謂不宜尚壯武也。即,從也。從戎, 之爲寇也。 君子之治小人,以其不善也,必以己之善 可 極 以衆陽之盛,央於一陰,力固有餘 其 故聖人誅亂,必先修己,舜之 剛 戎,兵者,强武之事。 至於太過,太過乃如蒙上九 邑,私邑。「告自邑」,先自 「不利即

> 尚武 剛武,而 君子之道有未至也,故宜進 上, 陰雖微,猶有未去,是小人尚有存者, 也。「 其道益進,乃夬之善也。 利有 攸往」, 陽雖 而往 盛 也。 未 極 不尚 乎

彖曰: 和 夬,决也,剛决柔 也。健 而 説, 决

而

是健 説爲 决而和」,以二體言卦才也。 夬爲决義,五陽决上之一陰也。「健 和 而 能 説 ",决而 能和,决之至善也。 下健 而 F 而 説, 説, 兑

「揚于王庭」,柔乘五 陰而 柔雖消矣,然居 乘陽,非 理之甚。 五 一剛也 剛之上,猶 君子

孚號有厲」,其危乃光 盡誠信以命其衆,而知有危懼,則君子之 也

惡也

之,當

I 顯 揚

其罪於王朝大庭,使衆

知

善

,勢既

足

以

去

爲乘

陵之象。

道乃无虞而光大也。

當先自治,不宜專尚剛武。「即戎」,則「告自邑,不利即戎」,所尚乃窮也。

尚乃至窮極矣。 夬之時,「所尚」謂剛

武也。

「利有攸往」,剛長乃終也。

長之終也。去,則君子之道純一而无害之者矣,乃剛法,則君子之道純一而无害之者矣,乃剛陽剛雖盛,長猶未終,尚有一陰,更當决

禁,有防禁,則无潰散也。王弼作「明忌」,安處其德,則約也。忌,防也,謂約立防觀其决潰之象,則以「居德則忌」,居德,謂以「施禄及下」,謂施其禄澤以及於下也。以「施禄及下」,謂施其禄澤以及於下也。象。君子觀澤决於上而注溉於下之象,則澤,水之聚也,而上於天至高之處,故爲夬

天」,「上於天」,則意不安而有决潰之勢,亦通。不云「澤在天上」,而云「澤上於

初九,壯于前趾,往不勝爲咎。云「在天上」,乃安辭也。

所

居决時,壯于前進者也。前趾,謂進行。九,陽爻而乾體,剛健在上之物,乃在下而

之戒。陰雖將盡,而己之躁動,自宜有不也。夬之時而往,往决也,故以勝負言。也。夬之時而往,往决也,故以勝負言。也。夬之時而往,行而宜,則其決爲是,往人之决於行也,行而宜,則其決爲是,往

勝之咎,不計彼也。

象曰:不勝而往,咎也。

而有咎者,皆决之過也。 矣。理不能勝,而且往,其咎可知。凡行人之行,必度其事可爲,然後决之,則无過

九二,惕號,莫夜有戎,勿恤。

八九五

恤矣。 兢惕,而 爲過剛 備也。陽長將極之時,而二處中居柔,不 夬 者 陽决陰,君子决小人之時,不可忘戒 ;能知 外嚴誠號,雖莫夜有兵戎,亦可 戒備,處夬之至善也。 内 勿 懷

象曰:「有戎勿恤」,得中道 也。

君子决小人,而得中,豈有不正也? 然非正,其爲至善,何也? 戒 莫夜有兵戎,可懼之甚也,然可勿恤 自處之善也。 既得中道,又知惕懼,且有 備 勢,學《易》之大方也 ,何事之足恤也? 九居二,雖 日: 陽决陰, 温者,以 得 知時 中,

若濡,有愠,无咎。 九三,壯于頄,有凶。 君子夬夬,獨行遇 雨

夬,无咎。」亦未安也。 頄,有凶。 爻辭差錯,安定胡公移其文曰:●「壯 獨行 遇 雨 若 當云:「壯于頄,有 濡 有愠,君子夬 于

> 断也。 N_o 處正,非必有是失也,因此義以爲教耳。 愠惡之色,如此則无過咎也。 君子處斯時,則能夬夬,謂夬其夬,果决其 小人之時,而己獨與之和,其非可 言雨者,皆謂陰陽和 則與上六陰陽和合,故云「遇雨」。 之時,己若以私應之,故不與衆同而獨行, 遇雨」,三與上六爲正應,方群陽共决一陰 剛决,「壯于頄」者也,有凶之道也。「獨行 上,雖在上而未爲最上,上有君而自任其 也,在上而未極於 又處健體之極,剛果於决者也。 咎。」夬决,尚剛健之時。三居下體之上, 獨行 雖其私與,當遠絶之,若見濡污,有 遇 雨,君子夬夬,若 上者也。 也。 君子道長,决去 三居下體 三,健體 濡 頄, 颧 有 《易》中 知。 愠 而 唯 之

⁰ 「安定」,原誤作「定安」,依文意改。

爻文所以交錯者,由有「遇雨」字,又有

「濡」字,故誤以爲連也。

象曰:「君子夬夬」,終无咎也。

决於當决,故終不至於有咎也。 牽梏於私好,由无决也。君子義之與比,

九四,臀无膚,其行次且,牽羊悔亡,聞言

不信。

也。 其悔。然既處柔,必不能也,雖使聞是言, 猶臀傷而居不能安也。 决不足,欲止則衆陽並進於下,勢不得安, 用,克己以從義 亦必不能信用也。 言若能自强,而牽挽以從群行,則可以亡 悔亡」,羊者,群行之物,牽者,挽拽之義, 剛壯,不能强進,故「其行次且」也。 「臀无膚」,居不安也。 「行次且」,進不前 次且,進難之狀。 ,唯剛明者能之。 夫過而能改,聞善而能 九四以陽居陰,剛 欲行則居柔失其 在它卦, 「牽羊

九居四,其失未至如此之甚,在夬而居柔,

其害大矣。

言而不能信者,蓋其聰聽之不明也。處柔則遷,失其正性,豈復有明也? 故聞故不能强進,「其行次且」。剛然後能明,九處陰位,不當也。以陽居柔,失其剛决,

九五,莧陸夬夬,中行无咎。

八九八

象曰:「中行无咎」,中未光也。也。感陰多之物,莧陸爲易斷,故取爲象。

此,示人之意深矣。 此,示人之意深矣。 此,示人之意深矣。 此,示人之意深矣。 此,示人之意深矣。 此,示人之意深矣。 此,示人之意深矣。 是,可以无咎,然於中道,未得爲光大正之義,可以无咎,然於中道,未得爲光大正之義,可以无咎,然於中道,未得爲光大正之義,可以无咎,然於中道,未得爲光大正之義,可以无咎,然於中行爲无咎矣。象復盡此,示人之意深矣。

上六,无號,終有凶。

凶也。 必須消盡,故云无用號咷畏懼,終必有是衆君子得時,决去危極之小人也,其勢陽長將極,陰消將盡,獨一陰處窮極之地,

窮極,自然消亡,豈復能長久乎? 雖號陽剛君子之道,進而益盛,小人之道既已象曰:「无號之凶」,終不可長也。

凶也。 時也。 使之變革,乃小人之道亡也,道亡乃其 有凶,可乎? 惡,未嘗必絶之也。今直使之无號,謂 者率皆疑之。 有兩去聲字, 去聲,謂无用更加號令,非也。 以卦中有孚號惕號,欲以无號爲无號,作 咷,无以爲也,故 决去小人之道, 豈必盡誅之乎? 一平聲字,何害? 曰: 夬者,小人之道消亡之 或曰:聖人之於天下,雖大 云「終不可 長 也。 一卦中適 而讀《易》 先儒 必

以姤。 天之下者萬物也,風之行,无不經觸,乃遇 爲卦,乾上巽下。 有遇合,本合則 姤、《序卦》:「夬,决也,决必有遇,故受之 姤,遇也。」决,判也。 何遇? 以二體言之,風 姤 所 物之决判,則 以 次 行天下。 夬 也。

之象。 又一 陰始生於下,陰與陽遇 也,故

爲姤。

姤,女壯,勿用取女。

陽者,是以 從,以成家道。 姤乃方進之陰,漸壯 之正,家道敗矣。 姤雖 勿用取如是之女。 長壯也。陰長則陽消,女壯則男弱,故戒 陰始生,自是而長,漸以盛大,是女之將 不 可取 也。 取女者,欲其柔 女漸壯,則 一陰甚微,然 失男女 和 有 而 漸 敵 順

彖曰: 姤,遇也,柔遇剛 也

壯之道,所以戒也。

姤之義,遇也。卦之爲姤,以「柔遇剛 陰方生,始與陽相 遇也。 也」。

'勿用取女」,不可與長 也。

消勝於陽,不 女者、欲長 陰既生,漸長 久 可 加 與之長久也。凡女子、小 成 而 家 盛、陰盛則陽衰矣。 也。 此 漸 盛之陰,將 取

> 勿用取如是之女。 人、夷狄, 勢苟漸盛, 何可與久也? 故戒

天地相遇,品物咸章也。 陰始生於下,與陽相遇,天 地相

遇

也。

陰

則化育庶類,「品物咸章」,萬物章明也。 陽不相交遇,則萬 物 不生。「天 地 相 .遇_,

剛遇中正,天下大行也。 以卦 才言也。五與二皆以陽剛居中

之君,君臣以剛 以中正相遇也。 陽遇中正,其道可以大行 君得剛中之臣,臣遇中正

於天下矣。

姤之時義大矣哉!

則萬物不生, 君臣 **贊姤之時與姤之義至大也。** 不 相遇, 則政治不興, 天地不 相遇,

聖賢不相遇,則道 則功用不成。 姤之時 德 與義、皆甚大也。 不亨,事物不相遇,

象曰 天下有風,姤,后以施命誥四方。

八九九

與

IE.

關,育物享帝皆是也。 所爲也,財成天地之道,施命誥四方是也。 先王所以立法制建國,作樂省方,敕法閉 象也,行於天下,周徧四方,則爲姤,施發 行於地上,徧觸萬物,則爲觀,經歷觀省之 之象,以 風 通 上,與天下有風,皆爲周 命令之象也。 后」,或稱「君子」「大人」。 君子」則上下之通稱,「大人」者王公之 稱。 行 天下 施 无 其命令,周誥 所不周 諸 象或 ,爲君后者,觀 稱「后」者,后王之 稱「先 徧 四方也。 庶物之象。 稱「先王」者 王, 風行 其 或 周 稱 而 地 徧

孚蹢躅。 初六,繫于金柅,貞吉。 有攸往,見凶,羸豕

於其微 姤,陰始生而 盛 加 陰 長 未盛之時。 則 將長之卦。 陽消,小人 柅,止車之物,金爲 道 陰 長 也,制 生 則 之當 長 而

> 害君子之心,防於微則无能爲矣。 君子小人異道,小人 其中心在乎蹢躅。 戒,言陰雖甚微,不可忽也。 之,堅强之至也。 在下,可謂羸矣,然其中心常在乎消陽也。 物,故以爲况。 道吉也。 止之固也。固止使不得進,則陽剛貞正之 見凶」也。 使之進 「羸豕孚蹢 羸弱之豕,雖未能 往,則漸 止之以 蹢躅,跳躑也。 雖微弱之時,未嘗无 躅」,聖人重爲之 金柅 盛而害於陽,是 豕,陰躁之 ,而又繫之, 强猛 陰微 而

象曰:「繫于金柅」,柔道牽也

牽也。 牽者,引而 ,則不能消正道,乃貞吉也 繫之于金柅,所以止其 進 也。 陰始生 而 漸 進 進 也 柔 道 不 使 方

九二,包有魚,无咎,不利賓。

進

卦則初正應於四,在姤則以遇爲 姤 ,遇也。 二與 初密比 相 遇 者 重 也 相 在 遇 他

无膚也。

處既

不安,則當去之,而居姤之

安也,又爲二所忌惡,其居不安,若臀之

二與初既相遇,三説初而密比於二,非所九三,臀无膚,其行次且,厲无大咎。有魚。包苴之魚,義不及於賓客也。二之遇初,不可使有二於外,當如包苴之象曰:「包有魚」,義不及賓也。

固已有咎矣,知危而止,則不至於大也。 有不終迷之義。 不敢妄動,則可以无大咎也。 之狀,謂不能遽舍也。然三剛 雖不安,而其行則又次且 時,志求乎遇,一陰在下,是所 若知其不正,而 也。 非義求遇, IE 次且,進 欲 也,故 懷危 而 處巽, 難 處

促其行也。既知危而改之,故未至於大其始志在求遇於初,故其行遲遲未牽,不象曰:「其行次且」,行未牽也。

九四,包无魚,起凶。

咎也。

而失其民,所以凶也。曰:初之從二,以失德也。四之失者,不中正也。以不中正遇之時,居上位而失其下,下之離,由己之所遇,猶包之无魚,亡其所有也。四當姤所遇,猶包之无魚,亡其所有也。四當姤正應,當相遇者也,而初已遇於二矣,失其正應,當相遇者也,而初已遇於二矣,失其

生之謂。民心既離,難將作矣。 比 主、夫婦、朋友皆在焉。 不失道 當有咎,不能 而言。爲上 近 也 而下離者乎? 四 而 之 保其下,由失道也。 下離,必有凶變。 罪乎? 遇之道,君臣、民 四以下睽,故主民 티 : 在 四 起者,將 豈有 而 言 上 義

下之離,由己致之。遠民者,己遠之也,爲象曰:无魚之凶,遠民也。

上者有以使之離也

九五,以杞包瓜,含章,有隕自天。 而 而 下者,側微之賢之象也。 者,杞也。美實之在 杞,高木而 故終必有遇。夫上下之遇,由 九五,下亦无應,非有遇也,然得遇之道, 包瓜,能自降屈如此,又其内藴中正之 下求賢才,以 葉大。處 至 一高 下者,瓜也。 高體大,而 而求至下,猶以 九五尊居君位, 可 相求 美而 以 杞葉 包物 也。 居

> 者也。 屑也。 賢,未有不遇者也。 遇於漁釣,皆由是道 古人君至誠降屈,以中正之道求天下之 自天矣,猶云自天而降,言必得之也。 德,充實章美,人君如是,則 故必含蓄章美,内積至誠,則有 雖屈己求賢,若其德不 高宗感於夢寐,文王 也。 无 有 正,賢者 不 遇 所 自 隕 不 求

所謂含章,謂其含藴中正之德也。象曰:「九五含章」,中正也。

命,天理也。舍,違也。至誠中正,屈己求「有隕自天」,志不舍命也。實,則成章而有輝光。

賢,存志合於天理,所以「有隕自天」,必得

之矣。

上九,姤其角,吝无咎。

以角爲象。人之相遇,由降屈以相從,和至剛而在最上者,角也。九以剛居上,故

德充

如是,人之遠之,非他人之罪也。 順 以 誰與之?以 相接,故 能 合也。 此 求遇,固可吝也。 上九高 亢 而 由 剛 己致 己 極 則

象曰:「姤其角」,上窮吝也。

之,故无所歸咎。

以剛極居高而求遇,不亦難乎?既處窮上,剛亦極矣,是上窮而致吝也。

萃,亨,王假有廟。

王者萃聚天下之道,至於有廟,極也。群

甚明。 《涣》則先言卦才、《萃》乃先言卦義,彖辭 也,而 字,羨文也。「亨」字自在下,與《涣》不同。 故豺獺能祭,其性然也。 之報,本於人心,聖人制禮以 下之道,至於有廟,則萃道之至也。 道非一,其至大莫過於宗廟。 能致其來格。天下萃合人心,總攝衆志之 生至衆也,而 能致其 可一其歸仰,人心莫知 一誠敬,鬼神之不可度 「萃」下有「亨」 故王者萃天 成其德耳。 也,而 其 鄉

利見大人,亨,利貞。

財聚爲悖人,安得亨乎? 故利貞。以致争亂也。萃以不正,則人聚爲苟合,物聚則争,事聚則紊,非大人治之,則萃所天下之聚,必得大人以治之。人聚則亂,

用大牲吉,利有攸往。

萃者,豐亨之時也,其用宜稱,故「用大牲

古」。 當萃之時,故「利有攸往」。 天命也」。 時,而交物以厚,則是享豐富之吉也,天下 裕,天理然也。 事,貴得可爲之時,萃而後用,是以動 矣。蓋隨時之宜,順理而行,故《彖》云「順 薄,乃不享其豐美,天下莫之與,而悔吝生 莫不同其富樂矣。 鬼神,下接民 事 莫 重 夫不能有爲者,力之不足也。 物,百 於 祭, 故 若時之厚,而交物以 用莫不皆然。 以 祭享 大凡興工立 而 言。 當萃之 而 上 交 有

順説 説而下順,爲上以 萃之義,聚 此故能 心,下説上之政令,而順從於上。既 ,又陽剛處中正之位,而下有應助 聚也。 也。 欲天下之萃才,非如是不 順 以説,以卦才言 説 道 使 民,而 順 也。 於人 上下 如 上

能也。

王假有廟,致孝享也。

故萃天下之心者,无如孝享。王者萃天下其孝享之誠也。祭祀,人心之所自盡也,王者,萃人心之道,至於建立宗廟,所以致

之道,至於有廟,則其極也。

利見大人,亨,聚以正也。

見大人,則其聚以正道,得其正則亨矣。萃之時,見大人則能亨,蓋聚以正道也。

萃不以正,其能亨乎?

用大牲吉,利有攸往,順天命也。

爲,故「利有攸往」。皆天理然也,故云「順厚,稱其宜也。物聚而力贍,●乃可以有凡事莫不如是。豐聚之時,交於物者當「用大牲」,承上「有廟」之文,以享祀而言。

觀其所聚,而天地萬物之情可見矣。

以聚,則「天地萬物之情可見矣」。
无、動静、終始之理,聚散而已。故觀其所之化育,萬物之生成,凡有者,皆聚也。有觀萃之理,可以見天地萬物之情也。天地

所以「戒不虞」也。 所以「戒不虞」也。 等,大率既聚則多故矣,故觀萃象而戒有奪,大率既聚則多故矣,故觀萃象而戒則有不虞度之事,故衆聚則有争,物聚則以除治戎器,用戒備於不虞。凡物之萃,以除治戎器,用戒備於不虞。 君子觀萃象,

正矣。

勿恤,往,无咎。初六,有孚不終,乃亂乃萃,若號,一握爲笑,

初與四爲正應,本有孚以相從者也。然當

矣。 也。 守正,不從號呼,以求正 亂其心也。「乃萃」,與其同類聚也。 而 萃時,三陰聚處,柔无守正之節,若捨 從其類,乃有孚而 若能勿恤而往從剛陽之正應,則无過 「一握」,俗語「一團」也,謂 不終也。 應 則 「乃亂 一握 衆 以 爲笑 笑之 初若 正 惑 應

象曰:「乃亂乃萃」,其志亂也。咎,不然,則入小人之群矣。

不能固其守,則爲小人所惑亂,而失其其心志爲同類所惑亂,故乃萃於群陰也。

六二,引,吉无咎,孚乃利用禴 咎」,引者,相牽也。 法爲 才而爲之戒。 初陰柔,又非中正,恐不能終其孚,故 戒而微辭。凡爻之辭,關得失二端者,爲 戒,亦 各隨其 二雖陰柔,而得中正,故 才 人之交,相求則合,相 而 設 也。 「引吉 因 无 其

川易傳卷之二

伊

臣之聚,凡天下之聚,在誠而已。 用禴之義也。 焉,是未誠也。蓋其中實者,不假飾於外, 禴言者,謂薦其誠 孚則可不用文飾 直以誠意交於神明也。「孚乃」者,謂有其 禴,祭之簡薄者也。 者,善補 致,豈可量也? 之道往與之萃,乃君臣 矣。五居尊位,有中正之德,二亦以 遠,又在群陰之間,必相 待 · 孚乃利用禴」,孚,信之在中,誠之謂也; 則 離 過也。二與五不相引,則過矣。 與 孚信者,萃之本也。 五 是以 ,專以至誠交於上也。 爲 而已,上下相聚 菲薄而祭,不尚備物, 正 古 應 和合 而 牽 當 无咎也。 引, 萃 也。 者 則 也 而尚 其 得 不獨君 无咎 所 中正 其 而 以 飾 共 萃 相

萃。二與五雖正應,然異處有間,乃當萃萃之時,以得聚爲吉,故九四爲得上下之象曰:「引吉无咎」,中未變也。

故《象》含其意以存戒也 才,以其有中正之德,可覬其未至於變耳。 不變,遠須正應,剛立者能之。二,陰柔之 處,乃其類聚。方萃之時,居其間,能自 以 相引矣。 而 云「未變」,辭若不足,何也? 其有中正之德,未遽至改 未 合者 或曰:二既有中正之德,而《象》 也,故 能 相 引 丽 萃 ·, 則 變也,變則不 日 吉而 群 无 陰比

六三,萃如嗟如,无攸利,往无咎,小吝。 恨也。 與求。 陰陽正應,然萃之時,以類相從,皆以 五,是以不正爲二所不 正爲四所棄也。與二,則二自 三,陰柔不中正之人也,求萃於人,而 上六,則得其萃,爲无咎也。 如」,則爲人棄絶,而「嗟如 上下皆不與,无所 四則非其正應,又非其類,是以 利也。 與 不不 也。 以中正 獲 萃 與 惟往 故 F 欲 柔居 前 雖 人莫 而 非 萃 從 嗟 應

動爲如此,雖得所求,亦可小羞吝也。求萃於四與二,不獲而後往從上六,人之无常,在人識之。然而小吝,何也? 三始説順之極,故得其萃而无咎也。易道變動一體之上,又皆无與,居相應之地,上復處一體之上,又皆无與,居相應之地,上復處

象曰:「往无咎」,上巽也。

上居柔説之極,三往而无咎者,上六巽順

而受之也。

九四,大吉,无咎。 也。 四當萃之時,上比九五之君,得君臣之聚 道 上下之聚,固 无所不正,則爲大吉,大吉則无咎也。 夫 也,雖得上下之聚,必得大吉然後爲无咎 下之聚,可謂善矣。 也,下比下體群陰,得下民之聚也。 而 大爲周遍之義,无所不周,然後爲大, 得君者,自古多矣。 有不由 然四以陽居陰,非正 正道 非 而 得者。 理枉道 非理 而得 得上 民 枉

九四必能大吉然後爲无咎也。也。然得爲大吉乎? 得爲无咎乎? 故者,蓋亦有焉,如齊之陳恒、魯之季氏是

象曰:「大吉无咎」,位不當也。

大吉乎? 必得大吉然後爲无咎也。非盡善,安得爲以其位之不當,疑其所爲未能盡善,故云

長群生,有尊大之義焉,有主統之義焉,而 歸,則當脩德也。所謂德,「元永貞」之道 志之未光,心之未慊也。 不服矣,乃无 又恒永貞固,則通於神明,光於四海,无思 也。元,首也,長也,爲君德首出庶物,君 有遠近昏明之異,故其歸有先後,既有 逆命,帝乃誕敷文德。 貞」之道 未 至 匪孚而其悔亡也。 也 一,在脩 德以 舜德非不至也,蓋 來之。 所謂 如 苗 未 民

象曰:「萃有位」,志未光也。

尚 天下,有感必通,含生之類,莫不懷歸,若 象》舉爻上句。王者之志,必欲誠信著於 .有匪孚,是其志之未光大也。

上六,齎咨涕洟,无咎。

於齎咨而涕洟也。 下孰肯與也? 六,説之主,陰柔小人,説高位 求萃而人莫之與 齎咨,咨嗟也。 而 () 其窮 處之,天 人之絶 至

> 知所 之,由己自取,又將 爲,則 隕 穫 而 至嗟涕,真小人之情 誰 咎? 爲 人惡絶,不

九〇八

象曰:「齎咨涕洟」,未安上也 狀也。

處,非 也。 與,既非其據,豈能安乎 可羞也。 據,及其窮迫,則隕穫躁撓,甚至涕洟,爲 安,不以累其心。 之涕洟,蓋不安於處上也。 擇安地,至於困窮,則顛沛不知所 小人所處,常失其宜,既貪而從欲,不能自 未便能安於上也。 義 不居,不幸而 未者,非遽之辭,猶俗云「未便」 小人居不擇安,常履 有危 陰 而居上,孤處无 困,則 君子慎其 泰 爲。 然 所 非 自

升,故受之以升。」物之積聚而益高大,聚 升、《序卦》:「萃者聚 也,聚 而 上 一者謂 之

中,長而益高,爲升之象也。 上巽下,木在地下,爲地中生木。木生地而上也,故爲升,所以次於萃也。爲卦,坤

升,元亨,用見大人,勿恤,南征吉。

不假憂恤,前進則吉也。「南征」,前進也。才之善,故「元亨」也。用此道以見大人,升者,進而上也。升進則有亨義,而以卦

彖曰:柔以時升。

異而順,剛中而應,是以大亨。

以 也。 五,五以中順之德應於二,能巽而 順之道升,可謂時矣。二以剛中之道應於 就下,坤乃順 以二體言,柔升謂坤上行也。 時,是以「元 柔既上而成升,則下巽而上順,以巽 時 亨」也。 而 上升以 《彖》文誤作「大 時 也 異既體卑而 謂 順,其升 時當 升

·用見大人,勿恤」,有慶也。 亨」,解在《大有》卦。

遂其升,則己之福慶,而福慶及物也。大人,必遂其升。勿恤,不憂其不遂也。升於道則由聖賢。用異順剛中之道以見凡升之道,必由大人。升於位則由王公,

「南征吉」,志行也。

遂其升,而得行其志,是以吉也。南,人之所向。南征,謂前進也。前進則

不實,道德之崇高,皆由積累而至。積小 、順則可進,逆乃退也。萬物之進,皆 也。順則可進,逆乃退也。萬物之進,皆 也。順則可進,逆乃退也。萬物之進,皆 、順則可進,逆乃退也。萬物之進,皆

初六,允升大吉。

初以柔居巽體之下,又巽之主,上承於九

從於 孰大焉? 則當任。 乃大吉也。 應於君,當升之任者也。 初之柔巽,唯信從於二,信二而從之 二之剛,巽之至者也。 剛中之賢以進,是由剛中之道也,吉 初之陰柔,又无應援,不能 二以德言,則剛中, 二以剛中之德,上 允者,信從 以力言, 自升, 同 也。 升,

九二,孚乃利用禴 於事 可以久乎? 道 剛 二,陽剛 也 M ,勢非 事柔,以陽 而 暗 誠 在 而 其可以有爲乎? 服 下,五,陰柔 臨 而從陰,雖有時 , 无咎。 也。 明,以 上下之交不 剛 而 而居上。 事 五雖陰柔, 弱 而然,非 ";若 以誠,其 夫以 黽 順 勉

> 咎乎? 外飾 君,又當升之時,非誠意相交,其能免於 如是則得无咎。 孚乃宜不用文飾,專以其誠感通 也。禴、祭之簡質者也。云「孚乃」,謂既 剛强之臣事柔弱之君,未有不爲矯 至誠,不假文飾於外,誠積於中,則自 然居尊位。 故 曰「利用禴」,謂 二雖 以剛强之臣而事柔弱之 剛陽,事上者 尚誠 敬 也,當· 也。 於上也。 飾 内 自 不 者 存 古 事

象曰:九二之孚,有喜也。

也。 也。 己, 有可喜也。 於物也,言「有喜」者,事既善而 二能以孚誠事上,則不唯爲臣之道无咎 有喜」,蓋牿於童則易,又免强制之難,是 可以 凡《象》言「有慶」者,如是則有 如《大畜》「童牛之牿,元吉」、《象 行剛中之道,澤 及 天 八下,是 又有 福 慶及 미 有 喜 而

九三,升虚邑。

援 三以陽剛之才,正而 應。 以是而 升,如人无人之邑,孰 且巽,上皆順之,復有

六四,王用亨于岐山,吉,无咎。 象曰:「升虚邑」,无所疑也。 時,不可復升,升則凶咎可知,故云如文王 善,而其位當戒也。居近君之位,在升之 復有「无咎」之辭,何也? 曰:四之才雖 則亨而吉,且无咎矣。四之才固自善矣, 如此,周之王業,用是而亨也。四能如是, 之升進,己則柔順謙恭,不出其位。 子,而欲致之有道,下順天下之賢,而 所也。昔者文王之居岐山之下,上順天 己則止其所焉,以陰居柔,陰而在下,止其 四、柔順之才、上順君之升、下順下之進、 人无人之邑,其進无疑阻也。 至德

使

六五,貞吉,升階。

道則當亨也。 則止其分焉。分雖當止,而德則當升也, 於升,當上升其君之道,下升天下之賢,己 則吉而无咎也。然處大臣之位,不得无事 盡斯道者,其唯文王乎!

象曰:「王用亨于岐山」,順事也 王之亨于岐山,亦以順時而已。上順於上, 以其有順德也。 四居近君之位,而當升時,得吉而无咎者, 以柔居坤,順之至也。文

也? 用賢則彙升矣。 九二正應,然在下之賢,皆用升之階也,能 而升,猶登進自階,言有由 能貞固,則信賢不篤,任賢不終,安能吉 質本陰柔,必守貞固,乃得其吉也。 五以下有剛中之應,故能居尊位而吉,然 階,所由 而升也。 任剛中之賢,輔之 而易也。 若不 指言

下順乎下,己順處其義,故云「順事也」。

象曰:「貞吉,升階」,大得志也。

象曰:冥升在上,消不富也。

則有退而无進也。 有加益也? 不富,无復增益也。升既極,昏冥於升,極上而不知已,唯有消亡,豈復

伊川易傳卷之三

伊川易傳卷之四

周易下經

||-|| ||-|| || 兑坎 上下

沉隨時善處,復有裕乎?「有言不信」,當不唯其道自吉,樂天安命,乃不失其吉也。處困之道也,故能吉而无咎。大人處困,如卦之才,則困而能亨,且得貞正,乃大人困,亨,貞,大人吉,无咎,有言不信。

彖曰:因,剛揜也。

困而言,人誰信之?

時也。子而爲陰柔小人所掩蔽,君子之道困窒之不而為陰柔小人所掩蔽,君子之道困窒之而掩於上,所以困也。陷亦揜也。剛陽君卦所以爲困,以剛爲柔所掩蔽也。陷於下

者,「其唯君子乎」! 若時當困而反亨,身險以說,困而不失其所亨」也。能如是自得其說樂也。時雖困也,處不失義,則自得其說樂也。時雖困也,處不失義,則以對才言處困之道也。下險而上說,爲處險以說,困而不失其所亨,其唯君子乎!

亨,乃其道之困也。 君子,大人通稱。

貞,大人吉」,以剛中也

困 道也。五與二是也。非剛中,則遇 而 能貞,大人所以吉也,蓋其 以 困 剛 中之 加 失

其正矣。

有言不信」,尚口 乃窮也。

當困而言,人所不信,欲以口免困,乃所以

象曰:澤无水,困,君子以致命遂志。 致窮也。 以説處困,故有尚口之戒

致其命,以遂其志。 既盡其防慮之道,而不得免,則命也,當推 澤无水,困乏之象也。君子當困窮之時, 知命之當然 也, 則 窮

塞禍患不以 則恐懼於險難,隕穫於窮戹,所守亡 動其心,行吾義而已。苟不 知

矣,安能遂其爲善之志乎?

初六、臀困于株木、人于幽谷、三歲不覿 六以陰柔處於至卑,又居坎險之下,在困

> 者也。不覿,不遇其所亨也。 困,无自出之勢,故至於「三歲不覿」,終困 人於深困。 安其所遇,既不能免於困,則益迷暗妄動, 則非困也。「人于幽谷」,陰柔之人,非能 困于株木」,謂无所庇而不得安其居,居安 不能庇物、故爲株木。臀,所以居也。「 四,近君之位,在他卦不爲无助,以居困 下,不能蔭覆於物。 困於陰揜,是惡能濟人之困? 四 助,則可以濟其困矣。 不能自濟者也。 以 陽 而 居陰爲不正 幽谷,深暗之所也。 必得在上剛明之人爲 株木,無枝葉之木也。 一、失剛 初 與 四 而 爲正應,九 方益人於 猶株木之 不中,又方 m

象曰:「人于幽谷」,幽,不明也。

幽,不明也」,謂 益 人昏暗,自陷 於深 困

九二,困于酒食,朱紱方來,利用亨祀,征凶, 也。 明則不至於陷矣。

吉,惟 悔,何 自取 安處 其所,爲困 小畜,陽爲陰所畜,困,陽爲陰所 也 以 小 所怨咎?],將誰 俟命,征 畜 所 與 咎 動 困 乎? 也。 諸 而 乃 求 戹於陰,故 卦二五以陰陽 之, 失剛中之德,自取 不 度 則 時 犯 而 同 難 征 揜 道 一,乃不 得 相 也 相 N N 求。 而 安 乃 [X]

象曰:「困于酒食」,中有慶也 六三、困于石、據于蒺藜、入于其宫、不 通,守其中德,亦君子之道,亨乃有慶 之德,必能致亨而有福慶也。 雖困于所欲,未能 施惠於人,然守其

重難 居陽,用剛 六三以陰柔不中正之質,處險極而 勝之物。 也,不善處困之甚者也。 蒺藜,刺不可據之物。 石,堅 用 三以 剛。

妻,凶。

0 征」,原作「往」,據涂刻本改

加

易傳卷之四

雖使

時

未

卓

剛

中

見其

也

必辱; 死 苟能謙柔以下之,則无害矣。 名辱,其事惡也。 犯也,而犯之以取困,是非所困而困也。 所安矣。 也。 剛 乘之,則不安而取困,如據蒺藜也。 危,死期將至,妻其可得見耶?」二陽不可 凶可知。《繋辭》曰:「非所困而 不能矣。宫,其居所安也。妻,所安之主 于蒺藜」也。 德,居九二剛中之上,其不安猶藉刺 可犯,益自困耳,「困于石」也。以不善之 其將至,所安之主可得而見乎? 險 丽 知進退之不可,而欲安其居,則失其 非 L 進退與處皆不可,唯死 所據 進 進退既皆益困,欲安其所,益 則 而 二陽在上,力不能勝,堅不 三在二上,固爲據之,然 據焉,身必危。 乃用剛險以 困焉,名 而已,其 既辱 如是, 「據 H.

象曰:

「據于蒺藜」,乘剛也。「人于其宫,不

見其妻」,不祥也。

九四,來徐徐,困于金車,吝有終。 者也。 者,不容於世矣。二與四皆以陽居陰,而 各安其正而已。 正應,終必相從也。 乎?「有終」者,事之所歸者正也。 他,將從之,則猶豫不敢遽前,豈不可羞吝 欲從初而阻於二,故其來遲疑而徐徐,是 困,則宜爲初所從矣。 人之困。初比二,二有剛中之才,足以 困之時,上下相求,理當然也。 唯力不足故困,亨困之道,必由援助。當 不善之効,故云「不見其妻,不祥也」。 也。「不祥」者,不善之徵,失其所安者, 正應,然四以不中正處困,其才不足以 困于金車」也。己之所應,疑其少己而之 據 于蒺藜」,謂乘九二之剛,不 二以剛在下載己,故謂之金車。 苟擇勢而從,則惡之大 寒士之妻,弱國之臣 金,剛也。 安,猶藉刺 四 車,載 與初 初 四 物 拯 濟 爲 四

尚柔 以 也, 剛 中之才,所 得中者,不失剛柔之宜也 以 能 濟 困 也。 居 陰者,

象曰 「來徐徐」,志在 下也。 雖不當位,有

與 也

來。 四 應於初 雖居不 而 當位爲未善,然其正應相與, 隔於二,志在下求,故徐徐而

故有終也

九 言。 五 則非 也。 也。 也。 有九二剛中之賢,道同德合,徐必相應而 利 ,共濟天下之困,是始 為日則,傷於上也。去足爲 '劓刖'困于赤紱'乃徐有説'利用祭祀。 用祭祀」,祭祀之事 困 人君之困,以天下不來也,天下皆來, 赤紱,臣下之服,取行來之義,故以紱 五,君位也。人君之困,由上下无與 上下皆揜於陰,爲其傷 也。 五雖在困,而有剛中之德,下 ,必致其誠敬,而後 困 m 害 徐 鳥 有喜説 刖,傷於下 刖 之象 也

當用

也。

者也。 宜用 受福 鬼。五君位言祭,二在下言享,各以其所 則可通,分而言之,祭天神,祀地祇,享人 後有説也。二云享祀,五云祭祀,大意則 安有上下之與? 陽爻,以剛中之德,同而相應,相求而後合 相應也,如夫婦骨 上下无與,何也? 之賢,濟天下之困 下之賢,若祭祀然,致其 至誠,乃受福也。 人君· 如君臣朋 在 困 [時,宜· 友,義合也。 有與,則非困 肉,分定也。 矣。五與二同德, 日: 陰陽 祭與祀享,泛言之 念天下之困 、誠敬 相 ,則能致 方其 ,故徐合而 應者,自然 五與二 (始困 天下 求天 而 皆 云

象曰:「劓刖」,志未得也。「乃徐 中直也。「利用祭祀」,受福 始爲陰揜,无上下之與,方困 也 未 有 得志之時 説」,以

七

也。

徐

而有説,以中直之道,得在下之賢,

下 誠意 共 直乃宜 之困, 濟 ,如祭祀然,以求天下之賢,則能 於 困 而享受其福慶也。 也。 也 「直」比「正」意差 不 日 中 正 與 緩。 合 者 亨天 盡 其 云

上六,困于葛藟,于臲 无所不 矣。 變困 N S 也? 謂 卦之上 極 所 地 六處困之極,爲困 物 爲 也。 極則反,事 而 困于葛藟與臲 之道 上以 征 葛藟,纏 日 有 若能 而 困 : 則 悔 也。 也。 柔 三居 凶 出 也 居 日, 了; 上 3 極則 於 束 困 説 有 剛 困 能 如 之物; 與屯之上,皆以无 居一卦之上而 唯 悔,咎前之失 而 悔, 卼 變。 是 矣,故吉。 所纏束,而 卼, 曰動悔有悔, 征吉。 處 也。 爲 動皆得悔,當變前 險,困 則 困 困 臲 往 動悔, 極 既極矣, 卼 而得吉 耳 三以 而 居最 危 也。 用 動 困 无 動 剛 輒 陰 應 極 也 高危之 理當變 之狀。 X 曰,自 有 居 險 在 則 悔 故 之 卦 有 何 下 困

> 終, 險 極 屯 而 則 困 泣 説 體 血 故 漣 也 如 以 困 説 則 順 有 進 悔 可可 征 以 吉」,屯 平

吉行 日:二 也 困 于 葛藟」,未當 也。 動 悔 有 悔

象

困

也

未當也 爲困 出 於困 所纏 是其行 知 而不能變,未得其道 動 則 而 得 吉 悔、遂 也 有 悔 而 也,是處之 去之, 미

井。」承 井、《序 象 器之象。 已 水也,巽之象則木也 井,井所以 也。 加 困 則 上「升 卦 》。「困 木入於水 次 必反於下也。 困 圃 不已 也。 乎上者必 下 爲卦,坎上巽下。坎 必困」爲言,謂 ,巽之義則 而上乎水,汲井之 物之在下者莫如 反下,故受之以 人也。 上 升 不

井,改邑不改井,无喪无得,往來井井。

至者皆得其用,「往來井 之而不竭,存之而不盈,「无喪无得」也。 他,并不可遷也,故曰「改邑不改井」。 井之爲物,常 而 不 可 改 也。 井」也。 邑可 改 无 喪无 面 汲 之

也,周也,井之道也。

得,其德也常,往來井井,其用也周。

汔至,亦未繘井,羸其瓶,凶。

而未及用,亦與未下繘於井同也。君子之汔,幾也。繘,綆也。井以濟用爲功,幾至

用,而未及物,猶无有也。羸敗其瓶而失掘井九仞而不及泉,猶爲棄井。有濟物之道,貴乎有成,所以五穀不熟,不如荑稗,

彖曰:巽乎水而上水,井。井,養而不窮也。之,其用喪矣,是以凶也。羸,毀敗也。

·改邑不改井」,乃以剛中也。

巽人於水下而上其水者,井也。井之養於

爻,剛中之德,其常乃如是,卦之才與義可改,井不可遷,亦其德之常也。二五之物,不有窮已,取之而不竭,德有常也。邑

合也。

「汔至,亦未繘井」,未有功也,「羸其瓶」,是

以凶也。

常

以濟用爲功,水出乃爲用,未與雖使幾至,既未爲用,亦與未緣

不爲用矣,是以凶也。

也?

瓶

所以上水而致

用

也,羸敗其

瓶

出

則

何

功

井

同。

井

勉以相助之道也。勞徠其民,法井之用子觀井之象,法井之德,以勞徠其民,而勸不承水而上之,乃器汲水而出井之象。君象曰:木上有水,井,君子以勞民勸相。

初六,井泥不食,舊井无禽。

也, 勸民使相助,法井之施也。

井與鼎皆物也,就物以爲義。 六以陰柔居

九二,井谷射鮒,甕敝

漏

井之不可食也。 及物,爲時 泥也,猶人當濟物之時,而才弱无援,不能 下,无上水之象,故爲不食。 蓋无以 人既不食,水不復上,則禽鳥亦不復往矣, 人獲其用,禽鳥亦就 養人也,无水,則舍置不用矣。 井水之上 在井之下,有泥之象。井之用,以其水之 无 濟物也。 應援 所舍也 ,无上水之象。 井本濟人之物,六以陰居 井之不可食,以泥汙也。 而求焉。 井之不食,以 不 舊廢之井, 能 濟物 乃

濟也。 禽鳥 以陰 時所舍置不用也。 、所不食也。 ,禽鳥亦不至矣。 而居井之下,泥之象也。无水而 舍,上聲,與乾之「時舍」音不同 人不食,則水不 若能及禽鳥 見其 不 能 上,无以及 ,是亦有 濟物,爲 泥 所

象曰:「井谷射鮒」,无與也。 悔咎 耳。 中 己。 初二无功,而不言悔咎,何也? 可爲 就下,是以无濟用之功。 「甕敝漏」,如甕之破漏 下,失井之道,乃井而如谷也。井上出 澗谷之水,則旁出 不上而下之象 有悔,過則爲咎。无應援而不能 養人而濟物;今乃下 可以養人濟物,而 非 雖剛陽之才而居下,上无應而比於初, 射,注 過也。 鮒,或以爲蝦,或以爲蟇,并泥中微物 也。 用,乃破 居二比初,豈 也,如谷之下流,注於鮒 不能上,由无援 敝 也。 而 上无應援,故不能上而 漏之,不爲用也。 而就 井之道,上行 就污泥,注於 非 也。陽剛之才,本 下。 如水之在甕,本 過 非 二居 乎? 以比 曰: 成用,非 者也; 井 曰 : 井之 初 失 鮒 耐 也。 則 刻 就 而

九三,井渫不食,爲我心惻,可用汲,王明並上有與之者,則當汲引而上,成井之功矣。以在下而上无應援,是以下比而射鮒。若井以上出爲功。二陽剛之才,本可濟用,

福

也。

時, 清潔而 則 有 用,如井之清潔,「可用汲」而 也? 爲用,居下,未得其用也。 行、舍之則藏者也。 用而切於施爲,未得其用,則如井之渫治 應上六,處剛 在井下之上,水之清潔可食者也。 井以上 三以陽剛居得其正,是有濟用之才者也。 明王, Ë 剛 得 故王 圃 行 不見食,爲心之惻怛也。 則當用之而得其效。 不中,故切於施爲,異乎用 其道 明 而過中,汲汲於上進,乃有 則 ,君得享其功,下得被其澤, 受福 然明王用人,豈 矣。 陽之性上,又志 三之才足以 食也。 賢才見用 三居井之 若上 求備 之則 濟 才

上下並受其福也。

象曰:「井渫不食」,行惻也。求王明,

受

行也。 豈免有求也? 故求王明而受福,志切於以不得行爲憂惻也。既以不得行爲惻,則,則

受其福

六四,井甃,无咎。

四雖陰柔而處正,上承九五之君,才不足四雖陰柔而處正,上承九五之君,才不足四雖陰柔而處正,上承九五之君,才不足四雖陰柔而處正,上承九五之君,才不足四雖陰柔而處正,上承九五之君,才不足

象曰:「井甃无咎」,修井也。

九二二

等之。 已。若在剛陽,自不至如是,如是則可功,亦能修治不廢也,故无咎,僅能免咎而功,亦能修治不廢也,故无咎,僅能免咎而

九五,井洌寒泉食。

之德,爲至善之義。 寒泉而可食,井道之至善者也。九五中正象曰:寒泉之食,中正也。

也。收,汲取也。幕,蔽覆也。取而不蔽,井以上出爲用。居井之上,井道之成上六,井收勿幕,有孚元吉。

能?●他卦之終,爲極爲變,唯井與鼎終 常而不變也。博施而有常,大善之吉也。 財利无窮,井之施廣矣,大矣。「有孚」,有

泉曰:元吉在上,大成也。 乃爲成功,是以吉也。

以上爲成功。以大善之吉在卦之上,井道之大成也。井

== == 上 下 下 下

者也。火之性上,水之性下,若相違行,則水火,相息之物,水滅火,火涸水,相變革本,兑上離下,澤中有火也。革,變革也。爲不可不革者也,故井之後受之以革也。爲革。」井之爲物,存之則穢敗,易之則清潔,革、《序卦》:「井道不可不革,故受之以革、

^{■「}孰」,原作「就」,據涂刻本改。

而其歸各異,其志不同,爲不相得也,故爲相滅息者也,所以爲革也。又二女同居,睽而已。乃火在下,水在上,相就而相尅,一「

革,已日乃孚,元亨,利貞,悔亡。

革也。

也。革而无甚益,猶可悔也,况反害乎?可久,而得去故之義,无變動之悔,乃悔亡亡」,弊壞而後革之,革之而利於正,道則故革之而可以大亨。革之而利於正,道則故必已日,然後人心信從。「元亨利貞悔革者,變其故也。變其故,則人未能遽信,

未之有也。

得,曰革。 彖曰:革,水火相息。二女同居,其志不相

古人所以重改作也。

爲生義。革之相息,謂止息也。息爲止息,又爲生息。物止而後有生,故澤火相滅息,又二女志不相得,故爲革。

已日乃孚」,革而信之。

矣,然其久也必信。終不孚而成善治者,不能成也。先王政令,人心始以爲疑者有於已日,使人信之。人心不信,雖强之行,於已日,使人信之。人心不信,雖强之行,於已日,使人信之。人心不信,雖强之行,

文明以説,大亨以正,革而當,其悔乃亡。 文明以説,大亨以正,革而當,其悔乃亡。 文明則理无不盡,事无不察,説則人心和厚。革而能照察事理,和順人心,可致大順。革而能照察事理,和順人心,可致大亨。 一也。天下之事,革之不得其道,則反致亡也。天下之事,革之不得其道,則反致亡也。天下之事,革之而常,其悔乃亡。

人。革之時大矣哉! 天地革而四時成,湯、武革命,順乎天而應乎

九二三

四

氏也会易隹遷攻易亓戈四寺,萬勿冷是上一推革之道,極乎天地變易、時運終始也。|

天道變改,世故遷易,革之至大也,故贊之順天命,下應人心,「順乎天而應乎人」也。命於天,故易世謂之革命。湯、武之王,上運既終,必有革而新之者。王者之興,受長成終,各得其宜,革而後四時成也。時天地陰陽推遷改易而成四時,萬物於是生

象曰:澤中有火,革,君子以治歷明時。曰「革之時大矣哉」!

初九、鞏用黄牛之革。

革,則與天地合其序矣。

才,審慮而慎動,而後可以无悔。九,以時變革,事之大也,必有其時,有其位,有其

吉凶 也。 順自 則離 咎"、以中順自固,則不革而已,安得便有 用黄牛之革」,謂以中順之道自固,不妄動 革,所以包束。黄,中色。牛,順物。 不中而體 動也。其才如此,有爲則凶咎至矣。 下,則有僭妄之咎,而无體勢之重 易之象。 則初 平? 不云吉凶,何也? 固 體 也,動於事 而陽也,離性上而 而无妄 以位則下也,无時无援 躁,所不足者中與順也,當以中 初 動 以則无 則 可 也。 審慎之意,而 曰 剛體健,皆速於 妄動 鞏, 局東也。 則 而 蓋剛 以 有 動 有 「鞏 X 於 オ 躁

順自固也。以初九時、位、才皆不可以有爲,故當以象曰:「鞏用黄牛」,不可以有爲也。

六二,已日乃革之,征吉无咎。

以六居二,柔順而得中正,又文明之主,上

柔也。 違悖。 文明 耳,使賢才不失可爲之時也 大,故有此戒。 則其進緩,當位則其處固。變革者,事之 時,爲有咎也; 其道,則吉而无咎也。 弊,新天下之治。當進而上輔於君,以 德,所居之地,所逢之時,足以革天下之 善者也。 有剛陽之君 下之信,故「已日乃革之」也。如二之才 則 聖人因其有可戒之疑, 時可矣,位得矣,才足矣,處革之至 盡 然臣道不當爲革之先,又必待上 理,應上則得權勢,體 ,同德相應。中正則无偏 二得 以二體 中 不 而 柔而處當位,體 應 進則失可爲 剛 ,未至失於 而明其 順 則无 蔽 柔 之 行 義

處而不行,是无救弊濟世之心,失時而有慶也,謂可以革天下之弊,新天下之事。已日而革之,征則吉而无咎者,行則有嘉象曰:「已日革之」,行有嘉也。

咎也。

九三,征凶,貞厲,革言三就,有孚。 過矣。 之論。 明,審稽公論,至於三就而後革之,則无 九三以剛陽爲下之上,又居離之上而不得 失時爲害。 唯當慎重之至,不自任其 居下之上,事之當革。 衆所信也,如此,則可以革矣。在革之時, 如是,則必得至當,乃有孚也。己可信而 於三而皆合,則可信也,言重慎之至。能 順從公論,則可行之不疑。革言,謂當革 革,豈可不爲也? 在乎守貞正而懷危懼 是而行,則有 中,躁動於革者也。在下而躁於變革,以 就,成也,合也。 凶也。 然居下之上,事苟當 若畏懼 審察當革之言,至 而不爲,則 別

稽之衆論,至於三就,事至當也。「又何之象曰:「革言三就」,又何之矣?

宜矣。理時行,非己之私意所欲爲也,必得其矣」,乃俗語「更何往也」。如是而行,乃順矣

九四,悔亡,有孚,改命吉。 用也。 宜矣。 知。 命吉」。 可悔 處柔 之勢也。 隨時而已。 之君,乃中正之人也。 圃 革之既當,唯在處之以至誠,故有孚則「改 應,革之志也。以九居四,剛柔相際,革之 體而進上體,革之時也。 九四,革之盛也。陽剛,革之才也。 弊革,行之以誠,上信而下順,其吉 四非中正而至善,何也? 曰:唯其 而 也,故剛 後革之,革之而當,其悔乃亡也。 四既具此,可謂當革之時也。 改命,改爲也,謂革之也。 得近君之位,革之任也。下无係 而 不過,近而 易之取義无常也, 居水火之際,革 不逼 一,順 既 承 事之 離 事當 中 下 可

改命而吉,以上下信其志也。象曰:改命之吉,信志也。

况不當乎? 當不孚則不信。當而不信,猶不可行也, 上下信矣。革之道,以上下之信爲本。不 改命而吉,以上下信其志也。誠既至,則

九五,大人虎變,未占有孚。

九五以剛陽之才,中正之德,居尊位,大人也。以大人之道,革天下之事,无不當也, 文采,故云「虎變」。龍虎,大人之象也。 变采,故云「虎變」。龍虎,大人之象也。 變者,事物之變。曰虎,何也? 曰:大人 變之,乃大人之變也。以大人中正之道變 下必信也。天下蒙大人之革,不待占决, 知其至當而信之也。

事理明著,若虎文之炳焕明盛也,天下有象曰:「大人虎變」,其文炳也。

居

貞則吉也。

居貞非爲六戒乎?

日

爲

, 已革則患乎不能守也,故革之終, 戒以

不孚乎?

上六,君子豹變,小人革 甚非 則 爲成 蓋 謂深且久矣,而有苗、有象,其來格烝乂, 革之終,革道之成也。君子謂善 當貞固 爲君,以聖繼聖,百有餘 化,然有下愚,雖聖人不能移者。 云虎,君子云豹也。人性本善,皆可以 從上之教令也。 則己從革而變,其著見若豹之彬蔚也。小 人,昏愚難遷者,雖未能心化,亦革其 所革隨復變矣。天下之事,始則患乎難 亦革面 也。 道 以 也。 而已。 自 苟更從而深治之,則爲已甚,已 守。 故至革之終 龍虎,大人之象,故大人 小人既革其外,革道可 革至於極,而不守以 面,征凶,居貞吉。 年,天下被化,可 而又征,則凶也 以堯、舜 人,良 面 貞, 以 變 以

也。 不可 以 革面,何也? 愚,然考其歸,則誠愚也。 商辛是也。聖人以其自絶於善,謂之下 必皆昏愚也,往往强戾而才力有過人者, 尼之所謂下愚也。 之以不爲,雖聖人與居,不能化而入也,仲 焉:自暴也,自棄也。 人苟以善自治,則 語其才則有下愚之不移。 革終言也,莫不在 而寡罪,則與人同也。 无不可移者,雖昏愚之至,皆可漸磨而 知其非性之罪也。 唯自暴者,拒之以不信,自棄者,絕 革者,何也 日 ? 然天下自棄自暴者,非 其中矣。人性本善,有 心雖絕於善道 曰:語其性則皆善也, 唯其有與人同,所 既曰 所謂下愚有二 下愚,其能 ,其畏威 進

面」,順以從君也。 象曰:「君子豹變」,其文蔚也,「小人革

君子從化遷善,成文彬蔚,章見於外也。

九二七

九二八

凶矣。 中 圃 令,是革 不敢肆其惡。 人以 假善,君子 上 面 ,莫不變革,雖不移之小人,則 也。 革易其外,以順從君上之教 所容也,更往 至此,革道成矣。小人勉 而治之,則 亦

離異上下

象焉 也。 爲用 在上,下有足以承之,亦鼎之象也。取其 也,鼎之象也。 言之,則下植爲足,中實爲腹,受物在中之 易堅而爲柔。水火不可同處也,能使相合 鼎。」鼎之爲用,所以革物也,變腥而爲熟, 鼎、《序卦》:「革物者莫若鼎,故受之以 對峙於上者,耳也,横亘乎上者,鉉 ",取其義焉。 取其象者有二:以全體 爲卦,上離 圃 不 相害,是能革物也,鼎所 以上下二體言之,則中 下異。 所以 爲 鼎,則取其 以 次 虚 革

> 然也。在井亦然,器雖在 之象,乃人爲也。曰:固人爲 乃卦之象,卦復用器以爲義也。 象,以衆人之不能知象也,故設卦以示之。 不必先器。 乎? 曰:制器取於象也,象存乎卦,而 飪之象也。 不假器,故取烹象而爲鼎。 可以成物,形制如是則可用,此非人爲,自 卦器之先後,不害於義也。 木從火,爲然之象。火之用惟燔與烹,燔 義,則木從火也。巽,人也,順從之義。 制器取其象也,乃象器以爲 聖人制器,不待見卦 卦先,而所取者 或疑鼎非自然 以木巽火,烹 也,然烹飪 加 後 知 桂 卦

鼎,元吉亨。

亨」,其羨明矣。
元亨,未便有元吉也。《彖》復止云「元正尊」,文羡「吉」字。卦才可以致以卦才言也。如卦之才,可以致元亨也。

彖曰:鼎,象也。

器,卦之爲鼎,以其象也。 正,至正然後成安重之象。 IE 法象尤嚴。 鼎之名正也,古人訓方 也。鼎,大器也,重寶也,故其制作形模 之象也。 卦之爲鼎,取鼎之象也。 ,周圓、内外、高卑、厚薄,莫不有法 也。 以形言,則耳對植於上,足分峙 有象而後有器,卦復用器而 鼎之爲器,法 故鼎者法象之 7,方實 而 爲 至 於 卦

亨以養聖賢。 以木巽火,亨飪也。聖人亨以享上帝,而大

大,言其廣。
大,言其廣。
一大,正之聖至。
一次,下大亨以養聖賢」。聖人,古之聖王。
一切者也。極其用之大,則「聖人亨以享上
少,所以亨飪也。鼎之爲器,生人所賴至
以二體言鼎之用也。以木巽火,以木從

巽而耳目聰明,柔進而上行,得中而應乎剛,

是以元亨。

理, 如是,所以能 居中,而又以 而得中道,應乎剛,能用剛陽之道也。五 之物,乃居尊位,進而上行也。 凡離在上者,皆云柔進 之才,可以致元亨也。 上既言鼎之用矣,復以卦才言。 離明而中虚於上,爲耳目聰明之象。 元亨也。 柔 而 應剛,爲得中道。其才 下體巽,爲巽 愐 F 行。 以明居尊, 人能 柔,在下 順 如 於 卦

象曰:「木上有火」,鼎,君子以正位凝命 鼎。 跛毋 重其命令也。 君子所處必正,其小至於席 正之象,則以正 法象之器,其形端正,其體安重。 「木上有火」,以木巽火也,烹飪之象,故爲 倚。 君子觀鼎之象,「以正位凝命」。 取其安重之象,則 凝,聚止之義,謂 其 位,謂正其 凝 不正 所居之位。 其 安重也,今 命令,安 不坐,毋 取其端

世 俗 有「凝然」之語。 以 命令而 言 耳,凡 動

爲皆當安重 世

初六,鼎顛趾,利出 也。 良妾,則能 敗惡以致潔取新 而卑巽從陽,妾之象也。 也,以其子,致其主於无咎也。 陰而卑,故爲妾,得妾謂得 時,未爲悖理也。 成事功,乃善道,如鼎之顛趾,有當 下之人,而相應,乃上求於下,下從其 出否。否,惡也。 實矣,非順 上,顛之象也。鼎覆則 在鼎下,趾之象也 上能用下之善,下能輔上之爲,可 發此義。初六本无才德 輔助其主,使无過咎也。子,主 道 也。 ,則可 否,得妾以其子,无咎。 「得妾以其子无咎」,六 四近君,大臣之位,初在 然有當 ; 也。 上應於四,趾 趾顛, 趾 以六上應四爲顛 顛之時 其人也。 故顛趾利 六陰居下, 顛則覆 謂 若得 「 顛 之 而 在 傾 其 以 上 於 出 向

> 得妾」,言得其 人 則 如是 也

日:「鼎 顛趾」,未悖也

鼎覆

而

趾

顛,悖道也

然非

必爲悖者,蓋

有傾 出 否惡之時也

利出否」,以從貴也。

去故 應於四,上從於貴者也 而 納新,瀉 惡而受美,從貴之義

九二,鼎有實,我仇有疾,不我能即,吉。 也。 亨。 二以 之不能來就己。 正 故戒能遠之,使不來即我,則吉也。 五 實,上出則爲用。二,剛陽有濟用之才,與 而應中,不至失正,己雖自守,彼必 而 相應,上從六五之君,則得正 害義,是有 陰陽,相 然與初密比,陰從陽者也。 剛實居中,鼎中有實之象。 對之物, 疾 人能自守以正,則不正不 也。 謂 二當以 初 也。 正自守 相 而其道 九二居中 鼎之有 從則 仇,對 和求, `, 使 非 可

趾

而

可取,故云

能就之矣,所以吉也。

初,而上從六五之正應,乃是慎所之也。不慎所往,則亦陷於非義。二能不暱於鼎之有實,乃人之有才業也,當慎所趨向。象曰:「鼎有實」,慎所之也。

我仇有疾」,終无尤也

尤也。自守以正,則彼不能即我,所以終无過自守以正,則彼不能即我,所以終无過謂初也。初比己而非正,是「有疾」也。既「我仇有疾」,舉上文也。「我仇」,對己者,

何由而行? 革,變革爲異也,三與五,異同也,未得於君者也。不得於君,則其道而不同。五,中而非正,三,正而非中,不正,剛而能巽,其才足以濟務,然與五非應

以異體,故无過剛之失。 故有不足之悔,然其有剛陽之德,上聰明 不足之悔。終當獲吉也。三懷才而不偶, 終上進之物,陰陽交暢則雨。 守其道,其終必亨。 得雉膏食之也。 之雉。三有才用而不得六五之禄位,是不 物,象禄位。 君,則不得其任,无以施其用。膏,甘美之 而下巽正,終必相得,故吉也。三雖不中, 雨也,言五與三方將 而不合也。「其行塞」,不能亨也。不合於 雉指五也,有文明之德,故謂 君子藴其德,久而 五有聰明之象,而三 和合。 。若過剛,則豈能 虧 悔終古,謂 方雨,且 必彰, 將

象曰:「鼎耳革」,失其義也。終吉?

也,是以其行塞而不通。然上明而下才,非應,失求合之道也,不中,非同志之象始與鼎耳革異者,失其相求之義也。與五

九四,鼎折足,覆公餗,其形渥,凶。終必和合,故方雨而吉也。

而 M 可羞愧之甚也。 任,而所用非人,至於覆敗,乃不勝其任, 猶鼎之折足也。 天下之患。 勞而致也; 智與之協力。得其人,則天下之治,可不 事,豈一人所能獨任? 必當求天下之賢 四,大臣之位,任天下之事者也。天下之 餗,餗,鼎實也。 可用者也。 謀大,力小而任重,鮮不及矣。」言不 可 知。 《繋辭》曰:「德薄 用非其人,則敗國家之事,貽 四下應於初,初,陰柔小人,不 而四用之,其不勝任而敗事, 「鼎折足」,則傾覆公上之 「其形渥」,謂赧 居大臣之位,當天下之 而位 尊,知 汗也,其 勝 小

大臣當天下之任,必能成天下之治安,則象曰:「覆公餗」,信如何也? 其任也。蔽於所私,德薄知小也。

然,則失其職,誤上之委任,得爲信乎?任道之志,不失所期,●乃所謂信也。 不不誤君上之所倚,下民之所望,與己致身

六五,鼎黄耳,金鉉,利貞。故曰「信如何也」。

鉉。 鼎之主也。五有中德,故云「黄耳」。 質本陰柔,故戒以貞固 固而已。六五居中應中,不至於失正 上應,才无不足也,相應至善矣,所利在 二有剛中之德,陽體剛中色黄,故爲「金 加耳者也。 五在鼎上,耳之象也。 五文明得中而應剛,二剛中巽 二應於五,來從於耳者,鉉 於中也。 鼎之舉措在耳,爲 體 一,而 也。 鉉, 貞 而

六五以得中爲善,是以中爲實德也。五之象曰:「鼎黄耳」,中以爲實也。

所以聰明應剛,爲鼎之主,得鼎之道,皆由

得中也。

上九,鼎玉鉉,大吉,无不利。 井亦然。 雖居无位之地,實當用也,與他卦異矣。 不過,則爲大吉,无所不利矣。 陽,而居陰履柔,不極剛 成功之道,唯 在上,鉉之象。 并與鼎以上出爲用。 善處 剛而温者,玉也。 而已。 處終,鼎功之成 而能温者也。居 剛柔 在上爲鉉, 適宜 九雖 一,動静 也。 剛

象曰:玉鉉在上,剛柔節也。

成德,與井異,以剛柔節 之德,是以元吉。 曰: 井之功用,皆在上出,又有博施有常 皆以終爲成功,而 而 剛而温,乃有節也。 剛 柔中節,所以大吉无 鼎 鼎不云「元吉」,何也 上居成功致用之地 以烹飪 ,故得大吉也 不利 爲功,居上爲 也。 井、鼎 ?

> == == 震震 上下

震、《序卦》:「主器者莫若長子,故受之以震、《序卦》:「主器者莫若長子,故受之以義,而繼鼎之後。長子,傳國家、繼位號者者,爲相繼之義。震之爲卦,一陽生於二者,爲相繼之義。震之爲卦,一陽生於二倍之下,動而上者也,故爲震。震,動也。陰之下,動而上者也,故爲震。震,動也。陰之下,動而上者也,故爲震。震,動也。之交,一索而成震,生物之長也,故爲是不曰動者,震有動而奮發震驚之義。數也。

震,亨。

有亨。修,有主而保大,皆可以致亨,故震則爲恐懼,爲有主。震而奮發,動而進,懼而陽生於下而上進,有亨之義。又震爲動,

震 來 虩 . 啞啞

哑。 當震 也。 蠅 慮,●虩 虎 謂 動 處震如是,則能保其安裕,故「笑言啞 啞啞,笑言和適之貌 之 之來,則 虩 虩 然 者,以 也。 恐懼不 虩 其 虩, 周 敢 顧 環 自寧,周旋 慮 顧 慮,不 不安之貌 · 自 寧 顧

震驚百里,不喪匕鬯。

若雷。 則雖不 大震 處 酌 鼎實,升之於俎,鬯以灌 喪失。人之致其誠敬,莫如祭祀。 匕以載 百里也,唯宗廟祭祀,執匕鬯者,則不至 及百里之遠,人無不懼而自失。 言震動之大,而處之之道。 裸以求神,薦牲而祈享,盡其誠敬之心, 震 懼,能安而 雷震之威,不能使之懼而失守。 之道也。 震爲雷,故以雷言。 桂 不自失者,唯誠 才无取,故 地 而 雷之震動,驚 動之大者,莫 降神。 但 敬 雷聲 言處 而 已,此 故臨 方其 所 震 於 及

之道

彖曰:震亨。

則也。 「震來 虩虩, 恐致福也,「笑言啞啞」,後有

也。 啞」,言自若也,由能恐懼 懼,自修自慎,則可反致福吉也。「笑言 震自有亨之義,非 「有則」則安而不懼矣,處震之道也。 由卦才。 而後自處有 震來 而能 法 則 啞 恐

震驚百里,驚遠而懼邇 也

遠大也 雷之震及於百里,遠者驚,邇者懼,言其威

出可以守宗廟社稷,以爲祭主也。

鬯」,本爲誠敬之至,威懼 象文脱「不喪匕鬯」一句。 卦辭 彖以長子宜如是,因承上文用長子之義通 不能使之自失。 云「不喪匕

0 周 ·旋顧慮」,原作「旋顧周慮」,據涂刻本改。

司 以守宗廟 謂其 誠 社稷 敬能「不喪匕鬯」, 爲祭主 也。 長子如是, 則君出 而

而後可以守世祀,承國家 也。

象曰: 洊雷震,君子以恐懼修省

恐懼自修飭循省也。君子畏天之威,則修 正其身,思省其過,咎而改之。不唯雷震 重仍則威益盛。君子觀洊雷威震之象,以 游,重襲也。 上下皆震,故爲 「溶雷」。 雷

初九,震來虩虩,後笑言啞啞,吉。 凡遇驚懼之事,皆當如是。

爲恐懼而周 初九,成震之主,致震者也。在卦之下,處 震之初也。 旋 知震之來,當震之始,若能 顧慮, 虩虩然不 敢寧止,則 以

象曰:「震 來虩 虩」,恐致福 也,「笑言 啞

終必保其安吉

,故「後笑言啞啞」也。

啞」,後有

則

也

震 來 而 能 恐 懼 周 顧 則无患矣,是能因恐

> 懼 於法度,是由 而 反 父致福 也。 震 而 因恐懼 後 有 法則,故能保其 而自修省 不不 敢違

吉,而「笑言啞啞」也

六二,震來厲,億喪貝,躋于九陵,勿逐,七

日得。

至也。 剛。 其常矣,是勿逐 也。億之必喪也,故遠避以自守,過 懼之來,雖量勢巽避,當守其中正,无自失 高以避之也。 來之厲,度不能當,而必喪其所有,則升至 也。九陵,陵之高也。 之? 厲,猛也,危也。 六二居中得正,善處震者也,而乘初九之 危矣。億,度也。貝,所有之資也。 「勿逐七日得」,二之所貴者,中 九,震之主。震剛 九,重之多也,如 九言其重。 而自得 逐,往追也。 彼來既 動 也。 mj 九天、九地也。 岡陵之重,高之 上奮, 逐, 猛 Ė 即 也,遇震 孰 則己 躋,升 物 以震 能 則 處

東,然時過事已,則復其常,故云「七日時既易也。不失其守,雖一時不能禦其善處者也。卦位有六,七乃更始,事既終,善處者也。卦位有六,七乃更始,事既終,其。是之大方也。如二者,當危懼而以己即物,失其守矣,故戒「勿逐」。避遠以己即物,失其守矣,故戒「勿逐」。避遠

象曰:「震來厲」,乘剛也。

來,其可禦乎?當震而乘剛,是以彼厲而已危。震剛之

六三,震蘇蘇,震行无眚。

行,去不正而就正,則可以无過。告,過乎? 故其震懼而蘇蘇然。若因震懼而能不正。處不正,於平時且不能安,况處震蘇蘇,神氣緩散自失之狀。三以陰居陽,

象曰:「震蘇蘇」,位不當也。

不中不正,其能安乎? 其恐懼自失蘇蘇然,由其所處不當故也。

九四,震遂泥。

九四居震動之時,不中不正,處柔失剛健九四居震動之時,不中不正,處柔失剛健九四居震動之時,不中不正,處柔失剛健九四居震動之時,不中不正,處柔失剛健

象曰:「震遂泥」,未光也復能光亨也?

也 陽者剛物,震者動義。 泥, 豈能光 亨之道,乃失其剛正,而陷於重陰,以 ,以失德故泥耳。 也? 云「未光」,見陽剛本 以剛 處 動,本 能 致 有 遂 光 震

六五,震往來厲,億无喪有事。

而

處

震懼,有眚可知。

故二勿逐則自得,三能行則无眚。

以不正

也。

三行則

至

四,正

也。

動

以就正

爲

凶也。 危,由 之事 能 期於不失中, 故當 於正 以 不 之主,則能亨矣。 當君位,爲動之主,隨宜應變,在中 可居動之極,下來則犯剛,是往來皆危也。 於六二、六五 雖 居 六 致 不 不 違 剛 五 今齊也 ·中爲過,中常重 ,謂中德。 億度无喪失其所有之事 ,正不必中也。 當 於正矣,所以 ,又得中,乃 雖 非 億度,謂 以 位,多以中爲 -剛陽 陰 居 可見。 則 而 陽,不 圖慮求不失中 无 苟不失中, 可 有中 助 往來皆危 自 中爲貴也。 五之動,上往則柔不 天下之理,莫善於中, 於正也。 守。 美 當位 -德者 若以 三四四 以 也。 爲不 雖 一時 剛 柔 有 陽 也 而 蓋中則不違 諸卦 主動,固 雖 正 則 不 危 린 有 當位 五 失中 甚 然 不 助 ゴ、二五 · 一 已 難 至於 所 以 所 爲 一,或 但 以 有 柔 則 動

象曰:「震往來厲」,危行也。其事在中,大

无喪也。

中,則 无 往 喪其 來皆 미 属,行 事 自 而已。 守也。「大无喪」, 則 有危 其 事謂 也。 中也。 動 皆 有危, 以无 能不 喪 失其 唯 爲 在

于其鄰,无咎,婚媾有言。上六,震索索,視矍矍,征凶。震不于其躬,

大

也

瞻徊徨 道。 索也 以陰 也。 索索,消索不存之狀,謂 極,故征則凶也。震之及身,乃于其躬也 能變之義。 矣,故得无咎。 不于其躬,謂 震終當變,柔 能 柔居震動之極,其驚懼之甚,志 震 矍矍,不安定貌。 懼於未及身之前,則 以陰柔不中正之質,而處震 聖人於震,終示 未及身也。 苟未至於極,尚 不 固 守,故 其 鄰者,近於身者 志氣索索, 志 Ĺ 知 有 氣 不 畏 有 如 懼 至 可 是。 能 鄰 改之 改 於 動之 則 氣 戒 Ź 視 極 殫 六 而

震者異矣,故「婚媾有言」也。 衆動之首,今乃畏鄰戒而不敢進,與諸 義 有言,有怨咎之言也。 勸 深 婚 媾 所 六居震之上,始 親 也 謂 同 動 者 爲

過 而 所以恐懼自失如此,以未得於中道也, 極則有變義也 於未極之前,則无咎 中 復 也。 征 一,則凶 使之得 也。 中 若能見 則不至於索索矣。 也。 鄰 上六動之極 戒 而 知懼 變 極 謂

艮艮上下

所 艮、《序卦》:「震者動也。 止之,故受之以艮,艮者止 別有 以 次震 静,静 也。 則 艮者止也,不曰止者,艮,山 有 動。 物无 也。」 物不可以終 常 動 動 之 静 理,艮 相 因 動

> 无咎。 艮 其 陽動 止之也, 艮止者,安止之義,止其所也。 止之義何異? 曰:畜止者 静也,上止而 乾坤之交,三索而成艮,一陽居二陰之上。 之象,有安 (背,不 而上進之物,既至於上則止矣。 獲其身,行其庭,不見其人, 重 下静,故爲 堅 實 之意 艮也。 非 制制 止 義 畜之義,力 然則 可 盡 陰者 與 也

也。 近也。 之道。 於前 而止 忘我也。 不見也。 人之所以不能安其止者,動於欲也。 艮其背。 外物不接,内欲不萌,如是而止,乃 乃安。「不獲其身」,不 而 「行其庭不見其人」,庭除之間,至 在背,則雖 求 无我則止矣。 止於所不見, 所見者在 其 止,不可得 至 前,而背乃背之,是所 近不見,謂不交於物 不能 也 則无欲以 見其 故艮之道,當 无我 身也 亂其心, ,无可止 欲牽 得

止之道,於止爲无咎也。

不失其時,其道光明。 彖曰:艮,止也。時止則止,時行則行,動静

明之義。 時,仲尼行止久速是也。 其時也,乃其道之光明 時,則妄也,不失其 在物爲理、處物爲義。 艮爲止。止之道,唯其時。行止動静不以 時, 動静合理義,不失 也。 則 艮體篤實,有光 順 君子所貴乎 理 而 合義

艮其止,止其所也。

當止之所也。夫有物必有則,父止於慈, 者,由止得其所也。止而不得其所,則无 莫不各有其所,得其所則安,失其所則悖。 子止於孝,君止於仁,臣止於敬,萬物庶事 可止之理。夫子曰:「於止知其所止。」謂 艮其止」,謂止之而止 所以 能 使 天 下 順治 也。 非 能爲物作則 止之而 能 止

也,唯止之各於其所而已。

上下敵應,不相與也。

敵,故「不相與也」。不相與則相背,爲「艮與之義。陰陽相應則情通而相與,乃以其以卦才言也。上下二體,以敵相應,无相

相背故不獲其身,「不見其人」,是以能止,是以「不獲其身,行其庭不見其人,无咎」也。其背」,止之義也。

象曰:兼山艮,君子以思不出其位能止則无咎也。

皆出其位也,况踰分非 安。若當行而止,當速 之分也。 上下皆山,故爲兼山。 而思安所止,「不出其位」也。 重復也,重艮之象也。 萬事各 有其所,得其 據乎? 而 君子觀艮止之象, 此而并彼 久,或過或不及, 位者,所處 所 爲兼,謂 則 止 而

初六,艮其止,无咎,利永貞。

九三九

九四〇

六 常永貞固,則不失止之道也。 能常也,不能固也,故方止之初,戒以利在 行則失其正矣,故止乃无咎。 正,故无咎也。 趾」,止於動之初也。事止於初,未至失 在 最 下 趾之象。 以柔 趾,動之先 處下,當趾之時也。 陰柔患其不 也。 「艮 其

象曰:「艮其趾」,未失正也。

六二,艮其腓,不拯其隨,其心不快。正。事止於始則易,而未至於失也。當止而行,非正也。止之於初,故未至失

股 自由 剛止於上,非能降而下求,二雖有中正之 主乎止者也。 援,不獲其君矣。三居下之上,成止之主, 德,不能從 六二居中得正,得止之道者也。上无應 而 不在 ,故爲腓之象。 腓也。二既不得以中正之道 也。二之行止,係乎所主,非得 乃剛 而失中,不得止之宜。 股動則 腓 隨 動 止 在

> 後隨。 也。 位,則有當拯,有當隨,有拯之不 聽,道不行也,故「其心不快」,不能行其志 隨也,雖咎不在己,然豈其所欲哉? 救三之不中,則必 士之處高位,則有拯而 勉 山 隨 之。 无隨 不 能 拯 得 在 言 丽 m 下 不 唯

也。「退聽」,下從也。
所以不拯之而唯隨者,在上者未能下從象曰:「不拯其隨」,未退聽也。

九三,艮其限,列其夤,厲薰心。

下之堅也。 也。 在人身,如「列其夤」。夤,膂也,上下之際 「艮其限」,是確乎止而不復能進 體之上,而隔 不中,爲成艮之主,决止之極也。 限,分隔也,謂上下之際。三以剛 列絶其 夤,則上下不相從屬,言 止道貴乎得宜,行止不能 上下之限,皆爲 止義,故爲 退者也。 己在 居 止 剛 以 而

有安裕之里?●「厲薰心」,謂不安之勢 舉世莫與宜者,則艱蹇忿畏,焚撓其中,豈 與物睽絶,其危甚矣。 時,而定於一,其堅强如此,則處世乖戾, 人之固 止一隅 "; 而

象曰: 謂其固止不能進退,危懼之慮常薰爍其中 也。 「艮其限」,危薰心也。

爍其中也。

六四,艮其身,无咎。

正 无取之甚也。 施於政則有咎矣。在上位而 其身,則可无咎。 所以能无咎者,以止於 四,大臣之位,止天下之當止者也。以陰 而 也。言止其身无咎,則見其不能止物, 不遇剛陽之君,故不能止物,唯 僅能善其身, 自 止

象曰:「艮其身」,止諸躬也。 能爲天下之止,能止於其身而已,豈足

稱大臣之位也?

六 也。 五,艮其輔,言有序,悔亡。 也。艮於輔,則不妄出而有序也。言輕發 陰柔之才,不足以當此義,故止以在 由出,而輔在中。「艮其輔」,謂止於中也。 有序,中節有次序也。 而无序,則有悔。止之於輔,則悔亡也 輔義言之。人之所當慎 五,君位,艮之主也,主天下之止者也,而 五在上,故以輔言。 輔與頰舌,皆言所 輔,言之所由 而止者,惟言行 上取 出

象曰:「艮其輔」,以中正也。 也。 乃得正也。 五之所善者中也。 言以得中爲正,止之於輔,使不失中, 「艮其輔」,謂

止於中

0 里」,涂刻本作「理」。

上九,敦艮吉。

九四

善,所以吉也。六爻之德,唯此爲吉。一位,故不過而爲敦。人之止,難於久終,故極,故不過而爲敦。人之止,難於久終,故極,故不過而爲敦。人之止,難於久終,故此之至堅篤者也。敦,篤實也。居止之九以剛實居上,而又成艮之主,在艮之終,

象曰:敦艮之吉,以厚終也。

終者也。上之吉,以其能厚於終也。天下之事,唯終守之爲難。能敦於止,有

異人

以 也 消息之理也。 故受之以漸,漸者進也。」止必有進 漸、《序卦》:「艮者止也,物不可以終止, 卦,上異下艮。 緩進 漸 所 爲漸 以次 進,以序 卦 止之所生亦進也,所反 也。 山上有木,木之高而因 不越次,所 進以 序 爲 漸。 以 緩 一,屈 今人 亦進 也。 伸

> 也,所以爲漸也。 山,其高有因也。其高有因,乃其進有序

漸,女歸吉,利貞。

貞,而 爲義。 也。 巽艮重 下之事,進必以漸者,莫如女歸。 終二爻,雖不當位,亦陽上陰下,得尊卑之 以卦才兼漸義而言也。 廉恥之道,女之從人,最爲大也,故以 則陵節犯義,凶咎隨之。 於朝,人之進於事,固當有序,不以其序, 相對。女之歸,能如是之正,則吉也。 正。男女各得其正,亦得位也。與歸 由二爻之交,然後男女各得正 所施或不同,有涉不正之疑而爲之 且男女,萬事之先也。 加 爲漸。 在漸 體 乾坤之變爲巽艮, 然以義之輕重, 而言,中二爻交 諸卦 多 臣之進 位。 有利 女歸 妹 天 Œ

■ 「卦」,涂刻本作「艮」。

宜能 宜貞 利 此 之戒者,損之九二是也,處陰居説,故戒 漸進之義也 有貞者,漸是也,言女歸之所以吉,利於如 也,言所畜利於貞也。 戒者,有其事必貞乃得其宜者,有言所以 者 貞正也。 (也。有其事必貞乃得宜者,大畜 以 亨,而不云亨者,蓋亨者通達之義,非 其有貞也。 蓋其固有,非設戒也。 所謂涉不正之疑 有言所以利者以 漸之義 而 其 是 以 爲

彖曰:漸之進也,女歸吉也。

漸也。 如 漸之義而進,乃女歸之吉也,謂 女歸爲大耳,他進亦然。 正 而 有

進得位,往有功也

得 漸 四 復 正 進 位,亦爲 由上進 之時,而陰陽各得 而得 「進得位」之義 正位,三離 正 位,進 下 而 而 爲 有 上,遂 功 也

進 以 正 可 以 正邦也。

> 凡進 以 正 道 於 而 事、進於德 進,可以 、進於位,莫不皆當以 正邦國,至於天下也。

正 也。

其位,剛得中也。 得正,亦可謂之得位矣,然未若五之得 是以進而 謂位者,五以剛陽中正得尊位 上云「進得 有功。 位往 有功 復云「其位剛得中也」,所

也」,統

言陰

陽 得

也。諸爻之

位,故特言之。

止 而巽,動不窮也。 順之義。 内艮止,外巽順。 人之進也,若以欲心之動 止爲安静 之象,巽 則 爲

象 日 静 丽 山上有木,漸,君子以居賢德善俗。 外異順 ,故其進 動 不 有困 窮 也。

而不得其漸,故有困窮。

在漸之義,内止

躁

和

觀漸之象,以居賢善之德,化美於風 山上有木」,其高 有因,漸之義也。 君子

九四三

朝 可陵節 人,不以漸,其能入乎? 人之進於賢德,必有其漸,習而後能安,非 一夕所能成,故善俗必以漸也。 而遽至也。 在己且然,教化之於 移風易俗,非

初六,鴻漸于干,小子厲,有言无咎。 也。 以不躁 然之事,從衆人之知,非能燭理也,故危懼 事之所宜,處之不疑。 弱也,而上无應援,以此而進,常情之所憂 得其宜矣。六居初,至下也,陰之才,至 水鳥止於水之湄,水至近也,其進可謂漸 漸諸爻皆取鴻象。 有序,不失其時序,乃爲漸也。干,水湄。 有言。 若漸之初而用剛急進,則失漸之義, 行而以時,乃所謂漸。 君子則深識遠照,知義理之所安,時 也,无應所以能漸也,於義自无咎 蓋不知在下所以 鴻之爲物,至有時而 小人幼子唯能見已 有進 漸進不失,漸 也,用柔所 群

> 不能進而 有咎必矣。

象曰:小子之厲,義无咎也。

六二,鴻漸于磐,飲食衎衎,吉。

雖小子以爲危厲,在義理實无咎也

進之安固平易莫加焉,故其飲食和樂衎 也。二與九五之君,以中正之道相應,其 之濱所有,象進之安。自干之磐,又漸 但居漸,故進 二居中得正,上應於五,進之安裕者也。 一不速。磐,石之安平者,江 泂

象曰:「飲食衎衎」,不素飽也。 然,吉可知也。

天下。 子,遇中正之主,漸進于上,將行其道以及 夫子恐後人之未喻,又釋之云: 中正君 爻辭以其進之安平,故取飲食和樂 不謂空飽飲食而已。素,空也 所謂 「飲食衎衎」,謂其得志和樂, 爲言。

是知 從也。 能禦寇,則自失而凶矣。 凶 而 不復謂 陽也。夫謂三。三若不守正,而與四合, 易合,无應則无適而 密比,陽所説也。 三,陽在下而相親,陰所 牽,志有所就,則失漸之道。 地 漸進,而上无應援,當守正以俟時,安處 於陸也。 也。 ,則得 ,寇也。 合,則雖孕而不育,蓋非其道也,如是 征 曰 陸 二爻相比 三之所利,在於禦寇。 不反顧義理。 而 漸之道。 平 陽,上進者也。 守正以 不知復。 原 也。 而无應。 若或不能 閑邪,所謂禦寇 征,行也。 相求,故爲之戒。 三在 婦謂 居漸之時,志 下卦之上,進 四。 相比則相 自守,欲 四,陰在 復,反 非 若以不正 也。 理 親 而 Ŀ 有 夫, 也。 不 至 則 而 所 平 將 而 至

> 育」,失其道也。 「夫征不復」,則失漸之正。 豈唯君子自完其己而已乎? 亦使小人得 道相保。君子之與小人比也,自守以正, 其道,所以不育也。 不善。若獨失正,是離其群類。婦孕不由 離叛其群類,爲可醜 利用禦寇,順 所利 也。 卦之諸爻,皆无 在禦寇,謂 相保也。 從欲 而 失正 以

順

故曰「禦寇」。

不陷於非義。

是以順道相保,禦止其惡,

六四,鴻漸于木,或得其桷,无咎。

處。 棲。 則 有不安之象。 非安地,如鴻之進于木也。木漸高矣,而 而上進,豈能安處陰柔之下? 當漸之時,四以陰柔進據剛陽之上,陽剛 无咎也。 謂四之處本危,或能 桷,横平之柯。 如鴻之於木,本不安,或得平 鴻趾連,不能 唯平柯之上,乃能安 自得安寧之道, 握枝,故不 故四之處

一夫 川易傳卷之四 征 不 復」,離群 醜 也。 婦婦 孕不

象

九四五

義也。 必以得失言者,因得失以明其村而處之,則安也。四居正而巽順,宜无

四之順正而巽,乃得桷也。若其義順正,其處卑巽,何處而不安? 如桷者,平安之處。求安之道,唯順與巽。象曰:「或得其桷」,順以巽也。

九五,鴻漸于陵,婦三歲不孕,終莫之勝,吉。 能勝 位。 必亨之理,不正豈能 非 正 未能即合,故三歲 於三四。三比二,四比五,皆隔 陵,高阜也。 遽。 而 雖得尊位,然漸之時,其道之行,固 敵中正,一 ,但其合有 與二爲正應,而中正之德同,乃隔 鴻之所止,最高處也,象君之 時之爲耳,久其能勝乎? 漸 不孕。 耳,終得其吉也。 隔害之? 故終莫之 然中正之道,有 其交者也 以不 亦

上九,鴻漸于陸,其羽可用爲儀,吉。 可用 以其進之用,况上九進之道也。 進至於是,而不失其漸,賢達之高致也,故 中。 飛于雲空,在人則超逸乎常事之外者也。 時,居巽之極,必有其序,如鴻之離所 是出乎位之外。 安定胡公以陸爲達,達,雲路也,謂虚 蔽之義也。上九在至高之位,又益上進, 《爾雅》: 爲 儀 法 而吉也。 九達謂之逵。 在他時則爲過矣,於漸之 羽,鴻之所用 逵,通達 進 空之 止 无阻 而

象曰:「其羽可用爲儀,吉」,不可亂也。 吉,故九雖窮高而不失其吉。 君子之進,自 次,莫不有 序。 下 不失 而上,由微 其序則 而 无 可用爲儀法 著 所 「, 跬 不 得 步 其

象曰:「終莫之勝吉」,得所願也

者,以其有序而不可亂也。

常道。 下, 得 得正位,止静而巽順,其進有漸,男女配 四 義 故受之以歸妹。」進則 動,陰陽皆相應,是男女居室夫婦 相 説女,女從男之義。 長男也。 妹,少女之稱。 歸妹、《序卦》:「漸者進也,進必有所歸 也,男下女,二氣感應,止而説,男女之情 其 感之象。恒,常也,男上女下,巽 ,歸妹所以繼 女從男 咸,恒,漸,歸妹也。 道 漸,女歸之得其正也,男下女而 也。 男動而女説,又以説而 也,而 歸 妹 爲卦,震上兑下,以少女從 漸也。 有説少之義。 ,女之嫁,歸 卦有男女配合之義 必有所至,故漸 歸妹者,女之歸也 咸,男女之相 以説 也,男上女 動,皆男 唱隨 面 順 有 動 合 之 感 者 各 面

> 是矣。 漸、歸 也。 也,咸 當位 象。又有長男説少女之義,故爲歸妹 皆以巽順也。男女之道,夫婦之義,備於 與漸,夫婦之義也,恒巽而 上 動 從之象也。 少女。少女從長男,以説 上,而女從之,嫁歸從男之象。震長男,兑 雖 以 人之所説者少女,故云妹爲 也。 説 當 ĬŁ. 妹,女歸之義。 陰 則不得其正矣,故位皆不當。 歸妹爲卦,澤上有雷,雷震 而説,歸妹動於説,皆以 與漸 陽 物之隨動,莫如水。 之位 正 相對。 ,而陽在下,陰在上 咸與歸妹,男女之情 咸、恒,夫婦之道, 而動,動 動,漸止 説 男動 加 女歸 也。 而 一,亦不 澤動 而巽, 也。 相 初與 恒 説 於

歸妹,征凶,无攸利。

也。 以 説 无所往 征 加 ×, 動 動 動 而 利 加 則 也。 不當,故凶。不當,位 [X] 也。 如卦之義,不獨 不當

彖曰:歸妹,天地之大義也。

故爲女歸之象。「天地之大義也」。男在女上,陰從陽動,天地之常理也。歸妹,女歸於男也,故云一陰一陽之謂道。陰陽交感,男女配合,一陰一陽之謂道。陰陽交感,男女配合,

征凶,位不當也。

説以動,所歸妹也。

所處皆不正,何動而不凶? 大率以説而也。所以征則凶者,以諸爻皆不當位也。者,少女之事,故以「説而動」,所歸者妹以二體釋歸妹之義。男女相感,「説而動」

動,安有不失正者?

无攸利,柔乘剛也。

剛。 之配合,男女之交媾,理之常也。 剛是也。 此常理也,如恒是也。苟不由常正之道, 而流放,不由義理,則淫邪无所不至,傷身 而失其剛,婦狂説 徇情肆欲,惟説是動,則夫婦瀆亂 不唯位不當也,又有乘剛之過。三五皆乘 男女有尊卑之序,夫婦有唱隨之禮 所以凶,无所往而利也。 歸妹之所以凶也。 而忘其順,如歸 ,男牽欲 然從欲 夫陰陽 妹之乘

象曰:澤上有雷,歸妹,君子以永終知敝。 敝也。 女配合,生息相續之象,而以永其終,知有 從,女從男之象也,故爲歸妹。 雷震於上,澤隨 敗德,豈人理哉? 女歸則有生息,故有永終之義。又夫婦之 「知敝 「永終」謂生息嗣續,永久其 謂知物 有做 而 動,陽動 壞,而 爲 於上,陰説 相 繼之道也。 君子觀男 (傳也。 而

慎之。 莫不有可繼可久之道。 觀歸妹,則當思 終也。天下之反目者,皆不能永終者也。 之道,久必敝壞。 説,情之感動,動則失正,非夫婦正而可常 異乎恒之巽而動,漸之止而巽也。少女之 道,當常永有終,必知其有敝壞之理而 不獨夫婦之道,天下之事,莫不有終有敝, 敝壞,謂離隙。 知其必敝,則當思永其 歸妹,説以動者也 戒

初 九、歸妹以娣、跛能履、征吉。 賢,何所能爲? 君而已,如跛之能履,言不能及遠也。然 者也。處説居下爲順 在婦人爲賢貞之德,而處卑順,娣之賢正 女之歸,居下而无正應,娣之象也。 其分爲善,故以是而行則吉也。 不過自善其身,以承助其 義。娣之卑下, 剛 陽

永終」之戒也。

日 歸 妹以 娣」,以恒也。 跛能履吉,相

在

承 也。

助其君,娣之吉也。 能履,然征而吉者,以其能相承 常者也。 九乃剛陽,有賢貞之德,雖娣之微,乃能以 歸妹之義,以説而 雖在下,不能有所爲,如跛者之 動,非夫婦能常之道。 助也。 能

九二,眇能視,利幽人之貞。 九二陽剛而得中,女之賢正者也。

如是之貞,非不足而爲之戒 也。二之才如是,而言利貞者,利,言宜於 當以正禮。五雖不正,二自守其幽静貞 之能視而已,言不能及遠也。男女之際, 助之功,適可以善其身而小施之,如眇者 正,乃所利也。二有剛正之德,幽静之人 而配不良,故二雖賢,不能自遂以 應,而反陰柔之質,動於説者也。 也 成成其 乃女賢 上有正 内

象日 · 「利幽人之貞」,未變常也。

九四九

之道也。 蝶狎爲常,故以貞静爲變常,不知乃常久守其幽貞,未失夫婦常正之道也。世人以

六三,歸妹以須,反歸以娣。

之? 不可以爲人配矣。當反歸而求爲娣 説求歸,動非 者,未有所適也。 故爲欲有歸 无所適,故須也。 也。柔而尚剛,行不順也。爲説之主,以 三居下之上,本非賤者,以失德而无正應, 則 可也,以 不正 -禮也。 圃 未得其歸。須,待也。待 而失其所也。 女子之處如是,人誰取 六居三,不當位,德不正 上无應,无受之者也。

象曰:「歸妹以須」,未當也。

故无取之者,所以須也。未當者,其處、其德、其求歸之道皆不當,

九以陽居四,四上體,地之高也。陽剛在九四,歸妹愆期,遲歸有時。

理,以女賢而愆期,蓋有待也。 後行也。 九居四,雖不當位,而 爲有時,蓋自有待,非不售也,待得 人之道,以无應故爲愆期之義。 地,有賢明之資,人情所願娶,故 也。過時未歸,故云愆期。 女子爲 正德賢明者也。 无 正應,未 女子居 處 而 其 柔 佳 愆期 貴 聖人推 得 乃 高 其 配 婦 乃 歸 而

象曰: 愆期之志,有待而行也。

願娶,所以愆期,乃其志欲有所待,待得佳所以愆期者,由己而不由彼。賢女,人所

配而後行也。

良,月幾望吉。六五,帝乙歸妹,其君之袂,不如其娣之袂

之女,不得失柔巽之道,有貴驕之志。故乙而後正婚姻之禮,明男女之分,雖至貴爲下嫁之象。王姬下嫁,自古而然。至帝六五居尊位,妹之貴高者也。下應於二,

盈也。 也。 《易》中陰尊而 其夫,乃爲吉也。 望,陰之盈也,盈則敵陽矣。幾望,未至於 袂不及其娣之袂良也。良,美好也。 媵者,以容飾爲事者也。 乃尊高之德也,不事容飾以説於人也。 六五尊貴之女,尚禮 <u>Ti</u>. 五之貴高,常不至於盈極,則不亢 是 也。 貴女之歸,唯 謙降者,則曰「帝乙歸 女之處尊貴之道也 衣袂所以爲容飾 丽 謙降 不尚 **'飾,故**: 以 從禮 妹 月 其 娣

其位在中,以貴行也 象曰"「帝乙歸妹」,「不如其娣之袂良」也,

之位,以尊貴 良」,尚禮而不尚飾 以帝乙歸妹之道言,其袂「不如其娣之袂 而不尚飾,乃中道 而 行中道 也。五以柔中,在尊高 也。 柔順降屈 尚

上六,女承筐无實,士刲羊无血,无攸利 上六,女歸之終而 无應,女歸之无終者也。

也

也,故刲羊而无血,亦无以祭也,謂 共承宗廟,婦不能奉祭祀,乃夫不能 祭,禮云血祭,盛氣也。女當承事 侯之祭,親割牲,卿大夫皆然。 古者房中之俎葅歜之類,后夫人職之。 婦者,所以承先祖,奉祭祀。 夫婦之无終者也,何所往而 承祭祀也。 實,无實則无以祭,謂不能奉祭祀 則不可以爲婦矣。 婦不能奉祭祀,則當離絶矣,是 筐篚之實,婦 利哉? 不能奉祭祀, 割取 職 `筐篚 也 所 不 承祭祀 供 ·可以 血 夫婦 而 也。 諸 无 以

象曰:上六无實,承虚筐也

不可以奉祭祀也。女不可以 筐无實,是空筐也。 絶而已,是女歸之无終者也 空筐 可以 承祭祀 祭乎? リ則離

== == 震離 上下

豐、《序卦》: 得其所歸者必大,故受之以

下。 能明,皆致豐之道。 之以豐也。 震,動 物所歸 也。 豐,盛大之義。爲卦,震上離 聚,必成其大,故歸妹之後,受 離,明也。 明足以照,動足以亨, 以 明 而 動 動 而

然後能致豐大也。

豐亨,王假之,勿憂,宜日中。

豐爲盛大,其義自亨。極天下之光大者, 曹为之殷盛,治之豈易周。 爲可憂慮。 道,其唯王者乎! 豐之時,人民之繁庶, 道,其唯王者乎! 豐之時,人民之繁庶, 道,其唯王者乎! 豐之時,人民之繁庶, 少以盛,治之豈易周。 爲可憂慮。

彖曰:豐,大也,明以動故豐。

而成豐大也。豐者,盛大之義。離明而震動,明動相資,

「王假之」,尚大也。

所尚至大也。 大,其保之治之之道亦當大也,故王者之也,故豐大之道,唯王者能致之。所有既也,故豐大之道,唯王者能致之。所有既王者有四海之廣,兆民之衆,極天下之大

宜如日中之盛明,普照天下,无所不至,則所有既廣,所治既衆,當憂慮其不能周及,勿憂,宜日中」,宜照天下也。

豐大,豈小才小知之所能也?可勿憂矣。如是,然後能保其豐大。

而况于人乎? 况于鬼神乎?日中則昃,月盈則食,天地盈虚,與時消息,

神乎? 日 於萬物盛衰,可見其消息也。 之運,亦 缺。天地之盈虚,尚與時消息,况人與 既言豐盛之至,復言其難常,以 中盛極,則當昃昳, 月既盈 隨 盈虚謂盛 時 進 退 也 衰,消息謂 鬼神謂造化之迹, 於豐盛之時 進退。 滿, 爲 則 誡 天地 有 也。 鬼

保有

而爲此誡,欲其守中,不至過盛。處豐之

道, 豈易也哉?

「雷電皆至」,明雯逆行也。二體相合,故象曰:雷電皆至,豐,君子以折獄致刑。

象,「 姦惡,唯 者必照其情實,唯明克允。致刑者以 也,照察之象。 云「皆至」。 電皆至」,明震並行也。二體相 以折獄致刑」也。 斷 乃 明 成。 動 震,動也,威斷之象。 相資,成豐之象。 故君子 噬 嗑言先王飭 觀雷電 明 合,故 離 動 折 威 之 於 獄 明

威震,君子之用,故爲「折獄致刑」。旅,明者之事,故爲制刑立法,以明在下而麗於豐言君子折獄。以明在上而麗於威震,王

獄,君子皆當然也。

在上, 而云君子者, 旅取慎用刑與不

留

初 九,遇其配主,雖旬无咎,往有尚 道 雷 電皆至,成豐之象;明 非 明 无 以 照,非 動 无 以 動 行,相 相 資 ,致豐之 須 猶 形

象

所配 初,宜 日 從, 則相 也。 共 影,相資猶 无所用,相資而成用。 无過咎也。 非均敵。 以配君子,故初於四云配,四於初云夷也。 相資,其應則相成,故雖均 上,敵則安肯相從? 雖旬无咎」,旬,均也。 難 . 則能成其豐,故云「有尚」,有 也。 應, 在他卦,則不相下而離隙矣 則 雖旬无咎」,過旬災也 相 仇怨協力,事 用則相資,故初謂四爲「配主」, 須 如陰之應陽,柔之從剛,下之附 配雖匹稱,然就之者也。 以 表裹。初九明之初,九四動之 蓋非明則動无所之,非 成 其 八用,故 勢使然 唯豐之初四,其用 同舟則胡越一心, 天下之相應者,常 雖 是陽剛,相從 旬 也。 而 相 可 往 如配天 動 應。 嘉 ௱ 則明 位 則 尚 相 而

「上」,原作「土」,據涂刻本改。

九五三

患當 與 聖 以 則 不 是過旬 從 相 人 相 人 事。 至矣 同 下 因 求 也。 者,常理也。 也 時 而 若懷先己之私,有加 一,初四 故 力均 而 處宜 日一過 求勝,則不能同 者,在乎降己 是 隨 也,所以 旬災也」。 然有 事 圃 順 雖 雖 理。 以 敵 旬 矣。 均 上之意,則 相 圃 m 夫勢均則 而 求 相資者 无 協 先己, 咎 也。 力

若,吉。 六二,豐其蔀,日中見斗,往得疑疾,有孚發

明動 能 成 不 中正 見斗」,二,至明之才,以 應之才不足資,則獨明不能 相資之時,居相應之地,五才不足。 豐 Ė 成其豐,喪其明功,无明功則爲昏暗,故 可謂 非 ,則喪其明功,故爲「豐 相資,乃能成豐。 能 明者也,而 動 者 二 五 五 二爲明之主,又得 雖皆陰,而 在正 所 應不 其 成豐。既不 應之地,陰柔 褯 足與 _ 在 日 既 明 而 能 其 不 中 動

> 志 公,孔明之輔後主是也。若能 誠 可開 不能 至 運 古人之事 感發其志意而 君子之事上 疾。暗主如是 以昏見、言見斗、則是明 用 時乃見斗,猶豐大之時乃遇柔弱之主。 云「見斗」。 乎象。 意,則得行其 明 意上達,而 障蔽之物掩 下 中正之才,所遇乃柔暗不正之君,既 也,雖柔弱 求於己,若往求之,則反得疑猜 庸君 五以陰柔而當君位 斗,昏見者也。 也,不得其 君見信之篤耳,管仲之相 己。 常主,而克行 也,然則如之何 晦於明者也。 道,乃爲吉也 可輔 苟誠意能 也,雖不正 心則盡其至誠 喪而暗矣。二雖 蔀 其道者,己之 動 , 日 斗屬 以 川則 而 周 誠信 中 可 可? 匝之義, 盛 陰 雖昏蒙 Ē 發 明之 而 也。 其 夫 忌 斗 主

象曰:「有孚發若」,信以發志也。

「有孚發若」,謂以己之孚信,感發上之心

志 可 發之道 也 荷 也 能 發 則 其吉 可 知 0 雖 柔 暗, 有

九三,豐其沛,日中見沬,折其右肱,无咎 其无 陽剛 於四 卦至 相資 如 處 其沛,其暗更甚於蔀 幔,則是「斾」也。 中而見沬者也。 應,則不能成豐。 見沫」,暗之甚 沛」字,古本有作「斾 於天 震 一終則 [者,所 之折 能 之終,既終則止矣,不能動 而 得 下。 爲 成。 正 一,本能 其 可 極,震 應 三應於上,上陰柔,又无 知。 右 上 陰 肱 无 也。 明 暗 至終 賢智之才,遇明君則能 右肱,人之所用,乃折 也 可 沬,星之微小无名數者。 者 故 幡幔,圍 賴之主,則不 豐之時 也。 也。 也。 則 」字者。 人之爲有所失 止 豐 三居 三明體 矣。 敝 之道 而 於内者。 王弼以爲 明 遇上六,日 三无上之 者也 前 小必 能 體之上, 有爲 位 反 則有 明 有 他 動 暗 豐 幡 而

九

四,豐其蔀,日中見斗,遇其夷主,吉。

言? 肱 所 欲 歸 咎, 无所 爲 而 日 歸 上 由 无 咎 是 所 也 故 賴 致 則不 是。 能 若 而 欲 已 動 而 更 復 无 右 何

肽」,終不可用也。 象曰:「豐其沛」,不可大事也。「折其右

既 Ξ 肱之折,終不可用 終,其可共 應於上,上應 濟 大事 而 矣。 无 乎? 位 ,陰柔无勢力 既无 所賴 如 而 右 處

是其 也? 周 不 也 當盛明之時,反昏暗 大 兀 ,相應故謂之「主」。 圍 中 雖 臣之位 德 則不大,掩 陽剛,爲動之主,又得大臣之位,然以 E 故爲「豐其蔀」。 同 遇 ,而得在下之賢 ,又居相應之地,故 陰暗 蔽則 柔弱之主,豈 也。 不 蔀,周 明。 初 四皆陽 同德 夷主」,其等夷 虛 日 爲 相 掩蔽之物。 能 夷主。 中見斗」, 輔,其 而 致 居 豐 初, 大 助

象曰:「豐其蔀」,位不當也。 爲? 豈 无虚中巽順下賢之象,下雖多賢,亦將何 豐,有君而後能也。 助, 豈无益乎? 者上有當位爲之與,在上者下有賢才爲之 之賢爲之助,則能致豐大乎? 小 也 蓋非陽剛中正,不能致天下之豐也。 哉 故吉也。 故吉也。然而致天下之 五陰柔居尊,而震體, 如四之才, 曰:在下 得在

「位不當」,謂以不中正居高位,所以闇而

不能致豐。

「日中見斗」,幽不明也。

謂幽暗不能光明,君陰柔而臣不中正

故也。

「遇其夷主」,吉行也。

陽剛相遇,吉之行也。下就於初,故云行。

下求則爲吉也。

六五,來章有慶譽,吉。

人設此義以爲教耳。 譽」而吉也。然六五无虚己下賢之義,聖 吉也。章美之才,主二而言。然初與三 大。 有相爲用之義。五若能「來章」,則「有慶 五與二雖非陰陽正應,在明動相資之時, 雖陰,有文明中正之德,大賢之在下者也。 四,皆陽剛之才,五能用賢,則彙征矣。二 而委任之,可以致豐大之慶、名譽之美,故 正,章美之才也。 福慶,復得美譽,所謂吉也。六二,文明中 五以陰柔之才,爲豐之主,固 若能來致在下章美之才而用之,則有 爲五者,誠能致之在位 不能成 其

象曰:六五之吉,有慶也。

君雖柔暗,若能用賢才,則可以爲天下之其所謂吉者,可以有慶福及于天下也。人

上六,豐其屋,蔀其家,闚其户,闃其无人,三福,唯患不能耳。

歲不覿,凶。

能也 滿假 宜矣。「不覿」,謂尚不見人,蓋不變也。 无人」也。 至於三歲之久而不知變,其凶 陰柔, 當豐大之任,在乎得時,而不當位。 而 六居卦終,有變之義,而不能遷,是其才不 自絶於人,人誰與之? 陰柔居豐大,而在无位之地,乃高亢昏暗, 屋」,處太高 如上六者,處无一當,其凶可 以陰柔之質,而居豐之極,處動之終,其 處 躁 極高,致豐大之功,在乎剛健,而體 動甚矣。 也。 「蔀其家」,居不明也。 處豐大之時,宜 故「闚其户,闃其 知。 子謙屈 「豐其

无人」,自藏也。 象曰:「豐其屋」,天際翔也。「闚其户,闃其

際,謂其高大之甚。闚其户而无人者,雖六處豐大之極,在上而自高,若飛翔於天

自高大,故皆棄絶之,自藏避而弗與親也。居豐大之極,而實无位之地,人以其昏暗

=== 離 見 上 下

象,故爲旅也。又麗乎外,亦旅之象。山止而不遷,火行而不居,違去而不處之山止而不遷,火行而不居,違去而不處之以。過豐盛至於窮極,則必失居,故受之以旅。」豐盛至於窮極,則必失旅、《序卦》: ●「豐,大也,窮大者必失其

旅,小亨,旅貞吉。

之貞正而吉也。以卦才言也。如卦之才,可以小亨,得旅

六上居五,「柔得中乎外」也。 麗乎上下之而麗乎明,是以「小亨旅貞吉」也。

剛,「順乎剛」也。下艮止,上離麗,止而麗

●「卦」,原作「封」,據涂刻本改。

九五七

於 之中也。 也。 之時,非陽剛中正,有助於下,不能致 明,是以小亨,得旅之貞正而 處旅之道 明 也。 所謂得在外之中,中非一揆,旅 止麗於明, 柔順 而得在外之中,所止能 則不失時宜,然後得 吉也。 有 麗 大 旅 旅 亨 困 於

旅之時義大矣哉

天下之事,當隨時各適其宜,而旅爲難處

故 稱 其 時義之大。

留 象曰: 山上有火,旅,君子以明慎用刑,而不 獄。

獄。 火之在 則 而 以 滯 止 獄者 淹 ,亦慎象。 明慎用刑。 久也 高,明无不照。 不得 已 觀火行不處之象,則不 明不可恃,故戒於慎。 m 設、民 君子觀明 有罪 而人,豈 照之象, 明 可 留

初六、旅瑣瑣、斯其所取災。

留

之狀。當旅困之時,才質如是,上雖有援, 乃其所以致悔辱,取災咎也。 卑之人,既處 也,又在旅,與他卦爲大臣之位者異矣。 无能爲也 人,處旅困 六以陰柔在旅之時,處於卑下,是柔弱之 而在卑賤,所存污下者也。 四,陽性而離體,亦非 旅 困,鄙猥瑣細,无所不至, 瑣瑣,猥細 就下者

象曰:「旅瑣瑣」,志窮災也

分,獨言則謂災患耳。 志意窮迫,益自 取災也。災、眚,對言則 有

六二,旅即次,懷其資,得童僕貞。

忠信。 貨,旅所 亦處旅 則處不失當,故能保其所有,童僕亦盡 二有柔順中正之德,柔 舍,懷畜其資財,又得童僕之貞良,旅之善 雖不若五有文明之德、上下之助, 之善者也。 資也。 童僕,旅 次舍,旅 順 所 則衆與之,中 賴 所安也。 也。 得 就 財

也。 也。 得免於災厲,則已善矣。 所親比者,童僕也。 二,柔順 柔弱在下者,童 中正,故得内外之心。 不云吉者,旅寓之際, 也。 强壯處外 者 在旅 僕

象曰:得童僕貞,終无尤也。

貞,終无尤悔矣。 覊旅之人,所賴者童僕也,既得童僕之忠

九三,旅焚其次,喪其童僕貞,厲。 之道也。 童僕之貞信, E 不順於上,故上不與而焚其次,失所安也。 在旅而過剛自高,致困災之道也。 中,又居下體之上與艮之上,有自高之象。 處旅之道,以柔順謙下爲先。三剛 離 爲 焚象,過 ,謂失其 剛 則 八心也。 暴 下,故下離 如此,則危厲 自高則 而 喪 加 其 不

其義 象曰:「旅焚其次」,亦以傷矣。 喪也。 以旅與下,

> 剛自高 在旅而失其童僕之心,爲可危也。 而 旅焚失其次舍,亦以困 與下 -之道如: 待下,必喪其忠貞,謂失其 此、義當喪也。 傷矣。 在 以 旅 旅之時, 而 心也。 以過

九四,旅于處,得其資斧,我心不快。

能伸其才,行其志,其心不快也。云「我 善,然上无剛陽之與,下唯陰柔之應,故不 而得貨財之資、器用之利也。 次舍也。 然四非正位,故雖得其處止,不若二之就 才,爲五所與,爲初所應,在旅之善者也。 有用柔能下之象,得旅之宜也。 四,陽剛,雖不居中,而處柔在上體之下, 有剛明之才,爲上下所與,乃旅 雖在 以剛明之 旅 爲

心未快 象曰:「旅于處」,未得位也。「得其資斧」, 也

者,據四而言。

四 以近君爲當位,在旅,五不取君義,故四

斧,於旅爲善,其心志未快 以剛明之才,欲得時 爲有咎矣。曰: 「未得 位 也 ____ 以剛 日 0 而 居柔,旅之宜 然則 行其志,故雖得資 也 以 九 居 四不 也 九 正

六五,射雉,一矢亡,終以譽命。 旅,旅則失位 故 无不中, 命,福禄也。 明之道而必合。 離爲雉,文明之物。 失,則困辱隨之, 文明之道,可謂善矣。 與之,處旅之至善者也。 六五有文明柔順之德,處得中道,而 動必中文明之道也。五,君位,人君无 則終能 ,故不取君義。 五居文明之位,有文明之德 致譽命也。譽,令聞也。 如射雉,一矢而亡之,發 動而无失,然後爲善。 「射雉」,謂取則於文 覊旅之人,動 人之處旅,能合 上下 圃 或

有文明柔順之德,則上下與之。逮,與也。象曰:「終以譽命」,上逮也。

之時 譽命,則 之,所以致譽命也。 能 而得乎下,爲下所上逮也。 順 也。 承 於 非 「終 上而 旅 也。 以譽命」,終當致譽 上與之,爲 困 旅者,困 而親寡則爲旅,不必 上 在旅 所 而未得所 逮 命也。 而 也 上下 言上 已 安 與

易,凶。上九,鳥焚其巢,旅人先笑,後號咷,喪牛于

在外也。

所以 易以失其 失安莫與,故「號咷」。 自處於至高,始快其意,故「先笑」, 其所安,无所止也。 其所宜安矣。 時,謙降柔和,乃可自保,而過剛自高, 高,又離體,其亢可知,故取鳥象。 鳥,飛騰處高者也。 凶 也。 (順也。 4, 巢,鳥所安止。焚其巢,失 順物。 離火性上,爲躁易之象。 在離上爲焚象。 上九,剛不中 輕易以喪其 喪牛于易」,謂忽 在旅 而處 順 陽 之 剛 而 最

上承「鳥焚其巢」,故更加「旅人」字。 不云

旅人」,則是鳥笑哭 也

象曰:以旅在上,其義焚也。 「喪牛于易」,

終莫之聞也。

甚焉。 居? 極,固有高亢躁動之象,而火復炎上,則又 知,則不至於極而號咷矣。 高,爲得志而笑,不知喪其順德於躁易,是 「終莫之聞」,謂終不自聞 「以旅在上」,而以尊高自處,豈能保其 其義當有焚巢之事。 知也。使自覺 陽剛不中而 方以 極 剛 自

三 巽巽 上下

巽 苟能異順,雖旅 巽者人也。」覊旅親寡,非巽順何所取容? 巽、《序卦》:「旅而无所容,故受之以巽 所以次 旅 也。 困之中,何往而 爲卦,一 陰在二陽之下, 不能 人?

巽順於陽,所以爲巽也

巽,小亨,利有攸往,利見大人。 人」也。異與兑皆剛,中正異説,義 卦之才可以小亨,「利有攸往」,「利見大

亦 相

性柔也,異之亨所以小也。 巽陰之爲也, 兑柔在外用柔也, 巽柔在内 類,而兑則亨,巽乃小亨者,兑陽之爲也,

彖曰:重巽以申命。

剛巽乎中正而志行,柔皆順乎剛,是以小亨。 以卦才言也。 其命令。申,重復也,丁寧之謂也。 重巽者,上下皆巽也。上順道以出命,下 上行也。又上下之柔,皆巽 中正之道也。 重爲重複之義。君子體重巽之義,以申復 奉命而順從,上下皆順,重巽之象也。又 如是,雖内柔,可以小亨也。 陽性上,其志在以中正之道 陽剛居巽而得中正,巽順於 (順於剛,其才

利 有 攸往 ,利見大人。」

五二之陽剛中正,大人也。巽順不於大 正之大人,則爲利,故「利見大人」也 順 順之道 雖 一、无往 道,必知所從,能異 不能人,故「利 順 有攸往 於 陽 剛 如 中

人,未必不爲過 也

象日 隨風巽,君子以申命行事。

事。 也。 之,下順上而從之,上下皆順,重巽之 兩 風 重 命令政事,順 隨 巽 相 與 相 重,隨風也。 総 重,上下皆順也。 以 順之象,而以申命令,行 理則合民心, 隨,相繼之義。 上順下 而 民 君子 圃 義 順 出 政

初六,進退,利武人之貞。

從矣。

志意恐畏而不安,或進或退,不知所從,其 過於卑巽者 六以陰柔居卑,巽而不中 也。 陰柔之人, 卑異太 - , 處最 下 ൬ 八過,則 承 剛

> 失矣。 則爲 所利在 宜 也。 武人之貞。 勉 爲 剛貞 若能 則 用 无 武 過卑恐畏之 人剛貞之志

象曰: 「進退」,志疑 也。 「利武人之貞」,

治也。

之剛貞,以立其志,則其志治也。 進退不知所安者,其志疑懼 也。 利 治謂 用 武

九二,巽在牀下,用史巫紛若,吉无咎 立也。

可以遠 安於謙異,能使通其誠意者多,則吉 通 於巽,非有邪心也。 非正也。二實剛中,雖異 安矣。人之過於卑異,非恐怯則 牀,人之所安。巽在牀下,是過於巽,過所 二居巽時,以陽處陰而在下,過於巽者也 誠 意 耻 於神明者也。 辱、絶怨咎,亦吉道也。 恭巽之過,雖非 紛若,多也。 體 加 居 柔 諂 史巫者, 苟至 ,爲過 说,皆 正禮, 而 无

咎,謂其誠足以動人也。 人不察其誠意,

則以過巽爲諂 矣。

象日 :「紛若」之吉,得中也。

中實之象。 誠意,則非諂畏也,所以吉而无咎。 誠意者衆多紛然,由得中也。 二以居柔在下,爲過巽之象,而能使通其 中既誠實,則人自當信之。 陽居中,爲 以

九三,頻巽,吝。

巽,是可吝也。 之以異,又四以柔異相親,所乘者剛,而 復有重剛,雖欲 爲之,故屢失也。 剛亢之質而居巽順之時,非能巽者,勉 三以陽處剛,不得其中,又在下體之上,以 不巽,得乎? 居巽之時,處下而 故頻失而 上 臨 頫 F 而

象曰:「頻巽」之吝,志窮也。

剛 三之才質,本非能異,而上臨之以異,承重 而履剛,勢不得行其志,故頻失而頻巽

是其志窮困,可吝之甚也

六 四,悔亡,田 獲三品

悔亡 或可以爲功也。 能巽於上下之陽,如田之獲三品,謂遍及 乾豆,一供賓客與充庖,一頒徒御。● 品」,及於上下也。 以得悔亡,以如田之獲三品也。「田 下,巽於下也。 能 以陰居陰,得巽之正,在上體之下,居上 陰柔无援,而承乘皆剛,宜有悔也。 上下也。四之地本有 下也。居上之下,巽於上也。 而復有 功。 善處 天下之事,苟善處,則悔 田獵之獲分三品,一爲 如此,故得悔亡。 悔,以處之至善,故 以 [獲三 巽 而 所 臨 而 四 四

象曰:「田獲三品」,有功也。

巽於上下,如田之獲三品而遍及上下,成

0 頒」,原誤作「頌」,據四庫本《伊川易傳》改。

巽之功也。

日,後庚三日,吉。九五,貞吉悔亡,无不利,无初有終,先庚三

者,變更之始也。十干戊己爲中,過中 改之道當如是也。 也?「先庚三日,後庚三日,吉」,出 善也。若已善,則何用命也? 巽出令,皆以中正爲吉。 則吉而悔亡,无所不利。 利 得中正,盡巽之善。然巽者柔順之道,所 變,故謂之庚。事之改更,當原始要終,如 變更也。 有悔,安能无所 五居尊位,爲巽之主,命令之所出也。 先甲」「後甲」之義,如是則吉也。 蠱》桂。 在 貞,非五之不足,在異當戒也。既 无初,始未善也。 不利也? 甲者,事之端 柔巽而不貞,則 貞,正中也。 命令之出,有所 有終,更之使 何用 也。 解 命 貞 在 則 庚 更 更 處 處

象曰:九五之吉,位正中也。

得其中也。處柔巽與出命令,唯得中爲吉,而其悔亡也。正中,謂不過无不及,正九五之吉,以處正中也。得正中之道則

善,失中則悔也。

正乎? 凶也。 象曰:「巽在牀下」,上窮也。「喪其資斧」,

之曰:「得爲正乎?」復斷之曰:「乃得爲正乎? 乃凶道也。巽本善行,故疑於窮極也。居上而過極於巽,至於自失,「巽在牀下」,過於巽也。處卦之上,巽至

説,相説則相入,兑所以次巽也 故受之以兑。兑者,説 兑、《序卦》:「巽者,人也。 也。」物相 入而後説之, 人 則 相

兑亨,利貞。

咎,故戒利貞也 莫不説而與之,足以致亨。 兑,説也。説,致亨之道也。 利於貞正。 非道求説,則爲邪諂 然爲説之道 能説於物,物 而有悔

彖曰: 兑, 説也。

其死。説之大,民勸矣哉! 人。説以先民,民忘其勞,説以犯難,民忘 剛中而柔外,説以利貞,是以順乎天而 應乎

陽,而爲陽所 兑之義,説也。 説 一陰居二陽之上,陰説 也。 陽剛居中,中心 誠 實 於

伊川易傳卷之四

之象; 人君之道,以人心説服爲本,故聖人贊 難,則民心説服於義而不恤其死。 先民,則民心説隨而忘其勞,率之以犯 天地之施,感於其心而説服无斁。 非君子之正道。君子之道,其説於民,如 若夫違道以干百姓之譽者, 苟説之道。 剛中之德,能貞者也。説而能貞,是以上 而能 大,民莫不知勸。 道不順天,干譽非應人,苟取一時之説耳, 順天理,下應人心,說道之至正至善者也。 貞也。「利貞」,説之道宜正也。 柔爻在外,接物和柔之象,故 勸謂信之,而勉力順從。 故以之 説道之 桂 爲 違 有 説

其大。

象曰:麗澤兑,君子以朋友講習。

潤,互有滋益 麗澤,二澤相附麗也。 朋友講習」。 一之象。 朋友講習,互相 故君子觀 兩澤相麗,交相 益也。 其象,而 先儒 以 浸

九六五

九六六

初九,和兑,吉。 講習」,固可説之大者,然當明相益之象。 謂 天下之可説,莫如 「朋 友講習」。 川朋 友

偏。 能卑下和順以爲説,而无所偏私者也。以 不卑,居下則能巽,處説則能和,无應則不 和爲説,而无所偏私,説之正也。陽剛 初雖陽爻,居説體而在最下,无所繫應,是 處説如是,所以吉也 則

象曰:「和兑」之吉,行未疑也。 《象》又以其處説在下而非中正,故云「行 也,若得中正,則无是言也。説 未疑也」。其行未有可疑,謂未見其有失 本,爻直陳其義,象則推而盡之。 无所繫,无所爲也,以和而已,是以吉也。 有求而和,則涉於邪諂。 初隨 時順處,心 以 中正爲

九二,孚兑,吉,悔亡。 一承比陰柔,陰柔,小人也,説之則當有

> 自守而亡也。 故吉而悔亡。非二之剛中,則有悔矣,以 守不失。君子和而不同,説而不失剛中, 悔。二,剛中之德孚信内充,雖比小人,自

象曰:「孚兑」之吉,信志也。 是以吉也。 也。志存誠信, 豈至説小人而自失乎? 心之所存爲志。二剛實居中,孚信存於中

六三,來兑,凶。 來。上下俱陽,而獨之内者,以同體而 枉己非道,就以求説,所以凶也。之内爲 「來兑」,就之以求説也。比於在下之陽, 六三陰柔不中正之人, 説不以道者也。

九四、商兑未寧、介疾有喜。 象曰:「來兑」之凶,位不當也。 自處不中正,无與而妄求説,所以凶也。

性下也,失道下行也。

陰

若剛介守正,疾遠邪惡,將得君以 界則加「田」,義乃同也。故人有節守謂之 未能有定也。兩間謂之介,分限也。地之 决而 陽 四上 繫所從耳。 慶及物爲有喜也。 從五,正也,說三,邪也。四,近君之位, 介,若介然守正,而疾遠邪惡,則有喜也。 而 商 處 承中正之五,而 度。「未寧」,謂擬議 非 Ē 三,陰柔,陽所説 若四者,得失未有定, 下比柔邪之三,雖 所從而未决, 也,故 行道,福 不能 剛

象曰: 陽之道,而福慶及物也。 所謂喜者,若守正而君説之,則得行其 九四之喜,有慶也 剛

九五,孚于剥,有厲。 戒 聖人復設有厲之戒,蓋 九 也,戒 五得尊位而處中正,盡説道之善矣,而 所當 戒而已。 堯、舜之盛、未嘗无 雖聖賢在上,天下

> 是也。 其能勉 可懼也如此。 言令色,安得不戒也? 比於上六,故爲之戒。 故 者,消陽之名。陰,消陽者 不至則害於善,聖人爲戒之意深矣。剥 强仁耳。 賢之可説也。 未嘗无小人,然不 而不知其包藏,則危道也。 「孚于剥」則危也。 聖人非不知其終惡也,取其畏罪 而 五若誠 革 面 如 也 心信小人之假善爲實善, 四 敢肆其惡也,聖人亦說 彼小人者,未嘗 凶處堯朝,隱惡而 以五在説之時,而密 雖舜之聖,且畏巧 説之惑人,易入而 也,蓋指上六, 小人者,備之 不 知 而 聖 命

象曰:「孚于剥」,位正當也。 密比陰柔,有相説之道,故戒在信之也。 戒 「孚于剥」者,以 五. 所處之位

正

當戒也

他卦至極則變,兑爲説極則愈説。 上六成

上六,引兑。

九六八

説。六三則承乘皆非正,是以有凶。善惡也,又下乘九五之中正,无所施其邪也。 曰:方言其説不知已,未見其所説既極矣,又引而長之。然而不至悔咎,何既極矣,又引而長之。然而不至悔咎,何

象曰:「上六引兑」,未光也。

必能有光輝,謂不能光也。 有光也? 未,非必之辭,《象》中多用。非輝。既極而强引之長,其无意味甚矣,豈而事理已過,實无所説。事之盛,則有光説既極矣,又引而長之,雖説之之心不已,

異坎上下

也。爲卦,巽上坎下。風行於水上,水遇聚,説則舒散,故説有散義,涣所以繼兑故受之以涣。」説則舒散也,人之氣憂則結故受之以涣。」説則舒散也。説而後散之,

風則涣散,所以爲涣也。

涣,亨,王假有廟,利涉大川,利貞。

心,則散可聚也。故卦之義,皆主於中。則散矣。治乎散,亦本於中,能收合人涣,離散也。人之離散,由乎中,人心離,

利貞,合涣散之道在乎正固也。

上同。 彖曰:「涣,亨」,剛來而不窮,柔得位乎外而

中,則不至於離散,故能亨也。 與之能亨者,以卦才如是也。與之成涣, 海之能亨者,以卦才如是也。與為之成涣, 海之能亨者,以卦才如是也。與為之成涣,

「王假有廟」,王乃在中也。

「王假有廟」之義,在《萃》卦詳矣。天下離

也。 其 散之時,王者收合人心,至於有廟,乃是在 至于有廟,拯涣之道極於此也。 所歸從也。歸人心之道,无大於此,故云 有道,得其心斯得民矣。」享帝立廟,民心 之道,在 上同,卦才之義,皆主於中也。 个中也。 中者心之象。 得其中而已。 「在中」謂求得其中,攝其 剛來而不窮,柔得 孟子曰:「得其 王者 心 拯涣 之謂 位 民 而

「利涉大川」,乘木有功也。

義,有是象也。 、治涣之道,當濟於險難,而卦有乘木濟川治涣之道,當濟於險難,而卦有乘木濟川治,當濟於險難,而卦有乘木濟川治涣之道,當濟於險難,而卦有乘木濟川治,與之道,當濟於險難,而卦有乘木濟川治,

天下之涣散,至于享帝立廟也。收合人風行水上,有涣散之象。先王觀是象,救象曰:風行水上,涣,先王以享于帝,立廟。

帝立廟,人心之所歸也。繫人心,合離散心,无如宗廟。祭祀之報,出于其心,故享

之道,无大於此。

初六,用拯馬壯,吉。

求。 涣,如得壯馬以致遠,必有濟矣,故吉也。 得馬壯,所以吉也。 六居卦之初,换之始也。 涣拯於始,爲力則易,時之順也。 於涣也,爲教深矣。 離散之勢,辨之宜早,方始而拯之,則不至 之才,初陰柔順,兩皆无應,无應則親比 於壯馬,故能拯涣。 初之柔順,而託於剛中之才,以 馬謂二也。二有剛 馬,人之所託也。 六爻獨初 始涣 不云涣者, 圃 拯之,又 拯其 託 相 中

象曰:初六之吉,順也。

始涣而用拯,能順乎時也。 初之所以吉者,以其能順從剛中之才也

九二,涣奔其机,悔亡。

豈能 應,而 豈 柔微 矣。 俯 則 諸 儒皆以 相 而 一爲馬。 成,則 就 得 處 爻 止悔亡而 皆 同也? 險中,其 ,何足賴 悔 初雖坎體,而不在險中也。 當涣離之時,兩皆无與,以陰陽親 下 五爲 云 广 也。 相賴 也。 二急就於初以爲安,則能亡 涣 已? 若能! 机,非 ? 者 奔, 有 謂 机 也。 悔 涣之 蓋涣之時,合力爲勝。 急往 机 者, 同 也。 可 謂 故二目 則 知 時 也。 俯 俯 成 方涣離之時 也 憑 若 就 濟 以 也 一初爲 能 涣之功當大, 在 與 爲 奔 涣 初雖 或疑 安 就 机 離 一陽 者 所 之 非 初之 其 初 也。 安, 時 先 悔 謂 比 IE

象

EI:

「涣其躬」,志在

外

也

象日 初,求安也。 涣散之時,以合爲安。 **海奔** 其机」,得願 賴之如机 二居 也。 而亡其悔,乃得所 險 中,急就

於

六三,涣其躬,无悔。

願

也

以陰 以无 豈 Ξ 涣 之悔 能 在 悔 柔之質,不中正之才,上居无位之地, 涣 拯 時 時 而 也。 己。 之涣 獨 有 上 而 應 加 及人也? 》與,无 涣字,在 涣散 涣之時, 止於其身, 之悔 也 无 然 可

无悔者,本无 免於涣 志應於上,在外也。 而无悔。 也 悔 亡者,本有 與上 相應,故其 ൬ 得亡; 身得

六

之依 時, 位; 四 柔 君,君臣同功,所以能濟涣也。 涣,四、五二爻義相 曰「上同」也。 相 ,涣其群,元吉。 用 濟,以 五,剛中而 歸 剛 則不 四 拯 以 能使之懷附,用柔 天下之涣者也。 巽 Œ 四 一,居 順 I, 巽 涣有丘,匪 之正 須,故通言之、《彖》故 君位。 順 道, 而 正,居大臣 君 輔 夷所 天下涣散, 臣合力, 岡山 方涣 則 中 不 思 散 IE 足 之 之 之 剛

之見所能思及也。非大賢智,孰能如是?也。方涣散而能致其大聚,其功甚大,其止,匪夷所思」,贊美之辭也。丘,聚之大丘,匪夷所思」,贊美之辭也。丘,聚之大而能使之群聚,可謂大善之吉也。「涣有而能使之群聚,可謂大善之吉也。「涣有

稱「元吉」者,謂其功德光大也。元吉光大象曰:「涣其群,元吉」,光大也。

言其施用,於五言其成功,君臣之分也。

不在五而在四者,二爻之義通言也。於四

九五,涣汗其大號,涣王居,无咎。 也。 令也,謂新 下之涣,居王位 涣得其道矣。 唯在浹洽於人心,則順 涣者,上 五與四君臣合德,以剛中正巽順之道,治 體 當使號令洽於民心,如人身之汗 ,則信服而從矣。 謂 民之大命,救涣之大政。 涣之時,下謂處涣如是則无咎 爲稱而无咎。大號,大政 如是,則可以 再云 :浹於 濟天 從

> 相須,時之宜也。 也。非君臣同功合力,其能濟乎? 爻義之四五通言者,涣以離散爲害,拯之使合也。在四已言元吉,五唯言稱其位也。涣

王居,謂正位人君之尊位也。能如象曰:「王居无咎」,正位也。

五之

爲,則居尊位爲稱而无咎也。

象曰:「 上九,涣其血去逖出,无咎。 有也。 應於三,三居險陷之極,上若下從於彼,則 涣之諸爻,皆无繫應,亦涣離之象。惟上 極 能使其血去,其惕出,則无咎也。 象,又居巽之極,爲能巽順於事理,故云若 血惕。然九以陽剛處涣之外,有出涣之 不能出於涣也。 ,有繫而臨 涣其血」,遠害也 涣之時,以能合爲功,獨九居涣之 險,故以能出涣遠害爲善也。 險有傷害畏懼之象,故云 其者,所

去惕出」,謂能遠害則无咎也。也,義則不然。蓋「血」字下脱「去」字,「血若如象文爲「涣其血」,乃與「屯其膏」同

故爲節。 故爲節。 並爲主之, 立之以節。」物既離散,則當節止之, 能,故受之以節。」物既離散,則當節止之, 能,故受之以節。」物既離散,則當節止之, 節所以次涣也。爲卦,澤上有水。澤之容 以為

節,亨,苦節不可貞。

也?不可固守以爲常,「不可貞」也。貴適中,過則苦矣。節至於苦,豈能常事既有節,則能致亨通,故節有亨義。節

彖曰:「節亨」,剛柔分而剛得中。

卦之才,剛柔分處,剛得中而不過,亦所以節之道,自有亨義,事有節則能亨也。又

節至於極而苦,則不可堅固常守,其道已一苦節不可貞」,其道窮也。

窮極也。

説以行險,當位以節,中正以通。

面,過則苦矣。 因,過則苦矣。 因,過則苦矣。 因,過則苦矣。 因,過則苦矣。 因,過則思止。 方説 以對才言也。 内於所説則不知已,遇艱險則思止。 方説 以對才言也。 内於外坎,「説以行險」也。 以對才言也。 方説

通,過則苦矣。

害民。 天地節而四時成,節以制度,不傷財,不

度,則侈肆至於傷財害民矣。 傷 推言節之道。 節則失序也。 財 害民。 人欲之无 聖人立制度以爲節 天地有節,故能成 窮也,苟 非 ,故能 四 節 一時,无 以 制

象曰:澤上有水,節,君子以制數度,議

德行。

則中節 節也 大小、輕重、高下、文質,皆有數度,所以爲 也。 澤之容水有限,過則 存諸中爲德,發於外爲行。 君子觀節之象,以制立數度。 數,多寡。度,法制。 議,謂商度求中節也。 盈 溢,是有節,故爲 人之德行 「議德行」者, 凡物之 當義 節

初九,不出户庭,无咎。

安能有卒? 故於節之初,爲戒甚嚴也。咎也。初能固守,終或渝之。不謹於初,之初,故戒之謹守,至於「不出户庭」,則无之称,故戒之謹守,至於「不出户庭」,則无以矣。 內以

象曰:「不出户庭」,知通塞也。

庭」則「无咎」也。象恐人之泥於言也,故爻辭於節之初,戒之謹守,故云「不出户

出矣。 時之通 在人所節,唯言與行,節於言則行可知,言 故君子貞而不諒。《繁辭》所解 復明之云:雖當謹守,不出户庭,又 塞也。 尾生之信,水至不去,不 通則行,塞則 止,義當 知通 獨 以言者, 塞 必 出 也。 則 知

九二,不出門庭,凶。

當在先也

之節, 也。 不合於五,乃不 以成節之功。 應,故不相從。若以剛中之道相合,則 陰,不正也,居説,失 節,如懲忿窒慾,損 之於外也,謂不從於五也。 德,與九五剛中正異矣。 「不出門庭」,不 二雖剛中之質,然處陰 節之道,當以剛中正。 如嗇節於用,儒節於行是也 唯其失德失時,是以 正之節也。 過 抑 剛 居説 有餘 也; 二五非陰 二失其剛 是也。 以 而 承 剛中 承 柔, 柔。 凶也。 中之 Œ 近 不正 陽正 可 邪 處

象 E 「不出門庭凶」,失時極也。

不能 繫於私暱之陰柔,是失時之至極,所以 上從九五 剛中正之道,成節 之功,乃 N

也。「失時」,失其所宜也。

六三,不節若則嗟若,无咎。 六三不中正,乘剛 而臨險,固 宜有 咎。 然

无過。不然,則 柔順而 「不節若則嗟若」,己所自致,无所歸咎也。 和說,若能自節而順於義,則可 凶咎必至,可傷嗟 也。 故 以

象曰:不節之嗟,又誰咎也?

節則可以免過,而不能自節,以致可嗟,將

誰咎乎?

六四,安節,亨。

也。 四 爲无節,就下有節也。 象。下應於初。 順承九五剛 以陰居陰,安於正也。 中正之道,是以 四,坎體,水也。 如四之義,非强節 當位 中 爲 水上 E 有 節之 爲 溢 節

> 强守而不安,則不能常,豈能 之,安於節者也,故能致亨。 節以安爲善。 亨也?

象曰:「安節」之亨,承上道 也

九五剛中正之道以爲節,足以亨矣,餘善 四能安節之義非一,象獨舉其重者。 上承

亦不出於中 正也。

九五,甘節吉,往有尚 以節,中正以通者也。 九五剛中正,居尊位,爲節之主,所謂 在己則安,行天下 當位

而行,其功大矣,故往則有可嘉尚也。 則説,從節之甘美者也,其吉可知。 以此

象曰:「甘節」之吉,居位中 也。

以 既居尊位,又得中道,所以吉 中爲貴,得中則正矣,正不能盡中也。 而 有功。

上六、苦節、貞凶、悔亡。

亦爲苦義。 上六居節之極,節之苦者也。 固守則凶,悔則凶亡。悔,損 居險之極,

過從中之謂也。節之悔亡,與他卦之悔

亡,辭同而義異也。

象曰:「苦節貞凶」,其道窮也。

節既苦而貞固守之則凶,蓋節之道至於窮

||| ||| | | | | | | | |

極矣。

孚。」節者爲之制節,使不得過越也。 信而中孚,《序卦》:「節而信之,故受之以中

之也,中孚所以次節也。爲卦,澤上有風。後能行,上能信守之,下則信從之,節而信

感謂感而動也。内外皆實而中虚,爲中孚風行澤上,而感于水中,爲中孚之象。●

體則中實,在全體則中虛。中虛信之本,之象。又二五皆陽,中實亦爲孚義。在二

中孚,豚魚,吉,利涉大川,利貞。

中實信之質。

水火,况涉川乎? 守信之道,在乎堅正,魚,則无不至矣,所以吉也。 忠信可以蹈豚躁魚冥,物之難感者也。 孚信能感於豚

象曰:中孚,柔在内而剛得中。故利於貞也。

體之中,中實,爲孚之象。卦所以爲中二柔在內,中虚,爲誠之象。二剛得上下

乎也。

説而異, 孚乃化邦也。

事理,豈能化天下乎? 孚乃能化於邦國也。若人不説從,或違拂以順巽於下,下有孚以説從其上,如是,其以二體言卦之用也。上巽下説,爲上至誠

豚魚吉」,信及豚魚也。

信能及於豚魚,信道至矣,所以吉也。

「孚」,原作「爲」,據涂刻本改。

利 涉大川」, 乘木 舟虚 也

舟也。 以 舟之象。 中孚涉險難,其利如乘木 舟 虚則无沉覆之患。 濟川,而 卦 虚中 以 爲 虚 虚

中孚以利貞,乃應乎天也。

中孚而 貞, 則應乎天矣。 天之道,孚貞

面

른

象曰:澤上有風,中孚,君子以議獄緩死。 澤,猶物之感于中,故爲中孚之象。 人之。 澤上有風」,感于澤中。 人心虚,故 物能感之。 水體 風之 虚 一,故 君子 動 風 平

能

无所不 誠 獄,盡其忠而已; 觀其象,以「議獄」與 意常求於緩。 盡 其忠,而「議 緩,寬也。 於决死,極於惻而已,故 「緩死」。 獄 緩 於天下之事, 死」,最其大 君子之於議

初九,虞吉,有他不燕。

者也。

也。 也。 得 非虞也。 始之義大,故不 正應,四巽體 得其燕安矣。 也,度其可信而後從也。 九當中孚之初,故戒在審其所信。 其所, 人志不定,則惑 既得所信,則當誠 則 有悔 加 燕,安裕也。 取 居正,无不善也。 咎, 相應之義。 故虞 而不安。 , 若 雖有至信,若 度 有他,志 而 有他 若用應 後信 初 爻以 與 虞, 度 四 不 則 則 則 謀 爲 定

象曰:「初九虞吉」,志未 變也。

言求所信之道也 其正,是以吉也。 當信之始,志未有所從,而虞度所信 所從,則是變動,虞之不得其正矣。 蓋其志未有變動。 ,則得 志有

爾靡之。 九二,鳴鶴在陰,其子和之,我有好爵,吾與

道者爲能識之。
二剛實中,●孚之至者也,孚至則能感通。二剛實中,●孚之至者也,乎至則能感通之理,知言誠通也。有孚於中,物无不惠,説好爵之意同也。有孚於中,物无不惠,説好爵之意同也。有孚於中,物无不事,而汝願相通也。好爵我有,而彼亦緊告里違之。」言誠通也。至誠感通之理,和應和,一剛實中,●孚之至者也,孚至則能感通。

「中心願」,謂誠意所願也,故通而相應。象曰:「其子和之」,中心願也。

或歌樂,動息憂樂,皆繫乎所信也。唯繫歌,雖所信是從,或鼓張,或罷廢,或悲泣, 正,故得敵以累志。以柔説之質,既有所正,故得敵以累志。以柔説之質,既有所正,故亡匹以從上,三不中失四得位居正,故亡匹以從上,三不中失正,故稱敵,或鼓,或罷,或泣,或歌。

所信,故未知吉凶,然非明達君子之所

象曰:「或鼓,或罷」,位不當也。爲也。

居不當位,故无所主,唯所信是從。所處

得正,則所信有方矣。

四爲成孚之主,居近君之位,處得其六四,月幾望,馬匹亡,无咎。

爲象。孚道在一,四既從五,若復下繫於恐之至,故以幾望爲至盛。「馬匹亡」,四與必至,故以幾望爲至盛。「馬匹亡」,四與必至,故以幾望爲至盛。「馬匹亡」,四與必至,故以幾望爲至盛。「馬匹亡」,四與此一,故以幾望爲至盛。「馬匹亡」,四與此一,故以幾望爲至盛。」,是一,故以為望,是一,故以為望,是一,故以為望,是一,故以,以為,以為,以之。

「中」上、涂刻本有「於」字。

九七八

其匹 初 亡」,則无咎也。 則不一而害於孚,爲有咎矣。 也。 繫初則不進,不能成孚之功也。 上從五而不繫於初,是亡 故「馬」 兀

象曰:「馬匹亡」,絶類上也

絶其類而上從五也。 類,謂應也

九五,有孚孿如 、无咎。

是,則億兆之心,安能保其不 下,使天下之心信之,固結如拘攣然 无咎也。 人君之孚,不 五居君位。 人君之道,當以至 ·能使 離乎? 天 下固 誠感通天 ,則爲 結 如

象曰:「有孚攣如」,位正當也 之,如拘攣之固,乃稱其位。 如是也。 五居君位之尊,由中正之道,能使天下信 人君之道

上九,翰音登于天,貞 終則衰,忠篤内喪,華美外颺,故云翰音登 翰音」者,音飛 而實不從。 N 處信之終,信

> 謂也。 貞固於此而不知變,凶 止者也。其極至於羽翰之音,登聞於天, 居中孚之時,處於最上,孚於上進而不知 天,正亦滅矣。 「好信不好學,其蔽也賊。」固守而不通之 陽性上進,風 可知矣。 體 夫子曰: 飛 颺。 九

象曰:「翰音登于天」,何可長 固守 守孚至於窮 不通如是,則 極 而 不 X 知 也。 變, 豈可 也 長 久

== == | | | | | | |

前

過 於高 以小過。」人之所信則必行,行則過也,小 陽失位而不中,小者過其常也。 過所以繼中孚也。 小過、《序卦》:「有其信者必行之,故受之 ,又爲小事過,又爲過之小。 ,其聲過常,故 爲卦,山 爲 小過。 上有雷。 又陰居尊位 蓋爲· 雷震 小者

也?

小過,亨,利貞。

於貞也。 者,故小過自有亨義。利貞者,過之道利 過者,過其常也。 就正也。 事有時而當,然有待過而 若矯枉 加 過 正,過 後能 所 亨 以

下,大吉。 可 小事,不可大事。飛鳥遺之音,不宜上,宜

不失時宜之謂正。

過,所以求就中也。 所過者小事也,事之 宜下」,謂宜順 大者豈可過也? 飛鳥遺之音」,謂過之不遠也。「不宜上 順理也。 過而 也。 順理,其吉必大。 於《大過》論之詳矣。 順則大吉,過以就之,

彖曰:小過,小者過而亨也。

古 事,有時而當過,過之亦小,故爲小過。事 者過也,故爲小事過,過之小。 陽大陰小。 有待過 而 陰得位,剛失位而 後能亨者,過之所以能亨也。 不中,是 小者與小 小

> 過 以利貞,與時行也。

過 乃非過也,時之宜也,乃所謂 而 利於貞,謂與時 行也。 時當過 正 也 而

過,

柔得中,是以小事吉也

剛失位 而不中,是以「不可大事」也。

有飛鳥之象焉。

爲義。 中剛外柔,飛鳥之象,卦有此象,故就飛鳥 堪大事,與時合也。「有飛鳥之象焉」,此 事。小過之時,自不可大事,而卦才又不 位而不中,是以不可大事」,大事非剛陽 位,能致小事吉耳,不能濟大事也。「剛失 小過之道,於小事有過則吉者,而彖以卦 才言吉義。柔得中,二五居中也。陰 一句,不類象體,蓋解者之辭,誤入彖中。 才不能濟,三不中,四失位,是以 不可大 柔 ź 得

「飛鳥遺之音,不宜上,宜下,大吉」,上逆而

下 也

大吉。 所以過者,爲順乎宜也。 過之道,順行則吉,如飛鳥之遺音宜順 易,故在高則大,山 以 也? 事 飛鳥之遺音。 下」,更就鳥音取宜順之義。 之當過者,亦 迅疾,聲出而身已過,然豈能相遠也? 不可遠過 在 有 小過也,所過當如飛鳥之遺音。 時 如 而當 過 其常,在得宜耳。 恭、過哀 過, 如 夫聲逆而 是。 所 過 上有 以從宜, 身不能 儉,大過則 上則 雷,所以爲 能順乎宜 (難,順 甚遠於聲,事 然豈 過之道,當如 「不宜上,宜 不 可甚 而 所 過 미 鳥飛 下則 也。 也。 以 事 過 所

過乎哀,用 象曰:山上有雷,小過,君子以行過乎恭,喪 過乎儉。

无咎。

之事,有時當過,而不可過甚,故爲小過。 雷震於山上,其聲過常,故爲 小過。 天下

> 過乎恭,喪過乎哀,用過乎儉是也。 而 君子觀小過之象,事之宜過者則勉之,行 過,乃其 宜也,不當過 而過,則過矣。 當過

初六,飛鳥以 凶

過之速且遠,救止莫及也 飛鳥之迅疾,所以 過,必至過甚,况不當過 四 初六,陰柔在下,小人之象。又上應於四, 復動體,小人躁易 X 也。 而上有 而過乎? 躁疾 應助 如是,所以 於所 其 過 如 當

象曰:「飛鳥以凶」,不可如何 六二,過其祖,遇其妣,不及其君,遇其臣, 其宜矣。「不可 其過之疾,如飛鳥之迅,豈容救止也? 如 何」,无所用其 也。

力也

凶

同有柔中之德,志不從於三四,故過四而 四 陽之在 在三上,故爲祖。 上者,父之象, 二與 尊於父者,祖之象。 五居 相 應之地,

遇,當也。過臣之分,則其咎可知 從五,亦戒其過。「不及其君,遇其臣」,謂 之時必過其常,故異也。 象 遇 與與 進而不陵及於君,適當臣道,則无咎也。 Ŧī, 是「過 同德相應,在他卦則陰 其祖」也。 五陰 无所不過,故二 而 尊,祖妣 陽 相 求, 過 之

其君,臣不可過臣之分也。過之時,事无不過其常,故於上進則戒及象曰:「不及其君」,臣不可過也。

九三,弗過防之,從或戕之,凶。 過 不 亦 陽居剛,過於剛也。既戒之過防,則過 害之矣,如是則凶 无所能爲,而爲陰所忌惡,故有當過者,在 小過,陰過陽失位之時,三獨居正 失正 在所 防於小人。 戒矣。 故 故 无 若「弗過防之」,則或從而 防小人之道,正己爲先。 三 必凶之義,能過防則免矣。 也。 三於陰過之時,以 一、然在 岡 戕 下

三居下之上,居上爲下,皆如是也。

象曰:「從或戕之」,凶如何也。

矣。故曰「凶如何也」,言其甚也。子。當過爲之防,防之不至,則爲其所戕陰過之時,必害於陽。小人道盛,必害君

九四,无咎,弗過,遇之,往厲必戒,勿用矣。故曰。②女何也。言其甚也

永貞。

也? 陽性堅剛,故戒以 也。 陰過之時,陽剛失位,則君子當隨時 之」,謂得其道也。 四當小過之時,以剛處柔,剛 交,雖比五應初,方陰過之時,彼豈肯從陽 不可固守其常也 无咎」。 往,去柔 故往則 既弗過,則合其宜矣,故云「 有厲 而以 隨宜,不可固守也。 剛進也。 若往則 四居 高位,而无上下之 有危,必當 「勿用永 不過也,是以 順 貞」, 戒 方 遇

象曰:「弗過遇之」,位不當也。「往厲必

九八二

戒」,終不可長也。

異也。 剥觀 其宜也。 宜 剛而反居柔,乃得其宜,故曰「遇之」,遇其 終豈能長 也。長、上聲,作平聲則大失易意,以 位不當」,謂處柔。 也。 之可見。 以九居四,「位不當」也,居柔乃遇 當陰過之時,陽退縮自保足矣, 而盛也? 故往則有危,必當戒 與夬之《象》,文同而音 九四當過之時,不 夬與 渦

六五,密雲不雨,自我西郊,公弋取彼在穴。 乃弋而取之。 射、弋有取義。穴、山中之空、中 郊故也。 也,「在穴」指六二也。 如密雲而 五以陰柔居尊 公弋取彼在穴」、弋,射取之也,射止是 不能 陰不 五當位,故云公,謂公上也。 成雨。 能 位 成 ,雖欲過爲,豈能 雨 所以不能成雨,自西 、《小畜》卦 五與二本非 中 虚 成 已解 相 乃空 功? 應

> 猶密雲之不能成雨也。 同類相取,雖得之,兩陰豈能濟大事乎?

象曰:「密雲不雨」,已上也。

雖密,豈能成雨乎? 陰過不能成大之陽降陰升,合則和而成雨。陰已在上,雲

義

也

上六,弗遇,過之,飛鳥離之,凶,是謂災眚。 理人事皆然也。 極,豈唯人告? 天災亦至,其凶 災眚也。 也。 過之,其違理過常,如飛鳥之迅速,所 六,陰而動體,處過之極,不與理遇,動皆 離,過之遠 災者天殃,告者人爲。 也。 「是謂 災眚」,是當 可知。天 既 過之 以 有 X

既 受之以既 萬事已濟之時也。 交,則爲用矣。 既濟、《序卦》:「有過物者必濟,故受之以 濟。」能過於物,必可以濟,故小過之後, 濟也。 各當其用,故爲既濟,天下 爲卦,水在火上。 水火相

既 濟,亨小,利貞,初吉終亂

之也。 也。 下,語當然也。 既濟之時,大者既已享矣,小者尚有亨也。 雖既濟之時,不能无小未亨也。「小」字在 「利貞」,處既 「初吉」,方濟之時 若言「小亨」,則爲亨之小 濟之時,利在貞固以守 也。 「終亂」,濟

彖曰:「既濟亨」,小者亨也。

極則

反也。

利貞」,剛柔

Œ 而

位

當

也

既 濟之時,大者固 已亨矣,唯有小者亨也。

伊川易傳卷之四

濟 當其位,當位者其常也,乃正固之義 如是之貞也。陰陽各得正位,所以爲既 時 也。 既 濟 矣,固 宜 貞 固 以守之。 卦才剛 7,利於 柔

E

「初吉」,柔得中也。

二居下體,方濟之初也,而又善處,是以 二以柔順文明而 得中,故能 成既濟之功。

吉也。

終止則亂,其道窮也。

日 極道 其道已窮極也。 終,不進而止矣,无常 極也,堯、舜是也,故有終而无亂 天下之事,不進則退,无一定之理。 唯聖人爲能 窮,理當必 變也。 通其變於未窮,不使至於 九五之才,非不善也,時 止也,衰亂至矣,蓋 聖 人至此 奈何? 濟之

防之。 象日: 水在火上,既濟,君子以思患 ൬

豫

九八三

九八四

也。 唯慮患害之生,故思 水火既 自古天下既濟而致禍亂者,蓋不能 交,各得 其 用 爲 而豫防,使不至於 既 濟 時 當 既 濟 患

象曰:「曳其輪」,義无咎也。

自无咎也。 既濟之初,而能止其進,則不至於極,其義

君,宜得行其志也。然五既得尊位,時已二以文明中正之德,上應九五剛陽中正之六二,婦喪其茀,勿逐,七日得。

廢也? 言。 知變, 也。聖人之勸戒深矣。 道,无終廢之理,不得行於今,必行於異時 日得 七日當復得也。卦有六位,七則變矣。七 則失其素守,故戒「勿逐」。 得行,如婦之喪茀也。然中正之道,豈可 **茀」,則不可行矣。二不爲五之求用,則** 中反爲中滿,坎離乃爲相戾矣。 尚怠於終,况其下者乎? 既濟而能用人者鮮矣。以唐太宗之用言, 有求用之意? 故二不得遂其行也。 既 濟 ,謂時 茀,婦 ,无復進 則可以言易矣。二,陰也,故以 時過則行矣。 變也。 人出 丽 有爲 門以 雖不爲上所用,中正之 矣,則於在下賢才,豈 自蔽者也。 逐者,從物也,從物 於斯 自守不失,則 人能 時也,則剛 自古 喪 識 其 婦 不 時

中正之道,雖不爲時所用,然无終不行之象曰:「七日得」,以中道也。

理,故喪茀七日當復得,謂自守其中,異時

必行也。不失其中,則正矣。

亂也。威武可及,而以救民爲心,乃王者宗,必商之高宗。天下之事既濟而遠伐暴既濟而用剛如是,乃高宗伐鬼方之事。高九三當既濟之時,以剛居剛,用剛之至也。九三,高宗伐鬼方,三年克之,小人勿用。

不服,貪土地,則殘民肆欲也,故戒不可用之事也,唯聖賢之君則可。若騁威武,忿

貪忿,則莫肯爲也。「三年克之」,見其勞小人。小人爲之,則以貪忿,私意也;非

象曰:「三年克之」, 憊也。

可,无高宗之心,則貪忿以殃民也。言憊,以見其事之至難。在高宗爲之則

六四, 繻有衣袽, 終日戒。

之位 吉,方免於患也。 又終日戒懼 有罅漏,則塞以 慮變爲急。「繻」當作「濡」,謂滲漏也。 四 在 ,當其任者也。 濟卦而水體,故 不怠,慮患當如是也。 衣袽。 既濟之時,免患則足矣, 當既 取 有衣袽以備 舟 濟之時 爲 義 四 濡漏, 不言 近 舟 患 君

象曰:「終日戒」,有所疑也。

豈復有加也?

時,當畏慎如是也。 終日戒懼,常疑患之將至也。處既濟之

祀爲義。 德,二在濟下,尚有進也,故受福。 如 謂二。殺牛,盛祭也,禴,薄祭 五中實, 孚也, 二 薄者,時不同也。 東鄰,陽也,謂五, 虚 二五皆有孚誠 中,誠 也 西 也。 鄰, 故皆 五處 中正之 陰也, 盛不 取

九八五

受其福」,吉大來也。

受其福」,吉大來也。

「實象曰:「東鄰殺牛」,不如西鄰之時也。「實象曰:「東鄰殺牛」,不如西鄰之時也。已至於極,
反耳。理无極而終不反者也。已至於極,

大來也,亨小、初吉是也。
下,有進之時,故中正而孚,則其吉大來,
五之才德非不善,不如二之時也。二在

上六,濡其首,厲。

而小人處之,其敗壞可立而待也。 言其窮至於濡首,危可知也。既濟之終,而在險體之上。 坎爲水,濟亦取水義,故既濟之極,固不安而危也。 又陰柔處之,

既濟之窮,危至於濡首,其能長久乎?象曰:「濡其首厲」,何可久也?

離坎下

齊,亨,小瓜乞齊,需其尾,无女司。齊,亨,小瓜乞齊,需其尾,死女司。 數既濟之後,受之以未濟而終焉。未濟,故既濟之後,受之以未濟而終焉。未濟,故既濟之後,受之以未濟而終焉。未濟,故所,不可窮也,故受之以未

未濟,亨,小狐汔濟,濡其尾,无攸利 狐之果,則 之時,求濟之道,當至慎 小狐果於濟,則濡其尾 「仡」,壯勇之狀。《書》曰:「仡仡勇夫。」 其老者多疑畏,故履 道,唯在慎處。 未濟之時,有亨之理,而卦才復有致亨之 坎下,火在水上,不相爲用,故爲未濟 小者則未能畏慎,故勇於濟。 不能濟 狐能度水,濡尾則不能濟, 也。 冰 侕 而 則 既 不 聽,懼其陷 能 不 能 能 亨。 濟 「汔」當爲 也。 濟,无 若 如 未濟 也; 所 小

利矣。

彖曰:「未濟亨」,柔得中也。

中也。剛柔得中,處未濟之時,可以亨也。也。五以柔居尊位,居剛而應剛,得柔之以卦才言也。所以能亨者,以「柔得中」

「小狐汔濟」,未出中也。

故有濡尾之患,未能出於險中也。從之理,故果於濟如小狐也。既果於濟,也,又上應於五。險非可安之地,五有當據二而言也。二以剛陽居險中,將濟者

而終之,无所往而利也。其進鋭者,其退速,始雖勇於濟,不能繼續濡其尾,无攸利」,不續終也。

雖不當位,剛柔應也。

濟,故濡尾也。卦之諸爻,皆不得位,故爲有與,若能重慎,則有可濟之理。二以汔雖陰陽不當位,然剛柔皆相應。當未濟而

以慎處於事物,辨其所當,各居其方,謂止水火不交,不相濟爲用,故爲未濟。火在水上,未濟,君子以慎辨物居方。火在水上,未濟。《雜卦》云:「未濟,男之窮也。」謂未濟。《雜卦》云:「未濟,男之窮也。」謂

於其所也。

初六、濡其尾、吝。

不能濟也。不度其才力而進,終不能濟,
对,必揭其尾,尾濡則不能濟。濡其尾,言
此,必揭其尾,尾濡則不能濟。濡其尾,高
其居,有應則志行於上。然已既陰柔,而
其居,有應則志行於上。然已既陰柔,而

極也。不度其才力而進,至於濡尾,是不知之象曰:「濡其尾」,亦不知極也。

可羞吝也。

九八七

九二,曳其輪,貞吉。

日 吉也。 也。 在他 戒 則言其貞吉光輝,盡君道之善, 郭子儀、李晟,當艱危未濟之時,能極其恭 尤當盡恭順之道,故戒「曳其輪」則得正 勝火之象。 應之地 五 上 順,所以 之過也。 其恭順,盡臣道之正;盡上下之道也。 以 恭 九二貞吉,中以行 柔 順之道。 於未濟,聖人深 卦,九居二爲居柔得中,无過剛之義 倒曳其輪,殺其勢,緩其進,戒 ,當用者也。 處君位,而二乃剛陽之才,而居相 爲得 剛 方艱難之時,所賴者才臣耳, 過,則好犯上而順不足。 正 未濟者, 而 能保其終吉也。 剛有 取 正也 君道 卦象 陵 柔之義,水有 以 艱難之時也 爲戒 於九 於六五 明 唐之 一則 用 岡川 而

六三,未濟,征凶,利涉大川。

凶也。 非時不可,才不能 大川」也。 應,若能涉 出險之用,而征,所以 濟之道,險 正之才而居險,不足以 「未濟征凶」,謂居險无出險之用,而 必 出 然三之陰柔,豈能)險而 終 險 有 而 往從之,則濟矣,故「利 出 後 也 險之理。 可 征。 凶也。 濟 ,未有可濟之道 三以陰柔 然未濟 上有剛 出 險 而 有可 陽 行 往 不 之 則 ? 涉 中

象曰:「未濟征凶」,位不當也。

利矣。 正,无濟險之才也。若能涉險以從應,則三征則凶者,以「位不當」也,謂陰柔不中

大國。

九四,貞吉,悔亡。

震用伐鬼方,三年有賞于

主,又已出於險,未濟已過中矣,有可濟之九四,陽剛居大臣之位,上有虚中明順之

正

也。

九二

一得正

而吉者,

以

曳輪

而

得中

· 道

乃

之道,當貞固如是。四居柔,故設此戒。而行大國之賞,必如是乃能濟也。濟天下心。古之人用力之甚者,伐鬼方也,故以也。古之人用力之甚者,伐鬼方也,故以也。古之人用力之甚者,伐鬼方也,故以也。大難陽而居四,故戒以貞固則吉而悔也。濟天下之艱難,非剛健之才不能道也。濟天下之艱難,非剛健之才不能

五,文明之主,居矶而鹰矶,其處导户,虚六五,貞吉无悔,君子之光,有孚,吉。志,吉而悔亡。 鬼方之伐,貞之至也。如四之才與時合,而加以貞固,則能行其

象曰:「貞吉悔亡」,志行也

之盛,而功實稱之,「有孚」也。上云「吉」,也。五,文明之主,故稱其光。君子德輝貞,其固有,非戒也。以此而濟,无不濟至善,无不足也。既得貞正,故吉而无悔。其心而陽爲之輔,雖以柔居尊,處之至正其心而陽爲之輔,雖以柔居尊,處之至正其,文明之主,居剛而應剛,其處得中,虚

以功也,既光而有孚,時可濟也。以貞也,柔而能貞,德之吉也。下云「吉」,

象曰:「君子之光」,其暉吉也。 上九,有孚于飲酒,无咎,濡其首,有孚失是。 極也。 其處 從樂 義命 失其宜也。 不樂其處,則忿躁隕穫,人於凶咎矣。若 若否,終則有傾,時之變也。 之位,无可濟之理,則當樂天順命而已。 能燭理,剛能斷義。 九以剛在上,剛之極也,居明之上,明之 光盛,至于有暉,善之至也,故重云「吉」。 光盛則有暉。暉,光之散也。君子積充而 而自濟之理,故止爲未濟之極。至誠安於 而 也。「有孚」,自信于中也。「失是」, 而躭肆過禮 剛極而能明,則不爲躁而爲决。明 自樂,則可无咎。 如是則於有孚爲失也。人之 ,至「濡其首」,亦非能安 居未 飲酒,自樂也。 濟之極,非得濟 未濟則无極

安於義命者哉? 處患難,知其无可奈何,而放意不反者,豈

象曰: 飲酒濡首,亦不知節也。

是,不能安義命也。能安,則不失其常矣。饮酒至於濡首,不知節之甚也。所以至如

伊川易傳卷之四

第六

伊川先生改正大學

明道先生改正大學

第五

禮記

春秋傳

第四

詩解

第一

第二 易説繋辭

1解 改正武成

第 中 庸 子 解

論語解

九九一

伊 川經説卷之一

繫 奲

之

理

一,易簡

丽

己。

有

理

m

後

有

象

7,「成

位

乎

大。

聖賢

德

業

久

大,得易簡

之道

也。

天

下

而

成

功。

親

合則

可以

常久,

成

事

則

可

以

廣

從。

易知

則

可

親

就

耐

奉

順

易

從

則

可

取

法

之能

簡

平

易

故

人

易

知 ;

簡

直

故

人

坤

之道,

易簡

而

己。

乾始物之道易

坤

成

物

易

説

明 静,各有其 萬事理也」。 矣。 天尊地卑」,尊卑之位定,而乾坤 高 卑 常常 既 則 别,貴賤之位分矣。 剛 也。 柔 判 矣。 事 有 理 陽 一,一本 一之義 動 陰 作

之氣

相推

盪

,雷霆以

動之,風

雨以

潤之,

日

月

地

,變化之跡

見矣。

陰陽之交相

摩

軋,

八

方

群

,善惡分而吉凶生矣。

象見於天,形

成

於

物

有形

事

則

有 類,

形

則

有

男,得坤者成女。

乾當始物,坤當成物。

乾

其辭義,則

知其可樂也。

觀象翫辭而

能通其

以明義, 翫

運行,寒暑

相

推

뻾

成造化之功。

得乾者

成

其 中」也。

乃其 也。 夜, 也。 退消長,所 其吉 凶之生,由失得 觀畫 序也,得其序則安矣。 極,中 凶之理,以 聖人既設卦,觀卦之象 極,以位言也。 夜,則知剛柔之道矣。 三極,上中下 也 以 成變化也。 皆其 剛 也。 柔 時 相 悔吝 中也。 六爻之動,以位 推 而知變化之道。 者,可憂虞也。 剛柔 辭所 而繫之以辭 三才,以 相 易 圃 一爲義, 物言 成 書 進 吉 明

1016

意,觀象翫占而能順其時,●動不違於天矣。

吝爲 吉凶 以 掛 有 能 兼 小 防,則 大則辭之險易殊矣,辭各隨其事也 悔 小大之義。 彖言卦之象,爻隨 能 也 如 存意於微小。震懼 是, 卦有小大,於時之中有 則 吉凶之道 得 無咎。 時之變,因失得 ,於辭可見。 位有貴賤之分, 而 得無咎者, 小大 以悔 圃 也。 有

魂。 終; 與物 在 察地 徧 也。 神之情狀 天 理 理 地之道 則可 之所 爲 綸, 聚 理 也。 聖人作易,以準則天地之道。易之義, 則 幽、成象爲明。 ,驗之著見之跡,故能「知幽明之故」。 理也。 以 徧理天地之道,而復仰觀天文,俯 爲 也,「故能彌綸天地之道」。 以然也。 見 物,散則爲變。 萬物始終, 死 在事爲倫,治絲爲綸。 生之理。 原,究其 「知幽明之故」,知 聚散而已。 聚爲精 觀聚散 始,要,考其 氣,散爲 ,則見「鬼 鬼神 彌綸, 彌,徧 游 理

> 之運化而不過差,委曲成就 分,「 包, 與 情狀觀之,則可以見「天地之道」。 化之功也。 體 失,通晝夜闢闔屈伸之道而知其 天下,故無 此,則得天地之妙用,知道德之本源 土」,安所止也,「敦乎仁」,存 而 至神之妙,無 智周乎萬物 能愛」。 不 天地之道相 知也。其義周 流 知命」也。 道者,一陰一陽也。 失 「範圍 IE **沁過差。** 理。 以幽明之故,死生之理,鬼神之 圃 有 似,故無 囗,俗語! 道 方所,而 順 順 「旁行而不流」,旁通 濟 盡 理 乎理,「樂天」也。 天 萬物之理,其道足 安分 謂之模量 下,故 差違,相 易之準道, 動 故無 萬物之理 静 不 乎同 無 過。」義之所 似 所以 所憂。 端, 謂 模量 也, 易之義, 所 無 然。 陰陽 而 同 是 安 遠 以 有 以 無 天 也 以 其 見 遺 地 安 及 濟 無 形 如

「象」,陳刻本、涂刻本作「變」。

陽。 成 生相 跡,一 知。 變化 始。 静 通 矣。「富有」,溥博也。「日新」,無窮 有心而無爲。 生育之功,「顯諸仁」 仁者謂之仁,知者謂之知,百姓 之性也。 不宰,聖人有 物 也 藏諸用」也。天地不與聖人同憂,天 續 惟 不 而 故君子之道,人 非知 順 變易 神 窮,事之理也。 體 繼 在衆人,則不能 道 備、法象 也 此 者, 道 心也。 而 莫 天地 則 孰 不 知 著矣。 能 窮 其 聖人之盛德大業,可謂 爲 鮮 也。 也。 天 識 善 鄉, 天下之有,不 之? 地 克 也。 乾始 不 推 無 知 神妙無 識 測其 數 也。 心 成之在 動 可 物 隨 而 則由之而 静 以 而 成 方,變化無 運行之跡, 其所知, 爲 相 化, 知 有 也。 剛 離 因 來 象 柔 平 聖 則 加 物。 陰 坤 人 地 生 至 不 動 故 謂 成

正 天地 易 道 之間 廣大,推 萬 遠 物之 則 無窮,近言則 理,無 有不 同 安 静 乾, 而

> 坤 善之德也 陰一陽,日月之行也。 大」,天地之功也。 惟其專直 静 體 也 動 專」,「動 則 ,故其生物之功大。 開, 應 也直」。 乾 「變 開 闔 通」,四 乾坤 專,專 而 廣 易簡之功,乃至 時之運也 坤 生 0 静 萬 直, 物 翕 直 動 闢 廣

中矣。 也。 門」也。 理,合天地之道也。 大其德業也。 人心 易之道, 斯理也,成 存乎 其 知 至 此 川崇高 矣 之在 理 高卑之位 乎 之 1 一禮則 人則爲性。 所 聖 存, 、卑下。 人 一設,則 乃「道 以 易之 成之者性 易 高 義 在 道 卑 之 其 順

聖人見天下深遠之事,「賾」,深遠也,●

^{● 「}贖深遠也」,涂刻本此句在|

顯

明於道,而

見其

功用之神,故可

與

應

要也。 之則也。 也。 也。 擬 下 變化」也。 言天下之動無窮也,而物有其方,不可紊也。 下之深遠難 加 之動, 比 度而設其辭,商議以察其動,「擬議以成其 舉「鳴 擬 餘爻皆然也 乃以「行其 其形容,體象其事類,故謂之象。 無窮 繫之辭以斷其吉凶者爻也。 變化,爻之時義; 鶴在陰」以下七爻,擬議 知 也 也, 典 必「觀其會 而理之所有,不可厭 八禮」。 典禮,法度也 擬議,議 通 會通 加 加 言天 言者 言之 也 物物 天 綱

相

始於 數 爲五十。 而 以爲用。 也。 行 鬼神」者也。 有 ,備於五 數,氣之用 理則有氣, 五十,數之成 「天地之數 變化言功,鬼神言用。 小衍之而成十,大衍之則 也。 有 氣 「大衍之數五十」,數 五 也。 則有數。 + 成 有 則 五」、「成變化 行鬼神者, 不動,故 損

> 順 對 理以成功,乃贊天地之化育 萬變,可贊祐於神道矣,謂合德也。 也 人惟

占。 感而 尚其辭」,謂於言求理者則存意於辭 動者尚其變」,動 也 連,不合在下。● 通,求而得,精之至也 「受命如響」,「遂知來物」,非神 知 變化之道,則知神之所爲 制器作 事當體乎象,卜筮吉凶當 則變也,●順 言所 以 述理。 變而 也 乎? 動, 「以言者 也。 與 乃合 考其 上 「以 文 \Box

道

數。 陰陽之功,萬物變化,鬼神之用 五」上,簡編失其 才有上五者,便有下五者,二五 自「天一」至「地十」,合在 次也。 天一生數,地 一天數 也 一合而 五 六成 地 成 數

或 日 . 乾坤,易之門,其義難知 ()餘卦 則

- 下上下, 涂刻本有「章」字。
- 動」,原作「化」,據涂刻本改。

坤之道者,以爲易則可也。 卦隨時應變,取舍無常,尤爲難知也。知乾 在卦觀之,乾坤之道簡易,故其辭平直。餘 地之外者乎? 知道者統之有宗則然也,而 易知也。曰:乾坤,天地也,萬物烏有出天

伊

川經說卷之一

伊川經説卷之二

書解

也。 討論 陰陽醫方稱黄帝之説耳。 時之事,失其義理,如許行所謂神農之言,及 後代之繁衍末術也,固亦常道,聖人所不 陽、四時、七政、五行之道,亦必至之要語,非 道之説 簡邃如此,其上可知。所謂大道,雖性 之書謂之《五典》,言常道也。」又曰:「孔子 《三墳》,言大道也,少昊、顓頊、高辛、唐、虞 使誠 墳典,斷自唐、虞以下。」以二《典》之言 孔 ,固聖人所 序》:「伏羲、神農、黄帝之書謂 有 :所謂 羲、農之書,乃後世稱 不可得而 此聖人所以去之 去 也。 如言 述當 與天 去 陰 之

盡善。 然。 或有害義,聖人不得不有芟除更易也。 必盡善。若後世之史,未必盡當,其辭未 芟夷繁亂,剪截浮辭,舉其宏綱,撮其機要。 《易》道以黜去是書,所謂「加我數年,五十以 始。 也。 有害,有可删改之理耳。 可更易者,其事耳,未必須曾删改。 學《易》,可以無大過矣」。 之書也。《易》本八卦,故以八名。夫子贊 人或疑前代之書,聖人必無 有迹,得以紀載,有史官之職以志其事,自堯 何也? 蓋古雖已有文字,而制立法度,爲治 至淳之道邪? 又《五典》既皆常道,去其三, 變之術,竊窺機要,以爲變詐之用,豈上古 其八卦之説,謂之《八索》,前世説《易》 若上古聖人之世,史官固當其人,其辭 或疑《陰符》之類是,甚非也。此出戰國 設 如其 書足以 垂範,不可 或疑 舊書之過可見也, 所删 Ĺ 改,此 去之,而 流漂杵」之 但辭 其不 亦不 其 必

九九七

意也。 朴,因 皆是後世史所修。典,典則也。 辭 成 治迹,立政有綱,制事 當爲《虞書》,則《堯典》當爲《唐書》也。 至堯而 成乎堯。」蓋伏羲始畫卦,造書契,開其端矣。 以有書而 夏書》。 益稷》等,皆謂之《夏書》也。若以其 虞書》,蓋虞史所修;《舜典》已下,皆當 何不 也。 時爲治 改,此乃非害義理之辭 與世立則,著其典常,成其治道,故云 書序》,夫子所爲,逐篇序其作之之 故《左氏傳》引《大禹》、《臯 稱典也。 未 文 楊子曰:「法始乎伏羲, 法 有 度 典 法,故其治可 制。 也。 至堯 上古 (堯典) 爲 而 虞 陶 紀,所 ...時 大抵 始著 謨 時 淳 爲 事

堯 典

昔在帝堯,聰明文思,光宅天下,將遜于

位,讓于虞舜,作《堯典》。

下也。 之序,舉一篇所紀之大要也 其發謀措事,意思深遠。 順成文也。思,謀慮意思也,謂其含蓄。 流 聰,視遠曰明,堯之神智所知所照,洞 若與上文相連,則文勢當云在昔也。 故史官作此《堯典》之書,以載 治天下,故其道光顯,故云「光宅」,光顯居天 堯之神智聰明,而其動作 通,故謂之「聰明」。 「昔在」文連下文。「光宅天下」已下,● 既老而將遜避帝位,因禪 文,文章也,謂倫 施爲,有條理文章, 以 此 其 聰 事。 讓於虞舜, 明文思 此夫子 聽 徹 理 廣 無 臨 言 明 不

史氏追紀前世之事,若考古之帝堯,其《堯典》此題書之目也。 曰若稽古帝堯。

一下」,原作「不」,據涂刻本改。 此題原無,據本書體例補。

下若稽古帝舜、大禹、皋陶,皆謂考古之某《書》中「王若曰」之類也。古史之體如此。「曰」者,謂堯典之辭曰也。若,發語辭,如事「云放勳」以下是也。「堯典」字爲題,下加事「云放勳」以下是也。「堯典」字爲題,下加

人,其事如此

也

或稱 録 爲臯陶之名,而 舜、禹之名。 遂以爲堯之名,因 古史之體,發論之辭 隨事之宜,亦憂患後世而有作也。「放勳」上 循法則,著見功迹,可爲典常也。 道,因事立法,著爲典常。 古淳朴,隨 更加「曰」字者,稽古之帝堯,其事曰如 放勳,互 作 放 放勳」,功迹之著也。放,依 勳 事爲治,未立法度,至堯始明治 若以 一稱之。 亦 獨不 如 其 而 傳 也。 謂之名者。 文 又以「重華」、「文命」爲 如孟 記 同,則亦當以「允迪」 中 前儒見「云放勳」, 其施政 子曰堯事, 言仲尼,或作 故或 制事,皆依 不惟聖人 也。 稱 此 而 堯, 也。 夫 上 傳

子,或作孔子之類,但舉其人耳,誤不足

怪也。

事。 所爲放勳之事,皆安於義理之安。 慮。 上「安」其 理之所可安者,聖人安而行之。」 欽,敬慎,明,聰明,文,文章,思,謀 有此四者,故其所爲,能得義理之至當 欽明文思安安」,以 所 處 也; 下「安」得其理 此四德行 也; 王介甫云: 放勳 謂其 之

單言明則包聰。事則欽慎爲大,舉德則聰明爲先,各因其宜。立事,故云「欽明文思」,施各有所宜也。立立事,故云「欽明文思」,施各有所宜也。立

安於義理之安,又言其「允恭克讓」,所以其有「欽明文思」之德,故所以能立事成勳,「允恭克讓,光被四表,格于上下。」既言

● 「日」,涂刻本作「言」。

000

信,信 彼,而 慎; 克,能 情, 者 下 已 恭 争 則 功。 允 有,無所累於心。 」,未足 ~; 克 有 所以感 有 而 自處 被 則是謙 其才至能,而 其 矜 不 不 惟聖人至公無我,故 有能 也,禹 欽 而 然 四 功之謂 矜伐,乃聖 滿之氣 可 讓。 (既當, 慎 以 表, 乃 悦 矜 於 光 服 讓 當 日 格 也 信 此 夫雖 ,必悦 人 被 「朕 矣。 也, 也。 于 則 者 服 ,能高於己 四 則 上下」。 蓋一 無 也 也。 其實一 表 德罔克」是 允雖克,足以立 不自有 人之心 故舜 爲 言堯其 而 所 而 恭 誠服 介存於心,乃私心也 一聖人 孟 格 顧 稱禹功能 巽 雖 子曰 慮 上下也; 也。 義。 允, 而 其 所爲至 也 與常 功高 也 讓弗自有,此 知 能 有 當 :「以善 故 能 恭 能 然作爲 也 天下 X 堯、舜 當 ,天下莫與 之不 夫常 讓 謂 則 、異。 必 事 謂 欽 事 成 自 而 而 前 謙 順。 人之 於 可 人 服 當 功 允 居 儒 不 能 讓 争 於 İ 眩 知 天 而 而 其 欽 訓

乎? 故不 咸服 作 功? 惟其志至誠,故能 以 有之 之公心, 而 充 中 假 其德 私。 心 害欽慎之神能。 之於外,欲常其德 故 孟子曰:「不誠 光輝 悦 應物 如天地之造化,生養萬 ,則是其德充塞,至於天 天下見 而 照耀乃充塞也,其實 誠 而 服 允於彼。 其 也 光顯及於四 至 未有 亦由乎理 當 蓋 且難 而 __ 復 能 恭 出 矣, 何 能 動 遠。 於 而 物 存 者 况 公誠 己,故 高 地 於 義。 也。 先儒 足 而 而 也 以 此 孰 M 讓 聖 天下 訓 無 也 尸 感 所 其 光 居 ?

序,始 雍。」前 明 百 姓 而 擇任之也。 克明 於明 言 百 姓 堯之 後德。 俊 昭 (德,以 德, 明, 帝王之道也,以擇任賢 俊德,俊賢之德 此 協 親九族。 言 和 堯 萬 之治。 邦, 九族 黎 也 既 民 其 堯 睦 於 事 (俊爲 變 能 有 平 時 章 辨 次

也

⁰ 順」, 涂刻本作「慎」。

之謀乎? 之謀乎? 之謀乎? 之以正者親睦九族之道,豈不賴賢俊 後而爲治,治之始,自睦九族爲先,故以次序 「或疑親睦九族,豈待任俊德乎?」蓋言得賢 「或疑親睦九族,豈待任俊德乎?」蓋言得賢 「或疑親睦九族,豈待任俊德乎?」蓋言得賢 一人而後與之同治天下。天下之治,由

化成善俗而時雍。 也成善俗而時雍。天下黎庶於是變惡從善, 國,皆協同和從。天下黎庶於是變惡從善, 姓既已昭明倫理而順治矣,則至於四方萬 任之之道包在其中矣,故便及庶民。王國百 任之之道包在其中矣,故便及庶民。王國百 生,庶民也。前云「明俊德」,既明而用之,則

之最大最先,在推測天道,明曆象,欽若時令其立政綱紀,分正百官之職,以成庶績,而事由「睦九族」以至「和萬邦,變時雍」。此復言由「睦九族」以至「和萬邦,變時雍」。此復言,而後一人時。」前言堯之治始於「明俊德」,而後

堯之治,盡於此矣。自「堯曰疇咨」已下,皆敢,如正百職,順天時以制事,至於創制立治身齊家以至平天下者,治之道也。建立治此身齊家以至平天下者,治之道也。建立治以授人也。天下萬事無不本於此,故最先詳以授人也。天下萬事無不本於此,故最先詳

之所生出,歲所起也,故云暘谷。主敬導出定,"正,●仲叔各主一時。分命羲仲居東方之层,以班隨時之政,授人時也。」又分命羲、和侯,以班隨時之政,授人時也。」又分命羲、和侯以正四時,其法明而易準,乃命羲、和,使星以正四時,其法明而易準,乃命羲、和,使星以正四時,其法明而易準,乃命羲、和,使星以正四時,其法明而易準,乃命羲、和,使

● 「氏」,原作「叔」,據陳刻本、涂刻本改。

紀其事,以明堯之聖耳。

見,以 然 析 序,東作耕播之事。 正 之政 其 也 散 處 時 正 田 仲春之候,使無差天時。 猶 舉 野耕作,鳥獸則交接孕育。 其 春 氣之生, 時政,又言民物皆隨 又察晝夜之中,鳥宿之 舉 歲首之事,平 當是時, 天 上方察 時 均 而 次 民

也。 言 於野,收斂 主 1,平序 一夏 時之政教。 羲氏主二時, 厥 民 南 因 而 方 後耕 化 」,謂 育 播 孔云: 之事 又 春 也 時 重命羲叔居南方之官, 播 凡順夏 訛,化也。 種 在 田、民 時 所 《釋文》 因 施 就 政 居 教

將 時。 舒 也。 熟,歲功將畢,民 敬隨 寅餞納 毨,澤好也 時變,終歲之事。 日 一一一一一一 獲卒歲之食,心力平夷安 人之方。 夷,平也。 秋,收成之 秋 稼

謂陽初始生之方也。幽都,幽陰之處也。上北方曰「朔方」者,朔,初也,陽生於子,

易。 農事既興,而春官遽爲之也 也。 際, 之事耳,如此則不能包,見其冬今歲之初也 始。 當更之事也。 平,均也。 來歲計耳。皆是 或又以爲來歲更易之事,自是春官所 易之事也。 亦不然。 居北方之官,主順隆陰之候,布冬時之政也 云「朔方」,止言北方也,故須復 如修完室廬墻垣之類,非今歲之用,皆爲 若蓄種 如彼北方,終其陰 或以爲朔,初也,平在其來歲 古者功作之事,皆於冬月 在察也。 實,修耒耜,備器 冬,一歲之事既 既成今歲之終,又慮來歲 一歲之事既終,則復慮 平察終卒而反始所當 而 復始其陽,故 終,則平察 開,不 云日 可俟 初始變易 開隙 幽 職,此 云 其始 改 之 朔 之 歲 更

咨、《釋詁》云:嗟也,告與語之辭。

詳具,故舉其法以勑羲、和使職之。 古之時「以閏月定四時成歲」,其法至堯而精密

統天下之治者也。 其 分職,主察天運以正四時,遂居其方之官,主 道,故以星曆爲工技之事,而與政分矣。 時之政。 在堯謂之四岳,於周乃 後世學其法者,不知其 卿之任

律度量衡皆出於此,故首舉而詳載之。其他 不本於此。天下之事無不順天時法陰陽者, 政,使人遂其生養之道,此大本 務。首舉其大者,是察天道,正四時,順時行 以 於此矣。 數事,●無不備言,故統云「允釐百工」,言百 是信使治也。允釐,信治也。百工各信治其 工之職各分命之也。 至「格于上下」,堯之德也。自「克明俊德」至 職,故庶工皆 於變時雍」,堯治天下之道也。 下,言堯設官分職,立正綱紀,以成天下之 「允釐百工,庶績咸熙。」自「乃命義、和 「庶績咸熙」,治之成也。 和。 史載堯治天下之治、●盡 各授其任,使行其治, 也。 自「乃命羲、 自「放勳 萬 事 無

> 疇咨」已下至篇終,言堯之聖明能 和」至「庶績咸熙」,堯立治之法也。 知 自一帝 人 也 日

矣。又訪問:誰能若順我事? 老將遜帝位,博求賢聖之意。 順是,謂順我之治也。 發辭。問:誰乎能順於是者? 將登庸之。 求人之事 言。「象恭滔天」,言其外貌恭而中心懷藏姦 「胤子朱啓明」,朱本不害,故云明,發而 僞,滔天莫測。 静言庸違」,王介甫云静則 陵」,故蕩蕩然也 「帝曰疇咨若時登庸。」咨嗟,告與語之 也。 「方鳩 ○蕩蕩乎,平漫之狀, 僝 辭不與前相 功」,言方 能言,用則違 故 此又别一時 放齊 連。 集 「懷 其 明 對 此 功。 其 通 以 堯

吁,疑歎之辭。 方,不順也。 命,正 理 襄

數」,陳刻本、

克之人也。 也 理 謂 也,其 其 不 一汝 循 順 順 能 行帝位之事。 正 庸 理, 命遜 而 朕位」,汝能 毁 圮族 類 傾陷忌 門命,

明明 揚側陋 」,使顯揚側陋之賢。

者,必見推矣。 將以天下之公器授人,堯其宜 授,則盍授之? 故先命之大臣百官,以至天下,有聖過於己 位 事之次序,理自當然。 可當者,宜其得聖人也。 ,固宜先四岳,不能當,復使之明揚在 四岳,堯之輔臣,固賢者也。 遞相推讓,卒當得最賢者矣。 不可授,則何命之也? 後世多疑以爲岳 獨爲之乎? 堯將 下之 襌 夫 可 帝

若時登庸」已下,載帝堯求人之事,所以 進之使治,不至於姦凶之罪。 蒸蒸,勉益 其父頑,母嚚,象傲。烝,進也。《釋詁》云: 瞽子父頑。」岳曰: 漸 進之義。 其愚惡 所謂瞽叟之子也 自「帝 難 化,故 日 明 疇 漸 其 益 咨

> 乎? 之尊位,使之慎徽五典,時叙百揆,固非未 既 聖能 堯之治,何因而去之也? 惡之不可行也,則能隱其惡,立堯之朝,以 其惡矣,何不去也? 信而試之也。 觀其聖德,暴之天下也。故女之以二女,命 聖獨見,其能然乎? 其德始升聞,師舉則 姦佞也,能隱其惡而任其職。 授。共工之能言,象恭,鯀之才智,天下之大 堯知其不可,蓋 岳,●且弗能辨 而共工卒以惡誅,鯀績弗 知人也。 是舉世莫不賢之也。 或曰:共工、鯀之徒,堯既 親愛之至莫如朱,知 圃 用過其分,則其惡必見。 稱其 俞其言,遂授之位,非大 其曰「我其試哉」,將試 曰:彼所謂大姦者,知 才,况 及將舉 堯獨聞 成。 百官諸侯 克朝之賢如 舜居 而進之,則 其 舉 悪 ·而吁, 微 下民 而 陋 如 助 知 能 四 弗

克」,涂刻本作「當」。

也。 武 堪 不能 莫 禹 政,乘其事會,有以發其凶慝之心也。 其上,又將使之臣之,此凶亂之人所以不 惡顯,而舜得以誅之矣。 其至公之心,●能舍己從人,盡天下之議, 則其惡自顯矣。蓋治水,天下之大任也,非 朝,雖藏方命圮族之心,飾善以取容,故舉 起篡逆之謀,而終身爲才能之臣矣。鯀居堯 當時之人,才智無出其右者,是以四岳舉之 凶惡之人也。及舜登庸之始,側陋之人顧居 曰 : 王之世,何由作 也,故其惡顯,而舜得以誅之。 、知其惡,是其惡未嘗行也,及居治水之任, 莽、司馬懿,若使終身居卿大夫之位,必不 未 堯知鯀 顯。 成其功。 雖 九 舜登庸時,始三十矣,禹 年 不可大任 ௱ 豈方命圮族者所能乎? 功不 亂? ·成、然其所治, ,何爲使之? 共工、驩兠之徒,皆 當成王少,周公攝 如管、蔡 固 幼 日 : 非 미 故其 他人 知。 或 能 朝 在 則

> 也? 圮類益甚,公議隔 天下賢之,又其才力實過於 所及也。 而 功卒不可成也,故 若其時朝廷大臣才智有過鯀者,則 惟其功有叙,故其自任益强,咈戾 而 誅 人 心離 之。 人,堯安得不任 當其大臣舉之, 矣,是以惡益顯

舜典

亦不任之矣。

總言舜事,曰若考古之帝舜,重華協于帝。聖,宜於天下也,故云「重華協于帝」。此句德光華,與堯相襲,協宜于帝位,言以聖繼為光華,與堯相襲,協宜于帝位,言以聖繼為與剛微,側隨機。「重華協于帝」,盛於華,與為與問為,與阿太之辭,與《堯典》同。

♪ 「其」,涂刻本作「具」。

00五

下事,重叙其德也。統言「欽明文思安安」已,復云「允恭克讓」以自「濬哲文明」已下,重叙其德也。如《堯典》

之温潤 實。 所 其精粹,要之舉 以見其聖人耳。 如 美之焕發者而 温 濬 温良恭儉讓」,要之皆聖人之德美,稱之足 稱 稱 粹和。 淵 八者以形容其聖德。 堯則 ,足以見其美則可 弘。 濬、哲、文、明,温、恭、允、 ,或稱其聲之清越,或取其堅貞,或美 日 恭,恭敬。 哲,睿智。 「欽明文思安安」,稱仲 「稱之,繫其人所取,不必同 譬夫言玉之美者,或美 則足以知其實矣。隨人之 允,信當。 文,文章。 也 凡稱聖人,取其德 去聲。 塞」,八事。 明, 尼 塞,充 聰 其 則 也。 明。 色 日

「慎徽五典,五典克從。」堯既命之以位,潛德幽遠之中,又其德深遠,故云玄德也。「玄德聲聞。」玄,幽遠之稱。穹玄是也。

舜

《左氏》所謂 倫大典,豈 子云:「堯使契爲司徒,教以 之本,夫婦正而後父子親,而遺之可乎? 友、弟恭、子孝,烏能盡 五 臣 友則鄉黨賓客備矣。 面 者人: 有 舜 敬美其五常之教。 義,夫婦 倫也,言長幼 舜 無違 有 有别,長幼有序 以易之乎? 教 也 則兄弟尊卑備 孔氏謂父義、母 人倫 五典謂 哉? 人倫。」五者人 五典克從, 朋 父子 友 夫婦,人 矣,言朋 有 有 `慈、兄 信 也 倫 則 孟

任,而其所揆裁處也。皆時叙。順成也。「納于百揆」,謂進置之于揆度百事之

舜 綏 中 門,内外之限也。 化 禮 國 爲内, 待 也 賓 四 于 方, 則 四 而 夷 門, 狄 諸 侯協 爲 京師 四 外 門 和 也 爲内,則四方皆外 穆 , 穆。」 四夷懷來,皆從其 穆穆, 賓 和正之貌。 禮 接 也。 也

納于大麓,烈風雷雨弗迷。」進置之大

麓,總 之義。 置之 遷 也? 所 麓 大麓 試如上諸 則克從,使之揆 口 穆穆,使之總 歷試 之任 數職也,各舉其 止 者 也 舉 F 前 諸難」, 日 録 位 云「納于百揆」,又云「納于大 訓 謂 庶 事也 難事耳 百揆 總領 録庶 政 猶 自 庶 安知 統 聚 Ŧi. / , 揆 庶 政 政之稱,故極 事 也 典 ,非歷居數官也。 領 則 則 政 事言耳。 故 非 而 度百事謀 百 也 陰陽 時 居數職 下,皆非 孔 職 叙,使之賓懷 事 子 麓 和 之 云 云使之敬美 其全功而言,不 也? Щ 議 任 録 或 阜 之任 也 也 司 日 草 ·: 堯得舜 之事 録 四 麓 : 非 也 木 序》 亦 謂 方 是 百 $\overline{\pi}$ 也。 總 典 則 大 則 歷 云 歷 物 何 聚

天下.

知其聖也

言風 又 無烈風 R 庶績 日 弗 弗 咸熙,黎民 迷, 雷 迷 雨 而 辭 之愆錯 云 似 烈 不 雍 風, 順 逆 和 陰 亂 何 也。 也 陽 ? 順 謂 或 序 既 無 日 烈 風 風 烈 不 雨 雷 風 11-時

之事 震, 迷。 言? 雨 之迷錯 則堯知其聖矣,見於事 則不必迅暴然後爲迷,所以 以以 若 詢 雷 事 考汝之前言,皆可 也 雨 考言,乃言底可 必 風, 順 時,若當 無 時 之物,故必言烈, 暘 致 績。」詢 ,至於三年, 而 功 降,冬發夏不 獨 實 風言烈也 謀 也 汝 所 聞 乃見 而 其

逆 ? 之何? 受終,始占天意 類 時 蓋聖人欽若昊天之道也。 受終,則察七政之度,不愆忒 矣,故止 攝治也。 不 È 順 帝,禋六宗,望山 理 在璿璣玉衡,以 必 遜 日 裡六廟 六宗,三昭三穆也。 受 避 未 而 而 後 受終,則 已 ,何也? 也,堯之六廟 有 何 察 齊七政。」在 疑][也 焉 ,徧群神,告其 天 如 天意既 如 意 七 否,以觀天意, 先已受終文 其 政 何 或曰: 有 荷 有 緣 順 察 變, 誠 您 ,於是遂 而 也 (受命 則 有 舜 則 祖 如 既 則 順

感於 有 而 命官,乃舜納于大麓,其見之政久矣,既受命 己之意合天否也。 則欽若昊天,乃所當先,故考齊七政,非謂 天意 君,固宜察天意 天 地 不 順 通 者乎? 於 神 明,豈 也。 此則不 注云:或以爲既受終, 有 然。 聖授受之際,而 自堯之欽若 察

言「於是」也。「肆類于上帝。」肆,遂也,猶後之屬文者

侯 岳 非是當年二月便往 還其瑞玉。 少接之,則得盡 見之,不如 群神、輯斂五瑞、徵五等諸侯也。 四方諸侯至矣,遠近不同,來有先後,故 也。 之秩序,制度之等差,是修五禮也。五 自「上日受終」,而類上帝,禋六宗,至 所至協 他 自「歲二月」已下,言巡狩之事 朝會之同 ΙĒ 其 時 、詢,察禮意也。 日,同 ,亦非一歲之中,徧歷 期於一日也。 其 度量 既見,則頒 正 至月 蓋 $\overline{\mathbf{h}}$ 等諸 終 欲 日 等 五 徧 日 則 以

皆使合理也。明也。正其五等制度,并其君臣所執珪幣,之制,古有之矣,防其亂,故巡狩所至,必修

以成形言則器。
 工器即五瑞,以其物言則玉,以其實言則瑞,已觀則復還其玉,餘則否,所以禮答列辟也。已如五器,卒乃復」者,諸侯尊而贊重,故

庸 下, 惟 雖古禮不可詳知,恐 牲而已,故云用特。若受終而 各有牲。 如告朔大廟,亦不止告祖也。 也,此記禮也。 時祭設主,則各就其室,非祭不必設主也 故云「四 每 歸格于藝祖,用特。」歸格,告至於祖廟 巡狩,非能偏至諸國也,至方岳,則 五 載 如告朔告至之類,非祭也,共用一 朝敷 <u>巡</u> 止言祖廟舉尊耳,實皆告也。 奏以言 狩,則一 薦新之類,亦 明 方之諸 試 一種,則 四 以 功,車 時之祭,則 止就 侯 是祭也。 朝 廟 服 于 耳。 覲 以

而褒之,其言不善則固有以告飭之矣。以旌其功也。注曰:民功曰庸,其言善則考善者則從之,而明考其功,有其功則賜車服,見一方之君,使各進陳其爲治之説,其言之

别 罪之前,言殛鯀 水既平之後。 治平而定九州之域,在後始分十二州 而 其九州之封界,舜始分爲十二州,在洪 肇十有二州。]上古九州,治水之後,禹 後殛鯀也 此歷 在説 《禹貢》云别九州者,洪水 一叙舜 用刑之中,非是先 事,故肇十二州 分十 在 四

十、真正。 必非以人力增大其山使大也,蓋表其山爲一必非以人力增大其山使大也,蓋表其山爲一

朴作 鞭作官刑」,治官之刑 五 刑。 :教刑] 象以 情之有宜矜貸 」,凡教皆用,不必指在學校。 典刑」, 象罪之輕 也,小過不 ,則流於遠以寬宥其 重,立 · 用 正 爲 常常 「流 刑。 刑

> 刑也。 刑。」 刑。 刑之爲憂恤哉 赦之也。 調非 重明舜意云:舜之於刑,欽哉 哉,惟刑之恤哉!」史官既載舜制刑之法,而 民也,故殘害之以刑,使不得爲 直赦之。 矜其情而緩之耳。 寬緩之義。 告 人 五刑分其 上云皆舜之制刑立 一過也 所致而至者。 怙恃其惡,與終固 雖罪非固犯,失由 赦,除釋之也。 ,謂過失 1 遠 近。 言其敬慎哀矜之至也 災非由 肆,緩也,今語有縱 入於 告 法 人,宜. 罪 災 **青者肆之,災者** 於人,故必致法, 其 如此。 :者。 肆 非 人害也,是賊 赦 者 加 欽哉 災,害也 恤 「欽哉欽 ,凶惡之 怙 也,故 終 賊

注云:説者皆以爲舜語,非也。

官載述舜之制刑 於三危,殛鯀於羽 有二州之前 「流共工於幽州,放驩兠於崇山,竄三苗 因 Щ 大抵 叙其 四罪 流 所 放 而 用 天下咸服。」史 刑 統 也 謂 之流 四 罪 故

殛 者,投置之。 或 敗 鯀 ,去遠之也,如水流去。 流 **殛**則誅 功害事於彼耳。 必 宥 於 五 羽 刑 山 死之也。 以罪之輕重、地之善惡遠邇 者,非 而 於 流 時 四者,自輕及 之中 適在彼 放者,屏斥之。 有 輕 ,則惡之彰著, 重 之稱。 重 而 言。 爲 竄 流

巡狩, 朝 避丹朱之事,蓋 位,故復至文祖之廟,以告見焉。孟子云其 之南,迹之顯者、《書》不云,何也? 耳,故史官不載其事。 民,則君子可 三年喪畢, 書》之紀事,不如後史之繁悉也。 廷諸 則舜之在位,其所往多矣,皆不記 百 侯請之,是天下從之也。 姓如 而 知矣。 喪考妣。」百姓,庶民也。 朝 喪畢 廷公卿天下諸侯皆請 正月元日,舜格于文祖 而 或曰: 不自有之,畏避 舜往 推其 若五 避於 事 言庶 載一 舜 也 南 日 而 也。 泂 言 ΙĒ

改正武成

漂杵。 罔有 命。 有神 略。 藪。 孫周 成 干墓,式商容閶。散鹿臺之財,發鉅 戊午,師 暴殄天物,害虐烝民,爲天下逋逃主,萃淵 告于皇天后土,所過名山大川曰:惟有道曾 日癸巳,王朝步自周,于征伐商。 **%** 敵于 甲子昧爽,受率其旅若林,會于牧野 予小子既獲仁人,敢祗承上帝,以 王 武 ,尚克相子,以濟兆 華夏蠻 ^ 武 王 發,將有大正 逾 戎衣,天下大定。 我師,前徒倒戈,攻于後 成 伐 孟津。癸亥,陳于商郊,俟天休 一貊,罔不率俾,恭天成 殷, 惟 往 歸 一月 于 潤 商。 1 民, 識 辰 釋箕子 今商 無作 其 旁 政 以 王受 死 神 底商之罪, 事 命。 囚 魄 橋之粟, 羞 北 ,越翼 作 封 無道 惟 遏 比 亂 武 流 既 阚

伊

川

經說

卷之二

厥玄黄,昭我周王。 小邦懷其德。惟九年,大統未集,予小子其 成厥勳,誕膺天命,以撫方夏。 君暨百工,受命于周。王若曰: 三,建官惟賢,位事惟能。 周,乃反商政。 惟先王建邦啓土,公劉克篤前烈,至于太王, 日,庚戌,柴望,大告武成。 祀于周廟,邦甸侯衛駿奔走,執豆籩。越三 之陽,放牛于桃林之野,示天下咸服。丁未, 王來自商,至于豊,乃偃武修文,歸馬于華山 大賚于四海,而 厥志,肆予東征,綏厥士女。 惇信明義,崇德報功。 王迹,王季其勤王家。 政由 萬姓悦服。 天休震動 舊,列爵惟五,分土惟 重民五教,惟食喪 我文考文王,克 垂拱而天下治。」 既生魄,庶邦冢 厥四月哉生明, ,用附我大邑 大邦畏其力, 惟其士女,篚 嗚呼群后 1

肇

基

承

伊川經説卷之三

詩解世傳胡氏本,辭多不同,疑後人删潤,今悉從

舊本也。

周南 關雎

《詩》者,其周公乎? 古之人由是道者,文王 莫不 天下治矣。二《南》,正家之道也,陳后妃夫 也。天下之治,正家爲先。天下之家正,則 之。學《詩》而不求《序》,猶欲入室而不由户 能達 誦之聲,長而識刺美之意,古人之學,由《詩》 能專對,雖多亦奚以爲?」古之人,幼而聞歌 雅·鹿鳴》而下,各於其事而用之也。 使邦國至於鄉黨皆用之,自朝廷至於委巷, 人大夫妻之德,推之士庶人之家,一也。 **豈能興起也**? 而興。後世老師宿儒,尚不知《詩》義,後學 「誦《詩》三百,授之以政,不達,使於四方,不 義,可以 夫子慮後世之不知《詩》也,故序《關雎》以示 政專對乎? 謳 吟諷 垂世立教,故曰「興於《詩》」,又曰 誦,所以風化天下。 世之能誦三百篇者多矣,果 是後之人未嘗知《詩》也 如《小 爲此

也。 其歸止於禮義而 風之正也。自《衛》而下,王道衰,禮 至如一作「於」。● 也,故以當時 卷耳,不盈 膚,赤舄几几」是也。 芾甘棠,勿剪勿伐,召伯所茇」是也。 上,凡所刺美皆是也。 爲《詩》之義有六:曰 也,所刺者變也,規誨者漸失而未至於刺也。 有譎諫之義也? 蓋發於人情怨憤,聖人取 正風者無幾矣。 天下之治,由兹而始,天下之俗,由此 民之秉彝,好 雅,曰頌。 物相比,「狼 雅者,陳其正理,「天生蒸民,有物 傾筐。 之《詩》繫其 風 是 、跋其 《麟 懿 以 己。 其刺上,至指詆其惡,豈復 嗟我懷人,寘彼周行」是 德 動之,上之化下,下之風 趾》、《騶虞》,乃其 (胡,載 `惟《雅》亦然,所美者正 」,是也。 興者,興 風,曰賦,曰比,曰興, 賦者,詠述其事,「蔽 後。 疐其尾。公孫碩 起其義,「采采 頌者,稱美其 其化之之成, 義 比者, 有則 應也。 廢 而 今 成。 0

日

以

《頌》。 《雅》亦分焉,稱美盛 化自召而南也。 之道,先王之所以教天下也,故繫之《召南》, 巢》、《騶虞》之德,諸侯之風,國君而 者之風,故繫之《周南》,化自周 説《詩》者之辭也。 然後其義可知,今《小序》之首是也,其下則 義,則國史明之矣。 體也?《詩》之别有四: 天」,是也。 事,「假樂君子,顯 四者,故曰《詩》之至也。 曰《大雅》,曰《頌》。 風》,言天下之事,謂之《雅》,事 有是四端,所謂 學《詩》而不分六義,豈知《詩》之 今本「南」字皆誤作「公」。 顯令德,宜 《關雎》、《麟趾》之化,王 史氏得《詩》,必載其 德與告其 四始也。 言 曰《風》,曰《小雅》, 得失之迹,刺美之 或 民宜人,受禄 《詩》不出 而 之 成功,謂之 南 事, 有 也。 下,正家 召伯爲 大小, 謂 事 干

作於」,原爲大字, 據涂刻本改爲小字。

__ 〇 四

憂思 之義,樂得淑女,以爲后妃,配君子也。 諸 之心也,是則 之切也,切於思賢才,而不在於淫色,無傷 者,正家之道,王化之所由興也。 侯 ,在於進賢淑,非説於色也。 長 故 諸 《關雎》之義 侯之風 主之於《召 也 南 哀窈窕,思 ≫ 故《關 _ 其所 雎 南 善

漢 廣

守禮 得 雖 犯 水之爲限,不可 文王之道,南被江、漢之域,因 枝跛 也。 有 而 義。 以 犯 《漢廣》言漢之廣大,猶云江永也。本言 1,則不 非 倚,喬木不可攀及也,故人絶欲休之 南國 禮 既以禮義爲防,則非僻之思自絶 求之者,亦不 被文王之化,家 思犯矣。 `踰也,以興禮義 夫人之休於木下,必 可得 齊俗 圃 取 之爲 厚,婦 漢水 犯 也,不可 開,不可 爲興。 人知

> 也。 思 惟其禮法之限,不可得也。不止無 者,若得之以歸,則「言秣其馬」矣,情切之意 直者刈之,如是之女,豈所不 之内,姆傅之側 女之游者,謂 不 長永,不可思方而 思 可,濟難於泳矣,興 ,又知其端直之美而願慕之也。 興女有高潔 重稱漢水之廣,不可思游泳以濟, 曠解 也。 之行 渡也。 獨 錯薪翹 非 行 以禮自閉 可動 禮 江大於漢,雖方尚 者 之地, 翹然,必擇 願得哉? 自 不 無 可侵凌也 異 求 非禮之私 乎 之之思 之子 閨 江之 其 門

汝境

於《周南》之末。又周家風天下,正身齊家之天下蒙是化者,文王是也,故以文王之詩附人皆由禮義,王道成矣。古之人有是道,使《關雎》之化行,則天下之家齊俗厚,婦

道,貽 調 甚 子以正,言其勤勞,猶魴魚之頹尾,蓋王室暴 爲樵薪之事,思念君子之勤勞,如久饑也。 政如焚焰,雖則如是,文王之德如父母,望之 年矣,言將見君子不遠棄我也。 又能勉其君子以正也。君子從役於外,婦人 漢廣》,婦人之能安於禮義 作輖,重也。 邇,被文王之德化,忘其勞苦也。 謀自於文王,故其 二章,自勉之意。 功皆推 也 ; **※**汝 本而 三章,勉君 伐肄,見踰 墳 歸 》,則 焉。

麟 之 趾

之時 誤 下 趾 也 無犯非禮也。 》言其應。 關 以《詩》有「公子」字,故誤耳。 麟 雎》 趾 而 《關雎》之化行,則其應如 不 下,齊家之道備 成 自「衰世公子」已下、《序》之 辭,●言之時,謬矣。 矣,故 「麟趾 以《麟 此 關

是也。既言之,又歎美之,曰「吁嗟麟兮」!皆於麟取之,皆有仁厚之象也。趾不踐生草,皆於麟取之,皆有仁厚之象也。趾不踐生草,唯》始於衽席,及於子孫,至於宗族,以被天

召南 江有汜

●「麟趾」,涂刻本在下旬「言之時」上。

0

六

其 處 也。 後 自 一言其 悔 過,及也。 所 卒 以 章 致嫡之自悔 則 笑,喜樂而已。 言 不 過 我 也。 而 無 處,得 歌之,發於 怨 笑 其 歌 所 順

谷 風

中

也。

者 當其分乎? 也。 如陰 也。 宜 音,好音也。 其感也陰,其成也 ,所畫之界分耳。 有怨怒也。蓋 不遠伊 無以 陽 習習 我行道而遲遲者,中心念其有違乎此 和 以以 而 和 邇,謂此道 當期 成 送,置也。 也。 雨。 風。 雨 和則夫婦之道成而家室 夫 好音無違,至於偕老,承 陰 夫婦 茶,至苦也,乃以 采葑菲者,以其 婦之道同 陽 交和 不遠 之道,貴其 畿,分也。 一而邇 則 黽 感 一,何莫 勉 陰 有 所 和 有下 而 終。 以 八爲甘。 同,不 成 置 疆 IE 雨 德 畿 我 E 體

> 下, 慉 梁,所以 屑 惑 處則見清,彼以爲濁,而其沚自湜湜,以言 爲者如是,不能 已,又周 與亡也,强勉求爲之耳。 省閲,暇惜 魚,●使毋發而 清,今涇反 新 力而爲之,深則方舟,淺則泳游,不可計 也。 ,心所畜也。 而 昏 陳其躬所 不得 非 梁、笱,喻己所治家事 睦 壅蔽,使毋撤 禮 其正也。 我既 以 之至 其 爲 鄰 渭 去之。我身之所 惟 心知念我,而 去之後 治家勤勞之事,隨事盡 爲 也, 里 其 鄉黨,莫不 濁 愛其新昏,而反不以 反 心既阻絶我之善,故雖 好 而逝之。 乎? 湜湜,清貌 之 不特如是治 如 反以 ,惜爲其毀敗 盡 弟 就 其 笱,所以 其 爲,且不 我爲 道 涇 深 其 視 濁 (矣) 已 響惡。 其 我爲 我 其 於 家 而 能 在 所 心 其 淺 而 有 渭

^{· [}谷風]上"涂刻本作[取]。 · [谷風]上"涂刻本有[邶]字。

既 以 勤 以禦冬爲卒歲之備也,今乃止以 養生之道 習而爲常矣。暨,息也。 時,終乃見棄。 室家,心所歸息也 勞如 饒息矣,乃比我於毒。 憎 而 是, 不 窮困,及 知 侕 其 善善 不見取,如賈之不 肄,習也。 由 爾至於顛覆,今既 心 阻 不念昔之安息於我 絶其善也 所以蓄藏美物者, 貽我以武暴憤怨, · 售。 我禦窮困之 遂其 昔惟 凡 人 生 所 恐

簡 分

也。 武 在 將 碩德之人,俣俣然心廣體胖,在公庭爲萬舞 也 使之爲 前 列而 次章又言其才藝之美。 賢才之人,可 執 萬舞。 處上,見之宜可辨,而不能知之也。 如 組 以 日之方中 」,藝也。 爲王臣,而 言其藝 「有力如虎 明朗之時,又 簡 擇 如 取之,方 心此,非

> 道也。 也。 備 賢者,言彼美德之人,爲王朝之臣,乃得 者宜在王朝也。 藝容色如是,而公錫之以爵 必言其顔色之充美者,以 在公庭見之也。 人蓋謂衛之賢者,文意不然。 ,羽籥二事皆能之也。 言之,所以歎此之不得其所也。 榛之在山,苓之在 左執籥 「云誰之思?」思彼 而 其 [隰,乃 其 右 顔色 而已,勞賤者之 在 秉翟,言其能之 前,易見其才 其 如渥丹然, 宜 也。 王 或云美 一國之 其所

北風

虐 北 則養物也; 四時之風,春而 政。 則 《序》云「並 殺物 《詩 也。 秋而 序》 自 爲 以 謂 白西,則 東,則生 威 北 百 風 虐」,謂 一之殺 姓不 物 成 親 害 君 也 物 臣 於物,故 也; 夏 上下皆然。 相 而 冬 攜 自 而 以 持 自 興 而

全書

〇一八

矣,豈 是也。 速,故 乎? 意 也。 難將及於人矣。 擇 喈,聲。 言尚可寬容 徐,緩也,雍容之狀。 見幾 去」, 冷,必將至於雨 益 所安而往 迫切。 以恩惠相好,則攜持而去耳。 乃 而 莫黑 難辨哉? 其 作, 雱、霏,皆雨散之狀。 行,去也。 述當時之事。 辭 者匪烏 相 迫切,「其虚其邪,既 也。 同 虚 招 車 徐乎? 雪、既 君子全身遠害,惟恐去之不 無及 ,已有駕之意。 觀其爲政之道 同車,亦偕行耳。 乎? 於禍 亟,急也。 尚 然考《詩》之辭 既急也哉 威虐,必將殘暴於人 以其色, 患者也。 7,則知 只且,辭也。 莫赤者 1 則知其 但卒 虚,寬貌 项 風 暴 涼,氣。 乃 一只且」 虐禍 ·章辭 既 匪 君 歸, 物 狐 涼 7

君子偕老

其德之深厚,「如山如河」,乃稱象德之

君乎? 仰,故云胡然 稱 服 之媛也。 重陳衣服德容之美,誠如此之人,乃是邦人 次章又言服章容貌之美,與 君之德,服飾之盛宜如是,而奈 盛服。 0 服章之設,象其 帝, 媛,美德之女。 今「子之不淑」,奈何 君也。 而仰之如天乎,胡 帝言以其有德 (德位 之宜 德 相 ? 德尊位隆,乃 然 何反不稱。 稱 也 而 章言人 尊 則 \equiv 之 可 爲 章 尊

定之方中

言其 後 次章言相土地之初,屬文之勢然也。 下以 事 美建國之得其 决之。 然後 原其 ト洛 初者多矣。 時 亦然,古人之爲皆是也。 制 章言建國之事 既 度 其 今文首 八可,然

殷富 謀 臧 塞 則 當 龜 也 筮 從 淵,深也 矣。 卒章 序其 當其深 勤 所 勞, 以 以 成 致

蝃蝀

其富

盛

東。 醜 奔就 媒妁之言,男先下之,然後從焉。不由是而 之。今世俗不以手指者,因《詩》之言。 蝃 之義,從於人也,必待父母之命,兄弟之議 之「自我西郊」。 夫陽唱陰和,男行女隨,乃 理之正。今陰來交陽,人所醜惡,故莫敢指 知 愐 蝀,陰陽氣之交,映 於男者,猶蝃 在東者、陰方之氣就交於陽也、猶《易》 恥而惡絶之,詩人道是意,以風止其事 言奔則女就男。 不 敢 指 視 也 奈 蝀之東,故以 何女子之行,而違背 衛國化文王之道,淫奔 日 而見,故朝 、興焉。 西 女子 人所 而 暮 父

> 母 道 順 隮 違背其父母 獸矣。女子以不自失爲信,所謂 爲可惡也。 欲,當有信而知義,故言其大無信,不知命, 懷男女之欲耳。 子反遠其父母兄弟乎? ()故和 制 升於西者 兄弟乎? 欲 則順 而爲 苟惟欲之從,則人道廢而入於禽 1,乃陽 命,言此所以風 違謂 雨 可謂 婚姻,男女之交也。 違背 崇朝,不日之義。 方之氣來交於陰 無信矣。 不由 如是之人無他也, 也。 其命 命, IE 而 貞信之教。 理 奔 則 人雖有 奈何女 也。 也 理之 以 朝

相鼠

以 體態,故以 而 動 成 作 其身,有 相鼠之爲物,貪而畏人,舉 如 此 興 牙以 人人之 猶 有 完 無 人之形 其 禮 形, 儀 質 具 視 形 愐 鼠 上驚 體 無 之有皮革 以 禮 成物, 攫 容 無

止,不若死也。

干旄

告之。 郊,野 謂答之,中與之,謂交親之,終告之,謂忠 善道 益多,見其禮之益 疑爲竺,厚積之意。 受其禮意如是,當何以昇之? 馬,行禮於賢者。彼姝美之人,謂有美德者, 各不同。 干旄,注旄干首,九旗皆然。九旗之物,所 之郊,禮下賢者。 厚,當以善道告之,《詩》推其意,知樂告也。 也。 卿 外。 待之益 大夫公子多好善者,賢者受其禮意之 紕,疎布之狀。 若王建太常,諸侯建旗,而 都,邑。 至,報之益 素絲,東帛也,謂以東帛乘 加也。始界之,界,與也, 城 馬四至於五六,馬帛之 國中。 組、錯密之狀。 厚,是爲 好賢益篤,則 知其必告以 樂告也 來 就 视, 建 浚

淇 澳衛

賢

者

益

至,不

好賢則士

亦

遠

遯

也

之至善,人不能忘也。 也; 較」,大車,言其多容而任 之盛。三章言其成質之美,如金 之治學修身。「瑟兮僴兮」,恂謹 章,由其在學以 於外也。「有斐」,斐然文章貌。君子有 物之美者,興武公之美内充,而 由善學自治而然。二章言其威儀之美,服飾 「寬兮綽兮」,寬,弘 「有斐君子,終不可諼兮」,言文章君子 「赫兮喧兮」,成德顯著於外也,故云威儀也。 如如 淇澳之地 琢 如磨」,自修也, ,潤澤膏沃,而生緑竹。 自修。 裕也, 此首章言德美文章, 如如 重如 綽, 以象 切 大車 開 如 文章 錫 治玉,譬人 徭 磋 莊栗 主璧 也。 也。 威 竹,生 言 重 文

青」,言其色,「如簣」,言其盛,密比爲簣。過,是「不爲虐」也。「猗猗」,言竹之態,「青戲謔」,言其樂易而以禮自飾,防節不至於

考槃

緑竹」,竹也,淇澳所有。

道告君,故陳其由也。心在朝廷,寤寐不能忘懷,深念其不得以善賢者之退,窮處澗谷間,雖德體寬裕,而

碩 人

爲之早退,以與夫人燕處,見禮之之重。「河備,至近郊而説止,復整車服而後人如朝,君其家之貴盛,德容之如是。其來也,禮數之頑碩,容質之偉盛,言其位尊服飾之美,又陳頎碩,不質人」,大人尊賢之稱。「賢」,一作「貴」。

水洋 興衆多。 能 激 重, 因以 士大夫莫能正,有去而已。 妾上僭,而 貌。 制 也。 洋,北流活活」, 河水 庶姜衆多,孽孽不順,如葭菼然,賢 君 河水興 薄 情放縱,故禮法不能制。 如 於夫人。 是,故施罛 人情故 既 洋洋,浩蕩,活活,流 縱 盡 不安,强大之魚不 難 言夫人之尊位 制,所 以致 「葭菼」 嬖

君子陽陽

得; 又招其 樂 爲歌舞,又招 而 陶陶, 己。 簧爲樂之器,房,安息之所。 類,由安息之所 君子居亂世,如是而已。 自樂之狀,皆不任憂責,全身自 其侣,由傲樂之道。 也。 翿 舞 荷自 所 陽陽, 持。 爲 自 自

●「尊位」,涂刻本此二字互乙。

揚之水

子, 故周 當使 足也。楚、蒲益輕,言力不足愈深 非 子 揚之水瀾 有 命保衛之,亦宜也。平王 調諸 人怨諸侯之人不共戍申 方伯鄰國保助之,豈當獨勞畿内之民? 王者保天下之心也,人怨宜也。 周 人勞於 戍申, 也淺,故激力不足以流薪,興力不 侯之人。 申、甫、許、皆申之地名。 而 怨思。 獨 也。「彼其之 思其母家耳, 諸 侯有 。况天子 患,天

中谷有蓷

暵 則 献,長吟也,悲恨深於歎矣。 也。 乾 蓷 ~~ 矣,興夫婦 始章歎其 中所生之物,待陰潤 樂 、遇艱 歲 則 難,次章歎其人 能 相 保 而 後 卒章笑其 凶 能 年 生,故 之不 則 至

> 其 乾 恩義之素薄,非 也。 怨 益 深 也。 「暵 由於今也 其 濕 矣」,當作 ,故云「何嗟及矣」, 隰 矣,亦

丘中有麻

非 中反 賢反窮處而咨嗟,故思望其施施 能 實貽我及人者。 李者,徒能甘人之口,而不能養人之物。 云彼乃留而子反歸鄉國,思望其來食於朝。 可衣,麥可食,宜植丘中,興賢者宜在 真 養於人。彼,謂不賢者,乃留於朝。 玉。 有李,乃比不賢之人也。佩者外飾, 丘中,宛宛平窊之處,地之美者 彼留之人所貽我者,徒文飾,而 而來。 也 朝, 次 子之 章 則

緇衣鄭

武公父子相繼爲王司徒,善於其職,國

01

之報 還知、還解、若還,皆更義。還予,猶予還既 其 授之居,復賜之禄 粲,賜之禄廪。予謂 改爲,言 人美其爲國 德,則安舒享此,皆善善之功也。 也。 久其 緇 衣 君而能好善道,享服章宫室禄廪 職。 卿 也。 衣 適其舘,授之宫室; 王朝。 也。 蓆,安舒之義。 宜、言其 還,更也,今人言 稱 授之 服 敝 稱 又

子衿

間 故 行,有法以率之,不率教者有至於移屏不齒 往教强 亂,學校不修,學者棄業,賢者念之而悲 又禮義廉 遂 曰「悠悠我 衿青,學者之服。 爾棄絕於善道乎? 聒 讓之風 也。 心。 子寧 所漸陶,父兄朋友之義所勸 縱我不可以反求於汝,謂 不 思其所學,而 青青,舉家之辭。 世治 ,則庠序之教 繼 其 傷, 音 世

> 挑 亦豈能也? 督,故人莫不强於進學。及夫亂世,上不復 志荒矣,放僻邪侈之心勝之矣。 蓋士之於學,不可一日忘廢,一日忘之,則其 而 廢惰,爲自棄之人。 教者趨利,朋 主其教,則 己。 輕躍。 賢者念之,一日不見,如三月之久也。 達,放恣。 無以率之,風俗 故悲傷之而已。 友 所習者從時,故人莫不肆情 雖有賢者,欲强之於學, 不事於學 雜 亂浮偷 佩爲青組綬。 ,則遨遊城闕 ,父兄所

東方之日齊

當 明,故有淫奔之俗。 女淫 隱蔽,姦慝莫容,如 明 奔。 而 齊國 昏 日 政衰,君臣皆失道,故風俗 也。 興 (君,月 日 出 朝廷明於上也。 當明, 興 詩人以東方之日,刺 臣,日 而 月 姝美之人在 明 照 敗壞 則 今君 物 其 無 不

室; 由 加 姝 謂 來 行 美之人 在上之人不明,容此姦慝也。 所以在 跡 奔 履我 也 在 我室,履 跡 發, 我 門 而 行 内 來 步, 奔 ; 我 所 也。 即 履 以 其 而 在 月出· 來 行 我 也 步 門 亦 而 當 内 即 明照, 來 履 奔 就 我 也 也 發 而

東方未明

也。 柳, 也。 樊」是也 然 夜之限,非 折 職 無 柳 廢 柔脆易折之物,折之以爲 節 狂夫以知其有限,見之則躩 以樊圃,狂夫見之且驚躩,知 也 挈 政 壶 亂 之甚。❶ 言 氏 無節,動非 不 其 司 明 不能 漏 也, 樊 刻, 乃 正 其時,或早或暮,無常度 籬 而 不能 時 也 朝 矣,非 廷 「營營 知, 興 藩籬,非堅 特 而 居 然而 不 青 其 刺 不 爲 是 早則晏, 時 蠅 鷩 限 官 止於 是 也。 也。 固 書 其

盧

令

賢君畋狩以時,百姓見則善而美之。君荒於田獵,故百姓苦之,詩人陳古之

園 有 桃 魏

則治。 是,子曰何哉? 有桃,亦知其實以爲殽,興國有民 亡,故詩人憂思之深也。 復 不 誦詠之爲謡。 能 有德教 用 觀 此 今不能用其民,故心憂之,至 其 ? 詩,可見其憂深思遠矣。 民 耳。 其致侵削可 不 蓋 知我者,謂我驕慢,彼 不能 未之知也。 用 知也。 其 桃,果之賤者。 民, 則 故言我心之 或 不 雖寡,能 無 所 歌 能 政 Ħ 治 刺 人如 事 用 克 豈 則

「然」、涂刻本作「乃」。

猶「駕言出游」,所以寫憂。「罔極」,不中也。至深切也。棘尤賤物,可用以食也。「行國」憂,人莫知之。重言人不知者,不思耳,其情

無衣唐

何物也。燠,煖,亦謂安耳。曰:繼世之君,比受封有降,然不知六七者美之,美其所可美也。六七,衣之數。或武公始有晉國,而能請命天子,故詩人

葛生

是兩句。 日 好 生依於地,興婦人依君子。 也 攻 戦 此 詩 則多離濶之恨,葛之生託於物,蘞之 畫 誰與乎? 夜之永 思存者、非悼亡者、《序》爲誤矣。 時,思念之情尤切,故期於 獨處 丽 己。 「誰與? 獨 日 獨 獨處。」 處 至

死而同穴,乃不相離也

采芩

人。 之,置之,且無以爲然。人之造爲言者,皆讒 人,造爲巧言,且無用信之。又重誡 也,興采言必於誠實之人。下因誡於信讒之 誣不實,何所得乎? 顛,苦生於下,葑蓺 山者物之所生,故采必於 首陽山生堅實之物,故以興讒誣 山陽之平地,又各其 謂不得實事也。 Щ 苓生於山 不 日 實之 所 置

兼 葭泰

斯 故以興焉。 之象也。 蒹葭,蘆葦衆多 謂人情所在。 葭待霜而 蒼蒼 而成,白露爲霜矣。伊人猶 後成,猶民待禮 而强。 人情譬諸在水之中,順 草 類之 而 强者,民 後治,

禮教也。禮教未立,則人心不服而俗亂,國之未至。「采采」,茂盛未已,方濃之狀,未有凄」,青蒼之間也。「未晞」,未凝也,猶禮教而求之則易且近,逆而求之則艱且遠。「凄

終南

何以安乎?

其位 度。 也。 不忘」也 稱人君之位。「至止」,在此耳,不必自外至 美材也。有令德,故宜稱顯服,又美其容貌, 大,必生美材。 ,當修其身,修其德,保其位,故曰 紀,稜角;堂,平寬。 山必有紀堂,君必有禮德,故 終南崇高厚大,以興君位之尊。 人君尊崇,必有令德。 紀興禮法,堂興 宜其服,稱 山之高 條梅, 1「壽考 德

六,見其盛多也,義亦苞聚之類。如下之有

人之中固有秀異者矣。「隰有

六駁」亦然。

晨

風

才也。 見棄之意而言,故云「忘我」。「欽欽」,不懈 此,而如何今乃忘我之多乎? 賢者所就也。故人君未見君子之時,當「憂 廷有道,則賢者歸之,下章言當念下之有賢 之意。「如何如何」,歎其如是也。上章言朝 心欽欽」然,念恐己之有未至也。人君當如 也。林木茂盛,則飛鳥所集,興朝廷有道,則 其來去之疾。 人君好賢,待士有道,則賢者 賢之意。鴥,飛疾貌。 歸之。禮貌不至,則浩然去矣,如晨風之疾 《序》言「始棄其賢臣」,詩中又見其不求 櫟,山 之所有也,而有茂盛而苞者,衆 以 晨 風興君子者,取 此詩主賢者

大者乃成樹耳。「欽欽」、「靡樂」、「如醉」,淺如何反忘我乎? 棣、檖亦然。言樹、蓋其茂賢,則當求而用之,故於未見,則憂而靡樂,

無衣

深之次,漸言其至也

君當 矛,與之同仇矣。 于興師」,謂若以王道興兵 若推同袍之恩,則民亦同上之欲。「王 與 不 與 民 民同欲,故 同 欲 也。 澤,猶今謂汗衫之類。 能 民 同 疾上之爲,詩人言爲 袍, ,則百姓皆修其戈 則 雖寒不 怨

墓門

有 則 荆 荆 棘 棘 人情不修治,則邪惡生,猶道路不修治, 生, 則 當 故 以 以 斧斤開析之。 興焉。 墓門,墓道之門 他才不善,宜 也。

> 歸矣。「夫也不良」,詩人作詩 鳥萃矣。 咎自他幼小,不擇師傅,致成其惡。 衆皆知之,而 得賢師良傅以道義輔正之。今「夫也不良」, 責之而不我顧,必待顛沛,當思我言。 梅,美木,雖美木生墓門荆棘荒蕪之處,則 之不善,後章言有梅,深咎輔道之使然。 矣」,猶云從來誰如是乎。 雖有良心善性,與 不去之,自昔誰 前章言有棘,言他 不 如是 善 以告責之,告 人 乎。 (處,則 「誰 昔然 此 惡 惡 追

防有鵲巢

興 於是鵲往 人 心有蔽昏, 起土 一巢焉 爲防壟,以爲疆場之限,上植 則讒 有叢 誣者至 林之蔽翳, 邛,丘也,謂 則 鵲 以木, 丘

■「袍」,原作「胞」,據涂刻本改,下同。

平之處 則 有 苕生之美草,興 人 心 高

平 原 夷, 廣 則來善言。 侜 謂 譸 張 迁 迴, 誣 罔 人 者 明

誣賢 必 迁 善 曲 也。 以 致 其惡。 「中唐」,窓下之地,瓦礫 子 美」,心 所 賢者 所 聚也, 憂 讒

美 興 也 處 汙 惕惕 則 不 懼 善者從焉。 鷊,文草

也。

旨

匪 風檜

政 摇 興 顧 匪 則 風 時,上 民 瞻 車 上 、所思。 弔,傷 僻, 政, 亂 盻 無 極 德修則政舉,法制備則車 戀 法 故 車者人所 思治, 憫。 之 以 思 誰能烹魚以食人? 車。 興 而 魚, 人 上下 傷 發, 情 爲 美 旧 所 以以 焉。 好之物, 也 迅 然。 烈 興 匪 飄 民 風 風 偈, 俗。 人 回 者 人將喜 所 不 旋 軒 成,政 天之動 天 欲 和 輊 氣 之風。 嘌, 不 興 而 教 順 定。 助 善 輕 衰 則 以

> 懷, 之。 相要結也 誰 能 歸 從 周 好音,和聲,喜樂相從也。 之 道 ? 人 將 樂 而 與

O 二 八

蜉 蝣

閲,升 裳楚楚 處 也 也。 也。 蜉 蜉 騰 蝣 蝣 翼,翅也。采采,華飾。 然鮮美,胡 駕 游 之 朝 皆 翔之狀。 羽 生 用 羽, 而 説 暮 字, 能 翅 死,以 久乎? 如雪,潔白。 稍 憇 猶 也, 興 曹 國將亡,不能 亦 故憂其 息,止 君 有 之奢 悦 經文説 安所 息。 義, 故 説 掘 歸 衣

候 人

通

用

税

共公遠 君子而好近 小 人, 則 所用多小

0 説 税也」,原在「潔白」下,據涂刻本

乎季 言耳。 多? 朝 人之無 服章之美,待遇之禮。 鵜乃在梁,不濡 宜也,如彼之人,乃使服大夫之服,又至於 百廛、三百囷。 用者,其微有自候 三百之多,所以刺也。 濟乎南山者,以草木之盛有所取也。 取 女者,謂其有婉孌之容也。 其進者非 一也, 《左傳》「乘軒者三百人」,蓋因此詩也。 彼候人者,使荷戈祋以守疆場,乃 何 所 取。 薈蔚,草木之盛,鬱茂之狀。 近乎? 而食,興無功受禄,●不稱 曹 人 國 而 獨 之小,豈容有三百之 三百,言其多爾,如三 遂,稱也。 升 取 者 候 ,故取其甚 人而言者, 今小人無德 卒章興 饑渴 者 蓋 小 其 其 而 時

下 泉

義

可

爲而

泉之 潤 物,猶 政 令膏澤之及人。 泉寒

> 所也。 能 芃然盛之黍苗,蓋陰 卒也,又傷無賢伯以糾率之,故致 歎念周道之衰也,所謂「思明王」之詩 物。 冽,則不 勤 苞,叢生之茂者,乃反害之,是皆不 王事,由 稂、蕭、蓍,皆下澤所生。 能潤物,在下則不能及物,浸 郇伯 勞免之故也。 雨膏澤使然。 **愾然既** 郇伯,古 如 四方諸 是。 也。 漬 得 則 方 芃 其 侯 而 其 害

癧 七月

伯之有功者

冬之備,故以「七月流火」爲首章 火流下,歲過中而行暮矣,當有卒歲之具,禦 之由,民之勞力趨時 周公爲此詩,欲成王知先公先王致王業 , 稼穡之艱難如 也。 此。 大

典」, 原誤作「與」,據四庫本《程氏經 説 》改

具也。 室從事 明、蓋 月也。 備 公子裘」,「獻 孔陽」,言染爲玄黄之色,我特致功於朱 蠶 月 勤力蠶 亦用之」,應是也。 故重言之。 時也。女心之感,不由缺一字。● 采蘩祈 陽 春日 也。 之月 在葦」,亦蠶備也。「蠶月條桑」,當蠶長之 長之月,當枝落桑 ,庶幾得如富貴之子,及時而 遲遲」,上已云「春日載陽」。 |所以 伐遠揚 耕作 計歲氣之早晚,不可指定幾月 事,勞且傷悲也。 也。 祈,女心傷 同 供公上爲公子之衣 蘩之用,云生蠶。 ,農官至而喜之也。「春日遲遲, 我婦子」,我婦子同來致餉 豜於公」,皆此義也。 以猗女桑,皆用 之日」,猶 悲,殆及公子同歸。」再云 祈祈,衆多。 ,則用斧斨 云「冬之日」、「夏之 蓋 此道· 所 <u></u> 洲斧。 裳故也 7,亦預 行 以爲 正 祈 而 也。 義》云「今 祈如雲。 民之知義 人情之感 由 衣裝之 備 也 国遲遲, 也,盡 使鮮 我 其器 「爲 朱 言 女

> 以 凌陰 在歲 夫」。 同」, 也。 居也,乘屋,蓋治也。 勤勞,又復 食瓜」已下,皆爲壯者之食,故云「食 薁」已下,果蔬棗酒,皆爲養老之具。 改歲之事,歲暮 ○「嗟我婦子」,歎其勤勞,歲事既終,又復 股,始躍。 如 三物,然考詩意,恐是一物,隨時異 順 此 末,而 纘,繼 _ 謂收聚也。 時 ○諸び 則 氣 藏 美 也 冰 執宫功也。 俗 藏之須待春至,故云「三之日納 種皆人,農事畢矣,故歎我農 振 續之義,謂修 所 成 羽,翅成。 其 以 入居 矣。 斯螽、莎雞 蚤,用之於獻羔祭韭 備 暑,而 室 綯,所用蓋屋 「上人」,遷入 也。 二其 穹窒。《東山》中 肄 開 同 、蟋蟀,説者 也。 自「六月 冰 必 謂 後「我 以 名 會 仲 都 食 鑿 耳。 聚 一,時 邑之 七月 我 鬱 夫之 稼 冰 Ė 雖 共 農 於 必 及 爲 夏 爲 既 動 事

❶ 「一」,涂刻本作「日」。

此 耳。 觥 畢 詩多陳節物,大要言歲序之遷,人事當及時 堂」、公爲衆人會集之所,鄉校是 頒冰,是其後用 丁,朋 ,祝觴之辭,民相與爲樂,祝以壽考也。 但言其有時,不必始有也。 所言或與《月令》異者,月令多舉其始, 聚以饗其樂。 時 也。 「殺羔羊」,謂盛禮。「公 「朋 酒斯饗」,歲 也。 功既 稱 此 兕

鴟鴞

謂之: 喻 其毀壞之意,以 全體,據所存而言之可也。 心,作詩之志也。 知周公之志,公爲此詩,告以王業艱難,不 爲惡者 管、蔡流言及叛,是亂也。 爾既取我子矣,無更毀壞我室。 了, 喻管、蔡、室喻 悟 王 此詩章句不完,莫可 心,此周公出征救 鴟鴞,惡鳥,呼 王室。 成王幼 管、蔡 鴟 究 亂 而 骨 鴞 忽 其 之 未 而

> 病也。 意 摇 高 矣。 通用。 厚。 肉,而與之爲亂,是「既取我子」矣,毋更毀壞 王業之艱。予羽尾殘敝,然後成室。 披折貌,疑其義然。 之道。深至如此,而尚或侮之,興禽出 也。「迨天之未陰雨」而下,言自爲安固 我王室也。「恩斯」,謂 曰「汝下民」,義不安。 切也。 光光貌。 ,則其聲憂懼。 此皆謂鴟鴞之言,不知謂之者主何 以骨肉情愛之心,篤厚之意,養鬻「育」字 子之道,可憫惻也。 所以如是勞苦,以未有室家 既其 成 就之勞如 此周公之詩,所 蓄租,積取 拮据,持捋貌。 情愛。 今乃取之,其毒 此,故 動 也。 爲 斯, 以 也,興 卒瘏,致 翹翹 辭 風 捋荼, 前 防 謂 雨 成 而 然 謂 閑 物 篤

東山

完,言其完師而歸,無死亡之患也。思,

以 我 也。 之地,淮夷 謂 畦 其在外之久,往來之勞,每章重言,見其感念 枚」,言當歸 彼裳衣」,治歸 已下是也。 也,猶云升也。 處,自保其身,敦然獨宿於車下也。 作率慶士。」枚, 壠 在 爲懷也。 則 其勤 東 陰 ,爲麋鹿之場也。 有 婦 丁夫于役,田事廢,室廬遂荒,「果贏 而 雨 自 思念其勞而 「我征聿至」,謂我之行者其遂至 勞,思 念歸 則 也。 勉之意。 此言與「勿士行枚」,皆人情之正 也。 行 在 |彼思念其 歷 装 則 役尤苦,濛濛之時,覊旅 滔滔 蠋在葉中,故 其 蠋卷在葉中居,如士卒之獨 也。 西悲,謂 也。 廬 悲歎,又計其行之久,念 垤,丘 ,紛紛不窮之狀,言其久 「枚卜」之「枚」。 室荒廢 ±, 不可以荒毁爲畏,當 如 懷 事 此。 垤也。 也。 西 也。 云「烝在桑 加 「町畽」,廬傍 孔 悲 東 有陰 悝 「勿 烝,上比 也。 山 帰銘 愁慘, 野」。 事 所 雨 制制 E: 之 行 征

> 堅木。 其歸 還,言如苦瓜而繫堅木 見其 也。 縭」,女之親結之。 情之所樂也。倉庚之羽鮮明,婚 三年矣。 堅木,言繫之固,以比君子于役,久留滯 「瓜苦」,瓜之苦者,延蔓栗薪之上。 念其將至而 嫁女之歸,其 何 也? 而成 思 穹室」, 以其苦,人所不取,常在其 望之情 新 四章言歸,而 灑 昏 鼠 馬皇 且甚嘉,其 捹 切 穴穹空也。 也。 甫問 一駁,有 「九十其 切。 及 也。 有敦 文彩 舊昏相 時 復恨其 成婚 「自我 儀 窒, _, 也。 -, 圓 所 見之歡,當 儀 留 姻之時 姻之禮 所。 不見」,今 「栗薪 之多 成 壅 繫之久, 親結其 之狀。 土 施 也 也 也。 不 於

破 斧

如

是詩 也,周大夫刺朝廷之不知周公也

將缺 陳 美,所以刺朝廷之不知也。 之亂振動,恐其益亂天下。 將,大也。我人,猶云我公也。云斯人可哀, 業、惡日以滋、當速誅 親 也 知何物,要之器之大於錡者。 迫 蔡爲流言,遂以叛,將益動 有器用 而 同,動也。 心,勤勞王家,如是可哀也,其德亦甚大矣。 四國 制 切之辭。 云惡 王業。《 我 典禮,立政刑,皆爲天下之用,猶人之 是皇」也。 斨 四國, 也,故以斧爲興。言既破毁我斧,又 休,美也。 以及錡、銶、皆人之所 鴟 或寢或吪,振動於四國,爲是四 錡,斧屬,言益將有 鴉》遺 四國 斨,方孔 皇,《釋言》:「医 爲 王,《 哀周公之忠勤,謂之甚 而大者。 亂,何足云惡 也。 東 嘉,善也。 《豳》詩:《七月》 山》言東征、《 周公所以東征 天下,以傷壞王 遒,逕急也,加 商、奄始率管、 正也。」周公之 害。 用。 也? 建 訛與吪 銶,不 或 破 國 封

於刺也,復有淺深之異,觀詩可見。《狼跋》,斧》、《伐柯》、《九罭》皆刺朝廷之不知周公。

伐 柯

美不失其聖

得 者,動必以禮者也,亦當以禮致之,則周公可 是矣, 今欲反周公,取則於周公可也。周公 歸,亦必有其道也。 周公遲留未歸,士大夫刺朝廷之不知所以還 取則不遠,所執而伐者乃柯也,以之爲則 妻,匪媒則不成。言各有其道。今欲周公之 以興君臣夫婦之合。伐柯,匪斧則不能,娶 周公之道。斧也,柯也,二物合而後成用 下征之之急如此。《伐柯》乃既得罪人之後, 而 《破斧》言周公之忠勤,憂四國之亂,天 觀見也,故云:我欲觀見之子,惟以禮 二章言其道。 伐柯, 故 則 其

之事」、「籩豆有踐」,謂禮儀是用也。乃可。籩豆,禮器,所以行禮,《語》云「俎豆

鱒魴, 也。 所於外,於汝信安處 所,蓋朝廷未 遵渚,言不得其所。公既征 言公之不得其所也。鴻飛,戾天者也,今乃 道。《伐柯》是也。既又思之切,刺之深,責在朝 我欲覯之子,當用上公之禮服往逆之。二章 網,則得鱒魴之魚,用隆厚之禮,則得聖賢。 廷之人不速還公也。 居 東未反,士大夫始刺朝廷不 「宿」,安息也。「不復」,謂未還舊職。 周公爲詩遺王,王未知周公之志,故公 魚之美者。《詩》云:「必河之魴。」九 跋之 以 師保 重禮往 也矣,深責在朝廷之人 九罭,網之固密者也。 迎 m 也。 歸,則未得其 ·知反 使公不得 周 公之

> 以 之心悲思望公也 朝 四 二,用 廷 章祈反周公誠切之意。「是以」, 所 也 以 無無 有衮衣之章,用尊禮聖 以 是 服逆我公歸來, 無使 賢。「無 猶 所 士民

狼 跋

馬公攝政,居危疑之地,雖成王不知,四國流言終不能損其聖德者,以其忠誠在於王家,無貪欲之私心也。狼,獸之貪者,猛於求欲,故檻於機穽羅縶,前跋後疐,進退困險。 ,不矜其德,故雖在危疑之地,安步舒泰, ,本為几几然也。碩,大也,謂崇大之位。膚, ,不矜其德,故雖在危疑之地,安步舒泰, ,本為几几然也。碩,大也,謂崇大之位。膚, ,不矜其德,故雖在危疑之地,安步舒泰, ,本為几几然也。碩,大也,謂崇大之位。膚,

其聖。 焉 唯 欲崇 惟 鳥譬小人,豈 古之詩 瑕 大 遜 而 也。 無 其 舜 安 不伐,天下莫與汝争功」也。 不 也。 顧 處 高 所 以 崇 不失其 先儒 謂 人,比興 慮之意,所以不失其聖,德音 己也變變然有恭畏之心,存 得名之心,其能得天下之與 汝 几, 高 聖 以 有 惟 安義,几之立 狼 智自 猛,奚若 以 以 不 跋 類也,是以 豺 矜,天下莫與 疐不 處,所 狼 虎豹,胡 興 失其猛 以 聖人乎? 名取 天下 香草譬君子,惡 興 獨 使周 其 汝 稱 取 周 誠 如 争 義 聖, 且上 公有 狼 公 所 也 是 能 也 不 以 蕩 乎? 處 也 失 不 蕩 貪 汝 此 危 ?

小 雅 鹿 鳴

與

他

詩

不

類

故

不

通

耳。

此詩在六義

比

句言跋言疐,實

有

几

几 不

暇

之

2義,但

此

詩

體

自念 鹿 鳴 以 下 二十二篇, 各 賦 其 事 ,於

> 此。 長 示 其 悦 藉之,筐以貯之,既有誠樂之厚意,則人心 又以 食野之草物,情相樂 呼,故以 也 其 懽 事 久 民 而 無斁。 以 幣帛將其 云「我有 燕 心 相好,以 而 厚之之意,使儀法之。 群 用 興 之, 次章 臣 、燕樂。 嘉 此示我之列位,故 其 嘉 賓 又言所燕禮 誠意,故云「承筐是 周 賓,鼓瑟 則 呦 公之謂 呦 用《 也。 鹿 和 吹 乎? 君臣賓 聲,和 嘉 鳴 (笙」, 賓 三章言其樂之 聞 人 與 計 聲 鹿 浴將」, 主 勸 其 食 相 望 相樂 ^ 而 呼 昭 相 南 承 則 得 樂。 明 杰 感 以 如 共 相 同

匹 牡

其 力,故《 見 知 四 則 牡》之義 四牡》之義廢 説 矣。 上不 7, 憫使 知 則 臣之勤 下 君臣 之勞 勞,故 缺矣。 ()則下 云有 不 周 自 道 杰 功

而

作歌 母 義作歌,以 豈 將 能 止 王 猶 義告之。 使臣之勤勞,乃不暇遂其私,至「不遑將父」。 事也。 飛 事 也 不 通 懷歸 嘽 之物、蓋 不 途 將 嘽 也 可 母 「豈不懷歸」,言使臣之心。 ? 卒章 迅 廢 告其母。 來說」,作 倭 疾。 或飛 敗, 以 遲 王事 · 勸 心傷 , 駱馬, 以 ,或下集於所安之處 回遠。 父則 不 義 是歌,使以 悲 미 也。 强 念 廢 知 豈 而 義,母 敗 此 駕 不 耐 也 也。 而 遠。 懷 馳驟不息, 此 歸 主恩,故以 是用以 騑騑 騅,翩 義告 平 「是 ? 以 不 其 用 此 興 翩 以

皇皇者華

有 訪 光 問 華。 疾苦 天 子 遺 「皇皇」,猶煌煌,光采之狀。 宣道化於天下,下國蒙被聲 使 四 方,以 觀 省 風 俗 采 察 教 善 皇 是 恶, 華

> 之光 有義,要之詢訪耳。 均」,皆整順之狀。 以 能宣達,是「每懷靡及」也。 「征夫」,使人。「駪駪」,俊健之狀。 以 後言。 爲 興。 明 於 「於彼 野 濡,鮮澤。 猶 原隰」,言高下皆同 王 澤 諏、謀、詢、 絲,條 採察求訪,使臣之大務 之流 布 理。 駒、騏、駱、駰 光 度,前載雖各 華 「沃若」、「既 天 其光華。 下 惟恐 也,故 皆 不

常棣

之事 也。 萼 力 盛之貌,「不」當作「拊」,亦可如字,亦 而 相 作 ,故以興兄弟。 可畏 次章 依。 也 此 燕 ,則思兄弟之助,方困窮離散 敘兄弟相賴之事 樂兄弟,親 生相親 常棣,今所謂 ,力相 「鄂不 睦宗族之詩,不 承,興 玉 韡 李花,花萼 華」,華華,鮮 人當 人之莫 死 因 管、 生 如 可 相 以 群 患 兄 華 承 難 弟 花 壯 其

族

其

好

和

三章言兄 章多,章多所以 極 其 鄭重,句少則 各陳

義

故

也

於郊

野之時,

則求

所親以

相依恃。

伐 木

可

則

其

弟

之義。 共之。 章因 應。 好。 自 T 篤 朋友故舊則歌之,所以風天下 木之人,敘其情,推其義,以勸 伐木之人,尚有此義,况士君 幽 丁相應,相須以 則民德歸厚矣。 鳥 「友聲」謂應聲,猶 谷升喬木 山 嚶嚶」, 以 繼言「鳥 既 中 興 伐 同 朋 木, 其 相 相 友之義。 事, 非 應 鳴嚶嚶」,又以 追隨,嚶嚶然其鳴 成其事,賦 和 則 二人伐木,更運斧斤, 人能 之和 相 人之朋友相從也。 親 相鳥如是,豈 聲。 獨 好 爲 子乎 此 也。 物情興 成 朋 鳥 可 必 朋 鳴 友之義,燕 ? 以見朋 朋友故 與 ,蓋求其 相 友之義 故賦 朋友之 同 應 而 志 和 友 次 伐 者 不 聲 舊

之義。 也。 其侮 莫如兄弟也。六章勸其相宴樂,養恩義。 之兄弟,狠鬩於墻,雖有不睦之心,猶將外 人」,「毎 ~,則能 是 合 樂 籩 歎 和 相 可 相 樂, 也。 丁, 事 而 小 豆 永歎 應 須之急, ·,信 相 兒親慕父母謂之孺 ,飲食飫足,兄弟 若他 五章言平時則皆可遂其私意,急難則 如 久 有」猶「亦有」也。 宜其室家,樂其妻孥。 和 親慕也。 也。 四章重明兄弟之親 是 而 其 如 人,則衆 不厭。 也 然乎 鼓瑟琴。 猶 骨肉 鶺 鳹 每 七章言兄弟相樂,則妻子 不 卒章言能 首 人之分也,無兵戎之 能 有 言信然。 兄弟既 尾 既偕 良 相 况 子,孺 相 爲 朋」, 應。 來 義 如是親 也永歎」,校之 志 而 窮究是理 ,當和樂且 此 猶「豈 ,親慕之義, 不能 意 求 急難之際, 詩 翕 他 句 睦其宗 合,故 志 人,是 無 少 圖 陳 爲 譬 加 孺 禦 他

之罪 峻阪 當以 之,無酒則 豈 朋 朋 籩 也。 具飲食,洒埽 父」、「諸舅」,謂朋友故 際,尚釃 許」,衆人共力之狀,因聚衆 共 明 相樂也。 力 友 豆 友故舊 友 成列 /, 因 然乎? 也 ,尤須衆力,故釃 召諸舅也。 寧 「和」 乎 五章 其 ? 酒 相 常以 先儒 之禮,乾餱 謂 民之失德,故不 不來,無 我酤之,以至鼓舞我爲之,我及暇 相 朋 聚 重 相 卒 精潔、盛 樂,况 飲食, 友之信,常 陳 以 好 章 燕樂兄弟,無相疎 寧其不來,不可使我有不 藇爲美,未 「平」謂 此 陳 使我 義之不可不然。 既 所當然者。 見 不 酒之多,况 陳 相 舊 有 歡 恩意 簋器 及、蓋 不變。 也 樂 久 肥 能修親睦之道,厚 不渝 喻是否。 羜,當以 共 厚 ", 况既 四章陳厚意以 不至也。 篤之意 力,而 人之失 三章陳 有酒 乎有 遠 可 有 伐木 伐木 則 召 質 具 兄弟, 德 盛 肥 我 諸 酒 於 伐 具, 也 牡 于 厚 諸 之 許 醑 父 木 神 食

時,則相與宴飲,以篤恩義。

天保

鑒則錫爾多福。 祐,福 1 祀其祖先,得 聚,莫不增盛。 降 之福禄,莫不繁庶,如 俾爾享福,至無 益,莫不繁庶。 福不除。」除,更新 「天保定爾」,君位甚安固 之報上也。 之設辭 爾以 恩惠周 禄之厚,蒙被臣 遐遠之福,惟欲其長。 也。 物, 《天保》之詩,盛 無 Ŧi 所 窮之壽。 次 四 君之下下 章言其所 民所實有 [章言] 章 不 也 宜,受天之百禄,衆 一,日益之義。 重 民,由 山阜崗陵,如 既 陳其盛。 也。 獲。 享豐盛之福 也; 君 則日 君 陳人君受天之 「俾爾單厚, 三章言既 德 歸美於君,下 神之至,謂 1 用飲食, 既保定 之所致也。 爾一 俾之多增 川 之 受天 君 用 福 流 降 使 報 又 何

章言 言光照遠 享 其 其 豐 德 樂質實 廣,如 光 顯 也,群 南 無 虧 Щ 庇 之無 衆 百 覆 虧崩,如松栢之茂 生民。 族、皆化上德。 恒 亦猶 升,

采

盛,無不承其庇覆

地。 風以 守衛 歸 毒 而柔矣,行期將 日 「采薇采薇」,以薇爲遣戍役之候也。 問 民 歸」,深念歸 安否。 義、當時之事也、後世因用之以遣戍役。 不由上,則人懷敵愾之心矣。 ,歌此詩以遣之,敘其勤 舍其室家,不遑暇 文王之時,有昆夷、玁狁之事,遣戍役以 烈烈 薇 如 時 壯 饑 至 在 面 如 也,念歸期之遠而憂也。 渴 歲 剛 ,戍事 矣,且當行 起 暮 居,以 也。「作止」,生出 未休已 勞悲傷之情,且 玁狁之故也。 也 薇,始長),念誰 ,歸期須 日日 使 歸

也。 當期 棣然 義。 勞而 卒 其 備,玁狁之事甚急故 練 也。「翼翼」,行列整治之狀,既 也,腓是足肚也,言君子小人從其 君子則知義矣。 之華,華萼相親 = 甚 歲之陽,王事 騤騤」,强盛貌,付與之重。「依」,依上 章 其 一病,我 章言歸以憫其勞,春 情,次陳之以 「腓」,從動 「彼爾 也。 車甲,修治其器 成功之速。 極道勞苦憂傷之情。 不怨,雖 行 彼路何 |猶 不 不 可 憂 云 義以堅其 ,興下盡力以爲上,言當如常 歸 可 之義,人之腓, 一月而三捷,言速。 而 於彼,亦與「彼 總强盛之車甲,豈敢安居? 也? 盬 也 能 也,故 也。先言勞苦憂傷以盡 械, 弭服是也。 厲。 而往,冬而 乃君子所乘之車也。 首章 志,戍 上能 啓 四 述事之由, 處 章 察其情 《事盡 臨其 路 身行 不 Ŧi. 五章再言。 ·遑,憂 旋,行遠 一章則 所 同 衆 於此 則 處 日 所 從 爲 則 而 常 勸 則 次 心 章 雖 雖 而 戒 動 動 處 棣 以

役,再 王、成 不然。 疆 爲説 春 復 饑 時 以《天保》以 幸 留 渴 久 言 遺次戍者。 備 其 ,乃今之防秋也。 ,於義無 王時作。 期 則《采薇》等二篇或非文王時作,乃武 秋 「行道」 傷悲甚哀,人莫知 圃 (至過 還,今年春暮 上治内、《采薇》以下治外。」於義 害。 遲 十一月 每秋 南仲不 遲」, 然《魚 與冬初 則 脯 知 麗 見 行,明 歸,又明 何時 其思 • 序》云:「文、武 也。 兩番, 戍者皆在 年夏代者至, 歸之切,心 人。古者戍 此 年中 據《小序 春 至、 如

出車

歸 謂 其 于牧,王命 我」,命我也。次章既受命而 勞將 事 有敘 率之旋 大 之征 也。 要 赴 在 此詩 歸 事 功 之 所賦 將 急,不 率。 自受命 行,有旗 首章 敢 寧 至還 陳 也。 章 出

> 也。 服 矣。 卒 遂。 應,民心之望王師猶是也。 南仲之功,於此 不遑起居。豈無思歸之心? 禦戎之道,守備爲本,不以攻擊爲先 彭」,衆多,「央央」,華盛,主言城而 人亦爲之意瘁。三章指元帥之名,以顯 之盛,見 赫赫,德名顯盛。 「胡不」,猶莫不。 章喜其 玁 旗 五章復言出 四章言其歸,敘其久戍 狁 觀 施 兵 付 此 歸 斾 加 與之 詩 斾 因敘 而 意 華 服 尤盛。 疑 重 三兵,而 歸 或或 盛 其憂念之深,僕 「襄」,上 憂 時 似 「斾 止於小大,亦不 一勞其 景物 衆 當 草 和 時 蟲、 此南仲之伐 施一, 爲 和 也。 事 西 也,謂勝。 畏法令不敢自 阜 妍 戎 也 -螽,其 垂 了,其歡 方所徯望 以 兵 夫左右之 委之狀。 多難 勝玁 其 于 不 郊,行 미 樂可 加 類 西 事卒 其 知。 戎 而 相 彭 功

^{● 「}伐」,原誤作「代」,據四庫本《程氏經説》改。

見也。訊其魁首,當訊問者。「醜」,徒衆。

魚麗

在 可 麗於罶者,亦美大之魚也,見其盛多。 《詩》者之言也,不可取。 也。 麗》廢則法令缺矣。」物不足則不能備法度 物 君子之酒,皆美且 上,養育萬物,莫不盛多,故美之也 「文、武以《天保》以上治内」以下, 盛,故能備禮。 也,有而能 多,止云酒多。有,有富有之意。 美萬物盛多,能備禮也。」太平之時,庶 備禮也,盛有及時也。 多。 《六月・ 「多且旨」同 罶,魚笱之易作者。 序》云:「《 「旨且 魚與 物 多 傳 魚

南山有臺

此詩樂君臣俱賢,邦家榮盛,爲福之長

伊川經説卷之三

盛。 期。 也。 遠,至施及後世,故云「保艾爾後」。 父母。「德音不已」,言令聞 用,興君子爲邦家之光榮。 久。 「桑」、「楊」,充用之物,言山生 爲邦家之基本。 皆草,草之衣被於山,成薈蔚之美盛 「枸」、「楰」、木之尤高 「杻」,木之高者,益 南 「遐不眉壽」,猶 「杞」、「李」,可食之物,興君子 山」興君,「北 「萬壽無期」, Ш 山」興 之高,興 大者,興 云 不 臣。 遐 無 遠 無 重言 君子 君 窮。 「臺」、「萊」 疆 眉 子 ,猶君子 一財以 爲 德澤長 德音茂 壽 養人如 「栲」、 猶 乎? 福 無 濟

湛露

「厭厭」,足意之義。「豐草」,柔從而盛者,以則不晞,興燕樂恩惠之厚,不醉則不歸也。「湛湛」,厚濃之狀。露之濃厚,匪日出

德以 言諸國之君,皆明信君子,承王惠澤,莫不修 數 澤所懷,其序然也。「離離」,猶累累。 莫不皆修其令善之儀。 茂盛,其實離離然,言大國之君,承王惠澤, 木,興大國諸侯。 興 其桐其梓,其實離離 也 同 奉上,忠順之心,温克之容,皆令德也。 姓 之親 「杞」、「 棘」,卑下之物,興 在 宗 湛露在桐梓之上, 二物之 載考」, 」,「桐」、「梓」,高大之 先親,次小,後大,德 在 同 宗 小 成 國諸! 歡樂禮 侯

采 芑

甲。 語 叔 武之將,甲兵之强 解。 所 總 芑,美菜。 試」,肄習也,衆且練也。 采芑於新田 臨 三千乘 地力壯盛,則 之衆。 「則能 成茂功。 ,皆地力方盛處。 師 干 可植美菜,興文 「率止」,往征 「薄言 猶 今云 」,發 兵 方

方叔 動 鉦。 伐鼓 節。 蠻畏威來服 霆,方叔之明信, 擊鼓者。 有節 肅。 闐,整緩之狀。 其行也受服章之尊美,言付之重。 三章言雖 言隼之急疾,亦集於所止,以 將之才,士之衆且勇,進退得宜,趣舍有節 重言之。 也 而 卒章言成功,因言其致伐之由。 克壯其猶,故征 無 也淵淵,平 而不過也。 首章言肄習,次章言整肅,蓋其敘也。 言 鞠」,止也。遂美之,言明信之方叔,其 知之義。 四 「中郷」亦 「騏翼 方叔行師,有鉦鼓爲 翼 和 振旅之行,亦以 鉦 自伐玁狁時 壯 蠢爾之蠻,乃與大邦爲仇 不暴急; 美田。 健 而 人」,擊鉦者。「伐 路路 執 獲。 車儀 「旂 其振旅 興兵 聞于四方,故荆 戎車之盛 旐 飾 鼓 陳 之盛 央央」,言整 止,行 雖强,用之 師 也 鞠 鼓 「蠢」, 鼓」, 如 則以 旅 聲 次 翼 之 章

切。 聯屬 《春秋》於復古之事不加美辭,此《詩》但 中 射者傾助也。 復古也。《吉日》則言美矣。 先王之政,後嗣所當守,失則罪也,故《詩》、 侯順從,軍 詩美其修政事,治車甲,因田狩而 三子,指所任者。「囂囂」,盛衆貌。「有繹」, 同」謂調一。 武武。 範 衆射夫助舉,見其多不 也 如此,故獲多助。我助斂禽者舉掌,士賣 文王撫有四方,「四方」,一作「西」。「文」,一 至是蹙矣,故云「復文、武境土」也。 「决拾」,不知是一物,是二物。 蕭 法肅治如此,故能成中 「孔阜」爲肥壯。「之子」猶云二 蕭 「射夫」,衆射者。「同」 馬 鳴 悠悠旅旌」,詠 「既攻」謂堅治、「既 倚 不 -偏,不 簡車徒,諸 興之功。 肅 」, 失持 静 謂 稱 如 同 其 此 作

> 此。 承上言。 言至肅。 徒御不其警戒乎? 「有聞無聲」,聞師之行而 信哉君子之治戎,其成如此之善。 庖廚不其充盈乎? 不聞其聲,

吉 日

類,今西方有之。旄牛。 大兕,言所獲耳,不須爲多説也。 客,且以酌醴,先王接下之誠意。 率左右以燕天子,皆群下盡力奉上,以御賓 祭禱, 庚午于田。 祖而禱之,伯爲馬祖,據《爾雅》之文。 是也。「戊」,剛日之吉。「既伯既禱」, 美之,更稱其接下,得群下之自盡,詩中所 宣王將田 而卜吉日,見其慎微,詩 「漆沮之從,天子之所」, 「大兕」,牛 發小豝,殪 戊 祭 因 日

庭 燎

天下之事,貴乎得中 前 可常,是之謂

〇四三

川經説卷之三

也。 也。 必將 故次 也。 任 以 故 荷 其 其進鋭者其 以 治、盡其力以 晰 云未艾 「艾」,向盡 怠 勤 意 箴之於事, 夙 矣。 之所 興 而 噦噦」, 明 視 不 也。 へ向 長 知 朝,固有常節,始自於夜之未 此 欲 (退速。 節 所 而 車較 也。 如 勤 也。 輝」,光之散也。 也。 己, 以 鍼 於 「晨」,曉 方美其 會聚聲。「光」,明之盛 事,固 砭之刺病矣。 靡 宣王之於始也,不守法 不惟見無常節,且 無節則早 不 勤於始 可知其不能於終 勤 也。 而 -晚不 「將將」,鶯 而 遂 「央」,中 怠 能常也, 以 於終 箴 知 央, 之 其

白 駒

皎」, 」,又曰「白駒過隙」。「白」,色之貴者。 潔 刺 白 不 也 能 用 賢, 駒 賢 馬之俊者,古文「千里 者 去 而 不 留 也。 以 皎

其 使遠去 永也。 也。 心」,賢者既遠遯矣,國之好賢者,猶 也。 者而 游 待以 常苗 處 期度,不思求賢致治之道乎? 在朝廷,此一 賢人君子,當使於此爲嘉賓。 永 貴色之俊馬, 來思」,思其實然而來也。上二章言賢者當 人 窮 無 日。 之美 殊禮 困 卒章言其遠遯而思之之意。 進用之也。 所事之際,當勉强思天下之有潛遯之賢 ,必美蔬 「爾公爾侯」,謂公卿 《唐風》云: 也? 「所謂伊人」者,宜使於此逍遥,豈當 M 則 享淡 如 白駒則維繫之不使去,留 章言思其來,思其 「藿」,蔬之葉。 也。 興賢 薄,雖 玉 三章思賢者之來,是不 也。 「且以永日。」人暇樂則 白駒當食以 德之才士。 所 毋 享 生蒭 金 在位者,但 玉 「夕」 「賁然」,光彩。 爾 美物 戒使欽 場 來是不 東而 遠遯空谷, 音 圃 猶 ",賢才 所 望 逸 而 玩 朝 食 在 其 在位 慎 豫 有 樂 也 相 位 無 日 以 非

聞問而不見絶也,曰毋自貴重其音聲,而有

遠

棄

我之心

白華

是道 雲蒸 子」,謂王也。「英英白雲」,雲之貌。天之道 賤之序,而遠 刺 以爲菅,白茅 以 嫡妾當均 各有其所,興尊卑上下各有其分。今王亂貴 詩》大意刺 下, 王 露 也 幽 言當 降, 王字 王 被 寵 天步」,時 則菅茅皆被其澤。 其寵。 時 誤 褒 王專寵,失上下之分。 棄我,俾我窮獨 則用之裹束。 姒 作 事 而黜申后,周人爲之作詩以 后 如 今天運 字。 運也 此 , 《序》自「下國 詩 艱 * 物之美惡,其 猶 難 中 王如 失所也。「之 ,而之子不 . 所 如也。 白華 以道, 不 及 化之 則漚 也。 猶 則 滤 用

於嬖 崇高 池 以 去。 也。 以勞傷我心。 嘯歌 今王爲夫之道乃不常,「二三其德」,謂 之在林,皆其所也。今王使我不得其所,是 子,慘慘然憂蹙,而 「碩人」者,言其居尊大之位而所 改易也。 「鼓鐘于宫」,此章自傷其誠意之不能 而我烘於煁竈,興王之捨嫡后 樵彼桑薪」,桑,薪之善者,樵彼桑薪不用, 傷 北 「邁邁」,去遠不顧之意。 鼓鐘于宫中,而聲聞于外,今我 心。 人也。 尊大,而 流」,小水微 而 傷懷也。 鴛鴦,雌者右翼掩左,是雄之常也。 「扁」,乘石之形。 維彼王之崇大,而 反不能 言「之子」者,直謂是人也。 「滮」,池名,無源易竭之水。 流 也 曾不 通 一,尚 流 能 感動,視我 其 浸 設乘石,以爲高 寵 溉 鶖之在 所 之尊,而專 澤,念此 稻 爲如是也。 爲 田 如 邁 中 上梁,鶴 似此,所 邁 動 所以 王之 初終 心 言 寵 而 Ŧ

0 四 六

也。 訓 八章,有次序,更不 也 我 加 也,謂 之子見遠,使我 反 覆 卑, 幽 王。 興 王 我却烘於煁,今俗語如 煩解。 捨 困 后 病。 之尊, 第四章中,「卬」字 疷,病 而 寵 也。 微 賤 此 之人 此。 詩

大 旱麓

興 周 旱麓之榛楛,草木得麓之氣,濟濟茂盛 高 也。 福 以干 德 也,爲 峻 家之愷悌君子,承 於始,世修其業,至大王、王季,重修百福 盛 天禄,申,重也。 此章言先祖積德,必有善承之子孫 非 言 受 瞻彼旱麓」,「旱」,山 周家 生物之所,麓乃百物所聚生也。 福 善 也。 而 承受先 獲 榛 福 梏, 所謂 人爲善而獲 祖之業 早 其 Щ 先 所 自求 祖 也。 有 名。 愷 之木。 多 悌 后 「麓」,山 福。 福,乃干 之道 稷、公劉 瑟 修善 ,所 ",興 彼 瞻 足。 也 此 彼 禄 乃 積 玉 以

神

孫也。 黄流 昔 燎 成功由先祖之力。 茂之狀。 也。 躍于 也。 至也,謂以來大福 報而子孫受福也,故云「以介景福」。 孝之報,先祖饗其 自先世之貽謀,故「愷 「鳶飛戾天」,此章言先祖 作」,興起之於善也,言不遠作人於善 瑟 清酒既載」,此章言子孫承受其業,致其 也。 而 「鳶飛戾天」,興上得其道,謂先祖 密密 然。 ·淵」,興下得其宜,謂 也。 後人載酒備牲,以享祀其先君,祖先 「瓚」,圭瓚,玉器。「黄 義 愷悌 前章言先祖享成功之報,此 指先祖。 今之君子 謂 縝 君子 密 也。 成其 成 柞棫之所以密茂,由 ",则 温 今人 功也。 潤 悌君 「瑟彼柞棫」, 福 王業,亦猶神勞力於 之 種榆,亦焚之使茂 之德 後 禄 玉 子, 嗣 「載」,事 所 瓚 可 降, 流」,鬱 其 遐 後嗣之賢 不 以 必有賢子 中 作 作 章 瑟 「介」, 所 鬯也 謂 乎? 重 然 後 盛 「魚 焚 明 享 誠 密 造 人 必

道也。 狀。 先祖之道,以干天禄。 率循先祖之道。「莫莫葛藟」,柔曼茂 莫莫葛藟」,前章言由先祖之爲,此章 「施」者,謂依緣木之條幹,興 此詩所稱「愷悌君子」,或目先祖 「不回」,謂無邪 君 子 重言 率 盛 П 一,或 之 他 循

皇矣

謂子孫,觀文意可辨。

安定 業之成,而盛述文王之事、《序》因云「世 所定也。 德,莫若文王」也。 皇,大也,臨視天下,有赫赫威明也。 殷,莫若周然。 王赫斯怒」。 也 此詩美周 此泛言天祐下民,作之君長,使得 「維此二國,其政不獲,維彼四國 「監觀 家 此詩主意,在美王季,終 所以 「皇矣上帝,臨下 四方,求民之莫」,求民 興 王業,故言 天 下 有 章云 監 赫 世 言王 修 代

興。「作之」謂拔之,「屏之」謂去之。作屏之 其去惡養善,生息其 使其居西土以王天下也。「作之屏之」,上章 增而大之也。「憎」字與增同,憎,心有所 也,猶云規模範圍 爰究爰度」,惟求民所定,故君不善則絶之, 者,「其菑其翳」也。 之末言天命歸周,此言其 王之,故其眷西顧而 泛言天道如此,上所云求德 也,義與增通矣。「乃眷西顧,此惟與宅」,上 規限,自諸侯而升天子,由百里而 增其式廓」,「耆」,致也,《頌》云「耆定爾功」。 「究」,尋究也。「度」,謀度也。「上帝耆之, 於四方之國,求謀 如彼夏、商二國,不得其政,謂 「上帝耆之」,謂天命所 也。 有德之君,使王天下。 歸於周,「此維與宅」,謂 人民,皆以養治材木爲 「菑」,立死。 歸。 天命所致,則增大其 居西土所興之業。 「式廓」,謂 可安民者,大而 失 君 撫 「翳」,自 道 四 l海,是 也 規 則 超 限

〇四

斃

故「菑」上配「作之」、「翳」上配「屏之」。作,并 意者,立 死 則全枯,翳謂 夫人之爲惡以自亡,故以 枝幹之死耳。

也。 成 養民 生日 以興民。 言檉、椐,乃興民也。 檉,河柳也。 得其宜也。 叢 自 根出之。屏,伐去而已。 云天監就其明德,其治如此「串夷載路」也。 長 列 死之木興之。 也。 , 使疏 也。 灌,行生曰 帝遷明德,串夷載路」,上述其治矣,此 「攘之剔之」,謂穿剔去其繁冗,使 屎、柘,待用之木,以興養育賢 上四 据,横也。● 必芟除而後茂盛,此 密正直得其宜,此興平治民物, 「啓之辟之」,謂芟除 句止言所當去者及行列,至此 例。故字從「列」。● 「修之平之」,修治之也。 二木,常木,衆多者,故 也。 謂修治其 檉、椐 叢 才 各 興

庶; 爲人君,然其爲與王季相須,皆周家之事 興天對合者,自太伯與王季也。 王季之治,能對天,而由太伯與之國,●故云 天道。「邦作」,謂人君之爲。 栢」,良材,興賢才。 「拔」,長盛,興生民繁 治,以山爲興也。 成王業也。「帝省其山」,此章將言王季受命 則其受命堅固 「自太伯、王季」也。 之可以配天也。「帝省其山」,言天視周家之 配天之事,故再言「帝省其山」,以見其 命既固」,言天以其德之配天,而 「兑」,潤澤,興賢才得其所。 mi 不易也,言天命終歸之,必 「柞棫」,常木,興民,「 「維此王季,因心則友」, 人君之德,能 〇太伯雖不 「帝作」,謂 立之使王, 所 松 爲

家之治,順平之道,充塞也。

「天立厥配,受

夷」,平也。

載路」猶

滿路,謂

充塞

也。

周

串」,循順之義,穿物

一貫爲

串,字形亦

從」原作 [以, 據涂刻

國 横」,原作「積」,據涂刻本改 原作「固」 據涂刻本改

道

一,俾

、化民貽後皆是也。

君

以

爲至德。

「長」謂

類也,是非

誠

有 也。 義

,疑是大

也

「德音」,德聲也。

謂

下言文王之事,亦歸本王季也。

也。今人能知而弗克踐之者,明及之而行 大,而其實德克明,非徒能明,又能類,類,肖 帝度其心」,此章述王季之德。「帝度其心」, 意,在美王季,故其言太伯之讓,皆由王季。 :撫人民,興王此大國,克順又克俾,順謂 天鑒其衷誠也。「貊其德音」,「貊」字之 與其兄之光顯,受天福禄,保而不失,以至 事也。「因心」者,出其天性也,言王 ,興王業之篤厚、周家之福慶,又成其 「載」,辭也。「錫」,與也。 能居長上之道,「君」謂 言王季既明,又能類 夫身不行道,不行 「維此王季 其德聲既 之國 此詩本 卒 所 順 能 弗 救亂 赫然 爲强 依 心 既受天福禄,而能施及於子孫,此二句結之, 化民成俗,貽 於妻子,己能順道,然後能使人,王季所以 拒我大邦之命,既侵阮,而又往將侵共,文王 險難,此謂 同義,登岸既濟之義。天謂文王,無黨援 援,攀援。歆,欲之動也。 民征伐之事。「畔援」,黨比 緒,復受天命,終成王業也。至文王而有救 而下述文王之事也。 已,又俾其子文王守其德 言王季之業施於子孫,此章言文王承王 也。 ,憑也,京,周國。 7,無以· 而 安人,以厚周家之福,以答天 此文王征伐之始也。「依其 怒,整其師旅,以遏 貪欲 順天征伐之道。 厥子 而動,惟是所先者,濟天下於 孫 也。 文王本據周 「帝謂文王」,上章之末 故不特俾民遷 而不失,故無悔 羨,愛羨。 止 於是密人不恭 也。 密 人徂共之師, 畔,近岸 地 下望周之 以興,侵 在京」, 誕與 一季之 以 旧 丽

受天

命

兄讓德之光顯也。

謂

奄有四方。

奄字之義,在忽遂之間。

季天

性

友愛其兄,故其兄賢之而

讓

又

述

其

〇四

乎? 此。 其德 民 發見其大聲色也。 者化,所存者神,豈暴著於形迹 色而 宇,天下歸 渭水之傍。 廣 遂 廣 原」,鮮原謂高明之地,得其地於岐山之南 水泉皆我之池也。 矢」, 帝謂文王,予懷明德」,上章言文王開 歸 ,末也。」其化之感人,雖不大其聲色,而其 ,於是擇高明之處 土 「帝謂文王」,予懷爾之明 爲 人化。 夫聖人之誠, 感無 服 疆 陳 陟我」, 陵阜皆我之阿也。 也。 萬 自 也, 或 服,此章乃言其聖德所 阮 「將」猶傍也,謂其 開 謂 所 猶 而 地 墾闢。 歸 始, 云 益 向,是天下萬 廣 故聖人曰:「聲色之於化 言皆屬 謂密侵阮,文王救安之, 廣,至於岐、隴高山皆有 而安居之。 我疆宇,至登 言人無 無飲我水 其 有 傍建 德,不大其聲 也哉? 不通,故所 耕 也。 民之王 度 闢 以 相其 高 其 我 泉 化 其 都 岡 陵阜 乎? 是 拓 地 也。 邑, 也。 「鮮 不 過 如 土 既

> 服 閉」,徐緩之狀。 「言言」,猶斷 衝開 援」,登城之梯。 弟之國,以爾攻伐之具,以伐爲仇之崇。 化者,伐而誅之,則天下皆善而 末言聖人之化如此,而天下有昏惡之甚不能 此聖人之神化,非文王孰能及之? 加 言不待遲久而化也。 應之疾,人之惡不及長大而革也。 王之徐緩之時, 不服之狀。 謂文王,當謀與爾爲仇之方詢謀也。 王,詢爾仇方」,此章首言文王之化如此,章 者。 不知爲之者,是不識 閑」,此章述伐崇而天下畏服也。 既 不 凡聖人之伐,未有不俟其革 服 ,然後攻之。 則龂龂 「臨衝」,二車,皆兵 民由之而不知,日遷善 不 不服,故文王遂 -知,而 崇侯迷惡,當 順夫天 龂 王業成 也 夏,大也 「帝謂 車。 , 同 理 加之 心 挍 爾 也 鉤 閑 臨 文 順 訟 兄 帝 文

) 「龂龂」,原作「嘶嘶」,據涂刻本改。下同。

後,而此言度居乃在前章者,蓋此章自「侵自

王功之成也。《文王有聲》言作豐在伐崇之

於密,王功之始也,終於崇,天下遂無不服, 崇乃仡仡然。「仡仡」**,**壯勇之狀。 行,四方畏服,無敢違拂者矣。 文王之征始 縱攻也。「絶」,滅之,「忽」,滅也。 天誅 是其惡之終不革者也,於是攻伐之。「肆」謂 是力攻之。「茀茀」,盛强之狀。既力攻之, 於是四方畏服,莫敢侮慢。 著逆順之理,是可致所不服 神明,其伐合神明之道也。 明其罪,告之神明,言其當誅伐。伐而告之 古者出征,類於上帝,馮於所征之地,所以暴 戮也,故於馘也安安然審重,又爲類禡之祭。 斬獲也。聖人之伐,殺其犯順者,非輕肆殺 兵,「執訊連連」之多。「連連」,屬續之狀; 訊」,生獲者也。「安安」,不輕暴也。 又明其罪惡,以 伐而猶 而來附其人也。 不服,於 堅拒守, 「馘」, 既

盡言之耳,非謂事在伐崇前也。疆」,言其廣疆宇,以至於及遠建都日

伊川經說卷之三

併

阮

五 五

伊川經説卷之四

春秋傳序

明,然後人道立,天道成,地道平。 治之而争奪息,導之而生養遂,教之而 先天一作「時」。 當周 作,有天下者,雖欲做古之迹,亦私意妄爲 之更尚,人道備矣,天運 三王迭興,三重既備,子丑寅之建正,忠質文 上 專 不 ,聖賢世出 以智力持世。 事之謬,秦至以建亥爲正,道之悖,漢 天 [有也,於是作《春秋》爲百王不易之大 之末,以聖 之生民,必有出類之才,起而君長之, ,隨時 以開人,各因時而立政。 人不復作也,順天應時 豈復知先王之道也? 有作,順乎風氣之宜,不 周 矣。 聖王 二帝 既 暨 倫理 夫子 不復 之治 乎 而 mi

> 法,所 《春秋》,謂褒善貶惡而已,至於經世之大法, 辭 者 悖,質諸鬼神而 則不知也。《春秋》大義數十,其義雖大,炳 之冕,樂則韶舞」,此其準的也。 顔子嘗聞之矣:「行夏之時,乘殷之輅,服周 中,寬猛之宜,是非之公,乃制事之權衡,揆 宜者,爲難知也。 如日 衆材然後知作室之用,於一事一義而欲窺聖 或退,或微或顯,而 道之模範也。 也。 不待贊 星,乃易見也。 以「考諸三王而 先儒之論曰: 也,言不能與於斯耳。 夫觀百物然後識化工之神,聚 無疑,百世以俟聖人而 或抑或縱,或與或奪,或 得乎義理之安,文質之 惟其微辭隱義 「游、夏不能贊 不謬,●建諸天地 後世以史視 斯道也,惟 7,時措: 一辭。」 不 而 從

[「]以」,陳刻本、涂刻本作「謂」。

亥,伊川程頤序 求其義,得其意 也,故作《傳》以明之,俾後之人通其文而 其學不傳。予悼 非禹、湯、尚可以法三代之治。自秦而下, 能造其微也。 學《春秋》者,必優游涵 者得其門而 是《傳》也,雖 人之用心,一本無「心」字。非上智不能也。 人矣。 未 後王知《春秋》之義,則 而法其用,則三代可復也。 能 夫聖人之志不 極聖人之蕴奥,庶幾學 有宋崇寧二年四月乙 泳 默默 識 心 明 通 於 然 後 雖 世 後 故

春秋

之跡熄而《詩》亡、《詩》亡然後《春秋》作。」與先王之業,王道絶矣。孟子曰:「王者法。平王東遷,在位五十一年,卒不能復法。平王東遷,在位五十一年,卒不能復法。平王東遷,在位五十一年,卒不能復

適當隱公之初,故始於隱公。

子,繼室以聲子生隱公。《謚法》:不尸○隱公,名息姑,惠公子。 惠公元妃孟

其位曰隱。

元年春王正月。

Ę 元年,隱公之始年。 先君之命而繼世者,則正其始,文、成、襄、 位,不與其爲君也。 侯之立,必由王命,隱公自立,故不書即 爾。平王之時,王道絶矣。《春秋》假周 昭、哀是也。 或不書,義各不同。 正王法。隱不書即位,明大法於始也。 道立矣。周正月,非春也,假天時以立 下承王正。明此義,則知王與天同大,人 書「春,王正月」,示人君當上奉天 繼世者既非王命,又非先君 法既立矣。 既不受命於天子,以 春,天時。 諸公或書 正月,王 諸 以

比宣,則又有間矣。 君,何命之受? 受弒賊之立,定爲逐君者所立 也。桓、宣、定之書即位 書即 位,不正其始也,莊、閔、僖 故書其自即 ,桓弑君而 位 皆 也。 無 立,宣 定之 王 無 是

三月,公及邾儀父盟于蔑

外爲主,稱「會」。 誓,亂世之事 盟誓以結信,出於人情,先王所不禁 也,夷狄則稱名,降中國 子克,字儀父。 「及」,彼來 後世屢盟而不信,則辠也。 會」,彼盟 而往 而及之也。 也。 會之也。 附 在魯地、雖外爲主、亦 凡盟,内爲主,稱「及」, 庸 之君 也。 邾, 附 兩國已上則 稱 諸侯交相 字, 庸 同 或 Ŧ 也 臣 邾 稱 盟 稱

夏五月,鄭伯克段于鄢

鄭武 段,愛段,欲立之,亟請於武公,弗許。 公娶于申,日武 姜,生莊 公及共 及 叔

> 莊公即 段失道,而公弗制,祭公諫而公弗聽,故詩 所 譏其小不忍以致大亂也。 以致其惡也。 位,請 出 一奔共。 京,使居之,謂 書曰:「鄭伯克 不書奔,義不 段完 之京 聚 城 大叔。 繕 公伐 段 于 稱 于 其 甲

秋七月,天王使宰咺來歸惠公仲子之賵 討曰 奔也。 尤謹其名分。 彊 鄢。」鄭伯失爲君之道,無兄弟之義,故 本,故當先正。 正 王者奉若天道,故稱天王 伯而不言弟。克,勝也,言勝段之彊,使之 期,命子封伐京,京叛段,段入于鄢。 兵,具卒乘,將襲鄭,夫人將啓之。公聞 力把持天下者,覇道也。《春秋》因王 諸鄢,大叔 王 一法,稱 天討。盡此道者,王道也。 天王 男女之配,終身不變者也, 春秋之時,嫡妾僭 以奉天命,夫婦,人 ,其命曰天命,其 後世 亂 (倫之 命 以

之禮。 故 不王。王臣雖微不名,况於宰乎? 王之義未見,故不可去天而名咺,以見其 妾,不天亂倫之甚也。然《春秋》之始,天 謂惠公仲子,妾稱也。 言,故正其名,不曰 竊號而書之,以志僭亂。 特降,僖公而後,無復辨矣。 侯,内職具備,后夫人已可以攝治,無 文 無 故故 再配之禮。 春秋之始,尚有疑焉,故仲 不得 己 而 大夫 有 夫人,曰「惠公仲子」, 再 而 以 娶之禮。 下,内無 仲子緊惠公 夫人禮賵 《春秋》 主 子 天 則 人之 因 羽 子 再 家 而 數 諸 其 娶 道

祭伯,畿内諸侯,爲王卿士,來朝魯。不言

冬十有二月,祭伯

來。

不能輔 朝,不 謂世相朝,謂 然委官守而遠相朝,無是道也。 豈有内外之限? 其相交好,乃常禮 交之説,甚非也。 故不與其朝 失人臣之義,王所 與 王正 朝 也。 以明 典 鄰國 (刑, 當 若天下有道 其罪。先儒有王臣 當 爾 而反與之交,又來朝之, 時諸侯,不 治也。 祭 修 ,諸侯順 。《周 伯 朝 爲 覲 之禮, 禮 王 無外 一》所 也。

諸侯之卿,必受命於天子,當時 史,有可 史,記事 之義矣。或日或不 治國,其卒,國之大事,故書於此,見君 後,得命官,故獨宋卿書官。 稱公子,以公子故使爲 故諸侯之卿,皆不書官,不與 損 簡 而 略 不能益也 日 月或 日,因舊 不備 卿也。 卿者,佐君 《春秋 史也。 其 惟 不 爲 ·復請 宋王 岁因 卿 古之 也。 命 臣 者 以

公子益師卒。

〇五六

一年春,公會戎于潛。

所 慎 周 盟 秋》華夷之辨尤謹 國 謂 固 室 會者,則與之。 既 封守可 ,明大義 「戎狄是膺」,所以 衰,蠻夷猾夏,有散居中國者,方伯 也,若與之和好,以免侵暴,非 而攘斥之,義也。 公之會戎 居其 容其亂華也,故《春 地 非 而 其餘 義 親中國、與 也 列 或

夏五月, 莒人入向。

出。 伐 以 咎,或自辯,喻之以禮義,不 常在被侵伐者。 以 莒子娶于向,向姜不安莒而歸,莒人入向 人」,微者也。 其封疆,告于天子方伯。 與 姜 人,其罪著矣。 戰 氏還。天下有道,禮樂征 春秋之時,諸侯擅相侵伐,舉兵 者爲主,處己絕亂 凡將尊師衆曰某帥 蓋彼 《春秋》直 加 若忿 兵 之道 於己,則 得 書 其 也。 而 免焉,則 一伐自 與 事 師,將尊 書「莒 戰 天子 當 以 而 則 侵 固 引 責

> 少 師 書「人」,人其國 少 曰某人,不知衆寡 E 某伐某, 將 也。 卑 將 侵人之境固 師 帥 衆 名氏 日 某 亦 師 爲 曰某人。 將卑師

人人之國乎?

無駭帥師人極。

命也。賜族者則書族,不書族者未賜也。古者卿皆受命於天子,春秋之時,諸侯自

賜族者,皆命之世爲卿也。

戏猾夏,而與之盟,非義也秋八月庚辰,公及戎盟于唐。

九月,紀履緰來逆女。●

魯 非命卿皆書名,以君命來逆夫人 見 書 其 歸 故 明 禮 稱 之薄 女。 重 事 也。 也。 内女嫁爲諸侯夫人 先 來 儒 逆非 皆 -卿,則 謂 諸侯當 書 , 則 歸 也 親 而 迎。

❶ 「履綸」,涂刻本作「裂繻」。

親 迎者,迎於所館,故有親御授綏之禮,豈

有 委宗 廟社稷,遠適 他 國以 逆婦者乎?

非惟諸侯,卿大夫而下皆然。 《詩》稱文王

親 迎于渭,未嘗出疆 也。

冬十月,伯姬歸于紀。

送之者雖公子公孫,非卿則不書。

紀子伯、莒子盟于密。

闕文也。當云紀侯某伯、莒子盟于密。 左

無大夫在諸侯上者、《公羊》、《穀梁》皆 氏附會作帛,杜預以爲裂繻之字。《春秋》

作伯。

十有二月乙卯,夫人子氏薨。

隱公夫人也。薨,上墜之聲。 之,小君同。 婦人從夫者也,公在,故不書 諸侯國 内 稱

葬,於此見夫婦之義矣。

鄭人伐衛。

聲其罪曰 伐。 衛服,故不戰。 衛服,可免

> 矣。 鄭之擅興戎,王法所不容也

三年春王二月己巳,日有食之。

月,王月也。事在二月,則書王二月,在 道所忌,然有常度,災而非異也。 之大義也。 時備則歲功成,王道存則人理立、《春秋》 月。蓋 推求者,何 三月,則書王三月,無事,則書時,書首 有事則道在事 也? 日有食之,有食之者也,更不 太陽君也,而被侵食,君 小無事 則 存 天時,天 星辰陵

歷亦然。

三月庚戌,天王崩。 崩,上墜之形。 不往,極惡罪大,●不可勝誅,不書而自 四海之内,皆當奔赴,魯君

夏四月辛卯,尹氏卒。

見也。

0 極惡」,陳刻本、涂刻本互乙。

0五

諸

侯

告喪,

魯往

會葬

則

書。

春

秋

之時

· 皆

禄而 尹 爲王官,故於其卒,書曰 及周之衰,士皆世官,政由是 也。 氏 ,王之世 不世官,是以俊傑在位,庶 卿。 古者使以 「尹氏」,見其 德 敗。 爵 績 尹氏 以 咸 功 熙。 世 # 世

秋,武氏子來求 賻。

甚也。 於四國。 王崩,諸侯不供其喪,故武氏遣其子徵求 武氏,王之卿士,稱 書之以見天子失道,諸侯不臣之 「武氏」,見其 世官。天

冬十有二月,齊侯、鄭伯盟于石門。 八月庚辰,宋公和卒。 當然。 吉凶慶弔,講好修睦,鄰國之常禮,人情所 諸侯之卒,與國之大,故來告則書。

癸未,葬宋穆公。 天下無王,諸侯不守信義,數相盟誓,所以 亂 也,故外諸侯盟,來告者則書之。

則

四 不請謚 年春王二月, 莒人伐杞, 取牟婁。 諸 侯土地有所受,伐之其皋,而奪取其 ,稱私謚 ,所以罪其臣 子。

戊申,衛州吁殺其君完 惡又甚焉,王法所當誅 也。

君乎? 君子孫 乃老。 蓋身爲大惡,自絶於先君矣,豈復得爲先 世,故春秋之初,弑君者皆不稱公子公孫 然而奉之。 族,蓋謂先君子孫,可以爲君,國人亦以爲 聽,其子厚與州吁游,禁之不可。 子也,有寵 桓公,莊姜以爲己子。 衛莊公娶于齊,曰莊姜,無子,陳女戴嬀 也? 州吁弑桓公而立。 大義既明於初矣,其後弑立者, **参** 而好兵,公弗禁。石碏諫,弗 古者公族 秋》於此,明 公子州吁,嬖人之 刑 死 自古篡弑多公 則 大義 無 服 桓公立, 以 况 示 萬 生

者,蓋各有義,非可例拘也。

對解同,後人因謂之例,然有事同而辭異

等,立義各不同也。《春秋》大率所書事同太重,以至於亂,或見其天屬之親而爲寇皆以屬稱,或見其以親而寵之太過,任之

夏,公及宋公遇于清。

遇,故書曰「遇」,非《周禮》「冬見曰遇」之諸侯相見而不行朝會之禮,如道路之相

諸侯以伐鄭,固爲辠矣,而衛弑其君,天宋以公子馮在鄭,故與諸侯伐之也。日摟宋公、陳侯、蔡人、衛人伐鄭。

其罪大矣。二國構怨,而他國與之同伐,宋虐用其民,衛當誅之賊,而與之同伐人,秋,翬帥師會宋公、陳侯、蔡人、衛人伐鄭。

子。隱公不能辨,是以及禍。其强惡,非一朝一夕,辨之宜早,故去其公爲再伐,妄也。暈不稱公子,弑逆之人,積其辠均也。再序四國,重言其辠。左氏以

九月,衛人殺州吁于濮。

陳。稱「衛人」,衆辭也,舉國殺之也。因:「王覲爲可。」曰:「何以得覲?」曰:「此二人者,實弒寡君,敢即圖之」」陳人也。」厚從州吁如陳。石碏使告于陳曰:此二人者,實弒寡君,敢即圖之」」陳人執之,而請涖於衛,衛人使右宰醜涖殺州吁未能和其民,厚問定君於石子。石子州吁未能和其民,厚問定君於石子。石子州

冬十有二月,衛人立晉。

甚矣。

下所當誅也,乃與修好而同伐人,其惡

子,當時雖不受命於天子,猶受命於先君。晉」,衛入立之也。諸侯之立,必受命於天衛人逆公子晉于邢而立之。書曰「衛人立

一〇六〇

命,不可立也,故去其「公子」。 所不與也。雖先君子孫,不由天子先君之 衛人以晉公子也,可以立,故立之,《春秋》

諸侯非王事民東五年春,觀魚于棠。

夏四月,葬衛桓公。

乎? 死而加之不正之謚,知忠孝者肯不没于婦人之手。曾子易實而没,豈苟然不没于婦人之手。曾子易實而没,豈苟然有亂,是以緩。稱桓公,見國人私謚也。

秋,衛師人郕。

爲乎?

爲先,居喪爲重,乃興戎修怨,人人之國,晉乘亂得立,不思安國保民之道,以尊王

書其失道也。

九月,考仲子之宫,初獻六羽。

邾人、鄭人伐宋。

之道衰,用天子之禮祀周公,成王之過也。

此用八之僭也。

仲尼以魯之郊禘爲周公

不敢同群廟而用六羽也。

書「初獻」,見前

仲子别宫,故

祀周公、後世遂群廟皆用。

祀也,書以見非禮。成王賜魯用天子禮

初,尚以爲疑,故别宫以祀之。 考,始成

m

諸侯無再娶,仲子不得爲夫人。

春秋之

人,爲主也。 於宋,敝邑爲道。」邾人、鄭人伐宋,先邾宋人取邾田,邾人告于鄭曰:「請君釋憾

螟。

冬十有二月,宋人伐鄭,圍長葛。書螟,書螽,皆爲災也。國之大事,故書。

伐國而圍邑,肆其暴也。

六年春,鄭人來輸平。

魯與鄭舊修好,既而迫於宋、衛,遂與之同

伐鄭,故鄭來絶交。輸平,變其平也。匹

夫且不肯失信於人,爲國君而負約,可羞

之甚也。

夏五月辛酉,公會齊侯,盟于艾。

始平于齊也。

秋七月。

無事書首月天時,王月備而後成歲也。

冬,宋人取長葛。

宋之圍長葛,歲且周矣,其虐民無道之甚,

而不能保有赴訴,卒喪其邑,皆辠也。宋

而天子弗治,方伯弗征,鄭視其民之危困,

之彊取,不可勝誅矣。

七年春王三月,叔姬歸于紀。

始歸。娣歸不書,閔其無終也。伯姬爲紀夫人,叔姬其娣也,待年於家,今

滕侯卒。

不名,史闕也。

夏,城中丘。

其力。民力足則生養遂,生養遂則教化行爲民立君,所以養之也。養民之道,在愛

而風俗美,故爲政以民力爲重也。《春其力。民力足則生養遂,生養遂則教化行

義,固爲罪也;雖時且義,必書,見勞民爲秋》,凡用民力必書。 其所作興,不時害

重事也。後之人君知此義,則知慎重於用

民力也,然而不書,二者興廢,復古之大之意深矣。僖公修泮宮,復閟宮,非不用民力矣。然有用民力之大而不書者,爲教

事,爲國之先務,如是而用民力,乃所當用

始也。城中丘,使民不以時,非人君之用矣。凡書「城」者,完舊也,書「築」者,創也。人君知此義,則知爲政之先後輕重

心也。

齊侯使其弟年來聘。

凡不稱公子而稱弟者,或責失兄弟之義,或

秋,公伐邾。

而伐人,非義之甚也。《左氏傳》:「爲宋討也。」擅興甲兵,爲人

冬,天王使凡伯來聘。

臣職而聘之,非王體也。《周禮》:時聘以結諸侯之好。諸侯不修

戎伐凡伯于楚丘以歸。

使凡伯來聘,戎伐之于楚丘以歸。楚丘,初,戎朝于王,發幣於公卿,凡伯弗賓。 王

八年春,宋公、衛侯遇于垂。知。言「以歸」,則非執,凡伯有失節之辠。衛,而戎得以衆伐之,衛不能衛,其辠可衛地。伐,見其以衆。天子之使,道由於

曰「遇」。 故與鄭卒不成好。無諸侯相見之禮,故書於衛,請先相見,故遇于垂。宋忌鄭之深,齊侯將平宋、衛於鄭,有會期,宋公以幣請

三月,鄭伯使宛來歸祊。

魯有朝宿之邑,在王畿之内,曰許。鄭有魯有朝宿之邑,近於魯,曰祊。時王政不修,天朝宿之邑,近於魯,曰祊。時王政不修,天朝宿之邑,近於魯,曰祊。時王政不修,天朝宿之邑,近於魯,曰祊。時王政不修,天朝宿之邑,在王畿之内,曰許。鄭有

庚寅,我人祊。

人者,内弗受也,義不可而彊人之也。

聘之,又不見答,失道甚矣。

廢絶,王法所當治也。

不能

正典刑,而

反

秋七月庚午,宋公、齊侯、衛侯盟于瓦屋。

宋爲主也。盟,與鄭絶也。

八月,葬蔡宣公。

速也。諸侯五月而葬,不及期,簡也。

九月辛卯,公及莒人盟于浮來。

鄰國之交,講信修睦可也,安用盟爲? 公

屈己與臣盟,義非安也。

螟。

爲災也。民以食爲命,故有災必書。

冬十有二月,無駭卒。

未賜族,書名而已。

九年春,天王使南季來聘。

也。春秋之時,諸侯不修臣職,朝覲之禮法之行,時加聘問,以懷撫諸侯,乃常禮法之行,時加聘問,以懷撫諸侯之好。王

夏,城郎。

書不時也。

冬,公會齊侯于防。

謀伐宋也。

十年春,王二月,公會齊侯、鄭伯于中丘

爲師期也。

夏,翬帥師會齊人、鄭人伐宋。

三國先遣將致伐。齊、鄭稱人,非卿也。

翬不稱公子,與四年同。

六月壬戌,公敗宋師于菅。

❶ 「菅」,原作「管」,據涂刻本改。

不言戰而言敗,敗者爲主,彼與戰而此敗

之也。

辛未、取郜、辛巳、取防。

取二邑而有之,盗也。

鄭勞民以務外,而不知守其國,故二國秋,宋人、衛人入鄭。

宋人、蔡人、衛人伐戴,鄭伯伐取之。人之。

伐之。鄭、戴合攻、盡取三國之衆,其殘民戴克之、取三師焉。戴、鄭所與也、故三國宋人、衛人入鄭、蔡人從之伐戴。鄭伯圍

冬十月壬午,齊人、鄭人入郕。

也甚矣。

討不會伐宋也。宋以公子馮在鄭,故二國

於《春秋》不見其爲王討也。王臣不行,王交惡。《左氏傳》云:「宋公以王命討之。」

師不出,矯假以逞私忿耳。於《春秋》不見其爲王討也。王臣不行,

諸侯雖有相朝之禮,而當時諸侯,於天子十有一年春,滕侯、薛侯來朝。

未嘗朝覲,獨相率以朝魯,得爲禮乎?

夏,公會鄭伯于時來。

謀伐許也。

秋七月壬午,公及齊侯、鄭伯入許。

書「及」,内爲主。非内爲主,則先書會伐

後書「人」也。

冬十有一月壬辰,公薨。

不書地,弑也。賊不討,不書葬,無臣子也。終,乃正終也。薨于燕寢,不正其終也。薨氏,有死者。人君終于路寢,見卿大夫而氏,有死者。人君終于路寢,見卿大夫而民。暈使賊弑公于寫氏,立桓公而討寫

即位。《謚法》:闢土服遠曰桓。 一句公名軌,惠公子,隱公弟,桓王九年

元年春王正月,公即位。

王正月,公即位」,以天道王法正其罪也。桓公弑君而立,不天無王之極也,而書「春

三月,公會鄭伯于垂,鄭伯以璧假許田。

魯受祊而未與許。及桓弑立,故爲會而求隱公八年,鄭伯使宛來歸祊,蓋欲易許田,

之,復加以璧。朝宿之邑,先祖受之於先

王,豈可相易也? 故諱之曰「假」。諱國

惡,禮也。

夏四月丁未,公及鄭伯盟于越。

盟也。弑君之人,凡民罔弗懟,而鄭與之桓公欲結鄭好以自安,故既與許田,又爲

盟以定之,其辠大矣。

秋,大水。

君修德則和氣應而雨暘,若桓行逆德而致

陰沴,乃其宜也。

一年春王正月戊申,宋督弑其君與夷及其大

夫孔父。

雖無王,而天理未嘗亡也。人臣死君難,弑逆之罪,不以王法正之,天理滅矣。督桓公無王,而書王正月,正宋督之辠也。

失其官也。

書「及」以著其節。父,名也。稱大夫,不

滕子來朝。

也。首朝桓公,之辠自見矣。● 滕本侯爵,後服屬于楚,故降稱子,夷狄之

三月,公會齊侯、陳侯、鄭伯于稷,以成宋亂。

宋弑其君,而四國共成定之,天下之大

惡也。

夏四月,取郜大鼎于宋,戊申,纳于太廟。

皆有賂,魯以爲功而受之,故書「取」。以四國既成宋亂,而宋以鼎賂魯。齊、陳、鄭

■「之」,涂刻本作「其」。

一〇六五

乎? 成 亂 之賂器,置于周公之廟 故書「纳」,纳者,弗受而强致也。 ,周公其饗之

秋七月,杞侯來朝

也。及「紀侯大去其國」之後,紀不復稱 凡杞稱侯者,皆當爲紀。 杞爵非侯,文誤

蔡侯、鄭伯會于鄧。

始懼楚也。

九月,入杞。

公及戎盟于唐。冬,公至自唐。 將卑師少,外則稱人,内則止云入某伐某。

危之也。桓公弑立,嘗與鄭、齊、陳會矣, 君出而書「至」者有三:告廟 也,過 時 也

至」。 居夷浮海之意也。 皆同爲不義,及遠與戎盟,故危之而書 戎若不如三國之黨惡,則討之矣, 中國既不知義,夷狄或

能知也

一年春正月,公會齊侯于嬴

也。二年宋督弑君,以王法 桓公弑君而立,元年書王,以王法正其辠 正其辠也,三

成昏于齊也

年不書王,見桓之無王

也。

會齊侯于嬴

夏,齊侯、衛侯胥命于 二國爲會,約言相命 蒲 而

爲盟詛,近於

不

理

也,故善之。

六月,公會杞侯于郕。 自桓公篡立,無歲不 ·與諸侯盟會,結外援

以自固也

秋七月壬辰 既,盡也。 朔,日有食之,既。 食盡 ,爲異大也。

公子翬如齊逆女。

翬 稱公子,桓之黨也。 **翬於隱世,不稱公子,隱之賊** 雖尊屬,當官而行,亦無嫌也 卿逆夫人,於禮爲 也; 於 桓 稱。

九月,齊侯送姜氏于讙,公會齊侯于讙

齊侯出疆送女,公遠會之,皆非義也。

夫人姜氏至自齊。

見于廟也。齊侯使其弟年來聘,致夫人

也。 稱弟義,見隱七年。

有年。

書「有年」,紀異也。 人事順於下,則天氣

和於上。桓弒君而立,逆天理,亂人倫,天

立,其惡有間,故大有年則書之。 地之氣爲之繆戾,水旱凶災,乃其宜也。 今乃有年,故書其異。 宣公爲弑君者所

四年春正月,公狩于郎。

公出動衆皆當書。 于郎,遠也。

夏,天王使宰渠伯糾來聘。

桓公弑君而立,天子不能治,天下莫能討

而王使其宰聘之,示加尊寵,天理滅矣,人 無矣。 書天王,言當奉天也,而其爲如

> 此。 滅,天運乖矣,陰陽失序,歲功不能成矣, 名糾,尊卑貴賤之義亡也。 人理既

故不具四時。

五年春正月甲戌。

夏,齊侯、鄭伯如紀。

齊爲諸侯,而欲爲賊於鄰國,不道之甚,鄭

齊侯、鄭伯朝于紀,欲以襲之,紀人知之。

伯助之,其辠均矣。

天王使仍叔之子來聘。

古之授任,稱其才德,故士無世官。 周

官人以世,故卿大夫之子代其父任事。仍

叔受命來聘,而使其子代行也

秋,蔡人、衛人、陳人從王伐鄭。

伯禦之,戰于繻葛,王卒大敗。 王師於諸 王奪鄭伯政,鄭伯不朝,王以諸侯伐鄭,鄭

〇六七

侯不書敗,諸侯不可敵王也,於夷狄不書

一〇六八

戰,夷狄不能抗王也,此理也。其敵其抗,

王道之失也。

大雩。

書之所以見其非禮,且志旱也。郊禘亦因因其非時則書之。遇旱災,則非時而雩,大雩,雩于上帝,用盛樂也。諸侯,雩于境大雩,雩于上帝,用盛樂也。諸侯,雩于境成王尊周公,故賜魯重祭,得郊禘大雩。成王尊周公,故賜魯重祭,得郊禘大雩。

事而書。

蝗也。既旱又蝗,飢不在書也。

冬,州公如曹。

六年春正月, 寔來。 去如曹,遂不復。 州公嘗爲王三公,故稱公。不能保其國,

其國也。 忽稱鄭忽,明其正也。 寔不稱州,亡也。 忽稱鄭忽,明其正也。 寔不稱州,亡也。 忽稱鄭忽,則匹夫也,故名之。 來,來魯五年冬如曹,尚爲君也,故以諸侯書之。

夏四月,公會紀侯于成。

謀齊難也。

秋八月壬午,大閲。

之,教之不素,何以保其國乎。 政之甚。無事而爲之,妄動也。有警而爲民守國之道也。盛夏大閱,妨農害人,失爲國之道,武備不可廢,必於農隙講肄,保

蔡人殺陳佗。

之公也。 之公也。 之、實以私也,故書蔡人,見殺賊者衆人 立之。佗,天下之惡,人皆得誅之。蔡侯 立之。陳厲公,蔡出也。故蔡桓侯殺佗而

九月丁卯,子同生。

冢嫡之生,國之大事,故書。

冬,紀侯來朝。

而欲求援於魯桓,不能保其國,宜矣。子,近赴於諸侯,和輯其人民,効死以守,紀侯懼齊,來朝以求助。不能上訴於天

七年春二月季亥,●焚咸丘。

丘」,如盡焚其地,見其廣之甚也。 竭山林而焚之也。咸丘地名。云「焚咸古者昆蟲而後火田,去莽翳以逐禽獸,非

夏,穀伯綏來朝,鄧侯吾離來朝。

三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。 三國之來,別立義也。

八年春正月己卯,烝。

冬烝,非過也。書之以見五月又烝,爲非

禮之甚也。

天王使家父來聘。

魯桓公弑立,未嘗朝覲,而王屢聘之,失道

之甚也。

夏五月丁丑,烝。

不備也,其瀆亂甚矣。正月既烝矣,而非時復烝者,必以前烝爲

冬十月,雨雪。

建酉之月,未霜而雪,書異也。

祭公來,遂逆王后于紀。

而以逆后爲遂事,責其不虔王命,而輕天祭公受命逆后,而至魯先行私禮,故書來。

- 「季」,陳刻本、涂刻本作「己」。
- ❷ 「春」,涂刻本作「秋」。

下 之母也

九年春,紀季姜歸于京師。

曰: 書春日食,則其義 書王國之事,不可用無王之月,故 已。或曰:借如正月日食,則如何書之? 尤明也。 王后之 書 時 帲

下也。故書紀女歸而已。

歸,天下當有其禮,諸侯莫至,是不能母天

冬,曹伯使其世子射姑來朝。

道也。 春秋之時,君疾 曹伯有疾,不能親行,故使其 而使世子出,取危亂之 世子來朝。

説者,纂集附之於後 ○先生作《春秋傳》至此 而終。 舊 有 解

十年冬,●齊侯、衛、●鄭伯來戰于郎。

來 戰于郎,三國爲主。

十有一年,突歸于鄭。

突不稱公子,不可以有國也。「鄭忽出 奔

> + 有四年,●鄭伯使其弟語來盟 衛 忽國氏,正也,不能 有 其位 放不

使來盟 ,盟前定矣,與高子不同。

十有五年,●鄭伯突出奔蔡。

避祭仲而出,非國人出之也

鄭世子忽復歸于鄭。

爵。 稱世子,本當立者,不能保其位,故 鄭人謂之狡童,又曰狂童恣行,其不

不稱

秋九月,鄭伯突入于櫟。 肖可知。

助之。書爵,所以戒居正者,己不能保則 人取之矣。書「人」,以見義不容也 突,非正也,忽既恣行,故國人君之,諸 侯

- 「衛」下,陳刻本、涂刻本有「侯」字。 冬」下,涂刻本有「十有二月丙午」六字。
- 「年」下,涂刻本有「夏五」二字。
- 「年」下,涂刻本有「五月」二字。

十有六年夏四月,公會宋公、衛侯、陳侯

伐鄭。●

突善結諸侯,故皆爲之致力,屢伐鄭也。

秋七月,公至自伐鄭。

不惟告廟,又以見勤勞於鄭突也。

〇莊公名同,桓公子,莊王四年即位。

《謚法》:勝敵克亂曰莊。

諸國稱人,違抗王命也。貶諸侯,則魯在五年冬,公會齊人、宋人、陳人、蔡人伐衛。

六年春王正月,王人子突救衛。其中矣。

雖微稱字,王人當尊也。

夏六月,衛侯朔人于衛。

立之,諸侯莫得而治也。王治其舊惡而廢朔搆其兄,而使至於死,其辠大矣。然父

之宜也,故書名,書「人」。

敗也。小小勝負不書。及其師,非卿也。公戰諱敗,凡言敗績,大九年八月庚申,及齊師戰于乾時,我師敗績。

十年冬十月,齊師滅譚。

《春秋》之法:將尊師衆曰某帥師,將卑師、一年,息養天下厚矣。惟救邢稱位某。齊自管仲爲政,莊十一年而後,未伐某。齊自管仲爲政,莊十一年而後,未以身,四十年,息養天下厚矣。惟救邢稱之身,四十年,息養天下厚矣。 終管仲之身,四十年,息養天下厚矣。 終管仲之身,四十年,息養天下厚矣。 終管仲之身,四十年,息養天下厚矣。 惟救邢稱之身,四十年,息養天下厚矣。 惟救邢稱之身,四十年,息養天下厚矣。 惟救邢稱之身,四十年,以其功卑而易成。

公。上無明王,下無方伯,諸侯交争,齊桓齊桓始覇,仗義以盟,而魯叛盟,故諱不稱衛侯、鄭伯、許男、滑伯、滕子同盟于幽。

十有六年冬十有二月,會齊侯、宋公、陳侯、

● 「伐」上,涂刻本有「蔡侯」二字。

一0七

始覇,天下與之,故書「同」。

十有九年秋,公子結媵陳人之婦于鄄,遂及

齊侯、宋公盟。

鄄之巨室嫁女于陳人,結以其庶女媵之,

安國息民,乃以私事之小而取怒大國,故因與齊、宋盟。 挈之以往,結好大國,所以

深辠之,書其爲媵而往,盟爲遂事。

冬,齊人、宋人、陳人伐我兩鄙。

一十有二年秋七月丙申,及齊高徯盟于防。齊桓始覇,責魯不恭其事,故來伐也。

高徯上卿,魯無使微者與盟之理,蓋諱公

盟。始與仇爲昏,惡之大也。

冬,公如齊納幣。

齊疑昏議,故公自行納幣。後二年方逆,

齊難之也。

二十有三年夏,公如齊觀社。

昏議尚疑,故公以觀社爲名,再往請議,後

二年方逆,蓋齊難之。

十有二月甲寅,公會齊侯,盟于扈。

遇穀,盟扈,皆爲要結姻好。

二十有七年夏六月,公會齊侯、宋公、陳侯、

鄭伯,同盟于幽。

三十有一年冬,不雨。同志而盟,非率之也。

一歲三築臺,明年春城小穀,故冬書「不

雨」,閔之深也。

位。《謚法》:在國逢難曰閔。 ○閔公名啓方,莊公子,惠王十六年即

二年冬,齊高子來盟。

子,唇其尼血唇。 高子來省難,然後盟,盟未前定也。 稱高

○僖公名申,莊公子,閔公庶兄,惠王十子,善其能恤魯。

八年即位。《謚法》:小心畏忌曰僖。

元年春,王正月,齊師、宋師、曹師次于聶北,

救邢。

次以爲聲援,致邢之不保其國也。 齊未嘗興大衆,此稱師,責其衆可救,而徒

二年,虞師、晉師滅下陽。

虞假道而助晉伐虢,虢之亡,虞實致之,故

以虞爲主。 下陽,邑也,虢之立由此,故即

書「滅」。

四年秋,及江人、黄人伐陳。

齊命也。

五年,公及齊侯、宋公、陳侯、衛侯、鄭伯、許

男、曹伯會王世子于首止。

世子,王之貳,不可與諸侯列。

世子出,諸

侯會之,故其辭異。

冬,晉人執虞公。

書「執」而不書「滅」,自取也。

九年夏,公會宰周公、齊侯、宋子、衛侯、鄭

伯、許男、曹伯于葵丘

九月戊辰,諸侯盟于葵丘。 天子之宰,與世子禮異。

云諸侯盟,見宰不預。

十有七年夏,滅項。

滅人之國,罪惡大矣,在君則當諱。

故魯

故不諱。 滅國,書「夏滅項」,君在會,季孫所 爲也,

十有八年五月戊寅,宋師及齊師戰于甗,齊 師敗績。

大矣。齊師敗績,書敗,責齊臣 也。

書「宋及」,曲在宋也。奉少以奪長,其辠

二十有一年秋,宋公、楚子、陳侯、蔡侯、鄭 伯、許男、曹伯會于盂,執宋公以伐宋。

違,故以同執書之。

宋率諸侯爲會,而蠻夷執會主,而諸侯莫

〇七四

一十有二年秋八月丁未,及邾人戰于升陘。

公戰也。

一十有三年冬十有一月,杞子卒。

杞,二王後而伯爵,疑前世黜之也。中間

從夷,故子之,後復稱伯。

圍宋。 二十有七年冬,楚人、陳侯、蔡侯、鄭伯、許男

陳人、蔡人、秦人,盟于翟泉。 二十有九年夏,●會王人、晉人、宋人、齊人、 楚稱人,貶之,爲其合諸侯以圍宋也。

諸侯貶稱人,惡之大也。 迫王城,又與王人盟,强迫甚矣,故諱公, 晉文連年會盟,皆在王畿之側,而此盟復

三十有三年夏四月辛巳,晉人及姜戎敗秦師

于殺。

背惠,其惡甚矣。秦爲無道,越晉踰周以 晉不稱君 居 喪祔葬,不可從戎也。忘 親

戎」,亦然。

襲人,衆所共憤,故稱

「晉人」。

其稱「及姜

位。《謚法》:慈惠愛民曰文。 ○文公名興,僖公子,襄王二十六年即

二年春王正月甲子,晉侯及秦師戰于彭衙,

秦師敗績

越國襲人,秦罪也。忘親背惠,晉惡

其來不稱伐。晉不諭 秦經人之國以襲人,雖憤,無以爲辭矣,故 秦而與戰 ,故書「晉 也。

冬,晉人、宋人、陳人、鄭人伐秦。 及」。忿以取敗,故書「敗績」。

無已,殘民結怨,故貶稱人。 秦以憤取敗,晉可以已矣,而復伐秦,報復

三年,秦人伐晉。

0 「夏」下,涂刻本有「六月」二字。

構怨連禍,殘民以逞,晉人畏之而不敢出

秦 人 極 其 忿 而 後 悔 過,聖人取其 能 終

改耳。

四年夏,逆婦姜于齊。

納幣在喪中,與喪昏同也。 稱婦姜,已成

婦也。不稱夫人,不可爲小君奉宗廟也。

不書逆者,雖卿亦失其職矣。

晉侯伐秦。

秦逞忿以伐晉,晉畏而避之,其見報,乃常

情也。 秦至此,能悔過矣,故不復報晉。

冬十有一月壬寅,夫人風氏薨。

聖人取其遷善悔過,乃其善也。

自成風已後,妾母稱夫人,嫡妾亂矣。 仲

五年春王正月,王使榮叔歸含且賵。 子始僭,尚未敢同嫡也。

天子成妾母爲夫人,亂倫之甚,失天理矣。

不稱天,義已明。 稱叔,存禮也。「王使召

> 不稱天。聖人於此,尤謹其戒 伯來會葬」,天子以妾母同嫡,亂天理,故

七年夏四月戊子,晉人及秦人戰于令狐。

晉始逆立公子雍,既而悔之,故秦興兵以

人。晉懼秦之不肯,已而擊之,故書「晉 納之。晉不謝秦,秦納不正,皆罪也,故稱

及。

秋八月,公會諸侯晉大夫盟于扈。

至,故書往會,而隱其不及,不序諸侯,以 文公怠政,事多廢緩,既納晉盟,而復後

見其不在。故明年,公子遂再往 與 晉

盟也。

九年春,毛伯來求金。

家父致命,以徵車也,故書使「來求」。

毛

伯風魯以欲金,故不云王使。

冬,秦人來歸僖公、成風之襚。

過時始至,故云「來歸」。雖子母,先君後

夫人

十有七年春,晉人、衛人、陳人、鄭人伐宋。

〇七六

行天討而成其亂,失天職也,故不卿之。

禮夷之也,言其尚夷也。 ,體當然也。 書秦人,不云君使,以失 蓋嫡妾之亂,自

兹而始。

十年夏,秦伐晉。

也。 夷狄之道也,故夷之。 晉舍嫡嗣 秦不顧義理之是非,惟以報復爲事, 而外求君,罪也,既而悔之,正

河曲 十有二年冬十有二月戊午,晉人、秦人戰于

伯、許男、曹伯、晉趙盾,癸酉,同盟于新城。 十有四年夏六月,公會宋公、陳侯、衛侯、鄭 諸侯始會,議合而後盟,盟者志同,故書 凡戰,皆以主人及客。秦曲,故不云晉及。

十有五年冬十有一月,諸侯盟于扈。 魯以備齊,不在會,故不序。 衆辭,見衆國無能爲也。此盟,爲齊亂也。 又稱諸侯者,

同」,同懼楚也。

年即位。《謚法》:善問周達曰宣 ○宣公名倭,文公子,子亦庶兄,匡王五

元年春王正月,●遂以夫人婦姜至自齊。

脱「氏」字。

夏六月,齊人取濟西田

云我。非謂彼彊取,故不諱。 不義,故書「取」。不義不能保其土,故不 宣公不義得國,賂齊以求助,齊受之以助 不能有而 失

十年,●齊人歸我濟西田。 者,皆諱。

魯修好,故歸魯田。 田,魯有也,齊非義取

[「]年」下,涂刻本有「春」字。 「王正」,涂刻本作「三」。

之,故云「歸我」,不足爲善也。

十有一年冬十月,楚人殺陳夏徵舒。

人,衆辭。大惡,衆所欲誅也。

丁亥,楚子人陳。

誅其罪,義也,取其國,惡也。 人者,不受

而彊之也。

納公孫寧、儀行父于陳。

致亂之臣,國所不容也,故書「納」。

十有二年冬,晉人、宋人、衛人、曹人同盟于

清丘。

晉爲楚敗,諸侯懼 「人」以貶之。宋伐陳,衛救之,楚伐宋, 而同盟,既而皆渝,故書

伯、邾子,同盟于斷道。 十有七年夏六月己未,公會晉侯、衛侯、曹

諸國同心欲伐齊,故書「同盟」。

〇成公名黑肱,宣公子,定王十七年即

位。《謚法》:安民立政曰成。

人、陳人、衛人、鄭人、齊人、曹人、邾人、薛 二年冬十有一月丙申,公及楚人、秦人、宋

人、鄫人盟于蜀。

要結鄰好,豈有不能自存之理? 楚爲强盛,凌轢中國,諸侯苟能保固疆圉,

弱。 責諸侯,則魯可知矣。

服從,與之約盟,故皆稱「人」,以見其衰

乃懼

而

三年冬,鄭伐許。

鄭附於楚,一年而再伐許,故夷之。

四年冬,鄭伯伐許。

稱鄭伯,見其不復爲喪,以吉禮從戎。

公、衛侯、鄭伯、曹伯、邾子、杞伯,同盟于 五年冬十有二月乙丑,●公會晉侯、齊侯、宋

「乙」、涂刻本作「己」。

蟲

七年秋八月戊辰,同盟于馬陵。 天王崩而會盟不廢,書「同」,見其皆不臣。

諸侯同心病楚。

八年冬,衛人來媵。

爲媵,因爲之擇賢小君,則諸侯國之賢女, 於遠乎? 曰:古者庶女與非敵者,則求 之,故書,以見其賢。女子之賢,尚聞於諸 媵,小事,不書。伯姬之嫁,諸侯皆來媵 侯,况君子乎? 或曰:魯女之賢,豈能聞

九年,公會晉侯、齊侯、宋公、衛侯、鄭伯、曹

當自聞也。

伯、莒子、杞伯,同盟于蒲。 諸國患楚之彊,同 盟 以 相保。 鄭既 盟

復

叛,深罪其反覆

夏,季孫行父如宋 女既嫁,父母使人安之,謂之致女。 致女。

> 三月而 廟見,始成 婦 也。 伯姬 賢,魯國 重

之,使卿致也

十有三年春,晉侯使郤錡來乞師。 不以王命興諸侯師,故書「乞」。

三月,公如京師

夏五月,公至自京師,遂會晉侯、齊侯、宋公、 不書朝王,因會伐而行也,故不成其朝。

衛侯、鄭伯、曹伯、邾人、滕人伐秦。

曹伯、宋世子成、齊國佐、邾人,同盟于戚。 十有五年三月癸丑,公會晉侯、衛侯、鄭伯、 也,故書「同盟」,見其既同矣。 既三年,諸侯與之盟矣,方執之,稽天討 十三年,曹伯卒于師,負芻殺世子自立。 以伐秦爲遂事,明朝爲重。

去族,害公族也。

宋殺其大夫山

冬十有一月,叔孫僑如會晉士燮、齊高無咎、

古者

宋華元、衛孫林父、鄭公子鰌、邾人,會吴于

鍾離。

云:「襄十年相之會,與此同,十四年向之會亦同。」 國衰也。 時中國病楚,故與吴親。 一本此下之,故書諸國往與之會,以見夷狄盛而中之,故書諸國往與之會,以見夷狄盛而中

十有六年六月,晉侯使樂黶來乞師。

秋,公會晉侯、齊侯、衛侯、宋華元、邾人于沙時以穆姜、叔孫僑如將作難,故師出後期。

隨,不見公。

曹伯歸自京師。

曹伯不名,不稱復歸,王未嘗絕其位也。

自京師,王命也。

九月,晉人執季孫行父,舍之于苕丘。

寘之于苕丘也。

諸侯同病楚也。 十有七年六月乙酉,同盟于柯陵。

○襄公名午,成公子,簡王十四年即位。

二年冬,遂成虎牢。

《謚法》:因事有功曰襄。

守,故不繫于鄭,責其不能守也。設險,所以守國也。有虎牢之險而不能

三年六月乙未,●同盟于雞澤。

楚疆,諸侯皆畏之而修盟,故書「同」。

人、鄫人于戚。曹伯、莒子、邾子、滕子、薛伯、齊世子光、吴五月秋,公會晉侯、宋公、陳侯、衛侯、鄭伯、

吴來會,非爲主。

●「乙」,涂刻本作「已」。

〇七九

0八0

于重丘。

十年冬,盗殺鄭公子騑、公子發、公孫辄。

盗殺三卿,不稱大夫,失卿職也。

鄭服而同盟也。隨復從楚伐宋,云「同」,十有一年秋七月己未,同盟于亳城北。

見其反覆。

會于蕭魚。

誠之能感人也! 自此,鄭不背晉者二十晉悼公推至誠以待人,信之不疑。至哉,又服而請會,不書鄭會,謂其不可信也,而 就侯數月之間再伐鄭,鄭之反復可知。鄭

公至自會。

四

T 年。

兵不加鄭,故書「自會」。

伯、曹伯、莒子、邾子、滕子、薛伯、杞伯、小邾十有八年冬十月,公會晉侯、宋公、衛侯、鄭

書「同圍」,見諸侯之惡齊。

子,同圍齊。

三十年冬十月,晉人、齊人、宋人、衛人、鄭諸侯同病楚也。

一十有五年秋八月己巳,諸侯同盟

人、曹人、莒人、邾人、滕人、薛人、杞人、小邾

人會于澶淵,宋災故。

乏魯即,韋衍下書。《左傳》:叔孫豹會趙武而下諸國之卿,既

貶魯卿,諱而不書。

《謚法》:容儀恭明曰昭。 ○昭公名稠,襄公子,景王四年即位。

元年三月,取鄆。

乘莒之亂而取之,故隱避其辭。

去疾假齊之力以入莒,討展興之罪,正也,秋,莒去疾自齊入于莒。

故稱莒。遂自立,無所禀命,故不稱公子,

自以爲公子可立也。

莒展輿出奔吴。

欲執叔孫也。稱莒展興,見諸侯之與其號之會,雖國亂未預,然諸侯與其立矣,故爲弑君者所立,而以國氏者,罪諸侯也。

立也。

滕子、頓子、胡子、沈子、小邾子、宋世子佐、四年夏,楚子、蔡侯、陳侯、鄭伯、許男、徐子、

十有二年冬,晉伐鮮虞。 晉平公不在諸侯,楚於是强,爲覇者之事。 淮夷會于申。

晉假道於鮮虞而遂伐之,見利忘義,夷狄

之道也。

晉不使與盟,雖欲辱公,然得不與同盟之楚弃疾立,諸侯懼之,故同盟。公不與盟,十有三年秋八月甲戌,同盟于平丘。

罪,實爲幸也。

十有九年冬,葬許悼公。

蔡般、許止疑同,故書「葬」。

○定公名宋,襄公子,昭公弟,敬王十一

三年春王正月,公如晉,至河乃復。

復,故明年因會而請盟于皋鼬。而立定公,故晉怒而公往朝焉。晉辭公而季孫意如上不請於天子,下不告於方伯,

于召陵,侵楚。子、胡子、滕子、薛伯、杞伯、小邾子、齊國夏侯、陳子、鄭伯、許男、曹伯、莒子、邾子、頓四年三月,公會劉子、晉侯、宋公、蔡侯、衛

無功而還,故書「侵」以罪之。諸侯以伐之,而不能明暴其辠,以行天討,楚恃其强,侵陵諸侯,晉上請于天子,大合

〇八

五月,公及諸侯盟于皋鼬。

公以不獲見於晉,故因會而求盟焉,則此

盟公意也,故書「公及」。

十年,齊人來歸鄆、讙、龜田。●

書,解在哀公八年。齊服義而求歸之,故書「來歸」。始失不

○哀公名蔣,定公子,敬王二十六年即

六年,❷齊陽生入于齊。

稱齊陽生,見景公廢長立少,以啓亂也。

八年夏,齊人取讙及闡。

人民,是不君也。己與之,彼以非義而受,内失邑不書,君辱當諱也。不能保其土地

齊人歸讙及闡。 其君來致,齊怒,吴伐,彼故賂齊以説之。 則書「取」,此濟西田是也。魯入邾,而以

不云我田,既歸邾子,亦歸其田,非以爲

〇八二

惠也。

川經說卷之四

伊

] 「年」下,涂刻本有「秋」字。

程氏經説卷第五

二先生

禮記

明道先生改正大學

日 新。」是故君子無所不用其極。《詩》云:「邦 典》 銘》曰:「苟日 安,安而后能慮,慮而后能 有終始 克明德。」《太甲》曰:「顧諟天之明命。」《帝 曰:「克明峻 「作新民。」《詩》曰:「周雖舊邦,其命維 知止而后有定,定而 大學之道,在明明德,在 ,知所先 新 後,則 德。」皆自明也。 日日新,又日新。」《康誥》 近道 后能 得。 矣。 親 静,静 物有本末,事 民,在止於 《康誥》曰 湯之《盤 而后能 至

> 有也。此謂知本,此謂知之至也 者,否矣;其所厚者薄 庶人,壹是皆以脩身爲本。 而后國治,國治而后天下平。 物。 其意,欲誠其意者,先致 后心正,心正 欲脩其身者,先正其 國者,先齊其家,欲齊其家者,先脩其身; 古之欲明明德於天下者,先治其國,欲治其 止於孝,爲人父止於慈,與國 于丘 止 不 畿 一。」爲人君止於仁,爲人臣止於敬,爲人子 如鳥乎?」《詩》云:「穆穆文 千 物格而后知至,知至而后意誠,意 隅。」子曰:「於止知其所 里 ¬惟民所止。」《詩》云:「緡蠻黄鳥,止 而后身脩,身脩 心 而 其 欲正其 其知; 所薄者厚,未之 其本亂 而后家齊,家 自天子以 人交止於信。 ĪĻ, 王,於緝 心者,先誠 致 可以 圃 知 末治 至於 在 誠 人 熙敬 齊 格 mi 而

如好好色,此之謂自謙,故君子必慎其獨也。所謂誠其意者,毋自欺也。如惡惡臭,

體胖 故君 肺 小 十手所指,其嚴乎 ", 揜 肝 然,則 子 閒 ,故君子必誠其意 其不善 必 居 慎 爲 何 其 不 一而著其 益 善 獨 矣? 也。 』。」富 無 善。 所 曾 此 不 謂 潤 子 人之視己,如 至 屋 日 誠於中, 了: 十 見 德潤 君 子 身,心 目所視, 形於外, 而 見 后 廣 其 厭

謂 焉 得 不 視 得 其 脩身在正其心。 其 正 所謂脩身在正其心者,身有所忿懥 而 有 正 不 有 ·見,聽一 所恐懼則不得其正,有 所 憂 圃 患則 不 聞 『,食而 不得其 不 Œ 知 ,心不· 所 其 好 味 樂 則 在 此 則 不

矣。 焉。 其苗之碩。」此謂 辟 而 辟 故好 焉 故 ,之其所哀 所謂 一之其 諺 有 而 齊其家在 之曰:「人莫知其 知其惡, 所 矜 賤 身不脩 惡 而 脩 惡 辟 圃 其 焉,之其所敖 辟 而 不可 身者,人之其 焉,之其 知其美者,天 以 子之惡,莫 齊其家 所 惰 畏 所 下 敬 親 而 知 鮮 辟 愛 而

四 后 或 其 恕,而能 求諸 反其 讓 也。 所 能教 子于歸, 民從之,桀紂帥天下以暴而 求之,雖不中不遠矣,未有學養子而 國,孝者所以事君也,弟者所以事長也,慈 一言僨事,一人定國。 國 人。 家。 可 以使衆也。 (所好, 。」其爲父子兄弟足法,而 以 人,無 人者,無之。 所 一人貪戾, 一家仁, 《詩》云: ^ 謂 教 詩 宜 喻 或 治 其家 然諸己 》云:「桃之夭夭,其葉 諸 而民不從。 國 人。 人者,未之有也。 《康誥》曰:「如保赤子。」心 必先 一國作 人。」宜其家 「宜兄宜弟。」宜兄宜弟 ጠ 國興仁, 故 詩》云 后非諸 齊 君子不 其 是故 亂。 堯、舜帥天下 家者 「其 一家 君子有諸 民從之。 其機 出 其 后民 儀 家 所藏乎身 故治國 而后可 讓,一 家 不 如 蓁 而 不 太,正 此, 法之也。 其所 成 以 后 己 可 或 在 以 而 此 嫁 教 教 不 齊 謂 興 誠 於 而 m 而

此謂治國在齊其家。

後; 所 君 孝,上長長而民 矩之道。 交於左, 毋於下,毋以事上, 子有絜矩之道也。 所惡於後,毋以 所謂 所惡於左,毋以交於右,此之謂 平天下在治 興弟,上恤 從前; 所惡於上,毋以使下 其國者,上老老而 所 孤 惡 所 而民不倍,是 於前,毋以 惡於右,毋 民 先 絜 以 以 興

僇矣。 者,道學也,如 斐君子,如切如 民 所 兮喧兮,有斐君 詩》云:「節 具爾瞻。」有國者不可以不慎,辟則爲天下 好好之、民之所惡惡之、此之謂民之父母。 《詩》云:「樂只君子,民之父母。」民之 恂 《詩》云:「瞻彼淇澳,菉竹猗猗。 慄 也 彼 ; 南 赫 琢 磋 子,終不可 如如 山,維石巖巖,赫赫 兮喧兮者,威 如磨者,自脩也,瑟兮僴 琢 如磨。 誼兮。」如切 瑟兮僴兮,赫 儀 也 師 如 有 尹 有 斐 磋

> 忘也。 人,有人此有土,有土此有財,有財此 出者,亦悖而 是故財聚則民散,財散則民聚。 德者本也,財者末也。 失衆則失國。 以没世不忘也。 賢其賢而親其親,小人樂其樂 上帝,儀監于殷,峻命不易。」道得 志,此謂知本。 也使無訟乎!」無情者不得 君子終不可誼兮者,道盛德至善,民之不 《詩》云:「於戲 入,貨悖而 是故君子先慎乎德,有德此有 《詩》云:「殷之未 子曰:「聽訟吾猶人也,必 外本内末,争民施 ! 入者,亦悖而 前王不 盡 其 而 是故言悖 衆則 喪師,克配 辭,大畏 利 忘!」君 其利, 出 得國 有 用 能 而 民 此

斷 之,不善則失之矣。 寶,仁親以爲寶。」《秦誓》曰:「若有一个臣, 爲實,惟 断兮無他技,其心休休焉, 康誥》曰:「惟 善 以 爲 寶。」舅犯曰: 《 楚 命不于常。」道善則 書》曰:「楚國 「亡人 其 如有容焉 無 以爲 無 得 以

過也。 能先,命也,見不善而不能退,退 爲能愛人,能惡人。見賢而不能舉,舉而不 放流之,迸諸四夷,不與 以不能保我子孫黎民,亦曰 之性,菑必逮夫身。 之,人之彦聖,而違之俾不通。寔不能容, 黎民,尚亦有利哉! 不啻若自其口出,寔能容之,以能保 人之有技,若己有之,人之彦聖,其心好之, 好人之所惡,惡人之所好,是謂拂人 人之有技,帽 同中國 ,此謂唯仁 m !」唯仁人 不能遠, 疾 我 以 子孫 惡

利

也

有 以 寡 以 下不好義者也,未 失之。 府 、,爲之者疾,用之者舒,則財恒足矣。 仁者 財發身,不仁者以身發財 庫 是故君子有大道,必忠信以 察於 財 生財有大道:生之者衆,食之者 非 雞 其財 豚 ,伐冰之家,不畜牛羊, 者 有 好義 也。 孟 其 獻 事不終者也,未 未有上好仁而 子 曰:「畜 得之,驕 百 馬 泰

> 之。 亦無如之何矣。 長 有 乘之家,不畜聚斂之臣,與其有聚斂之臣,寧 國 盗 小人之使爲國家,菑害並 家 臣。」此 而 務 謂 財 國 用 此謂 者, 不以 必自 國不以利爲利,以義爲 利 爲 小人矣。 利 以以 至,雖有善者, 義 爲 彼 利 爲善 也。

伊川先生改正大學

意 静 脩其身者,先正其 者,先齊其家,欲齊其家者,先脩 之欲明明德於天下者,先治其國 有 在 本末,事有終始,知所先後,則 而 止於至善。 欲誠其意者,先致其知,致知在格 后 大學之道,在明明 能安,安而 知 止 心,欲正其心者,先誠 后能慮,慮 而 后有定,定 德 在親 而 當作「新」。 后 近道 而 其身, 能 欲治其 后 矣。 能 民, 其 國 古 欲 物

否矣; 物 IE. 國治,國 人,壹是皆以 格 而 正 其 后 治 而 知 所 后 而 至, 厚 脩身爲 身脩,身 后 者 知 天 薄 至 下 本。 而 平。 而 脩 后 其 而 意 其本亂而 后 所 自天子以至 誠, 家 薄 齊,家 者 意 誠 厚, 末治者, 齊 而 未之 於 而 后 庶 后 心

於信

有

也。

乎 以 黄鳥,止于丘隅。]子曰: 知 궁: 其 湯之《盤銘》曰:「苟日新,日日新,又日新。」 之明命。」帝 康誥》曰: 康誥》 (命惟新。] 是故君子 本。 1 「邦畿千里,惟民所 而 子 無情 四字 日 不 日 如 . 衍。 者 「克 「作新民。」《詩》曰 鳥乎 典曰: 不 聽 此 訟 明 得 ?!《詩》云: 謂 德。」《太甲 吾 盡 克明 知 其 猶 無所 本, 辭 止。」《詩》云: 人 「於止知 峻德。」皆自明也 大 不 此 也, 用 × 謂知 「穆穆文王 畏 一周雖 日 必 其 民 八其所 :「顧諟天 也 極。 志 之至也。 使 舊邦, 止 \wedge 無 緡 此 詩 於 謂 鑾 訟 可

爲人子止於孝,爲人父止於慈,與國人交止緝熙敬止。」爲人君止於仁,爲人臣止於敬,

體 故君子必慎其獨也。 肺 然,揜其不善而著其 如好好色,此之謂 十手所指,其 小人閒居爲不善,無所不至,見君子而 胖 肝 然,則 ,故君子必誠其意 所 謂 誠其意者, 何 (嚴乎 益 矣? 自謙,故君子必慎 !」富潤 毋 善。 曾子 此 自 謂 人之視己,如見其 欺 屋,德潤身 日 誠 也。 一: 十 於中,形 如 目 其 惡 所視 於 惡 獨 后 也。 臭, 廣 厭

所好樂 忿懥 味,此謂脩身在 心不在焉,視而 則不得其 所謂脩身在正其心者,身當作「心」。 則 不得其 IE Ē 不見,聽 一,有所 IE 其 有 心 恐懼 所 而 憂 不 則 患 聞 則 不 食 得 不 而 其 得 不 其 Œ 有 知 其 所 有

所謂齊其「其」字符。家在脩其身者,人之

能

天下 所畏 其 惡,莫知其苗之碩。」此謂身不脩不 敖 惰 所 敬 鮮 親 而 辟 矣。 而 焉 辟 而 故 焉,之其 辟 故諺有之曰:「人 焉 好 圃 之其 知 所 其惡 哀 所 矜 賤 悪悪 惡 而 辟 而 莫知其子之 而 辟焉, 焉,之其所 知 其美者, 可以 之其 齊

所好, 桀、紂率天下 能 事,一人定國。堯、舜率天下以仁而民從之, 之,雖不中不遠矣,未有學養子而后嫁者也。 以 孝者所以 人貪戾,一 一家仁,一 八無諸 使衆也。 教人者無之。 所謂 而 民 己 事 治國必先齊其家者,其家 不從。 而 國作 或 《康誥》曰:「如保赤子。」心誠求 君也,弟者所 以暴 [興仁] 后非諸人。所藏乎身不 亂。 故君子不出家而 是故君子有諸己而 而 民從之。❶ 其 機 家 讓,一 以 如 事長 此, 其所 或 此 也,慈者所 成教於國 謂 興 不可教 令反其 后 讓 一言僨 恕,而 求諸 而

> 《詩》云: 宜其 《詩》云:「桃之夭夭,其葉蓁蓁, 其爲父子兄弟足法,而後民法之也。此謂 國在齊其家。 教國人。《詩》云:「其儀不 喻 家 諸人者,未之有也。 人。」宜其 「宜兄宜弟。」宜兄宜弟, 家 人 而 故 後 忒 治 可 熨 正是 以 之子于歸, 在 뻬 教 齊 后 四國。 或 其 可 治 以

後,所惡於後,毋以從 所惡 民之所好好之,民之所惡惡之,此之謂民之 矩之道。 交於左, 君子有絜矩之道 孝,上長長而民興弟,上恤 於下,毋 所謂平天下在治其國者,上老老而 所惡於左,毋以交於右,此之謂 《詩》云: 以 也。 事上, 「樂只君子,民之父母。」 所惡於上,毋以使 前,所惡於右,毋 所 孤 惡於 而民不倍,是以 前,毋 以 民興 下 絜 以 先

⁰ 率 涂刻本作[帅]。

猗猗。 不忘 如切 父母 儀 也; 則 而 兮僴兮,赫兮喧兮,有斐君子,終不可誼兮。」 赫 善,民之不能忘也。《詩》云:「於戲 也; 利其利,此以没世不忘也。 爲 師 瑟兮僴兮者,恂慄也,赫兮喧兮者,威 # 如 !」君子賢其賢而親其親,小人樂其樂 天下僇矣。《詩》云:「瞻彼淇澳,菉 人,民 有斐君子終不可誼兮者,道盛 《詩》云:「節 有斐君子,如切如磋,如琢如磨。 磋者,道學也;如 具爾 瞻。」 有國者不可 彼 南 山,維 琢 如磨者,自 石 以 巌 不 1 巖 · 慎 德 前 至 脩 瑟 竹 辟 Ŧ 赫

之有技,若己有之,人之彦聖,其心好之,不斷斷兮無他技,其心休休焉,其如有容焉,人寶,仁親以爲寶。」《秦誓》曰:「若有一个臣,爲寶,惟善以爲寶。」舅犯曰:「亡人無以爲之,不善則失之矣。《楚書》曰:「楚國無以

也。作「殆」之誤也。 保我子孫黎民,亦曰殆哉 人之彦聖,而違之俾不通,寔不能容,以不能 民,尚亦有利哉 拂人之性, 菑必逮夫身。 人,能惡人。見賢而不能舉,舉而不能先,命 进諸四夷,不與同 啻若自其口出,寔能容之,以 能遠,過也。好人之所惡,惡人之所好,是謂 1 中國。 見不善而不能退,退 人之有技,帽 此謂唯仁人爲能愛 !」唯仁人放流之, 能保我子 疾 以惡之, 孫 而 黎 不

者 有 則失國。是故君子先慎乎德,有德此有 儀監于殷,峻命不易。」道得衆則得國,失衆 以失之。《詩》云:「殷之未喪師,克配 本也 人 此 是故君子有大道,必忠信以得之,驕泰 有土,有土此 ,財者末 也。 有財,有 外本内末, 財 此 争民 有用。 上帝, 施

「殆」,四庫本《程氏經説》作「怠」,與《外書》卷十一合。

出者,亦悖而入,貨悖而入者,亦悖而出。是故財聚則民散,財散則民聚。是故言悖而

臣。」 家 之何矣。 不畜聚斂之臣,與其有聚斂之臣,寧有盗 者疾,用之者舒,則財恒足矣。仁者以財 人之使爲國家,菑害並至,雖有善者,亦無如 於雞豚,伐冰之家,不畜牛羊,百乘之家, 財非其財者也。 義者也,未有好義其事不終者也,未有府庫 身,不仁者以身發財。 本云。「彼爲不善之小人,使之爲國家。」 而 務財用者,必自小人矣。彼爲善之。小 此謂國不以利爲利,以義爲利也。長 生財有大道,生之者衆,食之者寡,爲之 此謂 國 不 孟獻子曰:「畜馬乘,不 以 利 未有上好仁而 爲 利,以義爲利 下 木 也。 國 好 發

程

氏經說卷之五

程氏經說卷第六

論 語 説

而

於及人,不見是而無悶,乃所謂君子。 樂也。「人不知而不愠,不亦君子乎?」雖樂 來,不亦樂乎?」以善及人,而信從者衆,可 時復思繹,浹洽於中,則説也。 「學而時習之,不亦説乎?」習,重習也。 「有朋自遠方

愛及於物,所謂親親而仁民也,故爲仁以孝 也、故不犯上、豈復有逆理亂常之事? 本,本立則其道充大。 「有子曰:其爲人也孝弟。」孝弟,順德 孝弟於其家,而後仁 德有

伊川先生

巧言令色鮮矣仁」,謂非仁也。

弟爲本。

論性,則仁爲孝弟之本。

知巧言

令色之非仁,則知仁矣。

「道千乘之國」,今之諸侯能如是,足以 曾子之「三省」,忠信而已。

保其國矣。

之職,力有餘則學文,不脩其職而學,一作「先 「子曰:弟子人則孝,出則弟。」爲弟子

文」。非爲己之學也。

賢之誠也。事親事君與朋友交,皆盡其誠, 學求如是而已。 「子夏曰:賢賢易色。」見賢改色,有敬

者必忠信。遷善不可不速,君子之自脩當如 威儀,所學不能安固。所主在於忠信 「子曰: 君子不重則不威。」不厚重

", 所親

則 無

曾子曰: 慎終追遠,民德歸厚矣。」居

是也。

〇九

〇九

寷 事 能慎其終,不忘於遠,足以化民,歸於厚 盡 禮 ,祭祀致誠,慎終追遠之大者也。 凡

矣。

也。 之。」温、良、恭、儉、讓,盛德之輝光接於人者 侯敬而信之。 儉,節制也。 温,和 「子貢曰:夫子温、良、恭、儉、讓 厚 也。 讓,謙遜 良,易直也。 也。 德容如是,是以諸 恭,莊敬也。 以 得

居 喪,志存守父在之道,不必主事而言也。 「三年無改於父之道,可謂孝矣。」孝子

൬ 和,爲可 有子曰:禮之用,和爲貴。」恭而安,别 貴 也

相 守約,恭能遠耻 近,亦可 有子 尚 曰:信近於義,言可復也。」信能 也 ,近於禮義也。 因其不失於

敏於事」,勇於行也。

貧無諂,富無驕,能處其分也。 樂與好

周及於物而不偏比。

小人偏比,故不能周。

禮 告之以樂與好禮,而 ,能自脩也。 切磋 琢磨,自脩各以其道也。 知 爲自脩之道,知來

爲 政

者

也。

勉 於斯道也。 理盡性也。 亦由學而至 而中矣。 一子曰 : 一,所以 耳順,所聞皆通也。 不惑,則 吾十有五 勉 無 進 而志於學。」聖人言己 所 後 疑 人也。 矣。 從心,則不 知天命, 立 能 自立

能 益,斯言可 也。 温 故 師 而 也。 知 新。」温故則不廢, 所謂 日 知所亡,月無 知 新 忘 則 所 日

周 先行其言 而 不比。」周 而 後 、爲遍及之義,君子道弘, 從之」,踐言則 可信

1116

學而不思則罔。」學不思則無得,力索

而 不問學則勞殆

攻求異端,則害於正。

人苟耻其不知,而不求問,是終不知也。

以 爲不知而求之,則當知矣,故云「是知也」。

多見而闕其不安者,寡悔之道也。 君子

行己能慎,得禄之道也。

舉直錯諸枉」,舉錯得義,則民心服。

孝友于兄弟,則能施於有政」。 「《書》云孝乎!」《書》之言孝,則曰「惟

非其鬼而祭之, 謟也。」不當祭而祭之,

俗 謟於鬼神也。 ,知義之不可而不能止,蓋無勇耳。 時多非禮之祀,人情狃於習

八 佾

謂季氏八佾舞於庭,「是可忍也,孰

不可忍也」。忍爲是,則何所不能爲 「人而不仁,如禮何? 人而不仁,如樂 也

何?」仁者天下之正理,失正理則無 序而

不和。

儉,喪主於哀,故寧戚。

「林放問禮之本。」飾過

則失實,故

痙

「夷狄之有君。」夷狄且有君,不如諸夏

之僭亂、無上下之分也。

「君子無所争,必也如一本無「如」字。射

子」,言君子其争乎?

乎!!射者正己而已,非有争也。「其争也君

「巧笑倩兮」,美質待禮以成德,一作「法」。

猶素待繪以成絢。子夏能諭,故曰「起予」。

「夏禮吾能言之。」夏、商之禮未盡亡也,

而杞、宋之文籍法度不足考證矣,故夫子不 成之。

能

禘自既灌 而往者。」灌者,祭之始也。

一〇九三

之也。 其節 儒皆謂 自 則治之如視諸掌也。 灌 文皆 而 非止禘也,因禘失禮之甚而言耳 以 往 上失也。 魯逆祀 皆不 欲觀,蓋 而 天下之事,苟能使之中 「不知也」者,不欲顯言 云逆祀固失禮之大者, 非 事之失也。 先

意 ,抑之云,若「獲罪於天」,求媚何益也 奥」喻貴臣,「竈」喻用 事 者。 夫子知其 ?

取 必專以主皮爲工也。 ,不必同科也。 射不主皮,爲力不同科。」射有五善,不 古者取善之周 工力非一端,苟有 也 미

事君盡禮,人以爲謟也。」當時事上之

禮

簡也

切於善,一作「色」。 女,非淫其色也; 《關 雎 》樂 而 乃傷 哀思之切,無傷善之心也。 不 淫,哀而不傷。」樂得 善也。 淑

不 知禮也。 管仲之器 或問其知禮乎,故答以不知,器 小哉」,謂管仲器 小,非 止 謂

善也。

大則自知禮 矣。

樂始翕如、純如、皦如,至於繹如,非

通

之失者,故未盡 於樂者,孰能知之? 「子謂《武》,盡美矣,未盡善也。」一

有

傳

善善。

以 觀乎? 主於敬,喪主乎哀。 觀之哉?」居上以愛人爲本,主於寬 「居上不寬,爲禮不敬,臨喪不哀,吾何 不然,是無本也, 厚, 何 以

里 仁

子曰: 里仁爲美。」居以親仁爲美,處 知

不擇仁,焉得爲 惟仁 苟 志仁,無惡 者能 好 人,能惡人」,得其 也。」荷志於仁,則無不 公正

「君子去仁,惡乎成名?」去仁,則不得

名君子矣。

「道不可須臾離,可離非道」,言道也。造次、「君子無終食之間違仁」,得善弗失也。

顛沛必於是,言守道也。

耳,豈敢謂天下無仁者也?用力於仁者,固嘗一作「當」。有之,已未嘗見力不足者。」欲仁則仁斯至矣,不繫乎力也。「有能一日用其力於仁矣乎? 我未見

「朝聞道,夕死可矣。」人不可以不知道,小人常失於薄,君子過於愛,小人傷於忍。人之過也,各於其類:君子常失於厚,

也。」志於道而心役乎外,何足與議也?「士志於道,而耻惡衣惡食者,未足與議

苟得聞道,雖死可也。

之與比。」君子之於天下,無必往也,無莫往「君子之於天下也,無適也,無莫也,義

也,惟義是親。

者志在嚴刑,則民思仁厚者而歸之。懷惠。」在上者志存於德,則民安其土,在上「君子懷德,小人懷土,君子懷刑,小人

「放於利而行,多怨。」心存乎利,取怨之

道也,蓋欲利於己,必損於人。

不能以禮,將如禮何? 無禮讓,則不可以爲禮者爲國之本,能以禮讓,復何加焉?

國也。

人之不知已也。 立,不患無位以行也,求爲可知之行,不患爲可知也。」君子求其在己者,故患身無所爲可知也。」君子求其在己者,故患身無所

孟子曰:「盡其心者,知其性也。」之謂忠,推己之謂恕。忠,體也;恕,用也。「曾子曰:夫子之道,忠恕而已。」盡己

「君子喻於義,小人喻於利」,惟其深喻,

0九

子曰:

道不行,乘

桴浮于海,從

我

是 以 篤 好

故德必有鄰。 德不孤,必有鄰。」事物莫不各以類聚,

公 冶 長

斯 焉 取斯。」斯,助語、《詩》云:「恩斯

勤 斯。」

也。 器也。二器者,尚飾之物,子貢文勝,故云器 飾之盛者皆從玉,見其飾之美。 復問 子貢問曰:"「賜也何如?」子曰:"「女, 何器。 曰:「瑚璉也。」瑚璉,貴器,

進也。

用佞?」 有 之,則多人於不善,故夫子云"「焉 或曰:雍也仁而不佞。」佞,辨才也,人

且 未能信,信謂自得,故夫子説其篤志。 「子使漆雕開仕。」使求禄也。 對以 己學

也。

恕或能勉之,仁則非子貢所及。

通 不能 浮海也,故喜夫子與己。 子路勇於義,故謂其能從己。子路以爲實欲 其由也與!」浮海 用。 量 度事理也。「取材」,裁度也,材裁 居夷,譏天下無賢君 夫子許其勇而謂 也。 其

喜方人,故問 「何敢望回」,故云吾與女弗及,所 「子謂子貢曰:女與回

其與

回孰愈。

子貢

既

能

自

謂

也孰愈?」子貢

「宰予晝寢。」人既耽惑,難以語學矣,因

責其不踐平日之言也。

人有慾則無剛,剛則不屈於欲也

人。」仁也。施諸己而不願,亦勿施於人,恕 「我不欲人之加諸 我,吾亦欲無 加 諸

「夫子之文章,可得而 聞也, 夫子之言

以

勉

之

性與天道,不可得而聞也。」子貢聞夫子之至

論 而歎美之言也。

「子路有聞,未之能行,唯恐有聞。」子路

果於行者,故有聞而未能行,惟恐復有聞也。

久則敬衰,久而能敬,所以爲善與人交也。 「晏平仲善與人交,久而敬之。」人之交

世謂臧文仲知,僭上失禮,安得爲知?

之,無愠色。]其然,豈其然乎? 人不能見其 「令尹子文三仕爲令尹,無喜色,三已

何以知其未仁也? 夫子獨稱其以政告新爲 色則可矣,謂其無喜愠則非也。苟無喜愠,

忠,斯可見矣。

慮當矣,至於求遭喪之禮,則過矣。 「季文子三思而後行」,使晉時也,其再

「子在陳,曰:歸與!」 夫子之删詩書,

使群弟子編緝之也。

伯夷、叔齊之節,至高峻也,然其居之以

寬,故怨希,不然則不可以處世矣。

孰謂微生高直?」君子敬以直內,所枉

雖小而害則大。

顔淵、季路與夫子之言志,夫子安仁也,

「足恭」,過恭也。左丘明,古之聞人。

顏淵不違仁也,季路求仁也。 夫人能自知其過者鮮也,然知過非難

人,人不若己之好學耳,所以勉人學也。 之好學也。」忠信,質也。語生質則不異於 也,能自訟之爲善,自訟不置,能無改乎? 「十室之邑,必有忠信如丘者焉,不如丘

雍 也

「雍也可使南面」,仲弓才德可使爲

政也。

子桑伯子内主於敬而簡,則爲要直,内

存 子桑伯子之簡 可也」。 乎 簡 m 簡 則 雖 爲 可 疎 取,而未盡 略 仲 弓 善,故夫子云 可 謂 知 旨 者

宰」,則「與之粟九百」,思辭其 蓋 華,義也; 之意,故自與之粟 求不達而請益,則「與之庾」,求猶未達夫子 子曰「與之釜」者,所以示冉求以不當與也。 使,義也,而冉求乃欲資之而爲之請粟。夫 之粟五秉。] 夫子之使子華,子華之爲夫子 日 不 日 赤苟至乏,則夫子必周之矣。 :「與之釜。」請益,曰:「與之庾。」冉子與 善未嘗不知,知之未嘗復行,「不貳過」也。 苟有餘,則分諸鄰里鄉黨。 顏子之怒在物而不在己,故「不遷」; 子華使於齊,冉子爲其母請粟。子 原思 爲宰,有常禄也。 五秉,故夫子非其繼富 夫子之使子 多,故 「原思爲之 謂之 有

子謂仲弓,曰:「犂牛之子騂且角。」疑

多「曰」字。角,始角也,可用時也。

「其餘則日月至焉」,至謂心存於仁,非能至回「三月不違仁」,得善則服膺弗失也。

於仁也。

各有所長,能取其長,皆可用也。政乎,夫子答以各有所長。非唯三子者,人政爭康子問仲由、子貢、冉有其才可以從

曾子數人而已。 矣。」」仲尼之門,能不仕大夫之家者,閔子、『善爲我辭焉。如有復我者,則吾必在汶上『季氏使閔子騫爲費宰。閔子騫曰:

不足也。 原子之樂,非樂簞瓢陋巷也,不以貧窶 不足者,乃中道而自廢耳。今女自止,非力 大子告以爲學由己,未有力不足者。所謂力 大子告以爲學由己,未有力不足者。所謂力 不足者,乃中道而自廢耳。今女自止,非人 不足也。」

君子儒爲己,小人儒爲人。

·行不由徑」,動必從正道。

之巧言與朝之令色,難免乎今之世,必見憎 不有祝鮀之佞,而有宋朝之美。] 無鮀

道,不可離也。事必由其道,猶出人之

「文質彬彬,然後君子。」君子之道,文質

必由户也。

疾

也。

者安其常也。

得其宜也。

幸耳。 人類之生,以直道也,欺罔而免者,

好之者,不如樂之者。」非有所得,安能

以語上。」才卑而語之高,安能人也? 「中人以上,可以語上,中人以下,不可

鬼神當敬也,親而 樊遲問知。」能從百姓之所義者,知也。 求之,則非知也。 以所難

爲先,而不計所獲,仁也

字。 者樂於安静,如山之定止。知者得其樂,仁 好也。 「知者樂水,仁者樂山。」樂者,一本有「喜 知者樂於運動,若水之通流。仁

之道也。 至魯。魯則修廢舉墜而已,一變則至於先王 功之治,太公之遺法變易盡矣,故一變乃能 猶存周公之法制,齊由桓公之霸,爲從簡 之時,齊强魯弱,孰不以爲齊勝魯也? 「齊一變至於魯,魯一變至於道。」夫子 然魯 尚

爲不君,臣 之形制,則非觚也。故君而失其君之道,則 「觚不觚,觚哉! 而失其臣之職,則爲虚位 觚哉!」觚而失其 觚

難 焉,其從之也?]]宰我問仁者好仁,不避 ,雖告之以赴井爲仁,亦從之乎? 「宰我問曰:『仁者、雖告之曰井有 夫子謂 患

00

不 可欺以其方,不可罔以非其道 -然,君 子可使之有 往 不不 可陷之於不 知

以弗畔矣夫!」博學而守禮,雖未知道,亦可 以弗違畔於道矣。 「子曰:君子博學於文,約之以禮,亦可

喪予也 之被强也,故不説。 謂之曰:吾道之否塞如是,蓋天厭之,猶天 夫子雖不願見,安能拒之乎? 南子非正,而衛君以爲夫人,使見夫子。 夫子爲陳不得已之故而 子路以夫子

德也 自世教衰,民不興於行,鮮有中庸之 中庸,天下之正理。德合中庸,可謂至

矣。」以仁知而言也。

博 之至,惟聖人爲能盡仁道。然仁可通上下而 而 已也,患其力不能及耳。 及衆,堯、舜 博施於民,而能濟衆。」博施,厚施也。 病其難 也。 聖人濟物之心 聖人者,人倫

日新。

言, 爲仁之方也。 故 日 : 何 事 於 仁? 必 也 聖 乎 !」恕者

述 뻾

傳述而不作,信古而好之,自比於老

厭,知也,教不倦,仁也。 彭也。 有於我,勉人學當如是也。子貢曰:「學不 於我哉?」默識 默 而識之,學而 mj 無倦者,有諸己者也。 不厭,誨 仁且知,夫子既聖 人不倦,何

徙,不善不能改,是吾憂也。」憂如是,則 「子曰:德之不修,學之不講,聞義 能 德

吾不復夢見周公。」夢見周公,夫子盛 申申」,和適之貌,「夭夭」,温裕之貌

何

有

矣。 時,寤寐常存行周公之道,及其老也,志慮衰 存道者,心無老少之異,行道者,身老

則衰矣。

者當如是,游泳於其中。 「志於道,據於德,依於仁,游於藝。」學

焉。」苟以禮來者,無不受也。 子曰: 自行束修以上,吾未嘗無 誨

色也。 告也。 告之,必待其自得也。憤悱,誠意見於辭 「不憤不啓,不悱不發」,待其誠 「舉一隅,不以三隅反,則不復也」,既 至 加 後

矣,則飫飽。有喪者在側,豈能甘也? 「子食於有喪者之側,未嘗飽也。」食甘

遇者也。 我與 ,命不足道也。 爾有是夫!」用舍無所預於己,安於所 「子謂顏淵曰:用之則行,舍之則藏, 或曰: 然則知命矣。夫曰安所遇 君子知有命,故言必曰命。 唯

> 然而安之不以命,知求無益於得而不求者, 非能不求者也

負其勇,謂夫子必與己,故夫子抑而教之。 「子路曰:子行三軍,則誰與?」子路自

可也,如義不可求,寧貧賤以守其志也。 爲之。」富,人之所欲也,苟於義可求,雖屈己 「子曰: 富而可求也, 雖執鞭之士, 吾亦 非

慎。人之事爲多矣,能察知所慎,善 「子之所慎,齋、戰、疾。」三者,夫子所重 觀

樂於貧賤,義不可去也

人矣。

作「三月」,則於義不可。 爲二也。「不圖爲樂之至於斯」,歎其美也 而聞,忘味之美也。「三月」,乃「音」字誤分 「子在齊聞《韶》,三月不知肉味。」當食

者,讓國而 「夫子爲衛君乎?」問與輒否乎。二人 逃,諫伐而餓,終無怨悔,夫子以

聖

爲賢,故知其不與輒也。

疏食飲水也。不義而富貴,視之輕如浮雲也。水,不能改其樂,故云「樂亦在其中矣」,非樂矣。不義而富且貴,於我如浮雲。」雖疏食飲矣。不義而富且貴,於我如浮雲。」雖疏食飲

「大過」,皆謙辭。「大過」,皆謙辭。「大過」,皆謙辭。四人有作,則《易》道明矣。云「學」,云明。聖人有作,則《易》道,無大過矣。」此未贊《易》時言也。更加我數無大過矣。」此未贊《易》時言也。更加我數

葉公不知仲尼,故問於子路。子路以其

將至而不知,好學之篤耳。聖人未嘗自居於至云爾。」發憤至於忘食,自樂能忘其憂,老其爲人也,發憤忘食,樂以忘憂,不知老之將不能知聖人也,故不對。「子曰:女奚不曰,

也、謂汲汲也。也。」亦自謂好學也、所以勸人學也。敏,速也。」亦自謂好學也,所以勸人學也。敏,速「我非生而知之者,好古,敏以求之者

聖也,惟自謂好學耳。

悖亂、鬼神之事,皆不以語人也。 「子不語:怪、力、亂、神。」怪異、勇力、

人爲能安命。 人莫不知有命也,臨事而不懼者鮮矣。惟聖人莫不知有命也,臨事而不懼者鮮矣。惟聖「子曰:天生德於予,桓魋其如予何?」

子不推高,則人不尊,聖賢之分也。二三子子則推而高之。孔子不俯就,則人不親,孟道一也,其教人則異。孔子常俯而就之,孟「子曰:二三子以我爲隱乎?」孔、孟之

不能窺見聖人,故夫子告之以「無隱」也。

事,謂之信。 謂誠。盡心之謂忠。存於中,謂之孚。見於文修行而存忠信也。忠、信,本也。一心之文修行而存忠信也。忠、信,本也。一心之

妄人也,難謂之有常矣。若實無而爲有,以虚而爲盈,處約而爲泰,則善之人也。有常,雖無善,守其常分者也。善之人也。有常,雖無善,守其常分者也。斯可矣。」「善人,吾不得而見之矣,得見君行者,「聖人,吾不得而見之矣,得見君子者,

盡物,不驚衆也。「子釣而不綱,弋不射宿。」聖人之仁,不

在衆人,雖未能知之,若能多聞擇善而從,多 也。」不知而作,妄作也。 而 記識之,亦可次於知之者也。 子曰: 蓋 有 不 知 而 聖人固 作之者,我無 無 不 知也 是

復自云有過者,蓋巫馬期約以復告也。禮」答司敗之問,而以爲黨,在所不答也。而何,陳司敗問:昭公知禮乎?」夫子以「知矣。」爲仁由己,欲之則至,未有力不足者也。「子曰:仁遠乎哉? 我欲仁,斯仁至

皆欲勝人,實行則未之見也。「子曰:文莫吾猶人也。」常人於文飭則

「子曰:若聖與仁,則吾豈敢?」夫子謙

子不能學耳。」
聖人之道遠,而誨人不倦,故歎曰:「正唯弟不倦,不厭不倦,非己有不能也。公西華見自謂不敢當仁聖,然行之而不厭,以誨人而

善可遷,故云「丘之禱久矣」。悔過遷善,祈神之祐也。聖人未始有過,無謂有是理乎。子路以古人之誄告。夫禱者,谓不是理乎。子路詩禱。子曰:『有諸?』」

「奢則不孫,儉則固。」奢儉皆失禮也,而

故舒泰蕩蕩然。小人役於物,故多憂戚。「君子坦蕩蕩,小人長戚戚。」君子循理,

盛也。善哉! 門人之能觀聖人也。「子温而厲,威而不猛,恭而安。」德容之

泰 伯

「泰伯其可謂至德也已矣。三以天下

讓也,文身,三讓也。而聖人謂之至德。不立,一讓也,逃之,二爲天下也。其事深遠,故民不能識而稱之,讓,民無得而稱焉。」泰伯之讓,非謂其弟也,

無禮,則好計,故絞。 多懼,故葸。勇而無禮,則不順,故亂。直而無禮,則

遺,則民化而篤厚。 君子篤於親,則民興而樂仁,故舊不

殁,爲終其事也,故以全歸爲免矣。手。」君子曰終,小人曰死。君子保其身以「曾子有疾,召門弟子曰:啓予足,啓予

間,皆有法則。容貌莊敬,則可以遠暴慢。也,故善。君子所貴者,慎之於身,言動之曰」。鳥畏死,故鳴哀,人將死,而言出於誠曰」。鳥子有疾,孟敬子問之。曾子言曰:「曾子有疾,孟敬子問之。曾子言曰:

事,則有司存焉」,政在修己,身正則官治,若通用,孟子曰:「師死而遂倍之。」「籩豆之鄙倍。鄙謂偏僻,倍謂違咈義理。倍與背字颜色正,則自知其信。辭氣之出,不使至於

「曾子曰:以能問於不能。」顏子能無

事物器用之細,則有司存焉。

我矣。

「曾子曰:可以託六尺之孤。」節操如

是,可謂君子矣。

遠。」弘大剛毅,而後能勝重任而遠到。「曾子曰:士不可以不弘毅,任重而道

立其身也。安之而和樂,德之成也。學,興起於《詩》。禮者,人之模範,守禮所以發於人情,止於禮義,言近而易知,故人之發於人情,止於禮義,言近而易知,故人之

「子曰:好勇疾貧,亂也。人而不仁,疾民可使之由是道,不能使之皆知也。

無所容,皆必爲亂也。 之已甚,亂也。」好勇而不安其分,與不仁而

也。雖才美奚爲? 才美謂威儀技藝。其餘不足觀也已。」居貴富而驕吝,無德之甚其餘不足觀也已。」居貴富而驕吝,無德之甚,

可耻而不處,特立者能之。馬,恥也。」君子處身如是。知無道而富貴爲邦有道,貧且賤焉,恥也。邦無道,富且貴人,亂邦不居。天下有道則見,無道則隱。「子曰:篤信好學,守死善道,危邦不

也。哀公之世,則摯適齊矣。
世、三師摯之始,必定公始,仲尼自衛反魯時、一、師摯之始,《關雎》之亂,洋洋乎盈耳任其事也。若君大夫問而告者,則有矣。

信,吾不知之矣。」狂則必直,侗則必愿,悾悾「子曰:狂而不直,侗而不愿,悾悾而不

不可得而知也,謂非常理也。則必信,自當然也。而有不然者,僞妄之甚,

天下,而己不與求。巍巍,其德之高也。「巍巍乎,舜、禹之有天下也。」舜、禹得

則焕然至盛。也。其成功可見者,則巍巍崇高,其文章,也。其成功可見者,則巍巍崇高,其文章,天同也。蕩蕩,其德之廣大不可得而名言天同也。蕩蕩,其德之廣君也。」巍巍崇高,其大與

焉,惟 唐、 虞之際方之,周 舜有臣 九 人耳。 五人,而武王有亂臣十人。 才之難 爲盛 得 也。 如 此。 然 又有婦 婦 人,邑 以

「三分天下有其二」,而尚服事於殷,可

姜也。

「子曰:禹,吾無間然矣。謂至德也。

復有加矣。再言「無間」,稱美之深也。「子曰:禹,吾無間然矣。」禹德之至,不

미

子罕

命之理微,仁之道大,皆所罕言也。「子罕言利,與命,與仁。」計利則害義,

乎? 門人曰:欲使我何所執? 於時,蓋其不知聖人也。 達巷黨人大夫子之博學,而怪 成名。」常人之學,多以一長 「達巷黨人曰:大哉孔子,博學 吾執: 御矣。」御、藝之最下者。 故夫子聞之,而 「執御乎? 丽 不以 得稱 一善得 成 而無所 名 執射 也。 名

也。 害於義則不可從。 上,泰也,泰謂 下。」麻冕用 拜下,禮也,今拜乎上,泰也,雖違衆,吾從 君子處世 「子曰:麻冕,禮也,今也純儉,吾從衆。 純 一,事之無害於義者,從俗可也, 簡慢。 儉 而 無 事 害,從衆 君 不 미 泰 可 也 也 寧 拜 違 乎

程氏經說卷之六程氏經說卷之六字時代本,伊川先生作《論語解》,按時氏本,伊川先生作《論語解》,

程氏經説卷第七

孟

子

解

程氏經說卷之七 也。故今亦不複載,因存其目云。 則皆後人纂集《遺書》、《外書》之有解者 思録》及時氏本無之,校之閣本,又止載 十四卷,《大全集》止載一卷。又按:《近 「盡信書不如無書」一章。及反覆通考, 按:晁德昭《讀書志》,程氏《孟子解》

程氏經説卷之八

善與不善,莫不知之。

他人雖

一明,有?

所不

中庸解

爲法於後,不可不修。 爲法於後,不可不修。 爲法於後,不可不修。 爲法於後,不可不修。 爲法於後,不可不修。 爲法於後,不可不修。 爲法於後,不可不修。 爲法於後,不可不修。

立,化育亦以此行。

爲己,故不欺其心。人心至靈,一萌于思,飲食居處之不可去,可去皆外物也。誠以此章明道之要,不可不誠。道之在我,猶道也者,不須與離也,止故君子必慎其獨也。

喜怒哀樂之未發謂之中,止萬物育焉。 與也。 也。 是而 心。 爲甚」,所取準則以爲中者,本心而已。 地之中,極吾和以盡天地之和,天地以 非和不行。 此章明中和及言其効。情之未發,乃其本 本心元無過與不及,所謂「物皆然,心 達道, 衆所出人之道。 出,無有不合,故謂之和。 故慎其獨者,知爲己而已。 所出所由,未 嘗離 極吾中以 非中不立, 此大本根 盡 由 此

人莫不中庸,善能久而已。久則爲賢人,猶冬飲湯、夏飲水而已之謂。「無忌憚」,以無所取則也,不中不常,妄行而已。以無所取則也,不中不常,妄行而已。中庸之用。時中者,當其可而已,

不息則爲聖人。

矣夫! 子曰: 道之不行也,我知之矣。止道其不行

行之道 行; 習矣不察,是皆飲食而 此章言失中之害。 望道之行 無以異於衆,是不明之因 而 不 必可常行,然後道 適 也。 用, ,難矣夫 不及,則卑陋 行之過,不 必知所 不知味者。 明。 ·與 也。 不 衆 以然,然 足爲,是取 知之過 共, 行之不著, 不及,則 如此而 無無 後 徵 道 不

子曰 隱惡 所 猶 與不 樂取 此 以 持 : 舜其大知也歟! 止其斯以爲舜乎! 章言舜所以 爲舜 權 及 諸 而 衡 也。 揚善、皆樂取諸人者也。 人以 ,樂取諸人,用諸民,皆以能執 面 稱 爲善而 執其兩端, 用中。 物 輕重,皆得其平。 己。 舜之知 乃所以 好問 所以爲大者, 而 用 好 其 兩端 察邇 故舜之 時 過 中, 言, 兩

端而不失中也。

子曰:人皆曰予知,止則拳拳服膺而弗失

之矣。

久於中庸,惟聖者能之。 能,一節之廉,一朝之勇,有志者皆能之, 此章言中庸之難能。均,平治也。一事之子曰:天下國家可均也,止中庸不可能也。

子路問强,止至死不變,强哉矯。

及强,然犯而不校,未害爲君子。北方任北方之强,過强者也。南方,中國也,雖不此章言强之中。南方之强,不及强者也,

者也。塞,未通也。不變未達之所守,所强。自「和而不流」以下,皆君子自矯其强力,故止爲强者,能矯以就中,乃得君子之

謂

富貴不能淫也

悔,聖人之事也。惟君子依乎中庸,自信不之不及者也。惟君子依乎中庸,自信不行之過者也。半塗而廢,當行而不行,行此章言行之中。素隱行怪,未當行而行,

君子之道費而隱,止及其至也,察乎天地。 程子之道費而隱,止及其至也,察乎天地。 是一次,亦有所不能,故人猶有憾,况聖人 是一次,亦有所不能,故人猶有憾,况聖人 是一次,亦有所不能,故人猶有憾,况聖人 是一次,亦有所不能,故人猶有憾,况聖人 是一次,亦有所不能,故人猶有憾,况聖人 是一次,亦有所不能,故人猶有憾,况聖人 是一次,亦有所不能,故人猶有憾,况里人 是一次,亦有所不能,故人猶有憾,况里人 是一次,亦有所不能,故人猶有憾,况里人

> 能,至察乎天地,則常道盡矣。 思不肖之所能,則至道備矣。自夫婦之 思不肖之所能,則至道備矣。自夫婦之 天下莫能破。上至乎天地所不能,下至於 我不肖之夫婦所常行,語小者也。愚

子曰:道不遠人,止君子胡不慥慥爾! 言治人治己之常道。苟非其人,道不虚言治人治己之常道。苟非其人,道不虚是爲外物。一人之身,而具有天地之道,是爲外物。一人之身,而具有天地之道,之差。故君子之治人,治其不及人者使及人而已。將欲治人,必先治己,故以忠恕自治。責子之孝,而自知乎未能事父,責自治。責子之孝,而自知乎未能事父,責育,是乃治己之務。

[「]故」,陳刻本、涂刻本作「古」。

命,自邇自卑,皆安土順命之道。 不援上,不陵下,不怨天,不尤人,居易俟此章言安土順命,乃所以守常。素其位,君子素其位而行,止子曰:父母其順矣乎!

能

焉

揜如此夫!子曰:鬼神之爲德,其盛矣乎! 止誠之不可

誠 然體物弗遺,此之謂顯。不亡不息, 求,而物物皆體。 所 知來,知以藏往。 此章論誠之本。 矣。 屈者不亡,所伸者 因感必見,此之謂不可揜。 惟誠 弗聞 往者屈 無 所以能中庸。 弗見,可謂微矣。 息。 也,來者伸也。 雖 無 形聲可 神以 可謂

子曰:舜其大孝也與! 止故大德者必

得,非大德其孰能致之? 故夫婦之不肖,流澤之遠,始可盡其孝。故禄位名壽之皆中庸之行,孝弟而已。如舜之德位皆極,

可以能焉,及其至也,雖聖人亦有所不

子曰:無憂者,其惟文王乎! 止治國其如示

諸掌乎

達孝。 士庶 之孝,能不失顯名,而尊爲天子,周公則 此章亦言庸行本於孝。文、武、周公皆盡 以述文王事親之事也。 祖廟,所以繼文王事親之志,序爵序事所 達孝於天下,是皆盡孝者也。 所致,猶舜之德爲聖人,尊爲天子, 孝者也,所以父作子述而無憂者。 蓋善繼文王之志,善述文王之事。 人,繼志述事,上達乎祖,此之謂 追王之禮,下達於 武王、周 故修其 文王之 武 Ŧ

此章言爲政,蓋本於庸行也。盡哀公問政,止思知人不可以不知天。

行,至於以道以仁,行之至也。

思修身,至

修身之

於事親,知人知天,知之至也。

天下之達道五,止則知所以治天下國家矣。 有 人下而不辭。 加 及,輕困知勉行爲不能有成,此道之所以 之,體之,勉之,然後可行。 者,天下古今之所共行。 不明不行,中庸之所以難久也。 爲中庸。 勉行,未始有異也。 故君子論其所至,則生知與困知,安行與 塗,則不能不異,所至之域,則不可不同 知之則一。行之有三,成功則一。 所入之 勉之,不一於誠,則有時而息。求之有三, 下古今之所共有。雖有共行之道,必知 天下古今之所共由 也。 不求,自私者以天下非吾事,懦者甘爲 故好學非 若乃企生知安行之資爲不可 有是三者,欲修之身,未之 知 ,謂之達道。 ,然足以破愚,力行 既不有異,是乃所 所謂達德者,天 雖知之,體之, 愚者 所謂達道 自 幾 以

> 準,久而推之萬世而 知是三者,未有不能修身者也。天下之 家。皆出乎此者何? 以治人,知所以治 也。舉斯心以加諸彼,遠而推之四海 理,一而已。小以成小,大以成大,無異 仁,然足以忘私,知耻非勇,然足以起懦。 人而知所以治天 準。 中庸而 故一修身而 已。 下 知 或 所 而

經,所以行之者一也。凡爲天下國家有九經,止凡爲天下國家有九經,止凡爲天下國家有九

臣、體群臣。由朝廷以及其國,故子庶民,故次之以親親。由親親以及朝廷,故敬大應、,而是之本。必親友,然後修身之道德懷,無一物不在所撫,而刑有不與焉。德懷,無一物不在所撫,而刑有不與焉。。以此之以親親。由親親以及朝廷,故敬之此尊賢。道之所進,為後修身之道。以此章言庸行,至于九經,盡矣。自知天至此章言庸行,至于九經,盡矣。自知天至

賜 厚往 之。 禄, 使,如 者 諸 則人 位 庶 來 使,不親 以 富 瞻 讒、色、貨,皆害德。 不 侯。 厚 善,此所以諸父兄弟相勸 仰 出 民 百 士無有不勸者也。 送往迎來,嘉善而矜不能者,柔 猶 而 薄來,不爲 I 所欲與之聚之,所惡 ,尊賢則不爲異端所惑。 注 미 所以取法 納 吾子 此 説。 小 不 貢 九 由 爲賢。 事 敬, 此 薄 經之序。 其 也。 注 國 不 歸 視臣視民之别。 ,非其人 云:大臣 以 尊之欲其貴,愛之欲其 己者,厚 待 敬 以 及天 舍是三者,惟德之貴 之以 則 貫九者誠 視群臣猶 遠人惟可以柔 民 ,黜之可也。 下,故 皆有屬 忠信,養之以 勿 也。 眩,不知 而親。 施 爾, 大臣 也 柔 吾四 禮義 官, 故故 説 遠 官盛 而 所從。 道 人 謂 體 人 其下 道 所 不 在其 由 也 厚 任 所 燕 馭 任 青 督 視 懷

凡事豫則立,止道前定則不窮。

前定, 成。 幾何 廢。 豫 子之集大成。 何? 謂 不窮? 事前定,如 如 有諸 如顔淵 成己素定 誠有之,何往而 己之謂 言前定,如宰我、子貢以説 、仲弓以 此章論在事之誠。 冉 也。 信。 有、季路 徳成。 成 不可? 無 而 信 以政 素 不 道前 定, 立 苟無其實 事 定, , 有 非 成 如 信 誠 辭 FL 不 行 而

在下位不獲乎上,止不誠乎身矣。

者,能明其 在吾身誠有是善 而 我者,以 自治民而造約,必至於明善而後已。 知 身之誠 所 從 何 來,則 爲仁,以 善而已。 在我 ,故所以能誠其身。 何 如明仁 者,非 爲 義。 徒説 義,則知 能 明 之 其 而 情 此 凡 明善 狀 已。 在

誠者天之道也,止雖柔必强。論在身之誠。

誠者,理之實然,致一而不可易者也。

天

誠

天道 以至之也。至之,非人一己百,人十己千, 至 誠 中 即 雖 F 不足以化氣質。 德將去。 天。 前聖後聖,若合符節 道 而 ,所執必固。 而復之,故明有未窮,於善必擇 萬古,人心物理,皆所 己。 而 也 不迫。 由 學問 聖人誠 天道無勉無思,然其中其得, 仁 義 思辨,所 誠之者,以人求天者也, 行 善不擇,道不精; 一於天,天即聖人,聖人 何思勉之 是乃 以求之也,行,所 同 然, 有? 所 有 謂 執 ,誠有未 誠 故從 無 不 誠 固 思 容 自 即

自 天 假 者 誠 既已至之,則天下之理,如開目 思慮 下 ,由學以復之。 之性者,生之所固有以得之。 明謂之性,止明則誠矣。 之 丽 理 後知,此之謂 ,則天下之理皆得, 理之實然者,至簡 誠則明。 卒亦至于簡 睹 致知以 萬象,不 謂之教 至易。 窮

易實然之地,而行其所無事,此之謂明

唯天下至誠,爲能盡其性,止則可則誠。

以

與天

地

參矣。

乎是。 寡,故 爲昏 禀有多寡,故分而爲强柔。 皆吾性也。人受天地之中,其生也,具有 物之性與人異者幾希,惟 之性皆然,故能 然,雖聖愚 天地之德,柔强昏明之質雖異,其心之所 至于實理之極,則吾生之所 不若人之明; 同者皆然。 然人有 明 爲强 吾生所有,既一於理,則理之所有 蔽有 柔, 有 特蔽有淺深,故别而爲 近 所 物 開 偏 禀 盡 不 塞,故 之性者 而 有 異。 人之性。 不 偏 Œ 盡己之性 正,故爲 爲 「, 物 ,故才不若人 塞而 人物。 至於理之所 蔽有淺深, 固 有 有 不開,故 近 人物。 則 者,不越 禀有 人 昏 八之性 天 明 之 多 下 同 故 知 故

故行其 天 地之化育。天地之化育,猶有所不及,必 也 不盡,則物之性,未有不能盡 (地並立爲三才,此之謂天地參。 贊之 一,物也,莫不盡其性,則天地之化幾矣 亦 係 無 而 於此。 事,順以養之而已,是所謂贊天 後備,則天地非 於人之性 一,開 人不立,故人 也。 塞偏正 己也 無 與 所

其次致曲,止惟天下至誠爲能化。 不可 矣。 存所發,在偏曲處必多,此謂致曲。雖 盡 未有不見乎文章。 曲 具 變,其文蔚也,大人虎變,其文炳也。 與 幾者 無以 如如 然而禀於天,不能 有天地之德,自當偏覆包含,無 幾。 專壹於是,未 加 ,動之微 一則必 故知至,未有不動者也。 能知類通達,見其所不 也。 致 曲至於成章,無 有不成,德之成矣, 知 無少偏 至 Щ 不能至之, 曲,則其 君子 以 所 加 日 所 不

誠者自成也,止故時措之宜也。

至誠之道,可以前 明,非特前 誠一於理,無所間雜,則天地人物,古今後 也,先即後也,未嘗分别隔礙,自將達乎神 則有彼此先後之别。既無方所,彼即我 有思慮,如 世,融徹 理,不知 變者也。 有 心 乎動, 洞 其所以變,故惟 變者,復之初。 達 知而已。 動 有萌焉,無不前知。 而 一體 知,止故至誠如神。 不息,雖文有大小 而 己。 至誠 復于故,則一於 興亡之兆,今之 爲 蓋 能 未 有方所, 化。 有不

力 ? 乎? 道虚 物之終也。 以致之,物之始也, 誠 不 行。 爲己,則 實 既曰道矣,非己所自行,將 有是理,乃有是物。 既 皆無是 Ħ 誠 誠 爲外物,道 矣,苟不 有所從亡, 理,雖有物 自 成 有 不 自 就 有以喪之, 所從來,有 象 如 如 道 接於耳 誰 一,而 與 何 致 其

者也。 乎 收 用, 故能 焉。 不 故 理,故實有 性命之德,自合乎内外,故具仁與知。 無 目 自成也」。 道 ? 種 也。 可 實 耳耳 ,則斗非 無物,誠一以貫之。 自道也」。 實有是用 以 有 時 性生内 而 是所謂「 目 造化發育,皆在 是 望其收,雖荑稗且不可得,况禾麥 種麥於此,則麥之實可收也。 簸揚,則箕非箕矣。 吾信乎此,則吾德實矣,故曰「誠 措之宜也。 猶 事。 吾用乎此,則吾道行矣,故 斗矣。 不 是 ,外之别,故與天地不 可信,謂之非物 ,●故實有是心,實有是心, 夫誠者,實而 物;實有是 誠者物之終始,不誠無 是皆原始要終 種禾於此,則禾之實可 理義者,人心之所同 合大德而施化育, 其間 斗不可以 物,故實有 已矣。 ,故有内外 m 可也。 言也。 相 實有是 似 挹 如未 天 物 箕 大 酒 是 伙 若 者 生 日

> 其間 也。 歸於 哀樂未發之中,發而皆中節者也 措之宜者,凡以反乎性之德,而得 德 物,己自己,與天地不相似矣。 所梏,故有内外生焉。 無間者也。夫天大無外,造化發育,皆在 乃謂仁知之具也。性之所固有,合内外而 下同之而已。 成也,道雖自道也,非有我之得私也,與天 可見之成 惻怛之誠意 ,則安有物我之異,内外之别 虚 故君子必明乎善,知至意誠矣。 自無 加 己。 功。 内外之别。 乃能竭不倦之强力,然後 故思成 是則 苟 不 如 誠之爲貴也。 己,必思所 是,雖博 内 人有 外一 是 生,則 (形, 而 聞 哉? 反乎性之 以 多 誠 乎 見,舉 成物, 喜怒 物 爲 雖 既 故 自 有 肼 自 形 有

用 原作「理」,據涂刻本改。

0

故

至

誠

無

息,止

故

曰: 苟不至德,至

道

一八

積 是用 悠, 其 蓋 道 也 如 則 矣,又安所效驗於外哉? 所以久者,不 則 動 自 此 衆 是 行 能 傳之百世,亦猶是 有 爾 實理不二,則 章言至約之 則其 亦不越此。 久長 卑。 也。 乃乾 深 無 至於悠久、博厚 所以覆物、載物、成物者,其能 時 厚 間 而 積 也。 其, 如有所 有 息矣。 必 坤之所 如 故 多。 息 凡物 積不得 理,惟 是 至 窮盡 其 而 廣 窮,則其用必息。 久, 誠 博者 己。 用之不窮者 以 體 《博,其 無 實 至 開闔。 、高明, 不明,是皆積之之效 堪任 無 也。 息,非 理,得之有之,其勢 誠 能 不 雜。 、勢不 能 而 積 不息至於有徵 能 也 己。 其體 衆 堪任 如 使 但 傳 得 狹, 其 之也 積 使之非實, 徴,驗 百 盡 不 之而 無 世 厚者 故誠之 才堪 廢 也 天 高 一,機 雜 而 地之 敝 也。 所 能 自 有 不 任 必 則

> 故君子 己, 之所 行。 所以 無疆 德 可 命則異,其所以 人之爲聖人,不已其德 功能哉? 微,不同乎衆物,又烏 者,止於至誠 爾,是乃 以 可 以 章 尊德: 積之有已,則 任 故 以 行之者 配 圃 所 守至道。 己。 必 天者,如 天地 非 以 性 有 變、 天之爲天,不 用 人 面 德 如 之道 而已,天地之所以神者 而 道 m 所 使 也。 此 不已則 故道不 後 問 以 行,然後可名之道 其 天 也。 而 有 學,止敦厚以崇 成者,其 積 己。 地 小 有 不 而 爲 天 其 德 虚行 ·已其 博厚 多。 物 地 禮 0 己。 勢 可 儀 所 自 功 故聖人之道 不 以 ,必待人而 高 命 威儀,道 其 昭 以 也 貮, 然 任大 明 昭 生物 爲天人德 而 禮 悠久 則 己。 撮 不 能 道 積 必 得 土 非 不 也 後 至 測 不 力

德 至 性 道 廣 大 惟 高 至 德 明 皆 所 至德; 以 凝 至道 問學, 也 精微 雖 有 中 問 庸

以行之,則同污合俗矣。雖知所未知,不 學,不尊吾自德之性 德與道而言,然後可以有成矣。 志,不敦厚以持之,則其行不久。 温 不足以自信矣。 雖 有精微之理,不致廣大以 故以存之,則 雖有中庸之道,不極高 德 不 ,則問學失其道 可積;雖有崇禮之 自 求 則 此皆合 精 矣。 明 微

之也。

如此

則寡過矣。

藏而不知行。國有道,不知言之足興,知居上不驕,知上而不知下,爲下不倍,知是故居上不驕,止其此之謂歟!

子曰 從夏、殷之禮,所謂「居今世,反古之道」。 禮樂,所謂「賤 樂,所謂「愚 一者有 德爲愚,無位爲賤。 愚而好自用,止其寡過矣乎! 焉, 而 取裁之道也。 而 好 (自用 好自專」。 0 有位無德,而作 有 故王天下者, 德無 生周之世,而 **位**,而 作 禮

> 有所不與,故國無異政,家不殊俗,蓋有以 俗 有三重焉:議禮所以制行,故行 制度所以 ,故書必同文。惟王天下者行之**,**諸 爲法,故 車 必 同軌; 考文所 必 同 以 倫 侯 合

仲尼祖述堯、舜,止此天地之所以爲大也。 所徵。 下,其化循環而 博厚,足以 之大,如是之備,故譬言天地之大也。 之,天時者道之所由出也。稱文、武者,以 祖述堯、舜,善有所尊,憲章文、武,善有 用照鑒而不已,達畫 法,襲之言服也。 政事言之,水土者人之所有事也。 土,如憲章文、武。蓋稱堯、舜者,以道言 嘉善而矜不能,並 上律天時,如祖述堯、舜。 任天 無窮,達消息之理也,其 下;其高 此言仲尼之中庸,如是 夜之道 育不相害之理 明,足以冒 也。尊賢容 下襲 律之言 也 其 水

德所以 所 悖之義 貴 貴 以 尊 Ш 敦化也 也。 賢 流 ,賞功罰罪,各當其 , 洋洋 禮 儀 乎發育,峻極于天,此 三百,威儀三千,此 理,並行 小 不 大 德 相

惟 德,非 服,至於血氣之類,莫不尊親,惟天德爲 此 天下至聖,爲能聰明睿知,止故曰 能 充盛,至深至大,出之以時,人莫不敬信悦 配 章言聖人成德之用,其效如 萬物皆備,足以應物 而 己, 此。 一配天。 其 停 聖人 蓄 成

能知之!惟天下至誠,爲能經綸天下之大經,止其孰惟

歟 陽,合散,屈伸,其化育歟! 倚,不係 非 大經,庸也。 經也。 莫 非 累 親親,長長,貴貴,尊賢,其大 本也。 其 大本,中 大本 致公平,極廣 歟! 也。 化育,化也。 莫非 誠者,實有 化 大,不 也。 偏 經 理 陰 莫

> 矣。 矣。 德 已。卒所以浩浩者,天而 深則大。 矣,天德全矣。 之至矣。 者,是謂化育。 尊其所自出,則立之至矣。理之所不得已 者,是謂庸。 是 不倚於物而已。 也。 ,不足以知之。 由不倚,然後積而至於至厚,厚則深, 理之所自出而不可易者,是謂之中。 反 至誠 厚也,深也,大也,不至於天則不 圃 求之, 體其所固有之義,則經綸 夫天德無 而至於此,則 明其所不得已之機,則 有倚於物,則覆物也有數 理之所 所不覆者,不 己。 固 至誠之事 有 故非達天 而 不 可 越 盡 知

聲無臭至矣。《詩》曰:「衣錦尚絅。」惡其文之著也,止無

至於「不大聲色」,自「不大聲色」至於「無「不動而敬,不言而信」,自「不動」「不言」自此至終篇,言德成反本。自「内省」至於

焉。 之本,不越是矣。 之精微,至隱至妙,無聲無臭,然其理明 來,莫非心之所出,其「知風之自」歟! 中有本也,「的然而日亡」,暴於外而 聲無臭」,聲臭微矣,有物而不可見,猶 本之要,吾心誠 暴著,若懸日月,其「知微之顯」歟! 流之大小,則至於本源之淺深,其「知遠之 微,非聲色臭味之可得,此不可得而 察,日用而不知,非失之也,不自知其 深厚悠遠 無之,則 繼之也。故君子貴乎反本。君子之道, 而 惟循本以趣之,是乃人德之要。推末 故君子之學,將以求其本心。本心 理」,本我心之所固有也。 誠一於天可 以見聞之廣,動作之利,推所 而 有本,故「淡 然 如此則入德其幾矣。 而 E, 知。 而 闇 心 不厭,簡 誠然之, 豈係 然 習矣而 而 日 而文, 凡 致 在 無 章 反 達 心 從 力 我 實 E 德 不

温

以

可以能 哉 ? 間,得其實理,斯盡之矣。 故毛輶有倫。 德之端,夫婦之愚,可以與知,其不肖也, 若日月有明,容光必照,何聲色之用乎? 「篤恭而天下平」,正己 下,正己斯可矣。正己,則物孰與不正? 故不待懲。 愛之則樂從,故不待勸,敬之則 人知勸沮。其盛德之盛,足以使人愛敬。 其中有本,不待言動,而 乎人之見與不見? 四時行焉,百物生焉。不必賞罰,而 行。 其輕而易舉,豈 其斯之謂歟! 如誠 一於天,則無聲無臭之 惟「内省不疚」可矣。 一而已。 人敬信。 特毛之比乎? 君子之於天 自明之德, 不敢慢, 天何言

之、《中庸》,明道不及爲書,伊川雖言已 成《中庸》之書,自以不滿其意,已火之 卷,伊川《大全集》亦 按晁昭 德《讀書志》,有明 載 此卷。 道《中 庸解 切 嘗 考

講堂之初本、改本無疑矣。 用仍其舊,矣。 反復此解,其即朱子所辨藍田吕氏

程氏經說卷之八

以備參考。

1146

粹 言 序

《論語》爲僭,是豈文中子意哉? 余於是書, 苟非其人,差毫釐而千里謬矣。余始見之, 龜 IE 也,豈後學所能形容? 夫子之道,日月其明,泰山其 亦慮後世有以議夫子也,故輒記其始末。若 也。昔文中子所得粹矣、《中説》類多格言, 卷次不分,編類不别,因離爲十篇,篇標以 諸子高子,其家傳,以爲是書成於龜山 廼門弟子所録。 目,欲其統而要,非求効夫《語》、《孟》之書 叔。 Ш ,河南之門高弟也,必得夫心傳之妙。 河南夫子書,變語録而文之者也。 夫子之兄,諱某,謚明道先生,亦時有 後之病《中説》者,謂其 夫子姓程,諱某,字 高,江海其 先生。 余得 大 擬

南軒張栻

粹言序

南軒張栻序。 乾道丙戌,正月十有八日,

上卷

下卷

論事篇

論政篇

論書篇

論學篇

天地篇

君臣篇

也,惟理爲實。」或曰:「莫大於太虚。」曰

「有形則有小大,太虚何小大之可言?」

子曰:「有者不可謂之無。猶人知識聞

宋 龜 軒張 山楊 時 訂定

論 道 篇

親,在君臣則敬。 子曰:道外無物,物外無道。 有適有莫,於道已爲有間, 在父子則

又况夫毁髮而棄人倫者乎?

實理也。」

德者厭之,不知德者惑之,何也? 由涉道不 子曰:立言,所以明道也。言之,而知

深、素無涵蓄爾。

之差,則失其本旨矣。 子曰:傳道爲難,續之亦不易。有一字

惟 太虚爲虚」。子曰:「無非 理

杜編次 見,歷數十年之後,一旦念之,昭昭然於心, 謂之無者非也,謂之有者,果安在哉?」

或問:「誠者,專意之謂乎?」子曰:

心,實有是心,故實有是事。故曰:誠者, 是物,故實有是用,實有是用,故實有是 曰:「信哉! 「誠者,實理也,專意何足以盡之?」呂大臨 實有是理,故實有是物,實有

也; 也。以天人爲二,非道也。子雲謂通天地 甫之學也。道一也,未有盡人而不盡天者 道謂之聖。」子曰:「言乎一事,必分爲二,介 不通人曰伎,亦猶是也。 坤,地道也。論其體,則天尊地卑,其道 或問:「介甫有言,盡人道謂之仁,盡天 或曰:乾,天道 而

二程粹言卷之一

通天文地理,雖不能之,何害爲儒?」則無二也。豈有通天地而不通人? 如止云

謂之性,其用無窮則謂之神,一而已矣。其體則謂之易,其理則謂之道,其命在人則子曰:「上天之載,無聲無臭」之可聞,

小 也,其害義則不善也,其和義則非不善也 人也 子 子 Ė 丁,其 Ħ. 助 誠則無不 陰之道 陽 成 物 非 敬, 則君子 必 小人也,其 未至於誠,則敬 也。 利 害 非 不 陽 然 善 則

則 IE 也 事 子 理 日 , 7 :: 臨 人 誠無不動者: 修身則身正,治事 則 人化, 無往 而 不 得, 志之

後

誠

冕 漓 謂 服 不 也 ?: 子 俎 或問: 同 矣。 豆,未必可稱也。 曰:「是 「子所定昏禮 今人之壽夭貌象,與古亦異,而 時也。 ,有壻往謝之儀 聖人之主化,猶禹 以今視 古 氣之淳 何

> 隨時之義,亦因有此焉。」 之治水耳,宜順之而不逆,宜遵之而不違

征伐。 食; 行,尊卑有序,非 峻宇 浮華,而質朴之爲貴爾 相 敬,必有承接之儀; 道 者,人欲也。 或曰:「然則未可 也。 須 淫酷殘忍,本於刑罰,窮 子曰: 而 雕 父子主恩,必 先王制其本者,天理 不 墙,本於宫室,酒 可 缺 天下之害,皆以 損人欲以復天理,聖人之教也。 也。 物采則無別。 盡去乎?」曰:「本末,一 及夫末 禮遜 有嚴 有 勝 順 池 也 遠 節,非威 而 之禮 肉 兵 本 本喪,則寧遠 後 林 黷 文之與質 而 王流 , 武,本於 本 末 君臣 儀 勝 於 則 於末 也 不 主 飲

對,生生之本也。有上則有下,有此則有彼,子曰:質必有文,自然之理也。理必有

有質則有文。一不獨立,二必爲文。非知道

者,孰能識之?

子曰:佛者之學,若有止則有用。

子曰: 觀生理可以知道。

子曰:至誠感通之道,惟知道者識之。

子曰:仁道難名,惟公近之,非指公爲

仁也。

無,尚何有哉? 必曰是者爲真,非者爲假,真,則是假爾;既無假,則是真矣。 真假皆韓侍郎曰:「道無真假。」子曰:「既無

不亦顯然而易明乎?」

子曰: 義利云者,公與私之異也。較計

之心一萌,斯爲利矣。

子曰:公者仁之理,恕者仁之施,愛者子曰:便儇佼厲之人,去道遠而。

仁之用。

子厚曰:「誠一物也。」

事爲浮氣,其能久乎? 子曰:苟非至誠,雖建功立業,亦出於

或問:「學者多流於釋氏之説,何也?」

之? 子曰 之爲大中至正,則釋氏不能以説惑之矣。」 知醴之爲甘 知玉之爲 不不 致 ,則人不能以 知 寶,則人不能 也。 知之既 蘖亂之矣; 至,孰 以 石亂之矣; 得 知聖人 丽 移

物自付物,各得其所,而我無與也。」乎?」子曰:「定則忘物而無所爲也。止則或謂:「佛氏所謂定,豈聖人所謂止

不亨,事物不相遇,則功用不成。遇之道,不相遇,則政治不興,聖賢不相遇,則道德子曰:天地不相遇,則萬物不生,君臣

身,在天地之間,而與天地 子曰:至公無私,大同 佛者厭苦根塵 子,是 則 自 無 無我,雖 以異 利 而 己。 也,夫何 眇 然 疑

C,斯可謂誠也已。 子曰:能明善,斯可謂明也已。能守

或問:「孝悌爲仁之本與?」子曰:「行

之仁。」 此, 聖。至於盡人道者,必謂之聖,而 可以通上下而言。 一言一行仁矣,亦可謂之仁,而 或問:「仁與聖何以異?」子曰 聖,名 I其極 也。 不可 亦 有 二、一个, 謂之 人於 미

無序而不和。 子曰:仁者,天下之正理。失正理,則

純熟,其理著矣。」主之?」子曰:「齊莊整敕,其心存焉,涵養主之?」子曰:「無適之謂一。」「何以能見一而可問敬。子曰:「主一之謂敬。」「何謂

子曰: 子曰: 至誠 忠恕猶 事 親 日 中 則 庸 成 不 人子,至誠 可 偏 舉。 事

則

成人臣,無不誠者,故曰

誠者自成也

或問:「中庸可擇乎?」子曰:「既博學 識

之,又審問之,又謹思之,又明辨之,所以 中庸之理而不差忒,奚爲而不擇?」

者,身老則衰。故孔子曰:「吾衰也久矣。」 子曰:存道者,心無老少之異,行道

居之地。

無忠信,則無物。

仁者無所知覺,指知覺爲仁則不可。 子曰:仁者必愛,指愛爲仁則不可。不

見也。 存若亡焉,而不爲物所誘、俗所移者,吾未之 子曰:可欲莫如善,以有諸己爲貴。若

可曰 几 與 有 物物 事 行仁義云耳,何直之有。 所謂直也者,必 海 同 而 而 以敬直 子曰:敬以直内,義以方外,仁也。不 準。 矣,故曰 勿 īĖ 心 内,以義方外。 是也。 敬義立而德不孤,推 敬以直内,義以方外, 謂之敬義者,猶 而放諸

子曰: 守道當 確然而不變。 得正則遠

邪,就非則違是,無兩從之理。

深奥,於何所用其 子謂學者曰:夫道恢然而廣大,淵 力乎? 惟立誠然

後

有

미

然而

理,何幾之能見? 子曰:理素定,則能見幾而作。不明於

信矣。是故四端不言信。」 何不信之有? 若以東爲西,以南爲北,斯不 「有不信,故言有信。譬之四方,其位已定, 或問:「四端不言信,何也?」子曰:

之情也。 種,待陽氣而生乎?」子曰:「陽氣所 用乎?」子曰:「不可。」曰:「然則猶五穀之 所主曰心,名其德曰仁。]曰:「謂仁者心之 子曰:敬則無間斷,文王之純如此。 劉安節問:「仁與心何異?」子曰:「於 心猶種 焉。其生之德,是爲仁也。」 發,猶

子曰: 禮者人之規範,守禮

所以立身

也。安禮而和樂,斯爲盛德矣。

知之,而不處焉,惟特立者能之。 子曰:無道而得富貴,其爲可耻,人皆

言,非形而上者。 子曰:子厚以清虚一大名天道,是以器

精麤之分,通貫言之,蔑不盡者。則遺末。孟子之書,雖所記不主一端,然無子曰:今之語道者,語高則遺卑,語本

不留,疑於速也,然寒暑之變極微,曷嘗切之心,雖得之,必失之。觀天地之化,一息速助長而不中理,反不誠矣。故求道而有迫速助長而不中理,反不誠矣。故求道而有迫子曰:凡志於求道者,可謂誠心矣,欲

子曰:仁則一,不仁則二。子曰:語默猶晝夜爾,死生猶古今爾。

遽

子曰:一德立而百善從之。

子曰:無一亦無三,故曰「三人行則損

一人,一人行則得其友」,是二而已。

子曰:天以生爲道。

或問"「理義何以異?」子曰:「在物爲

理,處物爲義。」

子曰:形而上者,存於洒埽應對之間。

損。順之則吉,逆之則凶。君子隨時所尚,子曰:理有盛衰,有消長,有盈益,有虚理無小大故也。

子曰:理善莫過於中。中則無不正者,所以事天也。

而正未必得中也。

以博愛爲盡仁,則不可。」之謂仁。1愛,情也;仁,性也。仁者固博愛,而體認之,其必有見矣。韓文公曰:『博愛而體認之,其必有見矣。韓文公曰:『博愛或問仁。子曰:「聖賢言仁多矣,會觀

「「維天之命,於穆不已。」忠也。 「天地變化或問。 「何謂忠? 何謂恕?」子曰:

草 木蕃」,恕也。」

庸也。 之不爲,一息之不 也。此道也,常而不可易,故既曰 子曰:不偏之謂 存 中。 非 中 也,以 物 之不該,一 中 中,又 無 偏 故 事 日

者也。」 ·大道不明於天下,莊、列之徒窺測而言之 或問:「商開丘之事,信乎?」子曰

丛 所謂變化神通以駭衆人之耳目者,皆幻也。 其能者何也?」子曰:「西方有幻術焉,凡其 之,常懷欺人之意,何誠之有?」曰:「然 能之,豈在誠乎?」子曰:「彼以邪心 師 所能 或曰:「蹈水火白刃 ,廼其餘緒耳。」 IIII 無 傷,巫 詭 師 道 亦 則 或 爲

然其 而 兼 取 流必害,故不可以一言之中、一事之善 子曰:異端之説,雖 其大體 也。 夫楊、墨亦是堯、舜,而非 小道 必必 有 可 觀 也

> 桀、紂,其是非豈不當乎? 其所以是非之

意,蓋竊吾之似,欲成其説耳。

如此,己則不能然,是己與道二也。 夫有 者不矜於文學之門,啓口容聲,皆至德也 子曰:介甫之言道,以文焉耳矣。 言道 道

已也。 所不可,則曰姑從權,是以權爲變詐之術 子曰:世之學者,未嘗知權之義,於 夫臨事之際,稱輕重 而處之,以合於 而 理

孟子則配道義之氣也。」 曰:「信無在 或問:「信在四端,猶土王四季乎?」子 ,無不在。 在《易》則至理也,在

是亦中 其發故也。」 中, 中有二耶?」子曰:「 或問:「夫子曰有已發之中,有未發之 也。 對中而言之,則 非 謂 也。 之和 發 可 而 也,以 中節,

子 謂子厚曰: 「道者天下之公也 而 義,是之謂權,豈拂經之道哉?

爲,强私之也。」子曰:「彼亦是美事,好而爲之,不知廼所當者欲立私説,何也?」子厚曰:「心不廣也。」

而人情宜之者,義也。子曰:因人情而節文之者,禮也;行之

中 事 言中?」子曰 敬 未發也,謂 是覺,則 則不 自 目 存 物物皆有自然之中,若俟人爲布置,則 以 無 直 可 所見乎?」曰:「雖 或問:「喜怒哀樂未發之時,耳無所聞 ',然昭 内, 汝於静也何如?」對曰:「謂之有物 是 則知而得之矣。」曰: 静而已乎?」子曰:「汝必從 動 矣。」曰:「夫子於喜怒哀樂之 昭 「敬 乎有 而無失,所以中也。 所 知覺 無聞見, 也。」子曰: 「何 而聞 以 見之理 事於 凡 未 「有 不 事 發

間,方無内外。 子曰:或言方有内外,是有間矣。道無

> 時而不中也?」 矣。 過門不入非中矣。居於陋巷,在顔子之時 不入,在禹、稷之世爲中也, 中也,時 蓋以 或問: III 事言之,有時 「何謂 當 過門 時 不人, 中?」子曰 而 中, 則 居 時而居陋巷,則 以道言之,何 : 於陋 「猶之過 巷非 門 中 爲

絕之有?」有當無爾。當有也,何惡之有? 當無也,何無所見,則累與惡皆不得免焉,蓋亦原其當無所見,則累與惡皆不得免焉,蓋亦原其當或問:「外物宜惡諸?」子曰:「於道而

實生,形影之類也。 在也。文遇則奢,實過則儉。奢自文至,儉自本也。文者,華也,末也。理文若二,而一道不也。文者,華也,末也。建者,●實也,

^{) 「}理者禮也文也禮者」,涂刻本作「禮者理也文也問

子曰:昔聖人謂「立人之道曰仁與義」。

唯能尊賢,故賢者在位,能者在職。仁義,盡幼以及人之老幼。「義者宜也,尊賢爲大。」仁者人也,親親爲大。」唯能親親,故自吾老

子曰:視聽言動一於禮,謂之仁。

人之道矣。

子曰:信不足以盡誠,猶愛不足以盡

生、人鬼,一而二、二而一者也。道,則知死矣。盡人之道,則能事鬼矣。死

子曰:

晝夜者,死生之道也。知生之

然不動,故曰「天下之大本也」。曰:「君子而時中也。」喜怒哀樂之未發,寂曰:杜止久速,惟其可,不執於一,故

生之道矣。其致一也。去就之道矣。能盡出處去就之道,則能盡死去就之道,則能盡出處子曰:能盡飲食言語之道,則能盡出處

子曰:凡執守不定者,皆不仁也。子曰:有形皆器也,無形惟道。

子曰:釋氏言定,異乎聖人之言止。子曰 凡執守不定者 皆不仁也

人曰止,隨其所止而止之,止其所也。
苟曰吾之定,不預於物,然物未嘗忘也。聖於有美惡因而美惡之,美惡在物,我無心焉。

之,有堂之中,而自庭觀之,則堂非中矣。 為中,則當外無中乎? 故自室而觀之,有室為中,則當外無中乎? 故自室而觀之,有室為中,則一方無中乎? 以中外之中

合非所以言氣,自其未養言之也。爾,惟集義以生,則氣與義合,無非道也。子曰:集義生氣。方其未養也,氣自氣

義也?」 集矣。」子曰:「内外一事,豈獨事欲合寒矣。」子曰:「内外一事,豈獨事欲合或問:「集義必於行事,非行事則無所

也。 广 者乎?」 乎?」子曰:「敬以涵養也,集義然後爲 日 矣。」又問:「必 「其始,安得不 知敬而不知集義,不幾於兀然無所爲 「敬以 直内,其能不用意乎?」子 有 用意 事 焉 也 者,其 ? 久 而 惟 成焉,意 敬 有 而 事 已

本末間斷,非道也 子曰:佛氏之道,一務上達而無下學,

害,甚於楊、墨 子曰: 楊、墨之害,甚於申、韓,佛氏之

能 以 是揆事物者,長短輕 子曰:《論語 》所載,其 重 較 猶 然 權 自 衡尺度歟 見 矣。 1

子曰 敬則 虚静,而虚 静 非 敬 也。

仁,此爲大。 子曰: 一 不 敬,則私欲萬端生焉。 害

也。 知其皆我,何所不盡! 子曰:仁者以天地萬物爲一體,莫非 不能有諸己,則 我

> 其與天地萬物,豈特相去千萬 而

子曰:仁孝之理,備於《西銘》之言。

者斯須 不 在,是即與仁孝遠矣。

子曰

無不敬者,對越上帝之道也。

子曰: 子曰: 老 順理則無憂。 子 語 道 德 而 雜 權詐, 本

矣。 傳 得權詐之説 道德之意而爲刑名,後世猶或師之。 焉 申、韓、張、蘇皆其流之弊也。 而爲縱横,其失益遠矣,今以 申、韓 末 無 張 舛 原

也。 善遁。 物一理耳。 者,考其歸宿,則異乎聖人也。 含萬象,無 佛氏善侈大其説也。 夫已出諸 或問:「釋氏有事 今即 夫百氏諸子,未有不善道德仁 有 其言而 窮 其口,載之於書矣,遁 盡 也。 究之,則必 事無礙,譬如鏡燈,包 今一言以蔽之曰,萬 此理有諸?」子曰: 佛氏,其 日吾不 爲 辭 將 是 皆

何之?」

然後彼不能亂矣。學者戒之謹之,至於自信,是其喪天真矣。學者戒之謹之,至於自信,也,而秉彝終不可得而去也。耳聞目見,飲也,而秉彝終不可得而去也。耳聞目見,飲也,盡去其秉彝,然後爲道,佛之所謂至教也。盡去其秉彝

情,仁則性也。仁者無偏照,是必愛之。」或問:「愛何以非仁?」子曰:「愛出于

子曰:謙者,治益之道。

而下也。道,太虚也,形而上也。子曰:離陰陽則無道。陰陽,氣也,形

子曰:道無體,而義有方。

知,以先覺覺後覺」,知者知此事也,覺者覺「何必浮屠氏,孟子言之矣。『以先知覺後或問:「釋氏有言下覺,何如?」子曰:

此理也。」

舊迹盡亡,自然而已矣。故曰『動則變,變則也。」子曰:「非也。變,未離其體也。化,則易謂之變,離形頓革謂之化,疑其説之善或問:「變與化何别? 王氏謂因形移

子曰:盡己無歉爲忠,體物無違爲信,化,惟天下至誠爲能化」。」

表裏之義也。

者,孰能識之? 子曰:動静無端,陰陽無始。非知道

其分,故其道平直而易行。佛氏厭苦棄捨,子曰:聖人公心盡天地萬物之理,各當

造作 費力,皆非自然,故失之遠

見 而 子曰: 不燭四旁,是以事至則不能 佛氏求道,猶以管窺天,惟務上

不足以道乎中 也。 子曰:中庸天理也。 庸。 中庸乃高明之極耳,非二 不極天理之高明,

致

言 意 非 ,乃在乎翕之,權詐之術也 也。 子曰:予奪翕張,理所有也,而老子之 與之之意,乃在乎取之,張之之

情性之正 子曰:禮樂大矣,然於進退之間,則已

矣。 得 子曰: 離三而爲一二,一二見而三亡矣。 一二而合爲三,三見則一二亡 方爲

知理。 不及,無非惡也,楊、墨之類是也。 一二而 子 i E 成三,既已成三,又求一二,是不 善惡皆天理。 謂之惡者,或過 或

> 子 子 i 曰 : Ė : 静中有動,動中有静,故曰 以氣明道,氣亦形而下者耳 動

静

源。

子曰: 氣充則理正,正則不私,不私之

至則神。

之,非至顯 螳蜋捕蟬者,或 聲也?」夫殺在物,見在心,而聽者以 「自性言之爲誠,自理言之爲道,其實一 或問: 子曰:至顯 子曰:中無定體,惟達權然後能執之。 歟? 「何謂誠? 人聞之,而曰:「琴胡爲 莫如理。 何謂 昔有人鼓琴而見 道 乎?」子 聲 也。」 有殺 Ė 知

爲始學者言之耳。 也,無可離不可 子曰: 道不遠人, 不可須臾 離也 論道之極,無遠也 離也, 一無近 此

而已。 子曰: 使萬物無 一失所者,斯天理,中

莫己 曰:「是猶楊震所謂 雖然,人我之知,猶有分也,天地則無二 知 子曰 也 一,而 「人爲不善於幽 天理 不可 四知者乎?」子曰:「幾 欺 何 隱之中者, 顯 如 之?! 謂 或 人

知

也。

天 道之言也。 贵 性 得 道,各有當也。 又爲一物矣。在天曰命,在人曰性,循性 也, 中即 地。 混 爲 而 而言,中不可并性 和也 「非也。」大臨 性 行,無非道者。 而一之乎?」大臨 吕大臨曰:「中者,道之所由 道也。 中又有中哉?」子曰:「性道 方 ,名雖不同,混 員 猶稱 不 汝以道出於中,是道之於中也, 可 大本言其體,達道言其用,烏 謂之天 天 曰:「所謂 員 則由中 加 地 0 之則 地 方, 曰:「中即性 則 而出,莫非道也。 加 中也者,狀 一歟?」子曰: 道 萬物 不 也,性也,中 可謂 出也。」子 非 也。 미 出 方 於方 性 以 員 循 合 即 與 日

乎? 圓矣。 르 乎? 特取 何從 失赤子之心,所謂 非中乎? 之爲義,自過 之心爲中, 物之變, 髮之異也。 是不明大本也。」大臨 子之心,已發而 無不中也,故稱中所以形容之也。」大臨日 赤子未有所知,其心 喜怒哀樂之未發,赤子之心,至虚 其 當是時也,至虚 而守之乎? 求之此心而已。此心之動,出入無 性不可容聲 純 中不可謂之性 何往 一無 此 而 無過不及之謂 日 與不及 IMI 心所發,無往 僞, 中 未遠於中者也,而 非 求之喜怒哀樂未發之際 者道之所由出 可與 禮 允執厥中也。」子曰:「赤 而 不倚,純 義 固 論 而 ,則道非出 曰:「聖人智周 哉? 聖 不 也。 立 同也。 名, 人 而 中, 率性 同 一無僞,以 不中。 故大臨 而 爾非 何從 指中 於中矣。 也。」子曰 一之謂 孟子所言, 阚 指 無倚,豈 大人不 以赤子 而 謂 爲 道 萬 爲 知 一,則 中 m

也, 也。 爲已發者,而未發之時謂之無心可乎?」子 於喜怒哀樂未發之際,而求中之中,去中不 亦遠乎?」大臨 曰:「心一也,有指體而言者,寂 非 此 則淺陋之辠也,敢不承教!」 謂 言之未瑩,則亦擇之未精耳。 有指用而言者,感 在人所見 無毫髮之異,斯異矣,大本則無異 何如耳。 曰:「然則夫子以赤子之心 而遂通天下之故是 論愈析微 則 然不 大臨 愈 動 易差 日 爾。 是

論學篇

故敬爲學之大要。
方者,寇賊然也。天下無一物非吾度内者,夫人測其心者,茫茫然也,將治心而不知其一分曰:識道以智爲先,人道以敬爲本。

子曰:學必先知仁,知之矣,敬以存之

之用也,萬物之體,即我之體也。 與物無對,大不足以明之。天地之用,即我也? 理義益明,何事於思索也? 斯道也,而已。存而不失者,心本無懈,何事於防閑

「其有報也,亦循理而已。」
天也。」或曰:「然則無當報者乎?」子曰:天也。」或曰:「犯而校者,私己也;不校者,樂亂,亦治之而已。苟非自棄,皆君子也。

大於理,莫重於義。」
不然雖富貴,亦常歉然不自得。故曰:「莫不然雖富貴,亦常歉然不自得。故曰:「莫

曰:「琴者,禁邪心也。」 子曰:彈琴而心不在焉,則不成聲。故

以 脩 子曰:視聽言動, 飾言語爲心,是僞 蘇 **昞問:「脩辭** 何 無非天也,知其正 而 以 己。 立 誠 ? 子曰: 與

1162

妄,斯善學矣。

則君子去其甚者而已。輕,趙、魏失之重,既通乎衆,盡正之而不得,輕,趙、魏失之重,既通乎衆,盡正之而不得,

常有歉悔之意,則反爲心害。子曰:有過必改,罪己是也,改而已矣。

子曰:學者欲得正,必以顏子爲準的。

蘇洵曰:「平居講習、殆空言也、何益?

苟非自有所得,則雖五經,亦空言耳。」習而無益,蓋未嘗有得耳。治經固學之事,不若治經傳道,爲居業之實耳。」子曰:「講

内志耳。子曰:射法具而彀不滿,發不中,未正

歸? 必趨於聖人之道矣。於詁訓,惑於異端。苟無是三者,則將安子曰:今之學者有三弊:溺於文章,牽

或問:「有反身而未誠者何?」子曰:

能誠矣。夫身既不誠,則無樂矣。」「是視身之與誠,猶二物也。必以己合彼,非

繪之美,務悦人之耳目,非俳優而何?」於綴文者耶? 有德矣,動無不利,爲無不於綴文者耶? 若綴文之士,不專則不工,成,何有不文? 若綴文之士,不專則不工,成,何有不文? 若綴文之士,不專則不工,成,何有不文? 若綴文之士,不專則不工,成,何有不文? 若綴文之士,不專則不工,

節而過中,是謂苦節,安能常且久耶?子曰:能守節,善矣,亦貴乎適中而已。

亦隨焉,妄得之得,失亦繼焉。苟或知此,亦隨焉,妄得之得,失亦繼焉。苟或知此,也。况有凶咎隨之乎? 是故妄得之福,災也。况有凶咎隨之乎? 是故妄得之福,災

子曰:於上深有所望,於下深有所責,

一四〇

其處己則莫不恕也,而可乎?

子曰:言行不足以動人,臨事而倦且

怠,皆誠不至也。

子曰:人之智思,因神以發。智短

思

敝,●神不會也。會神必有道。

處。得見其人,亦可與語矣。 子曰:古人謂心廣,洪大無偏而不起之

而勿去?」子曰:「不能則去矣。」而將去也。」子曰:「勿去可也。」曰:「奈何曰:「常理也,古猶今也,而何歎?」曰:「老曰:「常理也,古猶今也,而何歎?」曰:「老曰:「常理也,古猶今也,惟日之暮,喟然而歎。子

度,卓然不疑者,未能無差忒。 子曰: 斟酌古今而去取之,非心有權

子曰: 可觀莫如萬物之生意。

子曰:處患難,知其無可奈何,遂放意

而不反,是安於義命者。

子曰:知過而能改,聞善而能用,克己

以從義,其剛明者乎?

葛,苟有一毫私意於其間,即廢天職。子曰:飢而食,渴而飲,冬而裘,

夏而

得其意,則可以沿革矣。 子曰:學禮義,考制度,必求聖人之意,

有本。譬之藝木,由毫末拱把,至於合抱而或問人道之功。子曰:「立志。志立則

乎行,則其所聞固自他人之言耳,於己何子曰:學者有所聞,而不著乎心,不見干雲者,有本故也。」

與焉?

或問:「有人少而勇,老而怯,少而廉,

^{● 「}敝」,原作「敝」,據涂刻本改。

定,則雖死生之際,亦不爲之動也。况老少曾子易簣之際,其氣微可知也,惟其志既堅氣所使故也。志勝氣,則一定而不可變也。老而貪。何爲其然也?」子曰:「志不立,爲

之異乎?」

變焉,則暗者必明,弱者必立矣。」鈍者不可使利也。惟積學明理既久而氣質是可學乎?」子曰:「不可。才可勉而少進,。或問:「人有日記萬言,或妙絶技藝者,或問:「人有日記萬言,或妙絶技藝者,

而 中人而設也。 動,其異於小人者幾希。 人苟不知命,見利 子曰:「爲己爲親、非二事也。 矣。」曰:「在己可免也,而親不悦,奈何?」 以 得之,然安於義而無求,此樂天者之事也 免此?」子曰:「志勝氣 或問:「爲養而求仕,不免憂得失,將何 上智之士,惟義之安。雖曰求 必趨,遇 聖人日命云者,爲 ,義處命,則 難 必 其如命何? 避 一,得喪 無 必 憂

至於聞有命而不能安之,則每下矣。」

經之言,非聖人有意於文也,至藴所發,自然於此,斯害也已。學以養心,奚以文爲? 五曰:「是其爲業也,不專則不工也,專則志局曰。」是其爲業也,不專則不工也,專則志局

而成也。」

「汝謂其執簡秉筆,從事於詞章之技乎?」或曰:「游、夏以文學稱,何也?」曰:

或滯心於章句之末,則無所用也。此學者之子曰:讀書將以窮理,將以致用也。今

大患

極,則争奪而致怨。 其害大矣。貪之甚,則昏蔽而忘理義;求之其害大矣。貪之甚,則昏蔽而忘理義;求之,子曰:利者,衆之所同欲也,專欲利己,

勇於進則遷善愈速。 子曰:學者自治,極於剛則守道愈固,

子曰:達理故樂天而不兢,内充故退遜

而不矜。

矣。 推己及物, 服 故 子日 以養形 君子 : 所以養人也。 動 物 也; 静 聚 節 而 威儀 宣 無 , 所 以養之, 行 以 動 養道之所貴,惟 養生也 ,所以養 則不 3 能 德 飲 存 也 食 正 息 ; 衣

而

已矣。

子曰:射中鵠,舞中節,御中度,皆

誠

也

也,克己自勝,非君子之大勇不可能也。子曰:赴湯火,蹈白刃,武夫之勇可能

過也。惟識趣汙下之人,其改之爲最難,故子曰:凡夫之過多矣,能改之者,猶無

其過最甚。

子曰:始於致知,智之事也,行所知而

極其至,聖之事也

美也。 也,然終 其 體 色,權 子曰: 不 如 其 學者好 輕 富人之有金,未嘗 重,商 爲 高 其 論 貴 賤 猶 其 貧 人談 自自言 言 未 金 金之 必 非

子曰: 進學莫先乎致知,養心莫大平

理義。

教 以下,自棄自暴者衆矣。 曰:「是不然。 爲,然後有所得,其不欲,不可以 也 王彦霖曰:「人之於善也, 任其自爲,聽其不爲,則 聖人所以貴於立 必 强 其 人 誠 也 中 心 欲

立 曰:「有既立 者,次也。」 彦 霖 再問:「立 圃 益 進者,上也, 德 進 德 當 有 何 勇 先?」子 m 至

曰:「敬,所以涵養也。集義,所謂必有事或問:「必有事焉者,其敬而已乎?」子

順理而行者,義也。」曰:「敬猶静歟?」子異?」子曰:「敬,所以持守也。有是有非,義以方外,然後中理矣。」曰:「義與敬,何以理之謂乎?」子曰:「中理見乎事,敬在心。也。不知集義,是爲無事也。」曰:「義者,中

鮮矣。 惟正固乎! 凡處難,能守正而不變者,惟正固乎! 凡處難,能守正而不變者,子曰:處屯難之時,而有致亨之道,其

:「言静則老氏之學也。」

爲也?可用,工不爲也。學而無所用,學將何可用,工不爲也。學而無所用,學將何子曰。百工治器,必貴於有用。器而不

矣。醒而不以爲恥,末如之何也。也,亦何所不至? 及其既醒,必惕然而恥于曰:學而未有所知者,譬猶人之方醉

方於平易,皆能濶步而進,一遇峻險,則子謂周行己曰:今之進學者,如登山:

止矣。

故 既 也。 立矣,而 子曰: 所 根本既立 造有 深 一,然 淺 不同 後 可 者,勉 立 趨 向 與 不 趨 觔 向

子曰:學之而不養,養之而不存,是空子曰:不誠則有累,誠則無累。

子曰:義有至精,理有至奧,能自得之,子曰:重任,必强脊膂之人廼能勝。

言也。

可謂善學矣。

行,無非所過之化也。 子曰:自得而至於無我者,凡善言美

明高遠矣。
子曰:學至涵養其所得而至於樂,則清

然者,局局其守耳。 子曰:力學而得之,必充廣而行之,不子曰:學而不自得,則至老而益衰。

四

子 日 語學者以其所未 至,不 惟 所聞 不

深,亦易忽於理。

子曰:見之既 明,養之既 熟,泰然 而 行

之,其進曷禦焉?

子曰: 識必見於行,如行道塗,涉 暗阻

子貴有 非 日月之光,炬火之照,則 識。 力學窮理 一則識 不 益明,照知 可 進 矣。 不惑, 故君

廼 益 一敏矣。

子曰: 言而 不行 1,自欺: 孰甚焉 ?

子曰: 子曰: 教人者,養其善心,則惡自消, 動以 人則有妄,動以 天則無妄。

治民 者,導 以敬遜,則争自 啃

子 Ď: 學必激 昂自進,不至於成德,不

敢 安也

則 能 無不勝其任者,在强勉而已。」 勝 其 或問 任 則 「今有志於學,而 如之何?」曰:「致 知 識 知 蒙蔽 則 明,明 ",力不

> 者 人自期, 斯自棄 子曰 猶有不至者焉。 也已。夫學者必志於大道 人之於學,避其 所難 而 姑 爲 以以 其 易

問驕人者,其害豈小哉? 子曰 以富貴驕人者,固不美矣, 以

學

加

稱耳。」 疾之也?」子曰:「非爲求名也,爲無善之可 則 爲利者乎?」子曰:「清污雖不齊,而 大本已失,尚何所學哉?」或曰:「不猶賢於 也。」「然則没 子曰:「學者當務實,一有近名之心, 世 加 名 不稱 ,孔子何 其利 爲 心 而 則

收其放,明其蔽,安其危,曾謂爲心害乎? 曰:「未之聞也。 已乎?」子曰:「有進意」 或問: 或問:「有因苦學失心者,何也?」子 日日 新者,益 善學者之於其心,治其 進 而求益者,必 乎? 抑 謂 日 無 新 而

子曰:不知天,則於人之賢否愚智有所

不 不知人,則 知、雖知之、有所不盡。故學以知天爲本。 所 親 者或非其 人,所由者或非其

道 ,故學者以親賢爲急。

能 力行。 子曰: 學不博者不能守約,志不篤者不

次也。 其必默識心通乎! 或問:「學,何 聞之知之,意億度之,舉 如 篤誠明 而謂之有得?」子曰: 理 非 而 得也。」 涵養之者,

如

一、敬。」

有 以會而通之?」子曰:「求一物而通萬殊,雖 顔子不敢 至善,蓋非一端而已也。」又問:「泛然,其何 察物情,揆人事,反覆研究而思索之,求止於 盡 |窮其理?」子曰:「誦《詩》、《書》,考古今, 貫。 或問:「學必窮理。 所以 謂 能 然者,萬物一 也。 夫亦積習既久,則脱然自 物散萬殊,何由 理故也。」 而

丽 未 能 子曰:未有知之而不能 行,是知之未至也 行者。 謂知之

子曰:於所當爲者,用意而爲之,未免

私 心也。

:

有 所 子曰 或問:「夫子之教,必使學者涵養而 得。 如何其涵 致知則智明,智明然後能擇。 養也?」子曰:「莫 後

内 則 主一也。不一,則二三矣。荷繫心於一事, 乎? 不能不與萬物接,則有感必應,知見不 明,則萬物畢照,鑑之常也,而奚爲使之不照 可屏,而 失於絕聖棄智,必流於坐禪 他事無自人,况於主敬乎? 有主而後可。主心者,主敬也, 子曰:學者以屏知見、息思慮爲道,不 思 慮不 可息也。 欲無外誘之患,惟 人定。 夫鑑之至 主敬者,

曰:「人謂 於言穿窬不可爲,不必强勉 或問:「致知 非禮勿爲 力行,其 ,則必 强 而 功 勉 後 並 能 而從之;至 進 也。 乎?」子 故 知

能 有 血 也。 至 淺 於 深 樂, 則 行 則 有 己 遠 與 近,此 理 一,殆 進 學之效也 非 强 勉 之 循 可 理

而爲之,必無入善之理。諸中而存之也。故役役然於不善之中求善子曰:閑邪則誠已存,非取誠於外,納

門,所由之道,然後可往。 亦 者,然鮮能明道,蓋知之者難 往之心,其能進乎? 未易也。今有人欲之京師,必知 子曰:古之言「知之非艱」者,吾謂 後世非 未嘗知 也 無 美材 也,雖 所 能 力行 出 知之 有 之 欲

於義有害者,胡爲而可從?」 或問:「使從俗,可以從歟?」子曰

.

志,則不肯安於所不安也。不能然者,不見子曰:學者苟有「朝聞道,夕死可矣」之

或問:「何謂實理?」子曰:「灼然見其

實理故

也

重於義,如見火之熱,水之深,無復疑,則其是非可否也。古人有視死如歸者,苟不見死

子曰:獨處而静思者非難,居廣而應天

能

者未

矣。」

之者,當其接物之際也。未與物接,則未光庭問爲善之要。子曰:「孜孜下者爲難。

子曰:有志於道,而學不加進者,是無

自敬

而

動

,所謂爲善也。」

敬

而

而

爲

勇也

我矣。」 覆辨之,辨之而明,不有益於彼,斯 也, 我 盡達之介甫。 非敢必以 伯淳與吴師禮論王氏所學之失:「其爲 爲 是。 理 者天下之公,不 介 甫 有 以告 我, 可 有 則 益 私 願 於 反

也。及夫施於用,則必有其漸。子曰:學者所見所期,不可不遠且大

則於人有相長之益,在己無自辱之患。子曰:責善之道,必也貴誠而不貴言,

子曰: 古之教人,無一物不使之誠心,

子曰: 怒在四 射與舞之類是也。

遷矣。 子曰: 怒在理而無所遷, 動乎血氣則

不期壞而自壞。」

矣,盡心力而爲之,以期乎必得,是惑也。」曰:「設科以文詞取之,苟可以應科,則亦足司之選。今夫子每止之使勿習,何也?」子可之選。今夫子每止之使勿習,何也?」子或謂:「舉子必精脩其所業,可以應有

得 語,不可 薄,父子兄弟 非 里門,察其長幼出入揖遜之序,詠歌諷 乎? 禮義之言。 子曰: 古者家有塾,黨有庠,三老坐于 以今所習如此,欲其善得乎? 以 屬 惟知 耳 今也上無所學,而民風 也。 以 以 利 古所習 相 與耳。 如 彼,欲 今里巷之 日 誦 以 不 無 善 偷

或問:「道不明於後世,其所學者爲

人如顔、閔不可得。故教不立,學不傳,人材授,由學致也。聖人既没,曠千有餘歲,求一患其不明也。魯國一時賢者之衆,非特天何?」子曰:「教之者能知之。學者之衆,不

也 子 也 ,言語必謹也。 曰:「無之。 拘迫則不能入矣。」 或 問:「燕處 入德必 倨 雖然,優游涵泳 肆,心不怠 自敬始,故 慢,有諸?」 容貌 而養之可 必恭

偏 其爲 出入於人心者猶 學使近本,而 質,而復其德性 可憂 子曰:人多以子弟輕俊爲 子曰: 古所以成材之具,今舉 也。 不以文辭之末習,則所以矯其 有 在耳。 輕俊之質者,必教以通經, 也。 學者其可不 可喜,而不知 -勉乎? 無矣,惟

之意猶浹洽於心而發見於外,况學而見理者子曰:凡人於事,有少自快,則其喜懌

悦者,則亦何以養心也? 乎? 雖然,至於窮理而切切焉不得其所可

不汲汲於勢利也,善心何以不喪哉?學,必至於有成。後世之人,自其爲兒童,從學,必至於有成。後世之人,自其爲兒童,從學,必至於有成。後世之人,自其爲兒童,從以不受於有成。後世之人,由其爲兒童,從

子曰:學佛者,於内外之道不備。

俟 無益 孔子曰:「吾嘗終日不食,終夜不寢,以思, 目 善學者,當求其所以然之故,不當誦其文,過 矣。」夫聖人何爲而迫切至於如是其極哉? 可得,况學聖人之道,悠悠焉,何能自得也? 而 來日」,●斯自棄也 已 ,不如學也。」又曰:「朝 子曰:博奕小技也,不專心致志,猶不 也。 「學如不及,猶恐失之。」苟曰「姑 聞道,夕死 可

子曰:昏於天理者,嗜慾亂之耳。

守也。子曰:子厚以禮立教,使學者有所據

聞人之言云耳,因曰亦云耳而已。子曰:學者於聖人無卓然之獨見,則是

假人以爲玩乎?止,則不能不外求。譬夫家有藏實者,豈復止,則不能不外求。譬夫家有藏實者,豈復

章,力求其所未至,以至於有得也。 格物,則知無不盡,知之既盡,則守無不 知,則何所守也? 故學莫先乎致知。 持正之道?」子曰:「知之而 言,則不期於文而自文矣。 有異也,惟不能知之,是以流於不同。 子曰: 潘康仲問:「學者於聖人之門,非 古之君子,脩 德 退之固因學爲 mi 後 已。 可守, 德 窮 成 願其 固 無 敢 文 理 所 問 而

■ 「姑」上,原衍一「曰」字,據涂刻本刪。

死 此 不 · 得 其 傳」,非卓然見其所傳者,語 不

及

不至 患。 焉 其説矣。 耳。 則 吾喜其近道,必欲堅叩,明其辨可 子曰:蘇、吕二子皆以知見聞 流别於殊塗,陷溺於異端,亦不得免 夫人之學,非自願其有差也,知之 見爲 與終 學之

年數之不足, 好學也。 子曰 : 吕進伯老矣,慮學問之不 恐無所聞而 遂 死焉,亦可謂之 -進,憂

屑

屑而難之,舉而措之可也。」

以 軼 久,然後化成 丽 子曰: 難 御。 養勇之法,求之太急,故 凡長 而 育人材也,教之在寬,待之 俗美。 性 氣 輕

闇 彼 深於佛氏之學者,其質開透,亦必加於人 高 今之惑人,因其高明。』切有疑焉。 明,而可惑乎?」子曰:「語其質云爾 或問: 「夫子有言: 『昔之惑人,因 其迷 夫既

> 數等,所謂『智者過之』也,非《中庸》所謂「極 高明』者也。 聖人「極高明而道中庸」,其照

無偏,何過之有?」

有用 默也。」子曰:「舍是有言,亦烏得已乎?」 論 曰:「如其誠然,則志大不爲名,亦知學貴於 [政而及禮樂兵刑之學,庶幾善學者。]子厚 也。 子謂子厚曰:「關中之士,語學而及政, 子厚曰:「十詩之作,將以驗天心於語 學古道以待今,則後世之謬,不必

説以自適,其勢則然。」 日 而 : 不莊者,畏法 一謹 或問:「學者何習莊、老之衆 禮 而 不 度之拘己也,必資其放曠之 達者,爲其所 膠 固 焉 也?」子 放情

其心欲遽止焉,則又不自安,一聞超騰侈大 曰:「學而 或問 無所得,其年齒老矣,智力屈矣, 學 者 多 溺 於 (佛説, 何 也?」子

從之,其勢然也。 而 旅者也。」 居之要爾。 途,其進無 曰:「深固者亦難反。嘗譬之行人: 履乎坦 進之爲難也,於是焉 是以是以 難 説 未有人既安於家,而又樂舍於逆 也 而 , 人之。」「然則 山高乎其前,水深乎其下 夫托乎逆旅者,蓋不得家 而有捷徑,則欣然 可反乎?」子 而

免也

也 不可不 小爾。今之言者,乃及乎性命道德,謂佛 紛,吾有所不 ,中人以上之資也。 談 1 子謂門人曰:昨日之會,談 甚,晉室衰,况有甚者乎? 古者釋氏盛時,尚只是崇像設教,其害 學,使明智之士先受其 能。 噫 ! 其才足以自立,則反 此風既 成,其何 惑。 夫明. 空寂者 嗚 智之 能 呼 爲 紛 1 救

亂。不然,猶之淫言美色,戒而遠之,尚恐不之難矣。學者必至於自信而不惑,則彼不能

之乎?」子曰:「吾夏 記憶也。 以曉人主。 美 (哉! 或人有自名導氣養生者,問:「子亦知 侯仲良曰: 夫子在講筵,必廣引博 若有心於記憶,亦不能記 何記 憶之富 日,講既 葛 也!」子對 退,范 而冬裘,渴 堯 曰:「以不 夫揖曰 矣。」 飲 喻 饑

知 猶 正,而能治天下國家者,無之。 也,終也。 物,所謂本 理也,若曰窮其理云爾。 ,不窮則不能致 子曰:學莫大於知本末終始。 治天下國家,必本諸身。 也,始也,治天下國 也 窮理然後足以 格猶 家, 窮也,物 其身不 所 致 謂 知 致 格 末

子曰:格物,適道之始,思所以格物而

食,節嗜慾,定心氣,如此而已。」

已近道矣。是何也? 以收其心而不放也。

至」,此蓋可以意得,不可以言傳也。 道」,至於「格物」則不言,獨 而充之,然後可以至於聖人; 不知格 誠 心 子曰:《大學》於「誠意」「正心」皆言「其 正而後身脩者,未有能中於理 曰「物格 者 物 自格物 而 也。 而欲 後 知

子曰:學莫貴乎自得,非在人也。

卜者而問吉凶,可謂大惑。子曰:見攝生者而問長生,可謂大愚,

有功。

見

學而不能成其業,用而不能行其學,則非子曰:學貴乎成,既成矣,將以行之也。

反之而聖。 於自足,莫罪於自棄。進而不止,湯、武所以 於自足,莫罪於自棄。進而不止,湯、武所以 子曰:君子莫進於學,莫止於畫,莫病

爲人而喪己。 子曰:古之學者爲己而成物,今之學者

也,習聞之久也,涵泳其教化深且遠也。無益矣。然聖人在上而民多善者,習見之熟無益矣。然聖人在上而民多善者,習見之熟

求師,從師不可不謹也。學者外也。師者何也? 謂理義也。學者必子曰:記問文章不足以爲人師,以其所

子曰: 君子之學貴一, 一則明, 明則

欲趨衆善,爲君子者乎? 德 敗,自謀不誠則欺心而棄 加 增怨。 子曰:進學不誠則學雜,處事不 今末習曲藝,亦 己,與人 必誠 而後精,况 不 誠 誠 則 則 事 喪

嘗思,自以爲得之者,未之有也。」「學者亦有無思而得者乎?」子曰:「漠然未子曰:「不深思則不能造其學。」或曰:

五五

臨震懼死生而色不變,當疾痛慘戚而心不子曰:德盛者,物不能擾而形不能病,

子曰:學不貴博,貴於正而已,正則博。動,由養之有素,非一朝一夕之力也。

言不貴文,貴於當而已,當則文。政不貴詳,子曰:學不貴博,貴於正而已,正則博。

貴於順而

已,順則詳。

大田:學也者,使人求於内也。不求於本而求於末,非聖人之學也。何謂求以文爲主者是也。學也者,使人求於本也。以文爲主者是也。學也者,使人求於本也。不求於本而求於末,非聖人之學也。何謂求於外?

子曰:自得者所守不變,自信者所守

不疑。

子曰:隨時觀理,而天下之理得矣。

至聖人而後已。不至聖人而自已者,皆自棄子曰:人皆可以爲聖人,而君子之學必

业下里、万工是。也。孝者所當孝,弟者所當弟,自是而推之,

是亦聖人而已矣。

子曰:多聞識者,猶廣儲藥物也,知所子曰:學以不欺闇室爲始。

用爲貴。

慮,涵養而自得之。今一日盡講,是以博爲子曰:「講説,非古也。學者必潛心積

教,非有益也。

子曰:踐行其言,而人不信者有矣,未子曰:學而爲名,内不足也。

有不踐言而人信之者。

子曰: 恥不知而不問,終於

不

知

IIII

以爲不知而必求之,終能知之矣。

子曰:有辨佞之才者,多人於不善,故

學不貴。

■ 「是也」,原作「也是」,據涂刻本乙。

差乎

何承天慮其差也,則以所差之之分,

1

子曰:有慾則不剛,剛者不屈於慾。

子曰: 克己之私既盡,一 歸於禮,此之

謂 得 其本 心

子曰: 學貴於通。 執一而不通,將不 勝

其 八疑矣。 通莫如 理。

大勇乎? 子曰: 難勝莫如己私,學者能克之,非

論

或問:「坤者臣道也,在君 亦 有用乎?」

子曰 :「厚德載物,豈非人君之用?」

蓋 於日月交感之際,以陰陽盈虚 子曰:堯夫曆差之法,妙絕乎古人矣。 求之,是以

不差。 下閎之作曆也,謂數 陰常虧,陽常盈,差之所由也。 百年之後,當有一日之 昔洛

均於所曆之年,以考每歲所差之多少,謂之

歲差法,而差終不可定也 子 曰: 五經之言,涵 蓄渾然,

無

精

麙

之别。

他求,學《春秋》可以盡道矣。 不過當年數 人而已,窮理之要也。 然以通《語》、 學者不必

子曰:《春秋》是是非非,因人之行事,

《孟》爲先

或問《 春秋 發微》。 子曰:「述法 而 不

通意。」

至微者理,至著者象,體用 子曰:易,變易也,隨時變易以從道 源, 顯 微 無 也。 間。

善學者求之必自近。 易於近,非 知易

者 也。

故

於淺也! 子曰 有謂六經爲六藝之文,何其求之

.

劉 絢 問 _ 孔子 何謂作《春 秋 》?!子

五五三

子爲邦之道,可見矣。」
所折中焉,此作《春秋》之本意也。觀其告顔其法詳矣。仲尼參酌其宜,以爲萬世王制之曰:「由堯、舜至於周,文質損益,其變極矣,

首月。 王朔。 《春秋》之大義也。 事 在三 子 |月則書「王三月」,無事 天時 曰:《春秋》事在二月則 蓋 有 備 事則道在事,無事 則歲 功成,王道存則人理立, 則存天時,正 則書天時,書 書「王二月」,

之。韓子謂「《春秋》謹嚴」,深得其旨矣。子曰:《春秋》之法,中國而用夷道即夷

同大,而人道立矣。《春秋》曰「春王正月」。明此義,則知王與天子曰:諸侯當上奉天時,下承王正,故

猶堯、舜禪遜,湯、武放伐之類也。 道無不中聖人盡道而無過,故曰大過,亦當事之大耳。或問:「《易》有大過,何也?」子曰:

過也。」
也,無不常也。以世人所不常見,則謂之大也,無不常也。以世人所不常見,則謂之大

若運氣則不可用。」
於人,善言古者,必有驗於今」,豈不當哉?問:「何説也?」子曰:「「善言天者,必有驗《三墳》者,非也,然其言亦有可取者。」或《三墳》者,非也,然其言亦有可取者。」或

儒傳其説而不得其理,是以所言多失。度,皆人爲感之也。故《春秋》災異必書。漢子曰:陰陽運動,有常而無忒,凡失其

皆未可據也。《經解》,非聖人之言也。夏后氏郊鯀之篇,不知:《禮記》之文多謬誤者。《儒行》、

平之法亦存焉,在學者審其是非而去取子曰:《周禮》之書多訛闕,然周公致太

之爾

断然言之如是其明也,其識大矣。孟子之後,識道之所傳者,非誠有所見,不能子曰:《原道》之作,其言雖未盡善,然

代爲盛,然三十年以來,議論尚 儒者氣象。 傳言語之中,不復致思,而道不明矣。 義,則皆賢人之德業矣。 堯典」二字,可謂知要乎? 子曰: 東京士人尚名節,加之以 漢儒之談 經也,以三萬 本朝經典,比之前 惟毛公、董相 同,學者於訓 餘言 明 禮 明 有

執之矣,此居夷浮海之意也。

苟不知鄭、真、●陳之黨惡而同爲不義,則必與戎盟,●《春秋》危之而書至者,以謂:戎也與戎盟,●《春秋》危之而書至者,以謂:戎也諸侯之盟會者,所以結外援而自固也。齊遠諸侯之盟會者,所以結外援而自固也。齊遠

謂曰:「先君子孫也,可以君國。」而國人亦子曰:自古篡弒,多出於公族,蓋其自

乎? 孫也? 爲大惡,既自絶於先君之世矣,豈得 以 書,大概事同則辭 寵之太過,任之太重,以 世,故入春 有事同而辭異者,其義各不同,蓋 爲然,從 此義既明矣,而或有以屬稱者,可見其 古者公侯刑 秋之初,其弑君者皆絶 而 奉之也。 同,後之學因以謂之例,然 死則 聖人明大義以示 階亂 無服,况 也。 《春 不可以 屬 於 復 籍 秋 弑 爲 シ所 子 萬 例 君

夫子盍爲一言,推明其用乎?」子曰:「横渠《訂頑》曰云云。楊子問:「《西銘》深發聖人之微意,然言體而不及用,恐其流至於兼愛。 之問意,然言體而不及用,恐其流至於兼愛。

- 「齊」。涂刻本作「及」。
- ❷ 「真」,涂刻本作「齊」。

断也。

過矣。 論 以存義 理 從明道,即授以此書,於是始知爲學之大方, 愛,至於無父之極,義斯亡也。子比而同之, 立言誠 分,所以施之,其心一焉,所謂平施 然其書以 固將終身服之,豈敢疑 反謂不及用,不亦異乎?」楊子曰:「時也昔 至於兼愛,非謂其言之發與墨氏同也。 西銘》有平施之心,無稱物之義,疑其 一,以 同 m 識 功 氏則愛合而無分。 止私勝之流,仁之方也。 未彼欲使人推而行之,●本爲用 無分之罪 分殊,故聖人 贵 擴 ,焉知理一無分之殊哉? 有過,乃在《正蒙》,至若《訂頑》, 民爲同 前 墨氏之比哉? 聖所未發,與孟子性善養 ,兼愛而無義。 胞,鰥寡孤獨爲兄弟,非 稱物,遠近親 其失於墨氏比也? 分殊之蔽,私 《西銘 分立而 無别 V 故恐其 疎各 理 也。 丽 (解有 當其 夫惟 而 氣 迷兼 推 昔意 勝 明 也。 明 之 流 分 理 而 理

或問:「子厚立言,得無有幾於迫切者未達也。今夫子開諭,學者當無惑矣。」

然孟子猶有英氣存焉,是以未若顏子之懿,言似之,方之孟子,則寬宏舒泰有不及也。乎?」子曰:「子厚之爲人,謹且嚴,是以其乎

渾然無圭角之可見也。」

也,充而盡之,聖人之事也。子厚之識,孟曰:「姑以其言觀之亦可也。」 或曰:「聖賢氣象,何自而見之?」子

子志之! 吾求仲尼、顔子之所樂。 要哉此言! 二三吾求仲尼、顔子之所樂。 要哉此言! 二三

子之後,一人而已耳。」

子曰「乾坤毀無以見《易》」,「聖人以此

● 「未」,涂刻本作「夫」。

學者深思,當自得之。得之,則於退藏之密,果何物乎? 聖人所以示人者,深且明矣。洗心退藏於密」。夫所謂易也,此也,密也,

本意,專精於文義,則必固滯而無所通本意,專精於文義,則必固滯而無所通子曰:讀書而不留心於文義,則荒忽其

奚遠乎?

事」也。」
事」也。」

「然則謂何?」子曰:「知大人之道爲事矣。」「然則謂何?」子曰:「知大人之道爲臣每懷此心,大亂之道也。且不識湯、武之臣每懷此心,大亂之道也。且不識湯、武之五之位可至而至之。」如何?」子曰:「使人或問:「王介甫有言:「乾之九三,知九或問:「王介甫有言:「乾之九三,知九

其一而不知其變,則三百八十四爻止於三百臣,當儲貳則爲儲貳,顧用之如何耳。苟知乎?」子曰:「胡爲而不可? 當大臣則爲大或問:「胡先生以九四爲太子爻,可或問:「胡先生以九四爲太子爻,可

八十四事而已矣。」

習以相資益,爲説之至也。 子曰:夫人之説,無可極者,惟朋友

是而學,則不迷於人德之門也。 子曰:《大學》,孔子之遺言也。學者由

成德之事也。 子曰:大學之道,明德新民不分物我,

造道之深,知幾可與權者,不能與也。」若夫隨時而動,合宜適變,不可以爲典要,非君以之聽善,臣下以之奉命,學者以之徙義,題下以之聽善,原下以之奉命,學者以之徙義,隨,何也。」子曰:「隨者,順理之謂也。人

子曰:由《孟子》可以觀物。

五經矣。讀《語》、《孟》而不知道,所謂「雖多「於《語》、《孟》二書知其要約所在,則可以觀或問:「窮經旨,當何所先?」子曰:

亦奚以爲」?」

義,曾不若無書之爲愈也。 學者當識其義而已。苟信於辭,則或有害於 子曰:凡書載事,容有重輕而過其實,

不同、《王制》有漢儒之説矣。子曰:孟子言三代學制,與《王制》所記

體則與道合,語其用則無非義也。如其漠然無形體,尚何養之有? 是故語其然,既已名之曰氣,則非漠然無形體可識也。雖然,既已名之曰氣,則非漠然無形體可識也。雖然,既已名之曰氣,則非漠然無形體可識也。雖

方伯,近赴於鄰國,必有所直矣。苟不勝其若,如於己,則引咎自責,或辨論之以禮,又 蓋兵加於己,則引咎自責,或辨論之以禮,又 相侵伐,聖人直書其事,而常責夫被侵伐者。 子曰:《易》之有象,猶人之守禮法也。 子曰:《易》之有象,猶人之守禮法也。

之道也。

之道也。

之道也。

之道也。

日: 權之爲言,稱輕重之義也。 容聲矣,在人所見如何耳。」 「其中 劉絢問: 庸 乎 「讀《春秋》,以 ŧ 欲 知中 庸, 權義而上,不可 何 道 其 爲 惟 準?」子 權

日 理。 何謂 象以 其中矣。 「有理而後有象,有象而後有數。 也,非聖人之道也。」閎中曰:「象數在 尋流逐末,術家之所尚,管輅、郭璞之流 (明理 得其理,則象數舉矣。」 理既見乎辭, 也?」子曰:「理無 張閎中曰:「《易》之義起於數。」子曰 必欲窮象之隱微、盡數之毫忽、廼 ,由象而知數; 則可以 形 得 由 也,故 其理,而象數 辭 而 《易》者因 因 觀 象以 理中 明 是 故 在

二,言賢人之學也。此其大致也。若夫敬以子曰:乾九三,言聖人之學也,坤六

以問

伊

ĬIJ

伊川曰:

「二君知《易》矣。」師直

又言《易》,明道不可,師直無忤色。

他日,又

謝師直與

、明道言《春秋》,明道或可之,

直內,義以方外,則雖聖人不越乎此,無異道

也

子曰:卜筮有疑心,則不應。

子曰:孔子之言,莫非自然;孟子之

,莫非實

事。

之,若秦皇、漢武窮兵暴虐,則自爲寇也。」是之謂也。昏蒙之極,有如三苗者,征而誅寇亦可爲,而聖人教之以利乎?」子曰:「非或問:「《蒙》之上九,「不利爲寇」。夫或問:「《蒙》之上九,「不利爲寇」。夫

而直言無隱,是固《易》之道也。」曰:「忘刺史之勢而屈以下問,忘主簿之卑曰:「伯淳不我與,而子何爲有是言也?」子

有四年。至哉,誠之能感人也!」之鄭,信而不疑,鄭自是而不復背晉者二十哉,誠之能感人也! 晉悼公推誠以待反覆哉,誠之能感人也! 晉悼公推誠以待反覆

也,此理也。其敵其抗,王道之失也。不能敵王也,於夷狄不書戰,夷狄不能抗王子曰:《春秋》王師於諸侯不書敗,諸侯

學於古者,比後世爲未缺也,然而周室班爵子曰:孟子之時,去先王爲未遠,其所

行之乎?解,字爲之訓,固已不可,又况一一追故迹而秦火之餘,漢儒所傅會者多矣,而欲句爲之禄之制,已不聞其詳矣。今之禮書,皆掇拾

其 求聖人之心,而吾之所以未得焉者。晝誦而 意 味之,中夜而思之,平其心,易其氣,闕其疑, ,與聖人所以爲聖人,而吾之所以未至者, 必有見矣。 子 Ė 讀 書者,當 觀 聖 人 所 以 作經 之

周公,故言禮必歸焉。」「周公其人也」。」子曰:「周家制作,皆自乎或問:「嚴父配天,何以不言武王,而曰

而欲敬其事,故若此乎?」焚之,或埋之,豈周公之時未有焚埋之禮也,乎?」子曰:「以近世觀焉,祝册既用,則或縢之匱中,豈逆知成王之信流言,將以語之水。或問:「周公既禱三王,而藏其文於金或問:「周公既禱三王,而藏其文於金

之牙吉。」見聖人處機會之際也。其爲惡之原,則終不得止。《易》曰:「豶豕其爲惡之原,則終不得止。《易》曰:「豶豕子曰:禁人之惡者,獨治其惡,而不絶

可乎 目 Ш 曰乾位在六子,而自處於無爲之地。 今以天觀之,無乎不在,何獨有於西 口 澤水火之六物者,廼天之用,猶人之身,耳 鼻 子曰: 先儒有言,乾位西北,坤 各 1致其 (用,而 日身未嘗有爲也,則 北? 夫風 位 東 南。 雷 又

子曰:盡天理,斯謂之《易》。

蟲草木之微,無一而不合。 子曰:作《易》者,自天地幽明,至於昆

兮,天王聖明。」可謂知文王之心矣。

子曰:退之作《羑里操》曰:「臣罪當誅

不忘。末陳其不得見君而告之,又自陳此情不忘。末陳其不得見君而告之,以解害意可也。齊、梁之君陋矣,乃若孟子,則每有顧戀也。齊、梁之君陋矣,乃若孟子,則每有顧戀也。齊、梁之君陋矣,乃若孟子,則每有顧戀也。齊、梁之君陋矣,乃若孟子,則每有顧戀也。齊、梁之君陋矣,乃若孟子,則每有顧戀也。齊、梁之君陋矣,乃若孟子,則每有顧戀之義,猶父子之恩,安得不怨? 故於寤寐而之義,猶父子之恩,安得不怨? 故於寤寐而之義,猶父子之恩,安得不怨? 故於寤寐而之義,猶父子之恩,安得不怨? 故於寤寐而之義,猶父子之恩,安得不怨? 故於寤寐而告之,又自陳此情

峻德之人,然後以親九族。」

之不詐也,忠厚之至也。」

有作也。故作史者,以典名其書。而可爲典常也。不惟隨時,亦其憂患後世而耳。至堯,始爲治道,因事制法,著見功迹,耳。至堯,始爲治道,因事制法,著見功迹,子曰:上古世淳而人朴,順事而爲治

賢,則不知親親之道。故堯之治,必先克明何也?」子曰:「道孰先於親親? 然不能尊也,姑以至善目之,默識可也。」 或問:「《中庸》九經,先尊賢而後親親,也,姑以至善目之,默識可也。」 或曰:「《大學》在止於至善,敢問何謂

日乾乾,未足以盡《易》,在九三可也。苟曰而上之,焉有不盡者? 然理不若是也。終聖,純亦不已耳。」子曰:「凡講經義,等次推聖,純亦不已耳。」此盡道之言也。文王之或曰:「文中子答或人學《易》之問曰:

一六二

推而上之,疑無不可者,然理不若是也。」乾乾者不已也,不已者道也,道者易也,等次

難 兆之心交鶩於利,而天下紛然,欲其不亂, 於己也。 分也 民 公卿,日志乎尊榮,農工商賈日志乎富侈,億 有定志,而天下之心可一。 公卿大夫而 志定,民 士知 子 有德 讀《易》至履 脩其身,學成而 四民各勤其事,而所享有限,故皆 志定 下,位各稱其德,終身居之,得其 而 位 而後可以言治也。古之時 不 , 歎曰: 上下之分明而 稱焉,則 君求之,皆非 後世自庶士至於 在 上者舉 有預 而 進 後

甲 衣 胄之士 食之,百工技藝作爲器械,吾得 之遺言 或問:「制器取諸象也,而象器以爲卦 子曰:農夫勤瘁播種 开守疆 以待後之學者,兹爲 圉 ,吾得而安之。 五穀絲麻,吾得而 小補耳。 惟 而 有 用 % 育 之,

而不能知之,故設卦以示之耳。」聖人制器,不待見卦而後知象,以衆人由之乎?」子曰:「象在乎卦,而卦不必先器也。

鳳鳥 天 於 生於春秋之時,而况麟乎?」 地 春 交感,五行之秀會也。 秋之季,何 不至,孔子曰:『吾已矣夫。』而麟見 或問:「 麟 鳳 也?」子曰: 和 氣 所生,太平之應也。 以 「聖人之生,乃 仲 尼元聖,尚 獲

而 奚爲」也。 有 所見 子曰:讀《論語》而 於是有要約 則不 難 於 觀 五經 精至之言,能深 不知道,所 矣。 謂 雖 名

分無不定矣。 子曰: 艮,止其所也。萬物各止其所,

也。一事苟,則無不苟者矣。子曰:孔子爲政,先正名,名實相須故

之不明也。師學不明,雖有美質,無由成成就人才者,不患其禀質之不美,患夫師學務。人才不足,雖有良法,無與行之矣。欲

乎天 律起,而律必取於黄鍾,以律管定尺,蓋準氣 聲不可得矣。 命之術,以五行支幹納音推之,蓋律之遺也, 可以考中聲。 而用之者末矣。欲度量權衡之得其正,必自 地,非 子曰:八十四聲各盡其清濁之極,然後 積 秬 律者,自然之數也。 聲必本乎律,不得乎律,則中 黍 比 也 秬黍 積數,在先王 今世有三

子曰:養親之心,無有極也。貴貴尊賢可矣。 時,惟此物適與度量合,故可用也,今則不時,惟此物適與度量合,故可用也,今則不

之義,亦何有極乎?

子曰:古之聖王所以能化姦惡爲善良,而與己異者一皆棄絕之,不幾於棄天下道,而與己異者一皆棄絕之,不幾於棄天以譬君子乎? 故聖人無棄物,王者重絕人。學韓公。公既已見之,退而不悦,曰:「謂其以職事來也,乃求薦舉耳。」子曰:「公爲州以職事來也,乃求薦舉耳。」子曰:「公爲州以職事來也,乃求薦舉耳。」子曰:「治公曰:「子之固,每若是也。夫今世之仕者,求舉於「子之固,每若是也。夫今世之仕者,求舉於「字之固,每若是也。夫今世之仕者,求舉於「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,愧且悔者久之。子顧范公曰:「韓公無以語,鬼矣。」

一六三

而已。」 也。 如?」子曰:「推此 恕,己所固有,不待求而後得,舉此 李 臨 政 心行恕 無 所用 可也,用心求 心,求 於恕 恕 加 非 彼 何

之不得其所 非能爲物作則也,惟止之各於其所而已。 安,失其所 子曰: 則 事 ,則無可止之理。 悖。 事物物各有其所,得其所 聖 人 所 以 能 使 天下順 止 則

善爲政者,必重民力。 則 生養遂、然後教化可行,風 子曰: 養民者,以愛其力爲本。 俗可美。 民 是故 力足

不可及已,三代之治,其可復必也 子曰: 爲治而不法三代,苟道 也。 虞舜

之侈 自誇 於神明,非乎?」子曰:「陳先王之功德,而 美 心 子曰:「封禪本於祭天,後世行之,祗 乎?』斯言當矣。」或曰: 而 己。 王仲 淹曰:『非古也,其秦、漢 <周頌》告 以

> 非 自誇美也。」

既 慮衰 萌,是以浸淫滋蔓,而不知亂亡之相尋也 而 有久而不亂者,蓋不能戒於其盛也。 狃安富 衰 驕侈生,樂舒肆則 則 其所欲。 而 明道在鄠邑,政聲流聞,當路欲薦之朝, 子曰:聖人爲戒,必於方盛之時。 後 可以 戒, 則無及矣。 防 對曰:「夫薦士者,量才之所 其 滿 紀綱壞,忘禍 極, 而圖其永久, 自古天下之治,未 亂 則釁 方盛 於 垂

堪 而問 ,不問志之所欲。」

也,當取其首來觀之耳。」自是光遂滅,人亦 敢 不不復疑 上,遠近聚觀,男女族集,爲政者畏其神 止。子使戒其徒曰: 明道守官京兆,南山有石佛,放光於頂 也 「我有官守,不能 往

無所不通,無所不應者,正而已矣。 子曰:聖人感天下之心,如寒 正者 暑 雨 「,虚 暘,

主於 中 無 我之謂也。 事,其能 廓然通 以有繫之私心,膠於一 應而無不 徧 乎? 隅

所 前弊可革矣,善備則後利可久矣,此古聖人 道,又慮其將然,則知備之之方。 以新天下垂後世之道 子曰: 治蠱 必求其所以 然,則 夫善救則 知救之之

隨

善也。 始以 之有也 爲疑者有之矣,久而必 子曰: 古之人重改作。 始既疑之,終復不信,而能善治者,未 變政易法,人心 信,乃其改作之

庶有取之者耳。」子曰:「不行於今,而後世 道。」子厚 有行之者,亡也 子謂 子厚 日 「非敢言 日 議 法既 也。 備,必有 顧 欲 載之空言, 可行之

化以善俗。 矣。 子曰 雖 日 聖王爲治,脩刑 尚 刑罰 德 立 而 則教化 不 尚刑 行矣,教化行 顧 罰 豈 以 偏 齊 廢哉 衆 明 mi 刑 教

> 之治。 有未暇及焉 時 維持而已,所以不能髣髴於三代與! 子曰:自古聖人之救難而定亂也,設 自漢 而 者,既安之矣,然後爲可久可 下,禍亂既除,則不復有爲,姑 繼 施

妃 也。 亂 其弟反, 選武才人,以刺王妃入也, 子弟不用父兄之命:元宗使其子篡,肅 胥爲夷,五胡亂華,行之弊也。 魏、晉一變而爲曠蕩浮虚之習,人紀不立,相 久而苦,視死如歸,而不明乎禮義之中也,故 死義之士。 道,然背理甚者亦鮮矣,故賊莽之時,多仗 行,崇經術,鑒前失也。 代而後觀之,秦以反道 極則治形,隋驅除之,唐混一之,理不可 以武才人進也。 唐室三綱不立,自太宗啓之,故後 劉安世問百世可知之道。子曰:「以三 世祖興而褒尚之,勢當然也。 終唐之世,夷狄 學士大夫雖未 暴政亡,漢興,尚 陰極則 納 數 陽 世 爲 宗 必 生, 使 德 節 節 知 E

一一六六

甚,人爲而致也。」國患,而藩鎮陵犯,卒以亡唐。及乎五季之

借,限隔上下,皆險之大用也。 分,明之以等威,異之以物采,凡所以杜絶陵溝洫之阻,特其大端耳。若夫尊卑貴賤之,以知,特其大端耳。若夫尊卑貴賤之

大綱正,唐萬目舉。 子曰:三代而後,漢爲治,唐次之。漢

故人心弭然柔伏,雖有姦猾,欲起而無端也。今混一之形,如萬頃之澤,祖宗涵濡既久矣,而足以自持者,先王之分界約束未亡故也。子曰:戰國之際,小國介乎强大之間,

世 故 或擾之,猶風 官,故賢才衆 _ 正 子曰: 子曰:善爲治者,莫善乎静以守之。 則 難 古者使以德,爵 傾,一 過乎澤,波濤 圃 傾則難 庶績 成。 正者,天下之勢也。 洶湧,平之實難。 以功,世禄而不 及周之衰,公卿 丽

大夫皆世官,政由是敗矣。

贖之類 忠厚之至也。」 或曰:「何 子曰:「今責 也。 類?」子曰:「如徒 古者責不廉, 曰 罪 官吏, 無養 簠簋不飾 流杖, 廉 耻之道。」 使 而已, 以 銅

「先示以第名,使以次見,則亦可矣。」出? 立侍天子之側,曾無愧乎?」子厚曰:子,不若使趨進而雍容也。大臣孰不由此塗子曰:「賜進士第,使衛士掖之以見天

無 日 大也。」子厚曰:「獄情不得,則 有司請加之桎梏,下則叛法,上 可 逮 . 必 執 繫,爲其近於君也。 有少監逮繫乎越獄。 寧獄情之不得,而 常 法,●而 不 敢從 焉。 君有一時之命,有 朝廷之大義 子曰:「卿監以上 君 則 如之何?」子 無 無 是 君,非之 命,而 不 口

^{● 「}可」,涂刻本作「司」。

其政矣。 子曰:後世有治獄 曹參之治齊,以獄市爲寄,其時爲 而 無治市,周公則有

子曰:舉措合義,則民心服

子曰: 治則有爲治之因,亂必有致亂之

因,在人而已矣。

曰:「非也。是所以成敬之具爾。」 或問:「敬者,威儀儼恪之謂乎?」子

遠。 若後世變之,則未如之何矣。 子曰:爲政必立善法,俾可以垂久而傳

或人謀仕於子,邑尉責重,邑簿責輕 子曰:古之仕者爲人,今之仕者爲己。

子曰 1、「尉能治盗而已,不能使民不爲盗

可乎?」 簿佐令治邑,宜使民不爲盗也,而謂責輕

或曰:「治獄之官不可爲。」子曰:「苟

程粹言卷之一

能充其職,則一郡無寃民矣。」

子曰:立治有體,施治有序,酌

而應之,

臨 時之宜也。

子曰:游文定公之門者,多知稽古而愛

民,誠如是,亦可從政矣。

子曰:「諸侯方伯明大義以攘却之,義也; 或問:「蠻夷猾夏、處之若何而後宜?」

苟免侵暴,則亂華之道也。是故《春秋》謹華 其餘列國,謹固封疆可也。 若與之和好,以

1191

夷之辨。」 子曰:今之度量權衡,非古法之正也,

姑以爲準焉可耳。凡物不出於自然,必人爲

之而後成,惟古人能得其自然也。 子曰:明道臨政之邦,上下響應,蓋

以協和衆情,則 而 已。 風 動矣。天地造化,風

動

子曰:今代之税,視什 爲 輕矣,但斂

之無法而不均,是以疑於重也。

乎? 其義。 瑟,今也俱亡之矣,何以 古之成材也易,今之成材 祭則不及其祖,喪必僧之是用,何以立 氣,行步有佩玉,登車有鸞和 之樂曲 下,則無與 詩》乎? 子 古人歌詠以養其性情,舞蹈 間間 日 後世老師 古禮既 閻 成 世 童 其 未 一稚皆熟聞 材。 宿儒尚未能明也,何以 嘗 廢,人倫 無 古人之爲《詩》,猶 美材 也 成於樂乎? 而樂道之,故 不明,治家 也, 難 無故 道 不 以 而 明 養其 不 無法 於禮 於天 通 去琴 今人 興 噫 於 曉 1 m.

酷 惟 世。 天下,皆數百年,其間郡縣之政,可書宜亦多 古者諸侯之國 有 傳 自秦罷 功 晉城 德者: 其 縣 餘 有 或記之,循吏與夫凶 侯置守令,則史亦從 則 令宰書名石,明 各有史,故其善惡皆見 泯然無 聞矣。 如 道 殘之極 而 漢、唐之有 記 廢。 之日 乎後 者以 其後

焉。 無以 質其是非,以爲師戒云爾 之,俾民觀其名而 政之名氏 待久而乃淳固而不變。 條 幸而 矣, 皇然圖所施設,則教令未熟,民情未孚,而吏 者固已遲之矣,使皆知禮義,自其始至即 爲之,且不能倉卒苟簡而就,蓋必本之人情, 而 欲新己之政而盡去其舊,則其迹固已 書已至矣。 而爲之法度,然後 與古史之意異矣。 况因 教必審定而 然其所 故聞古史之善而 託 無傳,其 其傳,則宜其去皆未 循 以爲記者尚近 不 書大率纔 儻後之人所志不同,復有甚者 職者乎? 不肖 後行,其 可使去惡而從善,則紀綱 者復幸而 不忘其政 夫圖治於長 十數人,使賢 不可得 夫以 今之爲吏,三歲 民之服 古。 ,後之人得 幾,而善惡 易息之政, 得傳,蓋其 則 第其 循漸 久者, 雖聖賢 因 先 [今有 者之政不 漬, 後 無 意 書 無 而 亦 而 而 聞 阜 必 前 又 斯

以 不 行師之道,以號令節制。 敗耳,勝者時有之矣,聖人之所戒也。 聖王重焉。 以 正 子曰:兵以正爲本。 則 民 不從而怨敵生,亂亡之道也,是 東征西怨,義正故也。子曰: '行師· 動衆以 無法,幸而 毒天下 不 而

濟矣。 本在 而 條例司劾不行之官,駁老成之奏,乃舉一偏 有言不信矣。 曰:明者見於未形,智者防於未亂。安危之 盡 阻 人情,治亂之機係事始。 青苗之法初行,明道時居言職,言於上 公議,因小事而先動衆心,難乎其能 萬邦協和 ,則所爲必成矣。 衆心睽乖 ·, 則 今

决,故不足以持久。可觀者也。隋文之法無不善者,而多以臆之制,第法不具爾。宇文周官名度數,小有之制,第法不具爾。宇文周官名度數,小有

或問:「孔子何譏大閱?」曰:「爲國者

爲之,無及也,無事而爲之,妄動也,是以聖盛夏閲兵,妨農害人,其失政甚矣。有警而國守民之道也。魯之秋八月,則夏六月也,武備不可廢,則農隙而講肄焉,有時有制,保

今之世,則當酌古以處時。制度必一切更張子曰:居今之世,則當安今之法令,治

人不與。」

也。然一變可至於道矣。
子曰:後漢名節之風既成,未必皆自得而可爲也,亦何義乎?

不迫也。」
不迫也。」子厚曰:「亦自吾規矩質之勁,勇於行也。」子厚曰:「亦自吾規矩焉。今而用禮漸成風化矣。」子曰:「由其氣子厚曰:「秦之士俗尤厚,亦和叔啓之有力子厚曰:「洛之俗難化於秦之俗。」

世以智力取天下而糾持之,古今之所以相絶子曰:先王以仁義得天下而教化之,後

者遠矣。

定萬世,是亦至公之法也。道也。然賢人難得,而争奪興焉,故與子以下,故與子。論善之盡,則公而與賢,不易之下,故與子。論善之盡,則公而與賢,三王家天子,故與賢,三王家天

矣。天下弊事一日而可革,若衆心既定,風入人:始也以利從,久則心化之,今而既安也。以彼之才之言,而行其學,故其教易以也。以行之,王氏之教靡然而同,是莫大之患子曰:王氏之教靡然而同,是莫大之患

慾未可求,而其母知之,何也? 愛之至謹, 子曰:赤子未有知,未能言,其志意嗜 俗已成,其何可遽改也?

出於誠也。視民如父母之於赤子,何失

其迹。迹者,聖人因一時之利而利焉者耳。放肉刑而用之而民不怨,得聖人之意而不膠而行之而民不病,放封建而臨之而民不勞,下可爲,非聖人之達道也。善治者,放井田子曰:必井田、必肉刑、必封建,而後天子曰:必井田、必肉刑、必封建,而後天

大益,小變則小補。 主言,未有不變而能有爲者也,大變則 自本而言,美大乎引君當道,君正而國定矣。 大益,小變則小補。

是也。 子曰: 古無之而今有之者,一釋、老子曰: 用兵以能聚散爲上。

子曰:有田則有民,有民則有兵。

心以小人自爲也? 在小人者用之於君子,皆有用,繫君相變化之耳。凡人之情,豈甘作成人材難,變化人才易。元豐諸人,其才

子曰:治道之要有三:曰立志,責任,

求賢。

미

則其

爲

用未必不賢於今之人也。

7歸之命。 子曰:賢不肖之在人,治亂之在國,不

分而已。苟無法以聯屬之,可乎?人之所以順從而不辭者,以其有尊卑上下之弟從父兄,今也父兄從子弟,由不知本也。弟從父兄,今也父兄從子弟,由不知本也。子,則人知重本,朝廷之勢自尊矣。古者子子則人知重本,朝廷之勢自尊矣。古者子子則人知重本,朝廷之勢自尊矣。古者子

故,則未知昭有罪,漢遣使治之而殺漢使温公曰誅之非。考之於史,不見所以誅之之,子曰:漢文誅薄昭,李衛公謂誅之是,

輕重,然後可議其誅之當否也。 之不以罪,太后憂悒不食而至於大故,則如之不以罪,太后憂悒不食而至於大故,則如乎。 抑將與漢使飲酒,因怒而致殺也? 誅

子曰:論治者貴識體。

度,以盡天下之務,治之法也。法者,道之也。建立綱紀,分正百職,順天揆事,創制立子曰:治身齊家以至平天下者,治之道

用也。

焉 不 昔 謂 之,不容而後去之,又何嫌乎?」 指 有 以 爲 則過之,與今爲政遠矣。人雖異之,不至 礙 明 猶 道 爲 狂 焉 有 駭也。 者 爲 也。 可 遷就,不害於法,而 ,然明道爲之,未嘗大戾於法,人亦 邑,凡及民之事,多衆人所謂於法 至謂之狂,則必 謂之得伸其志則不可,求 可 大駭。 以有爲者也 盡 誠 小補 爲

患,幸勿疑 以 於汾 洄 使者,此 失亦甚。 母地,昭事之道,當於嚴敬。 流,不必請 配食焉,誣瀆之惡,有大於此者乎? 公爲 陽, 子移書河東使者吕進明曰:「王者父天 而不正,尚何爲哉? 既非禮矣。 因唐人有妖人作《韋安道傳》,遂設 也 於朝,不必詢於衆,不必虞後 後世之人又建祠宇,其 宜以其象投之 漢武 遠 祀地

至,必曰虜既再犯河外,不復來也,可高枕子移書河東帥曰:公蒞鎮之初,僉言交

懈矣。 也。 矣。 禦敵,必用驍猛,招徠撫養,多在儒將。 也,是以有言,惟公念之。 日之事 全實,疆場安矣。 内地人信吾可恃而 而致悔。 於緩責,衆論既一,公雖未信,而上下之心 歸然後爲利也? 壘,已足以勞敝一道,爲利大矣,何必 之地,是大不然。 者,攻其所不守也,謂 今日彼不徒興大衆,必不利於河 此特常言,未知奇勝之道也。 故爲今之計,寧捐力於不用,毋惜 1,則異 豈獨使敵人知我有備而 於是。 此長久之策也。 彼誠得出吾不意,破 夫謀士悦其寬憂,計 願 某以 往,則數年之内,遂 其 荷德之深,思所報 不來,乃其 不來 自古 夫 所 負 外 攻 當 乘 司 蕩 既 以 必 戴 使 幸 功 來 空 取 而

論事篇

子曰:行事在審己,不必恤浮議。恤浮

議 而 忘審己,其 心 馳矣。

復矣。 生,生息之際,無一毫之間,碩果不食,即爲 子 息,止 也,生也。 事 息 則 事

億

不信。

時,而喜人其 子 日 久閲 趣, 事機 則 猶 物之遺種、未 則機 心生。

方

其

閲

退 也。 ,不退則進。 子曰:天下之事,無一定之理,不 時極道 窮,理當必變,惟聖人 有不 進 則 生

焉 、之情 耳。 子曰: 也。 或謂賢者好貧賤而惡富貴,是反 所以異於人者, 以守義安 命

時

也

爲

能通其變於未窮,使其不至於極。

堯、舜

而 不爲,俾誰爲之? 或人惡多事。 子曰: 莫非人事也。 人

子 日 天下之事, 荷善處之, 雖悔, 可 以

> 功 不善處之,雖 利,反以爲害

成 子曰 : 人以料事爲明,則駸駸乎逆詐而

時乃事之端,聖人隨時 聖人足以 之宜、未嘗先時 皆造端而非因也,豈妄乎?」子曰 順 理 而 或問 應之。」或曰: 無妄之道。 盡 舉,又何 而 開 人也。 必累 「聖人 子曰:「因事 而已。 聖 制 如不待時, 繼 作 聖 以 : 而 之當 因 利天下 後 備 則一 風氣 ?

言也。 孝,况事親 子曰: 乎? 疾 而 舍藥: 委身於 物 庸醫,比之不 可 也 是 非 君 慈 子之 不

爾。 合也 天下 子曰: 國家,至於事爲之末,所以不遂者 ş 必 子曰:天地之生,萬物之成,合而 所以不合者,由有間 也 脩身立教,然後風 關 中 學者 正禮 化及乎後世 文,乃一 也 故 間 時之事 1,由不 後遂。 隔 者

一七四

天下之大害,聖王之所必去也。

子曰:惟篤實可以當大事。

則不記。 子曰:養不全固者,處事則不精,歷事

逸樂。

子曰:豫,備也;豫,逸也。事豫備則

子曰:萬變皆在人爾,其實無一事。

能大治者,由用之不盡耳。

子

Ĭ.

一世之才,足以

周一世之事。

不

故以自崇,非敬也,飾私智以爲奇,非敬也。子曰:君子之遇事,一於敬而已。簡細

於太學,得失無以異,遂不復計較,明且子曰:謝良佐因論求舉於方州,與就試

舉事可以攷古而立制,非其人,未免隨俗子曰:禮院關天下之事,得其人,則凡

而

己。

正

,用賤陵貴,以不肖治賢者乎?

凡此,皆

子曰:較事大小,其弊必至於枉尺

直尋。

其言而莫違,况其下者乎? 是非可否於衆庶而不敢專也。 勸 止 子曰: 其 事 者。 西 邊用師, 自古舉事 非 不 小 逢合之智如此, 故也,未聞一人 以 今雖公卿,惟 大小,必 度其

幾何不至於一言喪邦!

誠公矣,初何嫌之足避乎?

子曰:凡避嫌處事者,皆内不足。

所爲

於 弼之論 治,雖有專任獨决,能就 而 曰:「智者如禹之行水,行其所無事 本諸簡易,而 (施置: 行之於險阻,則 新法將行,明道言於上曰:天下之理, 失 乖,臣庶之心戾, 宜 沮 行以 廢 公論 順道,則 不足 國 以言智矣。 一時之功者,未 而能有爲者也。 事 政 無 異 不成者。 出 , 名分不 自 也。」捨 聞 古 况 故 興 輔

日益摇動,此陛下所宜仰觀俯察而深念朝廷之福也。今天時未順,地震連年,人心倖就緒,而興利之臣日進,尚德之風浸衰,非理不克成,而智者之所不行也。設令由此僥

其能通於此而已。 理一致也,微顯一源也。古之所謂善學,以 子曰:至顯莫如事,至微莫如理,而事 者

也。

今之强有力者,將以爲亂。 自見耳。子曰:古之强有力者,將以行禮; 子曰:外事之不知,非患也,人患不能

子曰: 公天下之事, 苟以私意爲之, 斯

不公矣!

子曰: 閱天下之事,至於無可疑,亦足

樂矣。

矣。君子之和,和於義。子曰:世以隨俗爲和,非也,流狥而已

子曰:官守當事,不可以苟免。

宜於世,而未有,聖人亦必作之矣。然也。不席地而椅桌,不手飯而匕筯,使其子曰: 籩豆簠簋不可用於今之世,風氣

心也。」申公矍然謝之。 之悔。明道曰:「然不可以是而懈於好賢之變其節,申公謂知人實難。以語明道,且告

吕申公常薦處

士常秩,秩既起,他

日

稍

子曰: 事以急而敗者,十常七八。

好周者,於事未形而周端先著,皆心之病也。子曰:好疑者,於事未至而疑端先萌,

二程粹言卷之一

程粹言卷之二

宋龜 山 楊 時訂

定

然而震者,天地之怒氣也,相感而

相

遇

故

使之乎?」子曰:「夫爲不善者,惡氣

乎

子

曰

.

非

也,

雷

震

之

也

然

則

雷 ;

孰

也

赫

宋 軒 栻 編 次

霜, 金 氣 也 ; 露, 星 月 之 氣 也。

子

曰 :

天

地

篇

露 氣 也 結 爲 霜 非 也。 雷 由 陰 陽相 薄 而 成,蓋沴

殺 草,上寒而下温也。 子曰 : 雨 水冰,上温 而 下 寒 也。 隕霜 不

子曰: 日月之爲物,陰陽發見之尤盛

者也。

積 不善,常歉然於其心,忽然聞震 劉 安節問:「人有 死於雷霆者, 心,則懼 無 乃 而 死 素

無也。」

精也

然

軋

磨

既

極,則

亦

能

熱矣,陽未

擊

石

火

出

亦然。

惟金

不

可

以

得

火,至陰之

二物者,未嘗有

火也,以

動而

取之故

也。

則陽形也,是故鑽木戛竹皆可以得

火。

夫

動

極

也。」曰:「雷電相因,何也?」子曰

之。 王也。」 大河 或問: 之患 五五 德之運,有諸?」子 少 於唐,多於今,土火 曰:「有

年; 故雖 之道,曰:「大哉人謀,其與天地相 善保國者,延既衰之祚,有是理也。」 天命可以人勝也。 關子明推占吉凶,必言致之之由與處之 善養生者,引將盡之 終 始 乎

七六

端一

而已。」

日月運行,未嘗息也,則謂之不動可乎? 故子曰:冬至之前,天地閉塞,可謂静矣。

曰動静不相離。

子曰:致敬乎鬼神,理也, 暱鬼神而求

子曰:陰過之時必害陽,小人道盛必害焉,斯不知矣。

君子。欲無害者,惟過爲防耳。弗過防之,

從或戕之。

之者異也。夫天,專言之則道也。神鬼,以情性謂之乾,其實一而已,所自而名以主宰謂之帝,以至妙謂之神,以功用謂之以主宰謂之帝,以至妙謂之神,以功用謂之,或問天帝之異。子曰:以形體謂之天,

人能常於可久之道,則與天地合。 子曰,天地所以不已,有常久之道也。

聚也?」子曰:「難言也。然究其極致,則二或問:「日月有定形乎? 抑氣散而復

之。」子曰:「公有所見,則無是言也。」有是言也。」蜀公曰:「鬼神影響,則世有此,死爲彼,無是理也。」子曰:「公無惑,則此,死爲彼,無是理也。」子曰:「佛氏謂生爲

見聞也。然則如有見聞者,誰歟? 不在我,而享之者鬼神也。夫豈有二理哉? 如響,狗以私意及顛錯卦象而問焉,未有能如響,狗以私意及顛錯卦象而問焉,未有能如響,狗以私意及顛錯卦象而問焉,未有能如響,狗以私意及顛錯卦象而問焉,未有能不我,而享之者鬼神也。夫豈有二理哉?

復,故未嘗見其心。 子曰:天地之心,以復而見,聖人未嘗也。若夫天之所爲,人之所能,則各有分矣。

天不違,亦順理而已矣。 子曰:天地之道,至順而已矣。大人先

一一七七

聖人有是言矣,爲爾言有 或 問 鬼 神 之有 無 子 日 ,爾得不於吾言 . 吾 爲 爾 言 無

·事? 子曰: 天地之間,感應而已,尚復

何

求

之乎

則

背見,日月無背照也。子曰:日月之在天,猶人之有目,目無

於其間,有功用而已。
子曰:氣化之在人與在天,一也。聖人

物者,乃天之氣也。騰,天氣不下降,天氣下降至於地中,生育萬而不爲之虧,月之光乃日之光也。地氣不上一子曰:天地日月,其理一致。月受日光

微 數 亂 人事交相勝負,有多寡之應耶?」子曰: 世 多,豈 或問:「日食有常數者也,然治世 燭 理 明,其 人事乎?」子曰:「天人之 孰 能 識之?」曰: 無 廼天 理 少 甚 而

「似之、未易言也。」

者,氣之所鍾有不周耳。 子曰: 君子宜獲福於天,而有貧瘁夭

折

也。」莊周强齊之,豈能齊也?齊,而萬變生焉。故曰:「物之不齊,物之情暫息。陽常盈,陰常虧,一盈一虧,參差不暫息。陽常盈,陰常虧,一盈一虧,參差不

在 動 中,何敬之改修乎? 未嘗敬也。 然心悦,吾疑其未善也。」繹以告子。子 哉?」 爲 厭。 或謂張 社稷宗廟之中,不期敬 方其静時,所以能悦静之心,又安 使平居無不敬,則社 釋曰:「吾至於閑静之地, 然則以 静爲悦者,必 而自敬,是 稷宗 廟之 平居 則 日 洒

奚 也?」子曰:「不明 盡 ? 或問:「人多 求之於 理 理 惑 則 故 於 無 也。 鬼 蔽,故 神 求之於事 怪 異之 君 子 説, 事 理 則 何

陽歟? 之異 月何食? 日月之食,然則月之食亦可鼓者,以其 相當,陰盛亢陽,不下於日也。 也。 子曰 . 日月星辰皆氣 不受日光也。 古今異宜,人有所不便者,風 也。 何爲不受? 亦自異於古耳。 古者鼓以 與 助 救 日 氣

之功 則 遺其 乎? 子曰 重 . 而 祭門而不祭井,何説 Ŧi. 舉其 祀非 (輕者。 先王之典。 夫門之用,顧大於井 也 以 爲 報 邪?

子曰:當大震懼,能自安而不失者,惟

地也

誠敬而已。

運,則參差不齊矣。 子曰:静動者,陰陽之本也,五氣之

夭, 非 耶?」此以 跖 子曰: 史遷曰: 「天與善 何 爲 而 私意度天道也。 壽, 指 人 而 較 必 人,伯夷 之, 日 顔 非 何 善人 知 爲 天 而

者也。

者數也,數者氣之用也。子曰:有理則有氣,有氣則有數。鬼

神

之憤 婦 誠,自足以動天地也。」「然則殺 邪?」子曰: 冤既釋邪?」子曰:「冤氣固散矣,而 亦平也。」 或謂:「殺 「衆心固寃之耳 孝 婦 圃 早, 豈 暴姑 非 丽 衆 而 寃 人之精 雨,豈 所 衆 感 心

有意於簡別也,顧處之有道耳,聖人即天子曰:天地之間,善惡均於覆載,未嘗

中庸也。

中庸也。

子曰:天地之化,雖蕩無窮,然陰陽之

也。萬物成形於帝,人成形於父,故以季秋冬至祭天而祖配之。以冬至者,氣至之始子曰:萬物皆本乎天,人本乎祖,故以

程粹言卷之二

一一七九

ハつ

享帝而父配之。以季秋者,物成之時也。

神,祖 遺 末,亦不得已焉而 必用尸,後世 之心,以至 意,但流 子曰: 考所 爲 以 誠 事鬼神易,爲尸難。 直以尊卑,勢遂不行。 三代之 來 僞妄,不足以通幽明矣。 持之,則可 格者也。 廢耳。 盡其道矣。惟 後世 巫覡,蓋 孝子有 致神 戸之 尸象 思 親

於氣。字書由是不可勝窮矣。 名之曰天,蓋自然之理也。名出於理,音出以爲天,本何爲哉? 蒼蒼焉耳矣。其所以

月是也;有消長而無窮者,寒暑是也。 子曰:陰陽之氣,有常存而不散者,日

使竭智巧而爲之,未有能不息也。 子曰:天理生生相續不息,無爲故也。

夢 見 理感通 子曰: 在此 也。 而 明 夢彼 乎感 · · · · 通 感通 ,則何遠 也 ; 近 已 死 死 生 而

今古之别哉? 楊定鬼神之説,其能外

是乎?

日有影 陽而 開 闔 後 相 子曰:老氏言虚能生氣,非 明日 因 也 無有先也,無有後 有陰,則 亦可謂今日有形 也 也。 可 謂 而 今日 陰陽之 後 有 明

或問:

天

地

何

以

不

與

聖

人

同

憂

也?

言,善觀於此者,必知道也。 子曰:天地生物之氣象,可見而不可

聖賢篇

《易》而後無大過者,何謂也?」子曰:「非是 有過 或問 則 不 :「聖人 足 以 爲 有 聖 過 人 乎?」子 矣。」曰: 日 一夫 聖 子 而

過誤者鮮矣。」曰:「《易》亦有過乎?」曰:期年至于五十,然後乃贊《易》,則《易》道之之謂也。猶删《詩》定《書》正樂之意也。自

如《八索》之類,亂《易》者多矣。」

思企及,而才氣高邁者亦不敢躐等而進也。 好古敏而求之者也」。非獨使資質庸下者勉 常俯而就之,曰「吾無隱乎爾」,「吾非生知, 及,則趨向之心不幾於怠乎? 故聖人之教, 冀及之,然後知其高且遠也。使誠若不可 冀及之,然後知其高且遠也。使誠若不可

師可稱也,非言事君之道也。事君而若此,子曰:孟子論子濯孺子之事,特曰不背也,孔子告顔淵爲邦者,萬世不易之法也。子曰:損益文質,隨時之宜,三王之法

也,管子之仁,仁之功爾,非至仁也。子曰:齊威之正,正舉其事爾,非大正

忠之大也

或問泰伯之三讓。子曰:不立一也,逃

焉二也,文身三也。

「越境而反,且不討賊,猶不免也。 必也越境或問:「趙盾越境,果可免乎?」子曰:

而不反,然後可免耳。」

浮雲過於太虚耳。山也。唐、虞事業,自堯、舜觀之,亦猶一點子曰:泰山雖高矣,絶頂之外,無預乎

不相悖,然後明聖人之用。短,有數焉,而周公必祈之。知性命並行而緩溺而死,有命焉,而禹、稷必救之。國祚修服過宋。象將殺己,舜知之矣,乃同其憂喜。子曰:桓魋不能害己,孔子知矣,乃微

以行道爲己任哉?若不可聞者,有孔子在焉。若孟子,安得不若不可聞者,有孔子在焉。若孟子,安得不子曰:顏回在陋巷,淡然進德,其聲氣

或問:「聖人亦有爲貧之仕乎?」子

乎?」曰: 能 或 E 人因以 出 門户之時,又徐爲之謀耳。」 爲 委吏乘田 是勉子從仕。 「非 也。 是 爲 也。 魯司 子曰:「至於饑 寇 或 則 日 : 爲之兆 抑 爲 之兆 餓 也。」 不

子曰:子厚之氣似明道。

惟聖賢乃與於此,學者守法可也。 下與人,諸侯之職守社稷,而大王委去之。 子曰:天子之職守宗廟,而堯、舜以天

亦未嘗 此 知 亦 必 能 其 喜 未 順 使 · 當無 其 小人不 包 而 子 一藏,則 Ė: 不 面 聽 戒 知 革畏罪 命 戒所 敢肆 聖賢在上,天下未嘗無 聖賢之可說也,故四凶 危道 聖人豈 而已。 其惡而已。 當戒 也。 不察其終出於惡哉? 也 是以惟堯、舜之盛,於 苟誠信其假善,而不 夫小人之本心, 立 小人也, 一堯朝

伐國,其伐者皆非仁人乎?」子曰:「展禽之或問:「伐國不問仁人,然則古之人不

伐紂,則無非仁人也。」矣,仁人所不忍見也,况忍言之乎? 昔武王矣,常侯以土地之故,暴民逞欲,不義之伐多

彊,宰我是也。 子曰:强者易抑,子路是也,弱者難

人者也。若夫自信,孰得而移之?言於仲尼,則終身守之,而未必知道,此信於子曰:信一也,而有淺深。七十子聞一

也。 由 則有矣,亦豈寢而必夢,夢 誠,夢亦誠,不夢亦誠。 不失大概。 正乎? 不正?」子曰:「是亦心動也。」曰: 「孔子夢見周公,何也?」子曰:「 不 能 仲尼之門人,其所 子語楊 劉安節問 自 立于衆説漂煦之間 夫二三子豈皆智不足以 迪 曰 曰:「志 近 所 篤 見非盡能 夢則有矣,夢見周公 講 於善而夢其事者, 而必見周公歟?」 問 ?,設端 耳,信 與聖人同 聖 多矣,而 不 人 知之? 篤 無 故

夫信而加思,乃致知之方也。若紛然用疑,也,惟不敢執己而惟師之信,故求而後得。

終亦必亡而已矣。

之戒也。 唐李德裕功未及成而禍敗從之者,不知包桑 子曰:「其亡其亡,繫于包桑。」漢王允、

賢也。」
 李觀有言,使管仲而未死,内嬖復六人,李觀有言,使管仲而未死,内嬖復六人,李觀有言,使管仲而未死,内嬖復六人,

也。使鳩可占,非獨鳩也。」「舉此意,向此事,則有此兆象矣,非鳩可占或問:「郭璞以鳩占,何理也?」子曰:

相與遠行,則患難有相死之道,况回於夫子死之可乎? 不死乎?」子曰:「今有二人,或問:「孔子不幸而遇害於匡,則顏子

亡,乃爲人報仇而殺身,則亂民也。」 人,相與搏虎,其致心悉力,義所當然也。至 人,相與搏虎,其致心悉力,義所當然也。至 舊臨難而後言也。」曰:「父母存,不許友以 舊臨難而後言也。」曰:「父母存,不許友以 死,則如此義何?」子曰:「有可者,遠行搏 死,則如此義何?」子曰:「有可者,遠行其 不許友以 是不 於危急之際,顧曰吾有親,則舍而去之,是不 於危急之際,顧曰吾有親,則舍而去之,是不 以 是不 於危急之際,顧曰吾有親,則舍而去之,是不 於危急之際,顧曰吾有親,則舍而去之,是不 於危急之際,顧曰吾有親,則舍而去之,是不 於危急之際,顧曰吾有親,則舍而去之,是不

箕山之節,免於新室之汙;其知幾矣。姜肱爲土室之隱,●免於黨錮之禍,薛山守能及也。穆生爲酒醴而去,免於胥靡之辱,能及也。穆生爲酒醴而去,免於胥靡之辱,子曰:知幾者,君子之獨見,非衆人所

廷對天子之問,言天下之事,猶之可也。 苟弘猶强起之者,今則求舉而自進也。 抑曰欲子曰: 漢世之賢良,舉而後至,若公孫

● 「姜」,涂刻本作「袁」。

於此?則沮,肆則悦,沮則悲,不賢不良,孰加則沮,肆則悦,沮則悲,不賢不良,孰加志於科目之美,爲進取之資而已,得則肆,失

難者,李固、王允、周顗、王導之徒是已。 子曰:守節秉義,而才不足以濟天下之

人,則有可移之理也。」
之死也,發於至誠,而奚命之論? 然則在聖邪? 抑曰爲之命邪?」子曰:「其欲代其兄邪。 如問:「周公欲代武王之死,其有是理

忍坐視而不救也,必區區致力於未極之間,子曰:聖賢於亂世,雖知道之將廢,不

漢,謝安之於晉,亦其庶矣。 久。苟得爲之,孔、孟之屑爲也。王允之於强此之衰,難彼之進,圖其暫安,而冀其引

之迹著見。 子曰:仲尼無迹,顔子之迹微顯,孟子

不爲,而况聖人乎? 配而歸之,何避嫌之有? 避嫌之事,賢者且不知聖人之心也。夫孔子蓋以因其年德相其女,異於兄弟之女,是又以私意小智觀之,以私意小智觀之,不見其猶也。或謂孔子嫁以私意小智觀之,不爲,而况聖人乎。

子曰:顏子非樂簞瓢陋巷也,不以貧累子曰:陳平言宰相之職,近乎有學。

其心,而改其所樂也。

子曰: 伯夷不食周粟,其道雖隘,而又

能不念舊惡,其量亦宏。

其有之,則必若是其勤勞而不敢已也。」所合乎?」子曰:「周公固無不合者矣。如朱光庭問:「周公仰而思之者,其果有

謝良佐既見明道,退,而門人問曰:「良而知不足安也,則來有所請,庶乎其能變。子曰:游酢、楊時,始也爲佛氏之學,既

佐何如?」子曰:「其才能廣而充之,吾道有謝良佐既見明道,退,而門人問曰:「良

子曰: 顏子虚中受道,子貢億度而

知之。

堯夫細行或不謹,而其卷舒運用亦熟矣。子曰:子厚、堯夫之學,善自開大者也。

矣,而比干則非不知也。 子曰:邦無道而自晦以免患,可以爲智

,则未肯質子皆。子曰:顏、孟知之所至則同,至於淵懿

温淳,則未若顏子者。

子曰:

· 觀武帝問賢良,禹、湯水旱,厥咎

洪水也。」而不對所由,姦人也。何由,公孫弘曰:「堯遭洪水,不聞禹世之有

湯、武,雖然,皆聖人也。學而至之者也。文之德似堯、舜,禹之德似善子曰:堯、舜,生而知之者也,湯、武,

子曰:身之,言履也,反之,言歸乎

正也。

子則兼秋殺見之矣。子曰:仲尼元氣也,顏子猶春生也,孟

如見乎其人。所載,善乎其形容也。讀而味之,想而存之,所載,善乎其形容也。讀而味之,想而存之,

孔、孟非不知也,然自任以道,則無不可爲子曰: 魯、衛、齊、梁之君,不足與有爲,

一一八六

者也。

孟子生而大全,顧未粹耳,在養之而已。子曰:顏子具體,顧微耳,在充之而已。

此志也,禹、稷之功,其所優爲也。子是也。易簣之際,非幾於聖者不及也。推子曰:傳聖人之道,以篤實得之者,曾

者 將 尉於其 文帝於 當是之時,非陳平爲之謀,亦不能濟矣。 何處 子曰: 不知學也 哉? 霸 或 橋 而 周勃入北軍,問 而 嚴 已知其心爲劉氏者,不必問 請 兵, 問 則非 ,●則非 其 事。 其 士卒,如有右 時 幾於 見河 無 所能 東 也。 迎 袒 守

子曰:仲尼渾然,乃天地也,顏子粹

然,猶和風慶雲也,孟子巖巖然,猶泰山北

周茂叔曰:「荀卿不斗也。

知

誠。」子曰:「

既

誠矣,尚何事於養心哉?」

足紀者寡矣,晉、宋以後,詩之足采者微矣。及。續經,其僞益甚矣。自漢以來,制詔之爲必假真也。通之所得,粹矣,非荀、楊所爲必假真也。通之所得,粹矣,非荀、楊所不可。王仲淹,隱德君子也。其書有格子曰:王仲淹,隱德君子也。其書有格

人多矣。」子曰:「以天下之力,誅天下之賊,殺一不辜而得天下則不爲,孔明保一國,殺馬於天下也?」子曰:「孔明欲定中原,與先為於天下也?」子曰:「孔明欲定中原,與先佐。」曰:「然則何以區區守一隅,不能大有佐。」曰:「然則何以區區守一隅,不能大有

^{■ 「}問」,涂刻本作「閒」。

能 義 正?」子曰:「蜀之君臣,志在興 有大於殺也。 不戮一人乎?」 孔子請討陳恒,使魯用之, 日 :「三國之興,孰 復漢室, 爲

學者有不爲仁義者,則其失豈特楊、墨哉? 子 子曰:楊、墨,學仁義而失之者,則後之 曰:與巽之語,聞 而多礙者,先入

正矣。」

有 也 難,彼曲我直,君子不以爲恥也 , 晉侯怒成公後期而不見魯, 當是時, 國家 與與叔語,宜礙而信者,致誠也 子曰: 君子正己而無恤乎人。 沙隨之

ş

用 漢高耳。 子曰 世云漢高能用子房,非也,子房

也。 煌煌 容爲全身之道也。 旁燭 子曰: 其曰「遜于不虞,以 無 楊子雲去 疆 則 使彼知聖賢見幾而作,其 悔 一就 其蹈 無 保天命」,則欲 足 觀,其 亂 無 先 日 知 之 明 以 荷 哲 明

> 安足保也 及是乎? 苟至於無可奈何,則區區之命,亦

子曰: 堯夫襟懷放 曠,如空中樓閣, 四

通

八達也

投閣 子曰: 也。 夫其黽勉莽、賢之間而不能去,是 楊子雲之過,非必見於《美新》、

安得爲大丈夫哉?

也, 是,必有救之之術矣。 可以補養和平,不可以攻治沉痼,自處如 子曰:君實謂其應世之具,猶藥之參苓 子曰:韓信「多多益辦」,分數明而 己。

之甚焉?」 得如己者,故難。 不能化商均也?」子曰:「舜以天下與人,必 或問:「舜能化瞽、象於不格姦,而曷 於商均之惡,豈聞如瞽、象 爲

者也。 子曰:張良進退出處之際皆有理,蓋儒

子曰:孔門善問,無若顏子,而乃終日

如愚,無所問也。

(盡。 子曰:司馬君實能受盡言,故與之言

必

道者,二子也。 子曰: 顔子默識,曾子篤實,得聖人之

若虚,孰勇於顔子?」「孰勇於顔子?」顏子曰:『舜何人也? 有爲者亦若是。』有而若無,實而「孰勇於顔子? 顏子曰:『舜何人也? 予」或謂:「顏子爲人,殆怯乎?」子曰: 或謂:「顏子爲人,殆怯乎?」子曰:

子曰:孟子言己志,有德之言也;論聖

人之事,造道之言也。

子曰:子貢之知,亞於顏子,知之而未

能至之者也。

之時,何也?」子曰:「其任也氣象勝。」 或問:「伊尹出處,有似乎孔子,而非聖育至法者也

功,孟子之事功,與禹、稷並。子曰:人有顏子之德,則有孟子之事

明,尚何暇他人之知乎?」雜處乎衆言之間,群音囂囂然,己且不能自之坐乎堂上,則其辨堂下之聲如絲竹也,苟或問:「孟子何以能知言?」子曰:「譬

道,若孟子,必得賓師之位而後行也。 子曰:孔子爲宰,爲陪臣,皆可以行大

習,蓋美材也。其學晚溺於佛,所謂日月至子曰:明叔明辨有才氣,其於世務練

^{●「}祥」,原作「詳」,據涂刻本改。

焉而已者,豈不可惜哉!

「此《中庸》之理也。」能求於語言之外也。游酢得《西銘》誦之,則涣然於心,曰:

子曰:和叔任道,風力甚勁,而深潛鎮

密,則於與叔不逮。

子矣。

而知其心矣。」
「世額子以道爲可樂而樂乎,則非顏子矣。」「使顏子以道爲可樂而樂乎,則非顏子矣。」「使顏子以道爲可樂而樂乎,則非顏子矣。」所樂者何樂也?」曰:「樂道而已。」子曰:「樂美何樂也?」曰:「鄉子 而以不能改其無字」子曰:「知其所樂,則知其不改。謂其樂?」子曰:「知其所樂,則知其不改。謂其

之大道,是猶冒險阻,披荆棘,以祈至于四達者迂曲其所行而難於有至哉? 故求徑途而直乎?」子曰:「果其徑也,則仲尼豈固使學或謂:「佛氏引人人道,比之孔子爲徑

孟子曰:「可以仕則仕,可以止則止,可

爾。

《春秋》天子之事也。」知《春秋》者,莫如孟者之迹熄而《詩》亡,《詩》亡然後《春秋》作,者也。」知《易》者莫如孟子矣。孟子曰:「王以久則久,可以速則速,孔子也,孔子聖之時

焉,一也。學之,以至於孔子者,自明而誠也。及其至學之,以至於孔子者,自明而誠也。及其至之所載者,自誠而明也。由《鄉黨》之所載而子曰:孔子之道,著見於行,如《鄉黨》

後之學者,有一善則充然而自足,哀哉!也。以能問於不能者,顏子之所以爲賢也。子曰:聞善言則拜者,禹之所以爲聖

舜 不可,然後堯使之娶耳。 父母之心孰重?」子曰:「非直不告也,告而 在舜爲可娶也,君臣父子夫婦之道,於是乎 雖 不告,堯固告之矣。 或問:「舜不告而娶,爲 在瞽 堯以 無後 君 瞍 命 也,而 不 敢違,而 命瞽瞍, 與拂

人隱慝而治之,非堯也。」也?」子曰:「象之欲殺舜,無可見之迹,發皆得。」曰:「然則象將殺舜,而堯不治焉,何

人而知之也,明其在我者而已。 天下之事,非一一而學之,天下之賢才,非人子曰:伊尹之耕于莘,傅説之築于巖,

利,明其道不計其功。」度越諸子遠矣。 子曰:董子有言:「仁人正其誼不謀其

行人者。

鍾由是。」
貴,則失其本心者衆矣。顏子簞瓢由是,萬獨顏子?」子曰:「貧賤而在陋巷,俄然處富獨顏子?」子曰:「貧賤而在陋巷,俄然處富或問:「陋巷貧賤之人,亦有以自樂,何

自 積力久則人」,荀卿之言也,「優而柔之,使 以 澤之潤,涣然冰釋,怡然理順」,杜預之言 求 人道。」門人曰:「何謂 之,饜 子曰:「有學不 而飫之,使自趨之,若江 至而 言至 也?」子曰:「『真 者,循其言 泂 之浸, 口

之言也。此三者,循其言皆可以入道,而三將通之,非鬼神之力也,精誠之極也」,管子也,「思之思之,又重思之,思而不通,鬼神

人者,有以政事人者,有以言語人者,有以德子曰:孔子教人,各因其才,有以文學

子初不能及此

也。」

術蓋有所自。 子曰:老氏之言雜權詐,秦愚黔首,其

事。」子曰:「然則是僞也,聖人無僞。」知之素矣,恐民之未信也,故假夢卜以重其知之素矣,恐民之未信也,故假夢卜以重其或問:「高宗之於傅説,文王之於太公,

適 亦 盟,與不盟同。 衛 可 子曰: 要 也。 盟 是故孔子舍蒲人之約,而卒 可用,要之 使要盟而可用,則賣國 則不 可用。 背君, 要 而

子曰: 顔子之怒在物而不在己,故

· 子 曰:

制有舊,非可鑿知而苟爲者。
訪官名,而不害乎生知也。禮樂官名,其文古今之故,非學不能知也。故孔子問禮樂,古今之故,非學不能知也。故孔子問禮樂,子曰:生而知之者,謂理也,義也,若

子曰: 荀子謂博聞廣見可以取道,欲力曰周公能爲人臣所不能爲,陋哉斯言也!子曰: 人所不可能者,聖人不爲也。或

行堯、舜之所行,其所學皆外也。

甚焉,孔子蓋不與也。其曰殺人之中又有禮陽惟當致力君命,而乃行私情於其間,慢莫「我朝不坐,宴不與,殺三人足以反命。」夫商子曰:工尹商陽追吴師,既及之,而曰

不爲者同心。無所慮也,與行一不義、殺一不辜而得天下無所慮也,與行一不義、殺一不辜而得天下子曰:曾子易簣之際,志於正而已矣,

焉,蓋記《禮》者之謬也

思,則可見矣。 思,則可見矣。 時門弟子才辨明智之士非不衆也,而傳 矣。時門弟子才辨明智之士非不衆也,而傳 至人之道者,乃質魯之人也。觀易簣之事, 聖人之道者,乃質魯之人也。觀易簣之事,

也。子路以管仲不死於子糾爲未仁,其言仲管仲曰『如其仁』,何也?」子曰:「闡幽之道劉安節問。「孔子未嘗以仁許人,而稱

程粹言卷之二

一九二

可也。」揚,各有攸當,聖人之言類如此,學者自得揚,各有攸當,聖人之言類如此,學者自得者小矣,是以聖人推其有仁之功。 或抑或

在邦而有怨者焉,周公是也。使之知仁也。然在家而有怨者焉,舜是也;使之知仁也。然在家而有怨者焉,舜是也;子曰:在邦家而無怨,聖人發明仲弓,

其事功則有異。 子曰:堯、舜、孔子,語其聖則不異,語

所能知 也。 而 至 不 也 使,是 管叔初未嘗有惡,使周公逆度其兄將 子 也, 日 舜之於象,周公之於管叔,其 心誠何 則其過有所不免矣。 象憂喜,舜亦憂喜,天 心哉? 惟管叔之畔,非周公 理人情之 用 心 畔

然時 欲 有 富 所 也 於式,其心善矣,於孟子有可 子曰: 子 ,如其欲富 以 利 齊王欲養弟子以萬鍾,使夫國人 誘孟 子門人,故 ,則辭十萬 孟 而受萬乎?」故 子 E 處之義也, 我 非

誘耳。當知孟子非不肯爲國人矜式者,特不可以利

二,文王之德也。文王其猶天歟! 子曰:不已則無間,天之道也, 純則不

無本,然形容道理之言,則亦有善者。」 或問:「莊周何如?」子曰:「其學無禮

然其説之流,亦未免於有弊也。不人於禪學者。特立不惑,子厚、堯夫而已,

子曰: 世之博聞强

識者衆矣,其終未有

歎也。 及之異。是微也,惟顏子知之,故興卓爾之在後」,則又過也。其差甚微,其失則有過不在後」,則又過也。其差甚微,其失則有過不

舜當未開之時,及其聰明,如此其盛,宜乎後毓於物者,如何其茂也! 久則漸磨矣。 虞也?」子曰:「譬之於地,肇開而種之,其資也。」子曰:「後世有作,虞帝弗可及,何或問:「後世有作,虞帝弗可及,何

同者。陰陽消長,氣之不齊,理之常也。」一國有幾家,一家有幾人,其榮枯休戚未有一時之盛衰,有一月之盛衰,有一辰之盛衰。世莫能及也。胡不觀之:有天地之盛衰,有世

子曰:善惡皆天理,謂之惡者,或過或是以未嘗復行,有復行焉者,知之不至耳。顏子有不善未嘗不知,知之至也,知之至,子曰:知之既至,其意自誠,其心自正。

泛濫於諸家,出入於釋、老者幾十年,反求諸厭科舉,慨然欲爲道學,而未知其方也。及明道十五六時,周茂叔論聖道之要,遂不及。無非惡也,楊、墨之類是也。

高明,觀天地運化,陰陽消長,以達乎萬物之之事爲可必致。及其學益老,德益邵,玩心其才,慷慨有大志。既學,力慕高遠,謂先王明道志康節之墓曰:「先生少時,自雄

六經,而後得之。

道 之得之於穆伯長,推其源流,遠有端緒。 衆矣。况後此千有餘歲,師道不立,學者莫 思所以授孟子者耳。其餘門人,各以其才之 仲尼,其傳可見者,惟曾子所以告子思,而 厚風俗,成人材之功亦多矣。 昔七十子學於 其惡。故賢者樂其德,不肖者服其化,所以 諒,通而不汙,清明坦夷,洞徹中外。 其與 之可知其賢,然不事表暴,不設防畛,正而 人者與? 李、穆之言,及其行事,概可見也,而 知所從來。獨先生之學,得之於李挺之,挺 所宜爲學,雖同尊聖人,所因而入者,門户則 言,必依於孝弟忠信,樂道人之善,而未嘗及 變,然後頹然乎順,浩然乎歸。 而名其學者,豈所謂門户之衆,各有所因 一不雜,汪洋高大,乃其所自得者多矣。 ,以其所至而論之,可謂安且成矣。」 語成 德者, 昔難其居。 若先生之 德氣粹然,望 先生淳

後; 猶得 然後見斯名之稱情。 傳之學於遺經,天不愸遺,哲人早世。 肆 無善治 行; 道』之名,亘萬古而長 於道,知所嚮,然後見斯人之爲功,知所至, 而 無真儒,則天下貿貿焉莫知所之,人欲 孟 以 子爲之言曰:「周 天理滅矣。 伯 軻 明夫 3 淳 學不 死,聖人之學不 既没,公卿大夫議以 善治之道 傳,千載 先生生千四百年之後,得 存也。」 山可夷,谷可 以以 無 公死, 傳。 真 淑 儒 諸 明 道不行,百 聖人之道 人,以 無善治 道先生」 堙,『明 學者 傳 諸 士 世 不 不 號

君 臣 篇

其 意 惠 以 澤 待 子 可 物,恕己以及 日 : 也。 君欲附天 若乃暴其小惠,違道干譽,欲 人,發政施仁 下,當顯 名 使使 其 道 四 0 海 蒙 誠

> 也。 雖朋友亦然,修身誠意以 君 也,臣之於君,竭其忠誠,致其才力,用否在 已,不可巧言令色,曲從苟合,以求人之與己 致天下之親己 而已,不可 雖鄉黨親戚亦然。 阿諛 一,則其 逢迎,以求君之厚己也 道 狹矣。 待之,疏戚在 非 特 君 人而 爲 然

久而不離者。 固 守。 子曰: 子 Ħ • 君 君道以 臣 故賢者順理而安行,智者知幾 朋 友之際,其合不正,未 人心悦服 爲 本。

可 則 止,無苟爲,亦無必 子 i i 君子 有爲於天下, 爲。 惟 義 而 已,不

베

不 勞 免 而 咈 有 子 İ 違 傷 也。 矣。 止 惡 君惡 民 當 悪 於其微, 既 既 甚 甚 一**,** 雖 雖 以 至 以 聖 盛 聖人治之,亦 人 而 救 後 之, 禁, 亦 則

有

者,必 其所 之欲其富貴久長於齊,是其所明也。 龍所以導之者,亦因其明爾,故其受命如響。 留侯不攻其蔽 與周昌、叔孫通也? 高祖不從彼而從此者, 力,孰與夫公卿及天下之心? 其言之切,孰 愛戚姬,將易嫡庶,是其所蔽也,素重四老 果者,其説多 亦有所明,未有冥然而皆蔽者也。 少子長安君,不使爲質於齊,是其蔽也,愛 人之賢而不能致,是其 蔽,而因其所明,乃能入矣。 人者,亦如此而已。 子 因君 日 心 人臣 件; 所明,而後見納。 而就其明也。 以忠信善道事其 温厚明辯者,其説多行。 、所明 也。 趙王太后愛其 是故計直强 雖有 君者,必達 四老人之 古之善諫 左師 所蔽 觸

由顯明以道合者。 子曰: 小人之於君,能深奪其志,未有

程粹言卷之

儀有再造社稷之功,威震人主,而上不疑之 可謂明哲君子矣,周公、孔明其 位極而無逼上之嫌,勢重而無專權之過。 違理,威福不自己出,人惟知有君而已,然後 懷之,則危疑之地也。 者,王道也。 稱天王,命 子曰: 子曰:人臣身居大位,功蓋 則 王者奉若天道, 後世以智力持天下者,覇道也。 天命 也,討 必也 則 天討 動 誠 無非 積 人也。 也 天下,而 於中,動 天者,故 盡 郭子 天道 不 民

義當來則來耳。」
猶之可也。」子曰:「何必然? 義當往則往,補也,不如退而閒居,講明道義,以資後學,不如退而閒居,講明道義,以資後學,

也,亦其次歟

其能久相有乎?飾之行者鮮矣。夫上下之交不誠而以僞也,飾之行者鮮矣。夫上下之交不誠而以僞也,子曰:剛健之臣事柔弱之君,而不爲矯

一一九五

盡是道者,文王也。」朝,己則止其分耳,分則當止而德則當升也。之矣?」子曰:「上則升君於道,下則升賢於「道何所不在?」曰:「大臣而猶升也,則何」或問:「升卦有大臣之事乎?」子曰:

則用之天下治矣。可以濟而誠不至者。誠苟至焉,正色率下,可以濟而誠不至者。誠苟至焉,正色率下,子曰:士有志在朝廷而才不足者,有才

過也。 之於君,猶子之於父。苟不盡其責之所當 也,其孝非過乎子之分也,亦免 爲者而不爲,則誰 無不能爲之功,周公亦盡其分耳。人臣所當 之,故賜以人臣不能用之禮樂,非也。 用,周公之法亂矣。成王之賜,伯禽之受,皆 可乎?」子曰:「不可。人臣而用天子之所 劉安節問:「 王氏謂人臣有不能爲之功,而周公能 賜 爲之 魯天子禮樂以祀周公, 也? 事 責 親若曾子可 而 已。 人臣 臣

之言夫。」
平? 後世有恃功責報而怏怏於君者,必此之功,是猶曰人子有不能爲之孝也,而可為,則事業何自而立? 而謂人臣有不能爲

已,斯可謂之君子。然,則危塞險難無足以動其心者,行吾義而矣,而猶不免,則命也。苟唯致其命,安其矣,而猶不免,則命也。苟唯致其命,安其

焉,在下位也,則有當拯,有當隨焉。 子曰:君子之處高位也,有拯而無隨

表之見也。」 東京 東京 大於争則當争,事小於争則當已。雖然,今 大於争則當争,事小於争則當已。雖然,今 之仕於官者,其有能去者,必有之矣。而吾 已。事重於去則當去,事輕於去則當留,事 已。事重於去則當去,事輕於去則當留,事 之性於官者,其有能去者,必有之矣。而吾 之性於官者,其有能去者,必有之矣。而吾 之性於官者,其有能去者,必有之矣。而吾

范公爲諫官,嘗諫上曰:「今欲富國强

厭,言兵之不可用,至於及其所愛也,庶乎孟子爲梁惠王言利之不可爲,至於不奪不以格其君?《周禮》所記,亦有强富之術,惟兵,將何以爲?」子聞之,曰:「野哉! 烏足

事明,氣忿則招拂。子曰:凡諫説於君,論辯於人,理勝則

其可矣。」

節,庸肯苟死乎?」

是也。臣不及君,則贊助之而已。尹之於太甲,周公之於成王,孔明之於劉禪子之於太甲,臣賢於君,則輔君以所不能,伊

達,而 可開 其誠 明之輔後主是也 之人,事庸君常主 也, 子曰: 以感發其 其君信之之篤 雖 柔弱可輔 君子之事君也,不得其 志 而 而 己。 耳。 克 也,雖不正可正也。 行 誠積而 管仲之相威公,孔 其道者,以己誠上 動 列則 心, 雖 香蒙 則 古 盡

或問:「陳平當王諸吕時,何不諫?」

而臣事之也。當王諸吕時,而責平等以死徒以智力相勝,勝者爲君,其臣之者非心説諫者,未必不激吕氏之怒也。夫漢初君臣,曰:「王陵廷争不從,則去其位。平自意復

誠心,不如是不足與有爲耳。後往者,非欲崇己以爲大也,蓋尊德樂道之而用之者也。 古之君子,必待上致敬盡禮而一子曰:士方在下,自進而干君,未有信

若唐之僖宗、昭宗是也,恬然不 諸 盤庚、周宣乎? 不勝其忿,起而 也,號令有所不行,德澤有所不下,威權 人君亦有屯乎?」子曰:「非謂 而不識所收,如魯昭公、高貴鄉公是也。 侯復朝焉,蓋 或謂:「《屯》之九五曰「屯其膏」, 驟正之,則致 修德 以道馴 用賢,追先王之政,而 致,不以暴爲之也。 凶之道。其惟 其 爲,至於屯 名位 然則 去己 有

極 則有亡 而 已。

其 人僞 日 心 古者直道 競生,是以不免耳 本自以 昔有 典選,其子當遷官,而固不之遷者 爲公,而 而行,於嫌 不 知乃 有 所以 所 不必 爲私 避,後世 也。 或

自

期

也,曾是之謂愛身乎?

其 人耳。 子 日 0 非 無時也,時 者人之所 爲, 蓋 無

者 求 伊尹、武侯救世之心非不切,必待禮 則 以 遇 在 己。 此 子曰 者,終必自失,非君子自重之道 . 道 擇 合而 才 後 而 進, 用,雖 得 Œ 在 前 則 吉 君; 矣。 以 身許 而 汲汲 也。 後出 國 故 以

爲 諂 諛之言 子 Ė 事 君 知人臣義無私交,則不爲 者,知人主不當自聖, 阳 則 黨 不

諸 ?」曰:「正終大事也,加君 或問: 臣 子 加 謚 於君父,當極 父以 其 不正之 美,有

者

謚 知 忠孝者不爲也。」

者當 愈 子 Ė: 勤 人臣之義,位愈高 饑則 爲用,飽則 飛 而思所以 去, 是 以 報

犬

郧

任 也 当。」子 其 責,安得謂之閑?」 或謂 日 : 禮 朝 廷 局 舉 設官,地 動有 清 違 而 禮 職 則 閑 禮 官 口 居

果深, 曰: 「忠不足取信,事 「介甫 或曰:「未有大臣 而有是言乎?」 自 知 之。 事待 其 於 如 求 自 介甫 去 明。」使 自 得 表 君 於 君者。」子 臣 上 之 日 契

子 日 君 貴明, 不 貴 察 臣 貴 Œ , 不

貴權

爲 身 而 而 重 子曰: 君子不輕天下而重其身,不 天下 0 凡爲其所當爲,不爲其所 輕 不 其

或問 孔 子事君盡禮,而人以 爲 諂。

子而 事 禮 與諂異矣,諂何疑於盡禮?」子曰 君 餡而已。 言,必曰 『小人以爲諂也』,孔子曰 『人以 者 於禮 聖人道大德宏,故其言如此。」 不能 盡 也 一,故以 譏聖人。 . 非 當 孔 時

E 日 勿復諱 餅 仁宗之世,宫嬪謂正月爲 以 兆人之上,處天下之尊,只懼怕人過爲崇奉, 南 二、以 ,此何義也?」 ,皆此類,天下至今以爲非。 生驕慢之心,此皆近習諂媚以 字,請隱之,子不聽。 子進 也。」翼日 諱 講至「南容三復白圭」,中侍謂講 之故, 孫覺 獨 無 講 地 講畢進 名可 曰「子畏於正」,子 初月,易蒸餅曰 稱 嫌名舊名,請 曰:「人君居 養之耳。 也,謂 畏於 昔 炊 至

献 辭 朝 畝之中 ,遂命以官,典西 曰:「上嗣位之初,方圖大治,首拔一人於 司馬 ·, 宜 温公、吕申 得 英材 都之教。 公、韓康公上子行義 ,使天下聳動, 子辭,不聽,又 知朝廷之 於

莫如 遽加擢. 則失 至京師 之明 義? 責其 所 則 後世 有所言焉。 筵之除。 命,非禮也。」既見于庭,又命之陛對,遂有講 矣,况如臣者,何足道哉?」又不聽,而召之 以其方,待之以其道,雖聖賢亦將爲陛 是以罔虞刑威,而必盡其説 急賢也。 難。 曰:「草萊之臣蒙召 周 以 望於今,而貽笑於後,可不謹 報 何 臣雖至愚,敢貪寵禄以 臣進對於頃刻之間 月 且 照四 任 觀 效,此天下之所觀 成王,其所以成德 子退 ? 今乃官使庸常之人,則天下 也? 今之用臣,蓋非常之舉,必將 使校讐館閣。 古之人君,守成業 方,充取 朝廷之舉何爲? 而 上疏曰:「知 臣 之心以求 而至,未見君,先受 子以 聽 ,陛下見臣何者 則 也。 速戾 由 人則哲,堯、舜 願陛 布 而 臣 乎 致盛 苟或 真賢,求之 哉 衣 於 之 周 下 ? 造 受 公。 廣 厥 何 不然, 治 朝 臣請 下 望? 知 躬 也 也 周 而 人 ? 何

心成。 公之 也。 言 靡 心之人,服飾器用,皆須朴實之物, 存畏謹之心。 節 爲益多矣。夫傳德義者,在乎防聞見之非 艱 容 士 則 間,接賢士大夫之時多,親寺人宦官之時 諫也,尤在涵養薰陶之而已矣。今夫一日之 [正言,左右前後皆正人,故習與性長 Ė 語 麗 難 燕 嗜慾之過; ,以侍勸 氣質自化,德器自成。 一日積 所謂 輔 不至於前,淺俗之言不入於耳。 語 不獨 調 今陛下 成 使勸 Ŧ 護聖躬,莫過乎此矣。 輔養之道,非謂告詔以言,過而 講 既久,自然通達,比之深處宫闈 也 講 講 漸磨德 幼幼 保 故左右近侍,宜選老成重厚小 春秋方富,輔養之道不可不 者知之,庶幾隨事箴規,應 身 讀既 而 體 習之,所 義,至於人情 者,在乎 罷,常留以備訪問,從 臣欲謹 見必 適 人君居崇高 起 物 E 選賢德之 居 態 事 凡 俾華 ,所 之宜 、化與 稼 動 少, 聞 時 作 巧 穡 後 至

> 至,而 何足以 志。 臣 可矣,必欲通于神明,光于四海, 然自古君臣道合,靡不由至誠感通,信以 行,自昔抱道之士,孰不願之? 云。 周公告成王,稱前王之德,以寅畏祗懼 自然滿假。 此,其成則中常之君無 方崇奉而所欲必得,苟非知道 之位,持威福之柄,百官畏懼 旁加收擇,期得出 知其不可 夫海 臣也道未行於室家,善未孚於鄉黨, 夫儒者得以經術進説於人君,言聽 姑善辭説於進退之間,爲一 動 宇至廣,賢俊非 人主之心乎? 此古今同患,治亂所 也。 是以 類之賢,寘諸左右,輔 欲進 不 驕 一人,願 苟 而思義 肆 不 而 畏義,所養如 莫 度 由也。 ●英明之主, 博謀 ,喜時 顧恨弗 敢 久而 文其 時之觀 仰 誠 無 之未 爲 所以 成聖 以 則 發 愧 則 萬 志 而

「其成」,涂刻本作「其惑可知」。

矣。

辭

不

獲

命,於是

服

勤

厥

職

夫性

朴

而

臣

於

斯

時

雖

以

不

才

而

辭

然許

國之心

已

親

奉玉

音

耀寘

經筵,事出

望外,惘然驚惕

拙

臣

之所

短也。

若

夫愛上之心,事上之禮

及於

朝

政。

陛

下

視臣

一, 豈

求進者哉?

既

意

於仕

也。進

至簾陛, 咫

尺

天光,未嘗

是以

奔走承

命,甫至闕庭之外,又有

館

師

之位

,不往所以

規其

、君也。

土

之毛而爲

王

民

八石而

爲

召

而

不往,子思、孟

軻

則

可,

蓋二人者處

體

求賢願治之心,搜揚巖穴,首及微

臣

除,方且表辭,遂蒙賜對。

臣於是時,尚

未

不至,則邦有常憲矣。 如臣微賤,食 不合, 職之 一言 萌 有 賓 以 仰 不 累 讀 而 能文宫人可 古今也。 世 起居 左右 以 書,其言常伯常任之尊,與綴衣虎賁之賤,同 之道爲必可行,勿狃 擴 就 長久之計, 平,不止於 躬行大道 告上之道 反覆,惟此 口,然後知周公誠 天下之事,誠 示 爲戒,要在 高世之見,以 幼 復知 出入無違禮也、發號施 ,侍御僕從,罔 主,莫備 此 夫 則莫若 因 開 則 此 以 得 事 循 於 不 不 納 備勸 謂 聖人之言爲必可信, 周 人,以 足 荷 忠言 敢 而 端 不我 人主 公, 르 輔 慮 安 不 匪 而 講 滯於近規,勿遷惑 養 而 盡 已,苟 爲知恤 爲 Œ 欺 就 委用 夫僕 已。 Ê 也。 而 知 萬世之法。 也。 學,所 德。 方今所 書 令無不善也 耆德 旦夕 臣 苟 陛 曰 内 者鮮 考之《立政》之 能 如 E 下 歷 侍 以 直 承 厥 觀 謂 心 是 H 미 也。 涉 存 弼 后 前 至 謹一日, 而 以 欲舉太 以 願 書 足, 古 急 至 充 史 克 終 於 先 陛 後 聖 衆 成 輔 則 王 下 爲

足,不

願仕

也。

及上嗣位,陛下臨朝,大臣

爲當

塗

者

薦

揚。

臣

於是時,

自顧

道

學之

求

道

爲

事

于,

兹幾三十年。

昔在

兩

朝

書太

后

日

臣

鄙人也,少不喜進取

以以

德

則

爲宗社

生

靈之福矣。」久之,意有

其故 益 沖宜 然也 導 在 辨言鑠於外,欲 爲之不豫,及乎稍長,私 者,日復一 已 帝 至美,自 日 能言而教之。 肅 手默坐,當講説 先,而 之幼 以 陳於前,盈 異於周 退。 王才質,鮮不過人,然完德有道之君至少, 何 丹朱傲游慢虐爲之戒,禹豈不知是也 爾 何必 . 哉? 也,智愚未有所主,則當以格言至論 者,不知本之論也。 如 臣 「無違 不憂其太早也。 公輔 此、雖彌年積歲、所益幾何也? 服 日,雖有讒説摇惑,不能人也。若 置官 職 皆輔 耳 道 是故大學之法,以豫爲先。 成王之道矣。 以 設 者竦立案傍,解釋數行 其 充腹,久自安習,若固有之 來,六侍 養 職 則 純 ,求賢德之士哉 尤非 全,不可得已。 不得其道,而 慮偏好生於内,衆 或又曰:聖上天資 也。 展 古之人,自能 御,但見諸 或以謂 莫聖於禹 勢位 ? 故 上方 則 所 使之 臣 自古 而 蓋 ? 急 幼 拱 口 食 亦 已

衰學 誠化 有 ? 後 泰 忘規 若使營營於職事,紛紛於心思,及至上 之則聲哀。 其誠意則不能感發。 職,比於輔導,則弗專矣。 動虞違謬, 而 懈於閑邪拂違之道乎? 長 以 主之志而樂於學也。 未六七年,乃欲治乾陽殿矣。 責 朋習之益至切。 矣 唐 而 體 也。 廢,世不得聞此言也久矣。 功於簡册,望化於頰舌,不亦淺 戒,爲慮至深遠也。 太宗之聰 ,其始也,惡 所以聖賢處崇高之位,當盛明之際,不 舒 今夫 ,然後有所悦懌。 一言之出,史必書之,非所以遜 誠意之人也,其於 睿 鐘,怒而擊之則 躬 隋煬帝之侈麗,毀其層觀 夫學悦 歷 凡侍講 古人以 艱 難 况幼 夫開發之道有方, 夫告 而後 今也前對大臣 讀 蒲 力平 人亦 聲武 沖之君,而 盧 於 入,宜使上心 人心奚常之 ,皆使兼 雖聞之,必 喻教,謂 人者,非 禍 猶 乎 亂 悲 是 視 而 年 積 口 以 他 亦

鑒采。 所學上沃帝聽,則聖人之道有可行之望,豈 笑之,以爲迂且誕也。 虞幸會,得備講説於人主之側。 度,方且區 聖學不傳,臣幸得之於遺經,不自 品 一駕 其 説 於學以示 陛下高 天下後世 識 誠使臣得 遠見,當蒙 不不 以 量

特臣之幸哉?」

移。 流 爲 則 心 於明,去邪勿疑,任賢勿貳 矣。」上曰:「定志之道何如?」子對曰:「正 分,曉然趨 日 必 多 誠意,擇善而固執之也。夫義理不先定, :「君道稽古正學,明善惡之歸,辨忠邪之 因 可法,不爲後世駁雜之政所牽滯,不爲 必也以聖人之訓爲必當從,以先王之治 聽 而後已也。 神宗首召伯淳,首訪致治之要。 循之論 而 易 道之至正,君志定而天下之治 惑,志意不先定,則 所遷改,信道 然患常生於忽微,而志 ,必期致治 極 於 篤 守善 自 如 子對 亦 知 而 三代 戒 成 極 或

> 曉曉,無復廉恥,蓋亦尊德樂義之風未孚,而 王猷 侍法從,朝夕延見,講磨治體 臣 訓 乎漸習。 法先王之治,體乾剛健 篤誠忠厚之化尚鬱也。 職,俾日 箴 願 尊禮老成,訪求儒學之士,不必勞以 諫 允塞矣。 親 左右前後,罔匪 故古之人君,雖從容燕閒 便座 今 四 講 海 論 靡 道義,又博 惟陛下稽聖人之訓 而力行之,則天下之 靡 Œ 日 人,輔 門則 益 睿智益 延俊彦,陪 偷 成 薄,末 ,必有誦 《德業。 明, 俗 官

上 陳 臺 下士?」上聳然曰:「朕不敢。」明道之未爲 上 上拱手前坐曰:「當 君道 始 諫 曰:「朕未之見也。」曰:「陛下奈何 疑其迂濶,而禮貌不少替也。 也,察荆 明道告神宗曰:「人主當防未萌之欲。」 以 至 誠仁愛爲本、未嘗 公已信用矣。 爲卿戒之。」因論 明 道 一言及 毎進1 日 見,必 功 人才。 輕 天 極

幸。」上嘉納焉

論 咨而公論壅遏,謂興利之臣日進而尚德之風 分之息,謂鬻祠 論大臣不同心,謂 合,令出有不便者,即論奏之,其尤有益,則 之福。」上益敬之。 何敢當 治道), 上 上不敢用,子遂以罪去 ?」明道愀 斂容謝 部 然曰: 度 小 日 荆公畫策寝行,子意多不 臣 牒 此 良民 預大計,謂青苗 「陛下此言,非天下 堯、 八爲僧 舜之事 謂 民 也 收二 情 怨 朕

非 塞 吾學未至,德未成也。 H 命哉?」 孟津,亦復可笑。 明 明 道 道 曰:「當是時,吾不能感動君心,顧 補 外官 入辭,上猶眷眷問 人力不勝,以至于今,豈 雖然,河濱之人捧土 政。 他

心性篇

劉安節問:「心有限量乎?」曰:「天下

物乎?」 道 道,則何限量之有? 必曰有限量,是性外有 命,在人爲 無性外之物,以有限量之形氣用之,不 一、安能 廣大其 性,所主爲心,實一道也。 心也? 心則 性 也,在 通 天 以 Ŧ. 爲 其

也。心無遠近。 子曰:耳目能視聽而不能遠者,氣有限

之氣。聽聲者知其資之善惡,善卜者知其人之氣。聽聲者知其資之善惡,善卜者知其人

不及性,則不明。子曰:論性而不及氣,則不備,論氣而

皆一貫耳。 形諸軌轍之間,非也。高明之極,軌轍之間,則一氣也。若曰高明之極,無形可見,必也則一氣也。若曰高明之極,無形可見,必也則一氣也。若曰高明之極,無形可見,必也

子曰: 見聞之知,乃物交而知,非德性

所知。德性所知,不待於聞見。

子之未知義,孟子爲知言? 也。孟子道性善,極本原而語之也。生之謂 性,其言是也。然人有人之性,物有物之性, 性,其言是也。然人有人之性,物有物之性, 也。孟子道性善,極本原而語之也。生之謂 也。孟子道性善,極本原而語之也。生之謂

則不返,非吸既往之氣而後爲呼也。於出人息氣見闔闢往來之理。呼氣既往,往之地也。造化不窮,蓋生氣也。近取諸身,子曰:凡物既散則盡,未有能復歸本原

之性,其用無窮則謂之神,一而已矣。體則謂之易,其理則謂之道,其命在人則謂子曰:上天之載,無聲無臭之可聞,其

乎?」子曰:「可自得之,而不可以言傳也。」或問:「性與天道,是誠不可得而聞

謂善言,子貢可謂善聽。」與天道矣,使其不聞,又安能言之? 夫子可他日謝良佐曰:「子貢即夫子之文章而知性

我,既已入於妄矣,將誰使之?」子曰:「心惟物之聽,何所往而不妄也?」或曰:「心在于曰:「人心必有所止,無止則聽於物,

乎外,制乎外所以養其中也。 子曰:視聽言動,身之用也。由中而應 實使之。」

於外所以安其中也,久則誠矣。於前,其中則遷。故視聽言動,必復於禮,制於前,其中則遷。故視聽言動,必復於禮,制子曰:心本至虚,必應物無迹也。蔽交

不 語性 言遇也。」或問:「命與遇異乎?」子曰:「 命同禀於性,遇其適然爾。 遇即命也。」曰:「長平死者四十萬,其命 ,可以言氣,行同報異,難 張子曰:「性 通 極 於無, 力行不 氣其 以 語 至,難以 命 物 可以 遇

| 二0六

人以爲是駭然耳,所見少也。」九州之人,同日而死也,則亦常事爾。世之齊乎?」子曰:「遇白起則命也。有如四海

曰:「其所言者才耳。」 或問:「韓文公、楊雄言性如何?」子

者, 則求一善性而易之, 可乎?」者, 蓋性之不善也。」子哂之曰:「謂性不善韓侍郎曰:「凡人視聽言動, 不免幻妄

曾身之不遑恤,非其性之盡也。身者,窮理而不盡性也。小人以一朝之忿,子曰:君子慮及天下後世,而不止乎一

外,不可以分語。 子曰:天人無二,不必以合言,性無内

有己則喜自私,私則萬殊,宜其難一也。子曰:理與心一,而人不能會爲一者,

子曰:氣質沉静,於受學爲易。

慾勝志者有矣,以義理勝氣者鮮矣。 子曰:志御氣則治,氣役志則亂。 人忿

之,則可乎?」
曰:「信斯言也,是物先有性,然後坤因而生敬也,成物之形而不可易,方外之義也。」子

子曰:言愈多,於道未必明,故言以子曰:動以人則妄,動以天則無妄。

簡

爲貴。

誠窮理,則性命皆在是。蓋立言之勢,不得也,至於命,聖人之事也。」子曰:「不然也。或曰:「窮理,智之事也;盡性,仁之事善,而以忠信爲本,是曰「先立乎其大者」也。子曰:不知性善,不可以言學,知性之

言善事於我之側而我聞之者,敬也,心主於 也。 子曰:有爲不善於我之側而我不見,有

曰:「豈其然乎? 或曰:「惟閉目静坐,爲可以養心。」子 有心於息慮,則思慮不可

也,呼而覺之,斯不蒙矣。 子曰:人之知識未嘗不全,其蒙者猶寐

耗,謂己有得,皆揣度而知之者也。 而 無不充悦者,實有得也,切切然心勞而氣 子曰:有得無得,於其心氣驗之:裕然

子曰: 所守不約,則泛然而無功。 約莫

如敬。

之,則存者亡矣。 子曰:守之必嚴,執之必定,少怠而縱

子曰:義理客氣,相爲消長者也。以其

之謂信。」

二程粹言卷之二

消長多寡,而君子小人之分,日以相遠矣。

子曰:公則同,私則異,同者天心也。 或問:「人有恥不能之心,可乎?」子

不可也。至於疾人之能,又大不可也。若夫 曰:「恥不能而爲之,可也,恥不能而隱之,

小道曲藝,雖不能焉,君子不恥也。」

「存天理也。天理未嘗亡,而庶民則亡之者 或問:「君子存之,何所存也?」子曰:

衆矣。」

1231

安,何也?」子曰:「無乃助之長歟?」

或問:「志乎道,而玩之不樂,居之不

而能不懼,處貧賤而能不變,視富貴 子曰:人奠不知命之不可遷也,臨 圃 能不 患難

敬,盡心之謂忠,存之於中之謂孚,見之於事 慕者,吾未見其人也。 或問敬忠孚信之别。子曰:「一心之謂

從也。慮而後動者,猶以物取物,有中有不從也。慮而後動者,猶以物取物,有中有不子曰:自得而動者,猶以手舉物,無不

齊也。」曰:「性無不善,其偏蔽者,由氣禀清濁之不曰:「性無不善,其偏蔽者,由氣禀清濁之不或問:「人情本明,其有蔽,何也?」子

德,言性所有也。 子曰:德性云者,言性可貴也。性之

又何懼矣。知其妄而猶不免者,氣不充也,曰:「燭理不明也。明理則知所懼者皆妄,或問:「獨處夜行而多懼心,何也?」子

敬不足也。」

邪佞,無所不至,不仁孰甚焉!子曰:以私己爲心者,枉道拂理,謟曲

起,而謂禮樂一日亡,可乎? 統。道無本末精粗之别,洒掃應對,形而 者,以性命爲高遠,孝弟爲切近,而不知其 在,而未嘗亡也,則於窮神知化乎何有?」 不足道者也,必有總屬,必有聽 曰禮樂亡矣,然未嘗亡也。夫盗賊,人之至 命者,亦由之而弗知也。人見禮樂壞崩,則 者在焉。世豈無孝弟之人? 而不能盡 行,何以能盡性至命也?」子曰:「世之言道 知化,由通於禮樂。」劉安節問曰:「孝弟之 子曰:「盡性至命,必本於孝弟。 禮 順,然後能 樂 無 所 窮神 心 不 至 F

曰:「氣比之金可也,不可以比性。」或問:「性之成形,猶金之爲器歟?」子

忘則坐馳,有忘之心,是則思而

已矣。

子曰:未有不能

體道

而能

無思者,故

子曰: 言不足以得意,得意則言可忘

非心自得之,終非己物。

子曰: 泛乎其思之,不如守約。 思則

來,捨則去,思之弗熟也。

私也。」

也。 壞,則敬以復之耳。其不必治而修,則不 不全也。 而修,義也。 其全天德一也 子曰:天德云者,謂所受於天者,未嘗 苟無污壞,則 其必治而修,則治而修,亦義 直行之耳。 或 有 治 污

名之?」 者,性之動也,要歸之正而已,亦何得以不善 或問:「性善而情不善乎?」子曰:「情

而何易言也?」

才有善否,由氣禀有偏 養其氣以復其正,則才亦無不善矣。 子曰:受於天之謂性,禀於氣之謂才。 正也。性則無不善。

異?」子曰:「赤子之心,已發,發而去道未 或問:「赤子之心與聖人之心,何以

遠也。聖人之心,如明鏡如止水。」

之,發則意也。發而當,理 或問志意之别。子曰:「志自所存主言 也,發 而

子曰: 弘而不毅,則難立, 毅而不弘,

之憂喜,孟子不以爲僞,即是宜精思以得之, 可判之理,迪也疑焉。]子曰:「然則舜同象 則無以居之。 楊迪言於子曰:「心迹,固夫子以爲

無

亡矣。 死 不能不思,而欲灰 也。人者生物也,不能不動,而欲 爲有助也。 擾爲患,而今也求所以 m 已 子曰: 與叔昔者之學雜,故常 也。 夫養氣之道,非槁形 其從事 其 於敬 心; 虚 心灰而 mj 以直内, 所 静之,遂 形槁 灰 槁 以 心之謂 其 以 思 形; 慮紛 患 養氣 則 則

擇乎?」 者,彼亦不知其所循之序矣。 荀卿曰 "始乎爲士,終也爲聖」,其言是也,而 上天之載 「性者惡 雖然,其 游 日 也 可 序 , 禮者僞也」, 然則由士而聖人 循序 能 如 戒謹於不覩不聞之中 之何? 而 進 矣。」子曰 循之又如 可不深思 :「是則 何 而 也 謹 然 ? 則

分以應事物,雖不中不遠矣。 子曰:有能全體此心,學雖未盡,但隨

薄異也。 子曰:西北與東南,人材不同,氣之厚

乎事 無聲臭矣。 形 是放也,心則無存亡矣。」 體 ,則在 也,自操舍言之耳。夫心之所存,一主 或問:「心有存亡乎?」子曰:「以 其 此矣。」子因以 日 [放心者,謂心本善而流於不 目視 地 日 過則 心 無

子曰:佛者平居高談,自謂見性得盡,

所得也。 至其應物處事,則有惘然不知者,是實未盡

期中而自中矣。」
期中而自中矣。及其久也,喜怒哀樂之發,不也。」「然則何所據依,何以用功哉?」子曰:也。」子曰:「求則是有思也,思則是已發可也。」子曰:「求則是有思也,思則是已發或問:「有言求中於喜怒哀樂未發之前

欲,非必盤樂也,心有所向,無非欲也。子曰:不欲則不惑,惑者由有所欲也。

非所以言心也,惟敬以操之而已。」子曰:「莫知其鄉,何爲而求所寓? 有寓,或曰:「心未有所感之時,何所寓也?」

孟子欲正人心,息邪説。 之秉彝不可亡也。然亦惡其善惑人心,是以之秉彝不可亡也。然亦惡其善惑人心,是以

晬然達於外。 子曰:人必有仁義之心,然後仁義之氣

子曰:善惡云云者,猶杞柳之論也。

惡 混云者,猶湍水之説也

子曰 人性果惡耶,則聖人何爲能反其

性,以至於斯也?

子曰:命受於天。或者服餌致壽,是天

命 而 可增益 也

其 一身之窮通而 子曰:卜筮將以决疑也。今之人獨計 已,非惑夫?

真,雖有尾生之信,曾子之孝,吾弗貴也 惑,將流蕩而不知反,好惡失其宜,是非 人,力能行之,而識不足以知之,則有異端之 子曰: 君子 以 識 爲本,行次焉。 今有 亂 其

哉?」子曰:「有所事,乃有思也,無思 之,既以自累其心於不神矣,烏得 助長者,其入神之奥乎! 子厚曰:「必有事焉而勿正心,勿忘 孟子於是 流論 養氣之道,而未遽及 學者欲以 而 思 求 夫神 慮 則 之 勿 求 無

> 也。」子厚曰:「勿忘者,亦不捨其靈明,善 明?」「然則其能善乎?」子曰:「意必 既亡之後,必有事焉,此學者所宜盡 之耳。」子曰:「存不捨之心,安得 子曰:夜氣之所存者,良知 也 一,良能 心也。」 謂 之 固 也。 我 應

苟擴而充之,化旦畫之所梏,爲夜氣之所存

則欲 知反。 然後有以至於聖人也。 **慾誘之也。誘之而不知,則至於滅天理** 味,體則欲安,此皆有以使之也。 子曰:甚矣,慾之害人也! 人爲不善 故目則欲色,耳則欲聲,鼻則欲香,口

與性 之名者,以其所 也。舍而行之,是悖理而違道也。而世 者,必曰超然眇 子曰: 自性得者皆善也,而 施 之不 乎四端之外,是亦 同。 合而言之,一道 有仁義 一言道 不 禮

惟思爲能窒慾。

何以窒其慾?

曰思而已矣。

覺莫要於思,

丽

不

之過也。

其成形 須 者,心無目不能視,目無心不能識 子曰: ,水無波不害其爲水。 有一 物而 相離者, 如形 有兩 無影 物 也。 而 必 不 害 相

也,自溺於小而已,是故聖人閔之。 子曰:莫大於性。小人云者,非其性然

性也。

動也。性,猶置器日下,傾此於彼爾,日固未嘗性,猶置器日下,傾此於彼爾,日固未嘗子曰:人之性猶器,受光於日。佛氏言

不盡,其於知天難矣。
子曰:心具天德,心有不盡,則於天德

之道也。 子曰:真元之氣,氣所由生,外物之氣,不得以雜之,然必資物之氣而後可以養元氣,本一氣也。人居天地一氣之中,猶魚之氣,本一氣也。人居天地一氣之中,猶魚之不得以雜之,然必資物之氣而後可以養元

以死亡。而佛言有一物不亡而常存,能盗胎子曰:神與氣未嘗相離,不以生存,不

奪蔭,則無是理也。

性之德無僞慢,不免乎僞慢者,未嘗知其子曰:不誠不莊,而曰盡性者,無之。

者滯心於智識之間,故自見其小耳。有心小性大之説。聖人之心,與天爲一。或子曰:體會必以心。謂體會非心,於是

在於止而不行,未免於有是心也,故曰可以子曰:「無是四者,非仁而何? 原憲之問,或問:「克伐怨欲不行而非仁,何也?」

爲難而已。蓋將以起原憲之問而進之,而憲

不能也。」

之之道也。」
 一句:「必有事焉而勿正心,勿忘勿助長,乃存时:「必有事焉而勿正心,勿忘勿助長,乃存或問:「君子存之,如何其存也?」子

惟其有德者能之。

子曰:感而遂通,感非自外也。

子曰:退藏於密者,用之源也。

之謂也。一之,然後能執其中,中者極至一也。精之一之,然後能執其中,中者極至天理也,微而難得。惟其如是,所以貴於精天理也,微而難得。惟其如是,所以貴於精子曰。人心,私欲也,危而不安,道心,

也。有得於此者,樂則生,生則烏可已也?曰「必有事焉而勿正,心勿忘」,其意亦猶是下察也,此子思開示學者切要之語也。孟子下寫也,此子思開示學者切要之語也。孟子子曰:「鳶飛戾天,魚躍于淵」,言其上

而已。無得於此者,役役於見聞,知思爲機變之巧無得於此者,役役於見聞,知思爲機變之巧

謂其有差矣。天命可易乎? 然有可易者,微而觀之,未有不應者,自淺狹之所見,則也。天之應若影響然,得其應者常理也。致子曰:知命者達理也,受命者得其應

意深,可不戒乎!」 韓康公曰:「今有人頓然明盡者,子信 語?」子曰:「必也生而知之,然未之見也。 性,所以事天也。」言其至也。佛氏於陰陽生 性,所以事天也。」言其至也。佛氏於陰陽生 性,所以事天也。」言其至也。佛氏於陰陽生 型人無二致,可乎? 人才智愈明,其所陷溺 整人無二致,可乎? 人才智愈明,其所陷溺 整人無二致,可乎? 人才智愈明,其所陷溺

慊,則子厚所謂「有外之心,不足以合天子曰:學必知自慊之道,有一毫不自

心也。

則餒,無不義則浩然。子曰:率氣在志,養氣在直內;有私意

子曰:心活則周流無窮,而不滯於

隅。

其至,則一也。 斯與天地同體矣。莊敬持養,抑其次也,及 子曰:質之美者,一明即盡,濁滓渾化,

心不定也。」

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以下》,

《以

乎 如 如死 稿木。 子曰:「心盡 灰。 以 寂 形 滅湛静爲道者,其分遠矣。 盡 平,動 乎? 容周 智周萬 旋 物; 而 不盡 而不 乎 盡

累 定 牽己而從之,是以性爲有内外也。 於外 ,動亦定,無將迎,無内 張子 物 ,厚問 何 也?」子曰:「所謂 伯 淳曰:「定性未能不動,猶 外。 荷 以 定 性爲隨於 者 物 爲 外, 亦

應也。 喜,以 是反鑑 外 喜怒不繫於心 外之兩忘也。 自然。今以惡外物之心,而求照無物之地 道,其害在於是内而自私 東,生於西也。 來 絶外誘,而不 定,定則明,明則 則不能以有爲爲應迹,用智則不能以明覺爲 不可得而除也。 而 心普萬物而無 二本,則 7,則當: 丽 無 情。 順 物之當 人之情易發而難制者,惟怒爲甚。 應。 而 其在 又烏 故君子之學,莫若廓然而大公,物 索照 荷 外 可 知性之無内外也。 喜,聖人之怒,以物 也。 兩 而繫於物,聖人未嘗絕 心,聖人之常,以其情順 規 非其日之不足,顧其端無 時 語定哉? 人之情各有所蔽,故不能 忘,則澄然無事矣。 規於外誘之除,將見滅 何物之爲累 ,何者在内也 與其非外 也,用智也。 夫天地之常, 而是内 哉? ? 既 以内 是有 之當 ,不若内 聖人之 物 無 萬 以 外 而 事 自 意 則 私 於 爲 不 滴 其 於 事

見外誘之不足惡,而於道亦思過半矣。」 以方怒之時遽忘怒心,而觀理之是非,亦可

人 物

子曰: 萬物之始,氣化而已。 既形氣相

襌 ,則形化長而氣化消

子曰: 人以累物爲患,必以忘物爲賢,

其失一也。

子曰: 物 固 有是理,因而 充長之,不俟

子曰: 觀物理,於察己之理明,則無往

乎造爲,故曰「益長裕而不設」,設則僞矣。

而 不識 矣。

子曰: 君子循理,故常泰; 小人役於

物,故多憂戚。

之智愚,世之治亂,聖人必示以可易之道者, 子曰:時者,聖人之所不能爲也,而人

> 豈徒爲教哉? 蓋有其理也。

子曰: 物形有小大精粗之不同,神

而已。 子曰:物相人則相説,説則相人。

施 正爲貴。 焉。 君子之道,致説於民, 如天 説以 地之

有清介遠引,不屑世故者焉。孔子所謂志則 而保身者焉,有量能度分,安於不求者焉, 不偶,而高潔自守者焉,有知止足之戒,退 子曰: 君子之自尚, 蓋非一致: 有抱道

子曰:二氣五行,剛柔萬殊,聖人由

可者,進退合道者也。

理復其初也。

子曰:非仁 無以見天地

子曰:感慨殺身,常人之所易,處死生

之際,雍容就義,君子之所難。

子曰:觀物於静中,皆有春意

不 同焉。 同 子 者 曰 ,是隨俗習污而 不能大同者,是亂常拂 聖賢之處世,莫不於大同之中 己。 理 加 己, 不 有

子曰: 一行非所以名聖人。

己立 矣,則 子曰:有志之士,不以天下萬物撓 運天下,濟萬物,必有餘 裕

限量。 其 官而 之江 異,其受也不齊,而未有不滿者也。 知之所至而已。人有受一薦 無含容之氣,何也?」子曰:「識量狹也。 人之有量,天資也,君子之有量,學識 也。 滿 滿 海也,鐘鼎也,釜斛也,斗筲也,其 、與日月並明,故天地同量。 下此者,猶 或問"「凡人辨論,自直其説,求勝人而 猶 者 知道者量必宏,學而充之,則 鄧艾位登三公,年七十矣,其自處 ,推而上之,至於爲公輔 미 蔽 也,既不能 承,則 而滿者,有得一 必 而 盈 滿者,方 惟 亦 溢 隨 涯 道 不不 也。 聖 其 雖 無

矣哉!

所 傲者亦賢矣,亦爲富貴所 酒 之敗,不形喜色,及折屐齒,則心 亦善,及破蜀有功,則心 既 動,一也。 醉 而執禮愈恭者,雖賢 富貴公子折身過 動矣。 動也 於 於 顛 動矣。 謝 謙 沛 安聞 抑 而 視 有 苻 飲 酒 堅

至也。」 言之前,雖不言而人信之矣。不信者,誠不 之不聽,則當何如?」子曰:「誠意交孚於未 或問:「視朋友之過,不告則 不忠,善告

惟妻孥之牽,情慾之愛,能斷而 子曰: 匹夫悍卒,見難而能死者,多矣。 不惑者,鮮

小人也,勇於義者,君子也 子曰:勇一 也,而 用不同。 勇於 氣

立,爲氣所使故也。志勝氣,則一定而 廉, 老 劉 圃 安節問 貪。 何 :「人有少 爲其 然也?」子 加 勇,老 日 而 怯 不可 志 少而 不

미

有所

濟

變也。 志既堅,則雖死生之際,亦不爲之動,况老少 曾子易簀之際,其氣微可知也。惟其

之異乎?」

子曰:以己及物,仁也,推己及物,

恕也。

子曰:天下之聚,貴以正。聚不以正,

於人則爲苟合,於財則爲悖人。

之,非不宛然肖之,而欲觀生意之自然,則無 工也,賢人猶巧工也,剪綵以爲花,設色以畫 子曰:學者必識聖賢之體:聖人猶化

子曰:不以己待物,而以物待物,是謂

無我。

之也。

子曰: 聖 人之明猶日月,不可過也,過

則 不明矣。

子曰:一介之士,苟存心於愛物,亦必

殊, 有清濁,故有智愚之等。 子曰:氣之所鍾,有偏正,故有人物之

曰:「然。」「其所生也,無所從受,則氣之所 曰:「然。」「純氣爲人,繁氣爲物 劉安節問:「太古之時,人物同生。」子 乎?一子

化乎?」子曰:「然。」

者,變而不窮也。 子曰:物窮而不變,則無不易之理。易

於天地之間,至於暢茂,則塞意亡矣。 子曰:萬物始生也,鬱結未通,則 實塞

勵行,守之於爲乎! 子曰:哲人知幾,誠之於思乎! 順理則裕,而從 欲則 志士

危乎!

子曰: 君子之教人,或引之,或拒之,或

各因所虧者成之而已。

聖人未嘗有知,由問乃有知。」子 張子曰:「洪鐘未嘗有聲,由扣乃有聲。 Ė 謂

曰:「有不知則有知,無不知則無知,故曰聖人無知,則當不問之時,其猶木石乎?」張子

人未嘗有知,由問乃有知也。」

者,天吏也,大人則進乎此矣。」曰:「順天而行道者,天民也,順天而爲政时。「順天而行道者,天民也,順天而爲政或問。「天民與大人之道何以異?」子

也; 知義命,不爲也。 守,以自放 守正而 子曰: 君子處 於邪 難不 濫 解,則 ,雖使苟免,斯亦惡德也。 難,貴守正 命也。 遇難 而不知其 而 不 · 固 其 他

以 嫡子,母弟 同 母爲加親,是知母而不知父,非人道也。 子曰:先儒母弟之説,非 者謂 嫡 也,非 以 同 也。 母 爲 《禮》云立 加 親 也。

者也。而或以爲聖人有能有不能,非知聖人人者,自其尤盛而言之。尤盛者,見於所遇人者,自其尤盛而言之。尤盛者,見於所遇

子曰:厚責於吾所感,薄責於吾所應,

子曰:聖人責人緩而不迫,事惟君子能之。

Œ

則

已矣。

『他山之石,可以攻玉』?! 己,兢謹以遠其禍,則德益 困 辱之患,則如之何?」曰:「於 或問:「君子之與 小人處 進矣。 也, 《詩》不 是 必 而 有 能 侵 日 反 陵

子曰:人各親其親,然後能不獨親

其親。

君子常過於愛,小人常過於忍。子曰:君子常過於厚,小人常過於薄。

子曰: 欲利己者必損人,欲利財者必

斂怨。

子曰:聖人之心未嘗有,志亦無不在,可欲也哉? 殆亦昏棄無立之異名。

蓋其道合内外,體萬物。

静, 其在安静, 亦有至憂, 而未嘗勞也。子曰: 聖人之心, 雖當憂勞, 未嘗不安

子之間,不能盡其分者多矣。 子曰:萬物之理皆至足,而人於君臣父

子曰:無物無理,惟格物可以盡理。

或問:「聖人之道,其難知也?」子曰:

是言也,涵蓄無窮之旨,學者宜深思也。」阻人之進,蓋曰「未之思也,夫何遠之有」。「聖人未嘗言易以驕人之志,亦未嘗言難以

知覊靮之制在人,而不知覊靮之用本於馬子曰:覊靮以御馬,而不以制牛。人皆

也。聖人之化亦如之。

用,而未及乎物,猶無有也。子曰:君子之道,貴乎有成。有濟物之

子曰:聖人,天地之用也。子曰:天地萬物之理,●無獨必有對。

逃父棄家,毁絶倫類,獨處山林之下,乃以所人,是欲天下之人皆至於聖人之域也。佛氏子曰:聖人盡道,以其身之所行者教

輕所賤者施諸人,豈聖人君子之心哉?

者之虚實均而實勝也,意言數象亦然。

子曰:凡物有形,則聲色臭味具焉。

四

散也。 物生者氣聚也,物死者氣有形聲之理。物生者氣聚也,物死者氣子曰:夢之所接無形聲,而心所感通則

而困也。以處困,道無時而不可行也,不以蹇而蹇,困以處困,道無時而不可行也,不以蹇而蹇,困則有子曰:君子在蹇則有以處蹇,在困則有

失,事無不然者。故孔子贊之曰:「元者善善者。成而後有敗,興而後有衰,得而後有不子曰:元者物之先也。物之先,未有不

● 「物」,原無,據涂刻本補。

1110

之長也。」

子曰:凡人有己,必用才。聖人忘己,

何才之足言?

道也。」
 修德則無損,因禎祥而自恃則有害,是以不

之。」「聖人不道焉,何也?」曰:「因災異而

或問:「符瑞之事,有諸?」子曰:「有

人,物自物,其理昭矣。 人也,不能物物,則我爲物之物也。」夫人自人曰:堯夫云:「能物物,則我爲物之

亦可矣。也。然而精氣歸於天,形魄歸於地,謂之往也。然而精氣歸於天,形魄歸於地,謂之往子曰:合而生,非來也,盡而死,非往

則右仆,右扶之則左仆,欲其卓立中塗,不可子曰:與昧者語,如持掖醉人,左扶之

得也。

子曰:莊周言神人者,非也。聖而不可

於聖人一等也。

知,則不可得而名,故以神稱之,非謂神人加

之,思與叔不幸而蚤死,爲之隕涕 也。」予因善誌之。 既十有五年,閱 言如何?」子曰:「最後者善。」與 識,乃如是之不同也!」與叔曰:「夫三子之 用,吾是以歎之。」及語吕與叔曰:「人之器 人亡人得,可以一視,何歎可惜也?」子曰: 千錢,亦何足惜也?」又有曰:「水中囊中, 有謂子曰:「是誠 晨裝遺,●必涉水沉之矣。」子曰:「惜哉!」 六七人從予行。一日亡千錢,僕 則善矣,觀夫子之言,則見其 「人苟得之,則非亡矣。今廼墜諸水,則無 子嘗言:昔游乎雍、華之間,關 可惜也。」又有曰:「微哉 有 叔曰:「善 者曰:「非 體 故 而 西 編 無 學

● 「遺」下,涂刻本有「失」字。

則日新,不日 | 子曰:凡物參和交感則生,離散不

和

進者必日退,未有不進而不退者。惟聖人之

則死。

子曰: 君子之學, 必日進

道無進退,以其所造者極也。

子曰:聖人之言,其遠如天,若不可階

而升也,其近若地,則亦可以履而行也。

學,學而善思,然後可以適道。

子曰:

有求爲聖人之志

,然後可以

共

子曰:多權者害誠,好功者害義,取名

者賊心。

惟能物各付物,則無不可矣。 之所重者更互而見,此一事重,則此一事出。 子曰:萬物皆備於我。心與事遇,則内

耳。聖人無爲異於是。 子曰:爲有爲而以無爲爲之,是乃有爲

子曰:元氣會則生聖賢。

子曰: 君子之於義,猶小人之於利也,

子曰:聖人齊勿之心無窮,而力4唯其深喻,是以篤好。

不及。 子曰:聖人濟物之心無窮,而力或有所

焉。才卑者多不及,不及者殆且弛矣。 子曰:才高者多過,過則一出焉,一人

「非化也,克也。物無一定,盛衰相因,古之也。」或曰:「克則木化爲土而何?」子曰:生,新根既大,則舊根化矣。」子曰:「是克化焉。」子曰:「何以見之?」曰:「如木之の焉。」子曰:「何以見之?」曰:「如木之

備,然後生。猶五常一道也,無五則亦無道。氣也,其本一物耳。」子曰:「五物也。五物人以迭王言五行,盡之矣。」或曰:「五行一

然而既曰五矣,則不可渾而爲一也。」

子曰:物有本末,而本末非二道也。

日致曰位,非聖人不能言,子思蓋得之云爾。子曰:「致中和,天地位焉,萬物育焉」,

见见。 無一介累其心。蓋有一介存焉,未免乎私

子曰:聖人無私無我,故功高天下,而

《乎? 6而不尸其功,應物而見於彼,復何存於善子曰:聖人之心,如天地之造,生養萬

子曰:輕浮巧利之人,去仁遠矣。

子曰:天理無私。一人於私,雖欲善其

言行,皆非禮。

子曰:不履聖賢之行,則亦不能人其

閫奥。

子曰:不可爲而爲之,聖人無忘天下之

心也。

源之教也。

子曰:「隘與不恭,君子不由」,拔本塞

間,若不啻在己者,亦勞矣。 物至則醜,鏡何有美醜哉? 君子役物,小人物至則醜,鏡何有美醜哉? 君子役物,小人本無怒也。譬諸明鏡試懸,美物至則美,醜本無喜也。因是人有可怒則怒之,聖人之心子曰:因是人有可喜則喜之,聖人之心

自育,氣無不和,四靈何所不至? 此聖人修子曰:上下一於敬,則天地自位,萬物

心悟。子曰:爲惡之人,原於不知思,有思則

己以安百姓之道也。

子曰:物未嘗不齊也,强欲齊之者,非

曰天惟高耳,地惟厚耳,鬼神惟幽顯耳,是則

物 不齊也,汝自不齊耳。

習化其高也,况聖人至誠妙物之功乎! 子曰:上竿而戲者,自數尺至於百尺,

子曰:聖人一言,即全體用,不期然 而

然也。

子曰:人之所以爲人者,以有天理也。

天理之不存,則與禽獸何異矣?

矣。 頭蛇身者,信乎?」子曰:「謂之人,則無 或言其賦形之有肖焉,則可謂 或問:「於《傳》有言,太古之時人有 云 爾 是 4

厚,語其小,至於一草木所以如此者,皆窮 理之功也。 此合内外之道也。 子曰:物我一理,明此則盡彼,盡則 語其大,至天地之所以高 通

高 ,地之厚,鬼神之幽顯,必有所以然者。荷 子曰: 窮物理者, 窮其所以然也。 天之

> 子曰: 惟聖人凝然不動。

辭

而

已,尚何有哉?

子曰:惟聖人善通變。

子曰: 五行在天地之間,有 則具

有, 無

生出先後之次也。 有序不可也,然則精神魂魄意之五者爲序亦 或水火金木上之五者爲

不可也。

二程粹言卷之二

鳴

謝

本焕法師

《儒藏》精華編惠蒙善助,共襄斯文, 謹列如左,用伸謝忱。

壹佰萬元

北京大學《儒藏》編纂中心

本册責任編委本 册 審 稿 人

沙志利

